



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.274





Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.274



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.274



2 Q.3 1.3.274



XXXVIII

ZEN.


POG.


VAR

SIG. V. Nicol.


ALB











VITA B. MEM.  
NICOLAI ALBER-  
GATI CARTHVSIANI, EPI-  
SCOPI BONONIENSIS, S. R. E. TIT. S. CRVCIS  
CARDINALIS, ET SVMMI POENITENTIARII,

CONSCRIPTA OLIM  
*A TRIBVS CELEBERRIMIS VIRIS,*  
*Jacobo Zeno, Poggio Florentino, &*  
*Carolo Sigonio;*

NVNC AVTEM ADDITIS SEPTENDECIM CELE-  
BRIVM SCRIPTORVM, QVI EIVSDEM CVM SANCTITATIS  
laude meminerunt, testimonijs, in lucem edita

P E R  
F. GEORGIVM GARNEFELT CARTHVSIANVM  
*Coloniensem.*

ACCESSIT ETIAM TESTIMONII LOCO  
HISTORIA DE IMAGINE B. M. VIRGINIS, A S.  
LVCA DEPICTA, ET IN MONTE GVARDIAE PROPE  
Bononiam miraculis coruscante,

AVCTORE ASCANIO PERSIO.



COLONIAE AGRIPPINAE,  
Apud IOANNEM KINCHIVM, sub Monocerote.  
Anno M. DC. XVIII.

*Superiorum Permissu.*



## CENSURA.

**L**iber hic, qui exhibet Lectori res sancte & praeclare gestas B. Nicolai Albergati Carthusiani, ac Episcopi Bononiensis, Cardinalis tit. S. Crucis in Hierusalem, à diversis ijsq; celeberrimis auctoribus scriptas, ac à R. D. F. Georgio Carthusiano Coloniensi collectas, cum adiuncta Historia de S. Imagine Deiparae Virginis à S. Luca depicta, & ad Montem Guardia prope Bononiam aservata, autore Ascanio Persio, nihil habet, quod sana doctrina, aut bonis moribus aduersetur; quin potius omnibus cum B. Nicolao in pari dignitate constitutis, viuum Episcopalis functionis exemplar exhibet, & omnes Christi fideles ad debitam Deiparae Virginis venerationem imitat. Quare dignus est, qui ad multorum profectum typis mandetur. In quorum fidem (postquam ad petitionem admodum R. P. F. Cosmae Morelli, SS. Theologiae Professoris & Inquisitoris Apostolici hunc librum legissem) censuram hanc manu propria subscripsi, Coloniae Anno 1618. die 22. Maij.

Theodorus Geuelfbergh SS. Theolog. D.

Pastor B. Mariae ad Indulgentias.





ILLVSTRISSIMO  
AC REVERENDISSIMO

DOMINO,

D. SCIPIONI S. R. E. CARDINALI

BORGHESIO, GERMANIAE PROTECTORI,

*Et summo Pœnitentiaro.*

**S**olent Ill.<sup>me</sup> ac R.<sup>me</sup> Princeps singula ferè cuiusque corporis membra ex instinctu quodam naturæ pro capite suo conseruando tuendoque ita sollicita atque anxiosa esse, vt pericula, non leuia etiam, promptissimè quandoque subeant.

Et quidem, vt cætera animantia præteream, de serpentibus ex SS. Patribus tradunt nonnulli, quòd non solum pugnautes corpus protendant, ac percutiendum exhibeant, quò caput illæsum conseruent; sed dormituri etiam ingy

S. Aug. lib.  
4. ex Mat  
2. de  
off. Christ.  
10.



rum illud contrahant, eoq; tanquā val-  
lo caput circumdent, contraq; imminē-  
tia pericula, quo possunt modo, sepiāt.

*Matt. ca. 10.*

*Heb. 13.  
1. Thess. 5.  
Ad Tit. 3.*

Horū cūm prudētiam discipulis suis,  
adeoq; nobis Christus Dominus dicta  
de causa imitandam proposuerit, certē  
cuncti Christi fideles, mystici corporis  
membra suū quoq; spirituale caput ab  
omni violentia, iniuriaq; vt defendant  
ac vindicent, neruis omnibus viribusq;  
cōtendere debent. Hoc etenim cūm vi-  
gilet pro illis, præsītq; in Domino, me-  
ritō & mēbra abundantius in charitate  
habere, dictis eius, imō & nutib<sup>9</sup> obedi-  
re, & ad omne opus bonū, quod ad ho-  
norē, defensionemq; capitis facere pos-  
sit, parata esse debent. Quapropter cūm  
afflictis hisce temporibus cōmune om-  
nium nostrū Ecclesiæ Catholicæ caput,  
eiusq; visibilis Rector Christi Vicarius  
grauiter impugnetur, Petriq; nauicula  
horrendis vndiq; ventorū turbinibus,  
sæuisq; maris procellis à Nouatoribus

passim



passim excitatis cōcutiatur, facere non possumus, quin tāquam membra, quiq; in eadē versetur naui, paribus periculis expositi, pro virili quisq; sua capitis ac naucleri nostri, sine quo periclitatur naus, salutem tueri ac propugnare studeamus.

Id quod nūc prācipuē requirit sēuitia, ac canina rabies nouissimi cuiusdā Apostatæ, qui virulentiùs ac perfrictā magis prē ceteris frōte in Ecclesię caput eiusq; mēbra prācipua, sacrū Cardināliū Collegium, & religiosos viros inuehitur sequitq; nec aliud machinatur, q̃ vt totam Hierarchiā Ecclesiasticā, velut castrorū aciem ordinatā subuertat.

Et licet tam huius, quā ceterorū hæreticorū errores plurimi Catholicorū ex ipsis fidei principijs, & aliūde deductis argumentis egregiē cōfutauerint, & exploierint; quoniā tamen vtile est, iuxta S. Aug. plures à pluribus cōtra hæreticos fieri libros, diuerso stylo, nō diuersā

Marcus Anton. olim Archiepiscopus Spalatensis.

1. de Trin. cap. 3.



fide, ideò nō abs re visum fuit etiam in medium prolatis exemplis, quæ nō minus sæpè, quā rationes momenti habere solēt, eosdem impugnare. Exempla aut ad rem præsentem magis apposita meo iudicio sumi non potuerūt, quàm insignium virorū sanctitatis splendore fulgentiū, qui præteritis sæculis eadē, quæ nos dogmata fidenq; tenuerūt, & eiusdem etiā ordinis ac dignitatis fuerunt, cuius sunt illi, qui modò impugnantur, ac traducuntur. Etenim futurum cōfido, vt qui viuā voce præclarisq; gestis multa pro S. Sede eiusq; mēbris præstiterūt, iidem etiā post dormitionem suam nō minora exulceratissimis hisce tēporibus exemplo suo, cōmuniq; sanctitatis famā, ac nomine Sampsonis instar, qui plures moriens quàm viuens inimicos prostrauit, sint effecturi.

Iudic. 16.

Apertissimè enim sancti illi Nouatores nostros coarguūt mēdacij, insigniaq; ac perpetua contra eosdem erigunt tro-

phæa



DEDICATORIA.

pheā, qui nescio quā non malè sanam  
ex cerebro suo procudant doctrinam,  
quibusq; nō iniurijs ac maledictis S. Se-  
dem Apostolicā, Cardinaliū Collegiū,  
virosq; religiosos proscindāt ac lacerēt.

Possent quidem exēpla plura præcla-  
rorum virorum ex ampliss. Cardinaliū  
Collegio in medium proferri, sed quo-  
niam ego Carthusiani ordinis debitor ē  
me agnosco, cui ante omnia etiā seruire  
cupio, idcirco præstātissimi imprimis  
ac pij Cardinalis Nicolai Albergati quō-  
dam Carthusiani memoriam ē tenebris  
eruere, & in lucem producere cōstitui,  
præsertim cū tam heroicæ huius viri  
sint virtutes fortiaque facta, vt similia  
passim in alijs nō reperiātur. Imprimis  
etenim viu<sup>9</sup> sanctitate vitæ, & erga S. Se-  
dem Apostolicam observatiā nulli fuit  
secundus, vti labores pro illa exantlati  
(præcipuè in octo legationib<sup>9</sup>, quas sum-  
ma cū laude obiuit) & quatuor summi  
Pontifices luculentissimè testantur. de-

inde



EPISTOLA

Nicolaus V.  
& Pius II.  
Iesse Sigo-  
nio, Boetio,  
& Platina.

inde ita se virtus eius in contubernium diffudit, ut multi egregij viri ex eo, precipue verò duo summi Pontifices prodierint; postremò post mortem ea sanctitatis de ipso sparsa est fama in Romana Curia, ut ipsemet Eugenius IV. Pontifex Romanus eam per motus, exequijs illius nouo exemplo interesse voluerit.

Ita ut ex vita sancti huius viri, tamquam ex diuino quodam fonte virtutum aquis abundante ac scaturiente pro sua quisque necessitate haurire possit. Hinc spiritu feruētes, unde magis feruescāt, & inflāmentur; tepidi, unde incalescant; duri, unde salubriter cōpungantur; hæretici, si modò solitas & heroicæ tanti viri virtutes cōtemplari velint, unde cōfundantur; Catholici, unde cōfirmētur, habere queunt.

In hac Legati summorum Pontificum, Cardinales, Episcopi, & Monachi (singulos .n. hosce gradus trāscurrit, eorumque munia sanctè & exemplariter obuiat) oēs denique mortales reperire possunt,

quod



quod sibi imitandum proponant.

Nec mirū videatur, quòd ex Carthufiana solitudine huiuscemodi lucubrationes prodeāt; cū quotquot in ea degunt, libenter sese illius in terra capitis mēbra fateantur, pro eoq; quod possūt, quodq; tenentur, præstare percupiant: quāquam etiam cōgregatio nostra, quò amplioribus gratijs & priuilegijs à Sede Apostolica est honorata, eò & libentius ac promptius pro ea laborare ac infundare debeat, exemplo venerabilis nostri P. Suriij, qui quiete suā & contēplatione non nihil postpositā, ad Nouatores cōfundēdos illisq; ostendendū, quales paret viros S. Mater Ecclesia (quæ Rom. paret Pont.) quosq; fratres & confortes habeamus (qualibus aduersarij carēt) calamum arripuit, SS. vitas gesta q; fortia conscripsit, collegit, & in lucem edidit.

Fecerunt hoc idem ante ipsū sanctissimiviri, quā verbo, quā scripto, vt in oriente Eremitarū decus ac Magister Io-

annes



a Eudg. li. 2  
e. 10. & Ni  
ceph. li. 1. c.  
22. Sur. 11.  
Dec.  
b Theod. in  
Philet. ca. 2.  
& S. & Bar.  
ann. 370.

annes Baptista, Antonius, Basilius, Si-  
meon & Daniel <sup>a</sup> Stylita, & <sup>b</sup> Aphraata,  
quorū postremus interrogatus à Valē-  
te Imp. quid Monachus ageret in publi-  
co, sapienter respondit se ad commune  
incendium extinguedum prodijisse. In  
occidente verò plurimi, inter ceteros S.  
Bernardus, Thomas Aquinas, Antoni⁹  
de Padua, alijq; qui scientes tempus lo-  
quendi, & tempus tacendi, aliquādo cū  
Moyse mōtis summitatem ascenderūt,  
vt cum Deo loquerentur, remoti ab ho-  
minibus; aliquando verò Deū pro Deo  
relinquentes, cum eodem de monte de-  
scenderunt proximis opem allaturi.

His itaque rationibus quasi funda-  
mētis subnixus cum opusculo hoc, seu  
vita B. Nicolai Albergati à tribus prae-  
stātissimis ac fidelissimis viris olim cō-  
scripta, adiunctis per me viginti facile  
celebrium auctorum testimonijs, qui  
eiusdem cū sanctitatis laude memine-  
rūt, in lucem prodeco, illudq; Ill. <sup>mae</sup> Cels.

V. vt



DEDICATORIA.

V. vt cui multis id nominib<sup>9</sup> debeatur, offero, dedicoq<sup>;</sup>. Potuiffem quidem eā alicui ex eadem familia tanquam de ordine noſtro bene merito dicare; verūm penitiūſ mihi rem conſideranti viſum fuit, non alteri, quā Germaniæ Protectori à Germano pro Germania viciniſque regionib<sup>9</sup> ſuſceptos deberi labores.

Accedit quòd vita geſtaq<sup>;</sup> Cardinalis, Episcopi Bononien. Summi Pœnitentiarij, & acerrimi Sedis Apoſtolicæ, & Curie Rom. defenſoris, viciffim Cardinali, olim Episcopo Bononiēſi, ſummo Pœnitentiaro, & indefeſſo labore pro Eccleſia Dei deſudanti iure merito cōmendanda viderentur.

Vt igitur C. V. hunc meum laborem æqui boniq<sup>;</sup> conſulere, exiguū hoc munus beueuolo animo ſuſcipere, ordinēque noſtrum, & præfertim Carthuſiam Colonien. vniuerſamque Germaniam ſibi commendatam habere dignetur, etiam atque etiam rogo.



EPISTOLA DEDICATORIA.

Gratia D.N. Iesu Christi Ill.<sup>ma</sup> Cels. V.  
multis annis incolumem seruet, ad Ec-  
clesiæ suæ & Germaniæ nostræ honorē  
ac defensionem, perducatur tandem  
ad ineffabilia gaudia patriæ coelestis, A-  
men.

Ita ex totis animi medullis precor &  
opto, omnesq; mecum, qui hic in Chri-  
sto sunt, fratres, Coloniae Vbiorum, ex  
Carthusia anno salutis M. DC. XIIX.

*Ill.<sup>ma</sup> & R.<sup>ma</sup> Cels.<sup>nis</sup> V.<sup>ra</sup>*

*humillimus ac deuotissimus  
in Christo seruus*

F. GEORG. GARNEFELT.

• BENE-



# BENEVOLO LECTORI

F. G. GARNEFELT ORDINIS  
CARTHYSIANI.



*Cogitanti mihi vitas quorundam nostri Ordinis sancti-  
tatis nomine celebrium virorum, quae haecenus ferè la-  
tuerunt, in lucem producere, prima se obtulit vita B.  
Nicolai Albergati, viri Ordinis nostri ante centum se-  
ptuaginta quinq; annos defuncti sanctissimi: prima in-  
quam, & quidem valde appositè.*

*Cum enim vir ille, ut doctrina, & dignitate (ex monacho enim fa-  
ctus est Episcopus Bononiensis, dein S. R. E. Cardinalis, mox summus  
Pœnitentiarius) rebus q; praeclare gestis; ita & vita integritate ac san-  
ctitate, (ut de tempore sileam) facile fuerit primus, non immeritò vita  
eius inter eas, quas in publicum dare constitui, primum occupat locum.  
Quamuis serò ac tardè satis super q; prodeat. Nam si Petrus Damianus  
S. R. E. Cardinalis doctrinâ & sanctitate insignis conquestus legitur,  
quòd tribus ferè lustris nemo extitisset, qui S. Romualdi vitam posteri-  
tati commendasset, an non potiore quis iure conqueratur, quòd per tri-  
ginta quinq; ferme lustra nullus fuerit, qui vitam huius viri à coevis  
conscriptam, & haecenus inter priuatos parietes conseruatam, typis  
vulgaris curauerit?*

*Idigitur dum facio, operam meam nec inutilem, nec ingratam tibi  
Opt. Lector futuram spero.*

*Quò autem unico quasi intuitu videas, quid ea tibi conferat, sum-  
matim, quae hoc opusculò continentur, subjicere placuit. sunt autem haec.*

*PRIMO, vita dicti B. Nicolai, uti eam (nisi quòd per me in capita sit  
distincta,) ante annos 150. & amplius conscripsit Iacobus Zenus Episco-  
pus Feltrensis B. viro coetaneus & familiaris.*

*SECUNDO, Oratio in funere B. viri habita per Poggium Florenti-  
num Oratorem facundissimum: De qua uti & de Zeno agit Trithe-  
mius de Script. Eccl.*

*TERTIO, vita eiusdem B. Nicolai, prout eam antiquis monumentis  
adiutus composuit Carolus Sigonius, qui floruit anno Domini 1570. de  
quo Possennus.*

*Vide an-  
notationes  
nostras vi-  
ae à Zeno  
scrip-  
tæ ubiunctas.*



# PRAEFATIO

QUARTO praeclarata testimonia de virtute, prudentia, sanctimonia-  
que B. Nicolai ex varijs celebribus auctoribus deprompta, quorum pri-  
mus est.

1. Franciscus Philelphus eques auratus & poeta insignis B. viro  
synchronos.
2. Blondus Flavius Secretarius Apostolicus, & historiographus  
excellens, item synchronos.
3. Aeneas Syluius B. viri quondam alumnus, & postea Rom. Pont.  
dictus Pius II.
4. S. Antoninus Archiepiscopus Florentinus, qui cum B. Ni-  
colao interfuit Concilio Florentino.
5. Baprista, alias Bartholomæus Platina Apostolicus Abbrenia-  
tor, qui floruit anno 1470. De hisce quinq; vide Trithemium de Script.
6. Paulus Aemylius historiographus Francorum, qui floruit anno  
1520.
7. Polydorus Vergilius Anglicarum rerum scriptor, qui floruit  
anno 1499.
8. Onuphrius Panuinus rerum antiquarum indagator solertissi-  
mus, qui floruit anno 1566.
9. Ioannes Nauclerus Praepositus Tubingen.
10. Arnoldus Bostius Carmelita Gandensis, qui floruit anno 1494.  
de quo Trithemius.
11. Petrus Dorlandus Carthusiae Diestensis in Brabantia Prior, qui  
floruit anno 1500.
12. Petrus Sutor S. Theolog. Doctor & Prior Carthusiae Parisiensis,  
qui floruit anno 1530.
13. Carolus Sigonius in opere de Episcopis Bononiensibus.
14. Alphonsus Ciaconus Dominicanus, qui floruit anno 1590. Ita  
Possennus.
15. Nomenclator quidam anonymus Tolosa impressus anno  
1614.
16. Vizanus seu Villanus aut Vigianus Italus, qui Italicè scripsit.
17. Ascanius Persius in historia de imagine B. Mariae Virginis à  
S. Luca depicta, & in monte Guardia prope Bononiam miraculis coru-  
scante, ex quo quidem testimonium solum ad B. Nicolaum spectans non  
excerpsit, sed, quia historia brevis est, nec Lectoribus, praesertim Dei ma-

tris



AD LECTOREM.

*tris cultoribus, ut arbitror, ingrata futura, eam bonâ fortunâ acceptam integram dedi.*

Appendicis loco adiunxi.

1. Tabulam chronologicam *de vita B. Nicolai, quæ servit loco Indicis.*

2. Cardinales quosdam sanctitate conspicuos.

3. Synopsin Sanctorum Ordinis Carthusiani.

*Omnia ad honorem Dei, & publicam utilitatem; nec enim alia de causa hic à me susceptus est labor; quem si probari cognouero, aliorum insuper Sanctorum Carthusiani Ordinis vitas, quas etiamnum paratas habeo, propediem Deo fauente typis vulgandas tradam; inprimis autem vitam*

*S. Anthelmi Episcopi Bellicensis,*

*S. Hugonis Episcopi Lincolnensis,*

*B. Stephani Episcopi Diensis, & aliorum nostri Ordinis.*


*Salue & vale opt. Lector.*

















V I T A  
ILLVSTRISS.<sup>mi</sup> AC REVE-  
RENDISSIMI PATRIS

BEATI NICOLAI ALBERGATI,  
ORDINIS CARTHUSIANI, S. R. E. TIT.


S. Crucis Cardinalis,

GRAVITER, DOCTE, ELEGANTER CONSCRIPTA A  
R. D. IACOBO ZENO, Episcopo Feltrensi ac Bellunensi.

Ad Reuerendissimum D. D. PETRUM BARBVM Venetum, Tit.  
S. Marci Presbyterum Cardinalem, &c.

Quae nunc tandem post annos 150. publicis typis publici boni amore euulga-  
tur à F. G. G. C.

PRAEFATIO AVTHORIS.

 VANTAM vim Virtus, vel opinio fidesq. virtutis apud  
potissimum bene institutum animum habeat, R.<sup>mc</sup> Pa-  
ter, etsi pleraq. alia documento sint; ex hoc tamen vel ma-  
ximè intelligi posse mecum ipse saepenumero cogitans a-  
nimaduerti, quòd ita homines ad amorem alliciat, bene-  
uolentià, admiratione q. deuinciat, ut illos, qui quoquo  
pacto eà pradii forent, non amare solum, sed colere, ac venerari, atq.  
etiam admirari ingenito nobis quasi quodà iure natura ferè necessario  
compellamur. Tanta enim auctoritas, tanta dignitas, tanta suauitas, &  
pulchritudo est, ut tamen si corporeis illam oculis cernere non liceat,  
mente tamen & animo in ijs ipsis humanis corporibus, quasi in vasis  
quibusdam & officinis, non sine iucunditate cõtemplemur, eos q. & ve-  
neratione, & honore dignos, & bene meritos censeamus, quos illam se-  
qui, & amplexari iudicauerimus. Hoc cum saepè aliàs & ratione & ex-  
perimento didicerã, Reuerendissime Pater, tamen maximè omnium co-  
potissimum tempore, cum persoluto studiorum laborumq. meorum cur-  
su, ad quæ penè puer accesseram, ad felicitis recordationis Eugenium  
quartum summum Pontificem, Auunculum tuum per id temporis Flo-  
rentia confidentem adolescens me contuli. Cum enim quamplurimos  
præstâtissimos patres, quorũ quidã ad meliorẽ vitam euocati sunt, qui-

Cicero de A-  
micitiã, Ni-  
hil, inquit,  
virtute a-  
mabilius,  
nihil est  
quod ma-  
gis alliciat

A

dum



homines ad  
diligendū:  
quippe cū  
propter vir-  
tutē & pro-  
bitatem eos  
etiam, quos  
nunquam  
vidimus,  
diligamus.

dam adhuc & in humanis nobiscum agunt, eo in loco apud Pontificem comperissem, inter omnes tamen pia semper & celebranda memoria Nicolai illum sanctae crucis Cardinalem, ita propter summam virtutis & sanctitatis opinionem, singulari & praecipua quadam sum observantia & veneratione complexus, ut me illi totum non deuotissime dedicare non possem. Sic enim, ut praeclare nosti, vir ille Deo plenus, quassplendor omnis virtutis & sanctimonia praefulgebat, ut decus & ornamentum Ecclesiastici ordinis, & cleri totius esse meritò videretur. Neque profectò omnium, quae ad virtutem & sanctam exemplaremque vitam attineant, dici quicquam, aut excogitari poterat, quod non esset in eo accumulata congestum. Religio, fides, pietas, doctrina, integritas humanitas, prudentia, sanctimonia, charitas, patientia omnia sese catervatim effuderant, & in Nicolai animam, tanquam in vase purissimo & electissimo collocarant. Quam verò ipse virtutis feruens Zelator esset, hominumque illam excolitum indefessus fautor & amator, Ecclesiae, Pontificis Ecclesiasticaeque salutis validissimus clypeus, & propugnator existeret, quis facile verbis poterit explicare? Itaque meritò tanti nominis, tantae apud omnes auctoritatis erat, ut nihil dignius, quam de sua vitam, sanctitate, virtute per uniuersum terrarum orbem pradicari & celebrari posset. Neque enim Christianos modò populos eius laudis, nominis, gloria fama compleuerat, sed ad barbaras etiā & exterarum gentilescum nationes illius vera, solidaque virtutis vox, & constans opinio penetrarat. Quanti verò illum praestantissimus Pontifex faceret, quanti Patres existimarent, quantum uniuersa curia coleret, ac veneraretur, quis ignorat? Cum nihil pretiosius in omnium posset ore versari Sancti Nicolai nomine; potissimum autem inter reliquos animaduerti te maximè omnium, Reuerendissime Pater, pro optimam & excellenti naturam tuam, innotatamque tibi & ingentem humanitate ac pietate praestantissimum illum Patrem usque adeo amare, colere, obseruare ac etiam venerari solitum, ut tamen si dignitate illi esses, & officio par, (quippe quem Eugenius Pontifex iam ad Cardineum apicem bene merentem extulerat) tu tamen illum, ut parentem unicum summam veneratione complexus, ipsius virtutes imitari, laudes verò celebrare, satiari non posses. Quae cum ita essent, ego & illius singulari virtute, & tuo etiam non mediocriter prouocatus & pelleretis exemplo, eum in modum ipsius Nicolai patris Patris memoriam ex eo tempore quasi adamantino clauo cordi semper infixam & insitam

b Contigit  
hoc ann.  
1440. iuxta  
Onuphriū.

geſſi



gesti, ut etiam post illius obitum meo nunquam ex pectore Nicolaus ex-  
 cesserit: accessit ad hoc quoque familiaritas non vulgaris, quae mihi ali-  
 quamdiu cum Thomae Theologo praestantissimo fuit, quo cum officij publi-  
 ci ratione & opinione virtutis sum diutius benevolentissimè conuer-  
 satus: me siquidem, ut bene nosti, (cum auctor eius rei, ut reliquorum ho-  
 norum meorum fueris) Eugenius Pontifex te directore & suatore in  
 Subdiaconatus officio, quod per ea tempora dignius habebatur, Colle-  
 gam illi, & comitem dederat. Is enim Thomas (qui ab ineunte aetate, &  
 teneris vnguiculis apud Nicolaum ipsum nutritus & educatus, secre-  
 torum omnium particeps, & conscius erat) assiduarum commemorati-  
 one & praedicatione virtutum, me in illius dedicatissimam observan-  
 tiam non confirmavit solum, verum etiam vehementer adauxit. Nam  
 sic ille mihi eius vitam, mores, res gestas, serius explicabat, ut neque  
 ipse dicendo, neque ego audiendo defatigari & satiari possemus, nullaque fe-  
 rere prateriret dies, in qua de Nicolai sanctimoniâ à nobis studiosissimus  
 sermo non fieret, adeo pariter pietate & observantiâ certabamus. Et  
 quoniam hominis memoriâ labilem & infirmam esse sciebam, tam pra-  
 claram verò excellentium rerum cognitionem oblitterari & obliuione  
 deleri prorsus indignum existimabam, operam studiosam adhibui, ut  
 quae ab eo de Nicolai vitâ & moribus accepissem, literis commendarem,  
 ut saltem apud me praesentia & recentia semper Nicolai praecleara mo-  
 numenta vigerent, in eum modum breui effectum est, ut omnium ferè,  
 quaecumque de Nicolao memoratu digna referri possent, recens apud me  
 cognitio foret. Itaque cum mecum ipse saepenumero, & alias antea, & hoc  
 potissimum tempore, hac ipsa à me de Nicolai vitâ rebusque gestis perscri-  
 pta, non sine ingenti fructu ac summâ iucunditate perlegerem, & saepe  
 quoque veniret in mentem, quantum tu illi deuotissimus & dedicatissi-  
 mus extitisses, rem tibi gratam fore putavi, Reuerendissime Pater, si  
 ea tibi etiâ efficerem redderemque communia, ne solus ea voluptate frue-  
 rer, quae tibi quoque omni iure & officio deberetur. Quamobrem singula  
 quaeque, ut mihi à Thoma relata sunt, ordine digesta studiosius enarraui,  
 & ad te, qui viuum tantâ pietate & observantiâ coluisses, meritò quo-  
 que deditanda censui. Eo enim tibi etiam gratiora fore arbitratus sum,  
 quod haec à Thoma ipso, qui tanta te pietate & charitate Pontifex de-  
 hinc Maximus complexus est, cuius insignis apud te potissimum Ponti-  
 ficis auctoritas valuit, quasi à secundissimo fonte manarint, ita ut

Hic est  
 Thomas  
 Sarzanus  
 dictus po-  
 ftea in Pō-  
 tificatu  
 Ro Nicol.  
 V. cuius  
 vitam ipse  
 Platina ex-  
 pressit.

d. Ann.  
 1449 ab  
 hoc Ponti-  
 fice Petrus  
 Barbus fa-  
 ctus est C.



dinalis  
presbyter  
tit. S. Mar-  
ci Ita O-  
nuphius.

*hac legens, Thomam ipsum, (qui & Nicolai ab hoc Nicolao sumpsit no-  
men) legere atq. intueri non sine pietatis affectione videre. Nam quod  
ad me attinet, nihil abs te mihi deferendum, nihil attribuendum puto,  
cum ita tibi sim omni officiorū & beneficiorū genere, & sanguinis iure  
deuinctus, ut me ipsum & mea omnia dedicans, tibi obsequi, & mo-  
rem gerere dignitati tuae dies noctesq. defatigari non debeam. Legere  
itaq. Sanctissimi Cardinalis historiam, Reuerendissime Pater, solita tua  
clementissima pietate dignabere, & quemadmodum nobilitate morum  
& generis, generositate animi, insigni prudentiā, misericordiā, ac pie-  
tate clementiāq. potissimum, & benignitate singulari, omniq. virtu-  
tum genere plurimum praestas; ita in me amando atq. tuendo, quo nihil  
in humanis mihi carius esse potest, & te ipsum & reliquos omnes  
excedas & superes supplici obsecratione & incessabili  
deprecatione deprecor. Vale felix.*

(.)



DE



5

DE VITA ET MORIBVS NICO-  
LAI CARDINALIS SANCTAE CRVCIS.

CAPVT I.

*FAMILIA, PVERITIA, ET ADOLESCENTIA IPSIVS.*

**I**Nter reliquas Bononiæ Urbis familias, præstās satis & clara haberi solita est Albergatorū stirps, eò potissimum, quòd viros diuinarum humanarumq; rerū doctissimos, & Iurisconsultos celeberrimi nominis, quā plurimos in lucē eduxerit. Ex ea Nicolaus traxit originē, patre Petro Nicolao, matre verò Philippa. <sup>a</sup> Quē cū primis elementis instituendū atq; formandū, vix vbi ex cunabulis excessit, Parentes exhibuissēt; vt in ijs, quantū satis esse visū est, profecerat, ciuilibus studijs, (quæ peculiari quodā iure plurimū in ea vrbe vigent) adhibere operā voluerunt. Accessit autē ad ea circiter ad xi. ætatis annū perstititq; diutius. Ad nouē etenim continuos annos iuris ciuilis auditor fuit; magnāq; virtutis, atque doctrinæ, & in ea ætate spem præstitit.

CAPVT II.

*FIT CARTHVSIANVS, ET ALIQVOT MONASTERijs præest.*

**C**Vmque iam & ingenio, & moribus, & ciuilibus disciplinis vsque adeò claresceret, vt decorādus pro studiorū præmio insigni lau-

<sup>a</sup> Natus est  
B Nicolaus  
ex hisce pa-  
rentibus,  
anno Domi-  
ni 1375. vt  
Sigonius ha-  
bet cap. 1. in  
vita illius.



reâ videretur; ipse contemptis humanis omnibus, relictis ciuilibus studijs, neglectis honoribus, parētibus, diuitijs, re familiari nō magni existimatâ, Deo immortali sese totum dedicauit & vouit, Religionēq; ingredi, ac Regularē deinceps ducere vitā cōstituit: est siquidē Bononiæ paulò extra vrbs portas Carth. Monasterium loco satis grato situm.

*a Occasionem  
ip am descri-  
bit Sigonius  
cap. 2.*

Hoc Nicolaus cū assidue frequentaret, <sup>a</sup>captus Monasticę & solitarię vitę pręstantiâ, vbi cōsulēs salutis suę Deo immortali seruiret, potissimū elegit. Itaque Religioso habitu sumpto, (peractis ijs, quę Religio obseruat, moribus) aliquot annos in ea omni humilitate, abstinentiâ, & synceritate vitę persoluit; verū vbi perspecta & explorata est virtus, prudentia, & sanctimonia morū, qui in Religione pręsidebant, ad religiosas Nicolaū dignitates extulerunt: pluribusq; illū pro tēporum varietate Monasterijs <sup>b</sup>pręfecerunt; ita vt integrum decennium nunquā eiulmodi pręfecturâ caruerit, magistratusq; illos eum in modum administrait, vt in Religione & in populo nihil diuinius prędicari posset Nicolai nomine. Erat enim ipse sanctissimorum operum patrator & prędicator, plurimosq; ad religiosam Sanctā vitā, & Diuina ministe-

*b Florentinā  
& Bononię  
sem Carthu-  
sim admini-  
strasse ipsum,  
affirmat Si-  
gonius c. 2.  
At: verò Ro-  
mę & Man-  
tue ipsum: i-  
am pręfuisse  
antiqua mo-  
numenta d-  
monstrant.*

ria,



ria, suafione suâ & exemplo pertrahebat; Humilitatē summā, & abſtinentiā aſperſimam præ ſe ferebat, & omninò à ſecularib⁹ terreniſq; rebus abdicatus, ad ſola cæleſtia & diuina volabat; venerabatur illum ſimul & admirabantur ciues omnes, fælixq; eſſe ille videbatur, qui huius perfrui conſortio, aut doctrinâ refici potuiſſet.

## CAPVT III.

*ELIGITVR EPISCOPVS BONONIENSIS, inuitus & coactus.*

**A**ccidit, vt circiter ea tempora, qui Bononiensis Episcopus præerat, fatalē diē suū obiret; Quare coacti ciues cum Clericis & Ecclesiasticis omnibus Nicolaum ſibi Præſulē & Pontificem delegerunt. Cumq; illi electionis ſuæ decretum attuliſſent, proſtratus in terrā Nicola⁹, ne ſe quiete ac pace ſuâ priuarent, rogare & obſecrare cœpit: Imparem ſe omninò tanto oneri, inexpertum, imperitum, indigniſſimum eſſe: illis verò magnâ vi, omni prece atque ſuaſione, vt electioni de ſe factę annueret, exorantib⁹, nullo tamen pacto adduci potuit, vt morem gereret. Sed quantò illi ardentius inſiſtebant, tantò ipſe obſtinatius reſuſcitabat. Per hunc modum, cū

inte-

a Is fuit Io-  
annes Episc.  
qui obiit an.  
1417.  
2 Ian.  
Iuxta Sigo-  
nium in Epif.  
Bonon. & c.  
3. in Vita B.  
Nicolai.



integrum semestre Bononiensis Ecclesia Pastore  
desolata iaceret, illis neminem nisi Nicolaum vo-  
lentib<sup>9</sup>, eo autem cōstantissimè detrectante, nouas  
tandem artes ciues excogitârunt, vt desiderio po-  
tirentur. operam .n. adhibuerunt, vt qui in ea Reli-  
gione maximâ auctoritate præstabât, quib<sup>9</sup> impe-  
randi potestas<sup>b</sup> erat, illi ex auctoritate præcipientes,  
Nicolaum obedire compellerent. Quib<sup>9</sup>. cū  
non parere non posset, curam Bononiensis ple-  
bis<sup>c</sup> assumere, & Episcopus esse coactus est.

## CAPVT IV.

MITTITVR. A SVIS LEGATVS AD MARTI-  
num Quintum Pontificem Romanum.

**P**ER ea verò tempora Patres Constantiæ Cō-  
cilium<sup>a</sup> celebrabant, quo tandē persoluto,  
cū Martinus eius nominis V. Pont. Max.  
qui ad Rom. sedem adsumptus erat, in Italiam ve-  
nisset, Bononiēses Nicolaū ad Pontificē cōgratu-  
latū ire voluerunt. Profectus itaq; Mantuæ, Mar-  
tinum confidentem inuenit. Cui cū solitam re-  
uerentiam exhibuisset, & populi sui mandata ex-  
posuisset, in magno honore à Martino habitus est,  
cōmorādi enim locum in palatio, quo habitabat,  
Nicolao dedit, & ex ærario Pontificio necessaria  
subministrauit, multisque ornamentis affecit, li-

teras-

<sup>b</sup> Latini hæc  
Sigonius c.  
4. Vita.

<sup>c</sup> Consecra-  
tus est Episc.  
4. Inl. vt ha-  
bet Sigon. in  
Vita cap. 5.

<sup>a</sup> Nanclerus  
gen. 48. an.  
14. 7.

<sup>f</sup>. Sigonius  
ca. 7 in vita  
ann. 1. 18.



terasque Apostolicas super Episcopatu libens dedit. Absolutis autem, quæ opportuna erant, cum Mantuâ abscedens Bononiam venisset, suarum oruium aliquamdiu quietam curam egit; erat autem in egenos inopesque piissimus, neminem vacuum abire patiebatur, neque solum satis erat illi, ijs, qui petitori aduenerant, elargiri, sed per urbem assidue perquisitis necessaria ministrabat; in diuinis ministerijs obsequijsque accurato semper & indefesso studio versabatur; vivebatque religiosè & abstinentissimè, quippe, cum illum, quem instituerat, Carthusiensium viuendi ritum ad extremum usque semper integerrimè conseruaret.

*Idem testatur Pogius in oratione.*

## CAPUT V.

ITERVM EVM MITTERE AD  
Pontificem Romanum cogitant  
Bononienses.

**V**ERVM non diutius, vt partâ quiete perfrueretur, illi permissum est. Nam paulò post cum Ferrariam Martinus venisset, iterum, vt ad Pontificem accederet, voluerunt. Siquidem Bononienses Martini mentem atque animum for-

*Vide Platinam in Martino V.*

B

mida-



midabant, curabantque omni arte, ne in illius liberam potestatem declinare cogerentur. Martinus verò nihil prætermittebat, quo ab alienatis sibi illorum mentes conciliaret, urbemque in fidem redigeret; Bononiam venturum enim se, atque diutius ibi mansurum, optimasque præstituturum condiciones pollicebatur. Illi verò durioribus asperioribusque in dies animis esse videbantur. Quare cum aliquandiu ad Urbem Ferrariæ confedisset, nullaque compositione Bononiensium animos conciliari posse videret, desperatis ferè iam rebus, Ferrariâ discedens, Florentiam venit, ut vi & armis rebellantes, proteruosque Bononienses perdomitaret; potissimumque Bononiæ ad eos dies excitatæ rerum nouitates erant; Zambeccarij quippe Canetulos (qui sunt alterius factionis) vrbe expulerant, totaque intestino dissidio ciuitas fluctuabat; Quarum rerum spe adductus Pontifex, facile confidebat, posse urbem redigi in potestatem.



c Sigonius c.  
8. in vita,  
ann. 1420.  
Vide quoq;  
de hisce fa-  
ctionibus  
Blondum  
dec. 3. li. 3.



## CAPVT VI.

*TERTIO MISSVS AD PONTI-*  
*ficem Romanum,redit cum mandato in-*  
*terdicti.*

**B**Ononienses verò, & qui alteram factionem detruserant, & qui bellum inferri à Pontifice pertimescebant, rursus Nicolaum Florèntiam ad Pontificem mittere decernebant. Nicolaoverò minimè quidem ea sententia probabatur; dicebat enim se vereri, ne à Pontifice, qui omnes curas in recuperandâ Bononiâ locauisset, quicquam indiceretur, quod & seruare cogeretur inuitus, & seruatum vrbi detrimentum afferret; non setantum de Pontificis amore confidere, quin longè arbitretur eius vrbis consecutionem illi esse cariorem; itaque ne se mittant, obsecrare: suspicari enim poenitentiâ huiusce rei acturos eos fore, quòd quamnam in partem res vertantur, intelligat. Sed cum illi è contra obstinatius insisterent, & intelligere se ex his Nicolaum factioni suæ minus amicum esse iactarent, eò quòd bis ad Pontificem, priusquam aduersarij vrbe pelleren-

a Sigoniu c.  
8. in vita  
ipsius.

B 2

tur,



b Sigentus  
c. 8 habet  
duos.

tur, accessisset, nunc obstinatè recusaret, huiusce-  
modique pleraque infestis orationibus iterarent,  
tandem parere coactus, <sup>b</sup> tres ex primoribus Urbis  
ciues dari sibi consodales expetijt. Profectus ergo  
ad Pontificem, quæ iniuncta fuerant, exposuit,  
remque ciuium suorum omni fide ac diligentia  
egit. Martinus hoc extremo Nicolai aduentu in  
optimam spem rei perficiendæ erectus, tale ali-  
quid machinatur: Interdicti litteras clam expedi-  
ri iubet. Nicolao ad se conuocato, grauissimo &  
exactissimo imperio mandat: ut è vestigio, nulli-  
bi tractâ morâ, Bononiâ proficiscatur literasque  
illas, cum primum Bononiæ constiterit, populo  
Bononiensi exhibeat, caueatque, ne quid in ijs in-  
scriptum sit, priusquam Bononiæ constiterit, le-  
gat. Hec ut omnino quamprimùm exequatur, ob-  
strictissimè atque obnixissimè iubet: pænas insu-  
per, ni paruisset, adiungit. Nicolaus tam graui de-  
uinctus imperio, quanquam quid rei foret, quid-  
ue deferret littere, coniecturâ consequeretur: fa-  
cere tamen nullo pacto poterat, quin Pontifici  
Maximo, cui omnia debebat, tam obstrictè  
potissimùm imperanti, obtemperan-  
dum duceret.

CAPVT



## CAPVT VII.

## INTERDICTI PROMVLGATI

*causâ de vita periclitatur apud  
suos.*

**I**Taque Bononiam accedens, coactis, qui eam in rem euocandi erant, Pontificis mandata persoluens, litteras edidit, Pontificis iussa compleuit. Tum verò exardere in eum omnium animi, excitari voces, proclamitare vniuersi, fremereque in Episcopum suum dentibus manibusque coeperunt: in eumque furoris impetum sæuamque rabiem proruperunt, vt in illius vitam caputque conspirarent. Re igitur inter eos compositâ, plerique ex ciuitatis principibus ad Pontificales ædes profecti, satellites vnâ trucidandi Nicolai gratiâ, carnificesque duxerunt: cumque in huiusce causæ sermones grauissimos incidissent, litteras ex Præsulis manibus diripientes, in illum impetum effecerunt. Ex ijs tamen, qui dedita hanc ad rem opera carnifices venerant, nemo in illum manum injicere ausus est, tantusque illos terror inuasit, vt nihil omnino violentum experirentur: litteræ verò Pontificales ab ijs, qui ex Ni-

a 27 Martij.  
vt ex Sig-  
nio patet, c. 1.

h. Forum ni-  
bil habet Si-  
gonius. At  
Z. nus om-  
nia cognouit  
ex Thoma  
Sarzauesi.



colai familia aderant, recuperatae, req; infecta inde digressum. At Nicolaus tam temerario & sacrilego sceleratissimorum hominum ausu perterritus, salutis suae, ut prudentem decet, consulendum existimavit. Itaque ut primum illuxit dies, commutatis vestibus, ignotus urbe digressus, Forentiam venit, & Carthusiense coenobium, quod ad duo millia passuum urbe abest, plerosque menses incoluit. Interdictum tamen Bononiae recte servatum est, integrumque semestrem nihil religiosum eam in urbe publice celebratum. Martinus autem summus Pontifex, exercitu comparato, Bononiam vi & armis occupandam arbitratus, legatum exercitui Gabriele Condulmarium Venetum, sacrae Romanae Ecclesiae Cardinale praefecit. Is est, qui post Martinum summus Pontifex fuit, qui optimo exercitu & valida manu Bononiam adortus, non magno illam tempore in Ecclesiae Pontificis redegit potestatem. Quare, cum urbe in fidem accepta, Martinus illi sancti Eustachij Cardinalem praesidem, Gubernatoremque dedisset, cum eo Nicolaus Bononiam venit, aliquandiuque propria in praesulatus sede quieuit.

a Sigonius  
addit Brac-  
cium Perusi-  
num, exerci-  
tus ducem.

Id est fuit Al-  
phonius Diac-  
card. qui Bo-  
nomensis pra-  
eses f. & usq;  
26 Aug. Vi-  
ex Sigonio  
constat e 8.

CAPVT



## CAPVT VIII.

*MITTITVR A RÔMANO PON-  
tifice ad Gallos, & Anglos pro pacere sti-  
tuenda.*

**C**Æterum, cùm per ea tempora asperissimum bellum Gallos<sup>4</sup> inter & Anglos diutissi-  
mè viguisset, quod maximas quidem cala-  
mitates, clades innumeras, cædes, deprædationes, direptiones, vrbium, regionum, atque ag-  
rorum deuastationes, & pleraque huiuscemodi, quæ bella parere solent, in dies maiora, grauiora-  
que pariebat: nec ad eam diem vlla diuturna pace tam atrox dissidium sedari potuerat; Pontifex Maximus, vbi viridoneus ad perficiendum tam difficile pacis opus perquireretur, etsi penes se omnifaria excellentia præditos quamplurimos haberet, tamen quòd in Nicolai summa virtute atque integritate fides illi erat amplissima, eum, quamquam Bononiæ residentem potissimum elegit, quem ad rem per ea tempora per-  
maximam destinaret. Nicolaus cognita Pontificis Maximi sententia, litteris quoque & mandatis acceptis, tametsi iucundius curam suarum ouium

a Consulendi  
de hoc bello  
Paulus AEm-  
mylium. ac  
Polydorus  
Vergilius,  
ut Nacler.  
82. 84. ann.  
1422.

exer-



b. An. 1427.

e Idē habet  
Man. Ierus  
Gord-  
mus.d Reuersus  
est an. 1423  
8. Augusti,  
vt Sigonius  
habet cap 9.

exercere maluisset, cū tamen facere nullo pacto posset, quin principi humanorum omnium obtemperaret; vt iussus à Pontifice fuerat, in Gallias pacis pertractandæ gratia<sup>b</sup> profectus est; Remque grauem, & ferè desperatam adortus, miris difficultatibus, itineribus, periculis, perturbationibusque innumeris diutius est profectus; cumque diuina gratia adiutus ad eum iam statum pacis conditiones adduxisset, vt optatus iam & gratissimus exitus sperari posset, euenit, vt sub idem ferè tempus ambo Reges ipsi Galliarum & Angliæ, qui inter se totum acerrimo, ac sæuissimo bello decertabāt, extremi fati<sup>c</sup> munus persoluerent. Itaque potentissimorum Regum interitu perturbatis passim, & commutatis rebus, pace non exacta redire coactus est; & iam decimo octauus mensis elapsus erat, quo in Gallias venerat (quod temporis spatium vt plurimum regionem pacis gratia peragrandō cōsumpserat.) Sic Romam ad Pontificem veniens, cū quæ secuta erant exposuisset, nihil sanctius existimauit, quàm cōfestim ad suas pascendas oves sese quamprimū conferre. Bononiam<sup>d</sup> itaque cū venisset, biēnium apud sibi commissum populum egit.

CAPVT



## CAPVT IX.

CREATUR S. R. E. CARDINALIS,  
*destinaturq; ad Venetos Florentinosq;  
 conciliandos.*

**P**ER id verò <sup>a</sup> temporis Martino Pontifici Maximo sententia erat ad Romanæ Ecclesiæ regimen Cardinales adsumere. Quare cùm maximè omnium in Nicolaum iam dudum antea mentem atque oculos coniecisset, Romam accitum in Cardineum apicem euexit, & Sanctæ Crucis in Hierusalem sacerdotalem illi titulum dedit. Veneti<sup>b</sup> ea tempestate Florentiniq; aduersus Philippam Insubrium Ducem acerrimum gerebant bellum, Florentinorum tamen, vt videbatur, gratiâ sumptum. Martinum, vt optimum summum Pontificem decet, eius belli causa anxium sollicitumq; habebat, & pace sedari, componiq; cupiebat. Iam verò tanta erat de Nicolai sanctitate atque virtute opinio & auctoritas, vt, qui commodior perficiendæ paci videretur, esset nemo. Eius itaque pertractandæ ac perficiendæ pacis cura cùm à summo Pontifice illi iniuncta & demandata esset, Nicolaus iussa capeffens, man-

*1. An. 1417.  
 2. Kal Jul  
 3. Onuphri.*

*4. Encl  
 Syluim in  
 Europa, cep.  
 49.*

C

datif



*e Poggini in  
orat fun. vi  
de Sabel  
lich in hist  
Vener.*

datiſque obtemperans, Româ digreſſus, Venetias  
venit; quò cùm & Philippi ducis oratores conue-  
niſſent, cognitſ ac plenè perſpectis diſſenſionum  
rationibus, cauſam pacis eouſque multa & graui  
difficultate deduxit, vt Veneti, Florentiniſque  
cum Philippi Oratoribus conuenirent, pacem-  
que firmam decernerent. Dictæ conditiones ple-  
ræq; pro exequendis omnibus viginti dierum in-  
ducia præſtitutæ. Cæterũ quò celerius liquidiusq;  
perficere poſſent, nec, quãtum in eo eſſet, pertur-  
batione vlla impedirentur, non parcendum opere  
atque labori, ſed in Ligures ſibi proficiſcendum  
duxit. Cœpit autem initio Philippus nonnulla ex  
ijs, quorum erat data fides, vti conuenta erant, ſer-  
uare, maiora verò & grauiora, inter quæ nonnul-  
lorum oppidorum reſtitutio erat, poſtergando  
differebat: facereq; id de induſtriâ videbatur, quo-  
ad præſinita laberetur dies. Nam & animum reip-  
ſa, & factis paulò poſtea euidentiùs patefecit Miſ-  
ſis ſiquidem à Nicolao Venetis, qui oppida reſti-  
tuenda recipere, palam denegata reſtitutio eſt.  
At Nicolaus ægerrimò & iniquiſſimo id animo  
ferens, fraudariſque ſe pacis executione proſpiciẽs,  
non deſiſtendum tamen ratus, quin omnia etiam

ex-



extrema experiretur, litteris, nuncijs, atque omnibus artibus cum<sup>d</sup> Philippo, quoad eius fieri potuit, agendo, monendo, suadēdo, rogādo, nunc precibus, nunc suasionibus, exhortationibus, plurumque etiam admonitionibus & increpationibus, ut res exigebat, plurimum operæ; dierumq; consumpsit Enimuerò cū iam tentata omnia in irritum deciderent, nec ad seruandas condiciones adduci quoquo pacto Philippus posse videretur, desperatum opus relinquere, atq; ad Pontificem Romam redire constituit. Ex Liguribus itaq; Bononiā iter faciens Romam venit: Pontifici, quæ secuta erant compositam pacem, sed non seruata, cuiusque id culpā accideret, detulit.

*d Philippum  
hunc quietis  
impatiem  
fuisse Syl-  
uam testa-  
tur in Eu-  
rop c 49.*

*c An 1427.  
6 Kal Mart.  
Sigonius ca.  
o. in vita*

## CAPVT X.

*INTERVM MITTITVR LEGATVS  
à Romano Pontifice ad Venetos Liguresq;  
pacificandos.*

**E**AM ob rem Martinus oratoribus omnium partium ad se venire iussis, ut quæ conuenta erant, perficerent, aliquandiu cum ijs egit, obtinuitq; demum, ut primas iam præscriptas



a Rome 4.  
m. s. b. m.  
mansit.  
Sigonius cap.  
10.


b His harū  
rerum et o-  
culatū te

conditiones concordibus omnes pariter animis confirmarent. Quare ne vlla occasione impediri pacis bonum posset, rursus Nicolao coeptum opus perficiendum delegat, utque in Ligures, & ad Philippum proficiscatur, iubet. Itaque Pontificis iussu iterum Romam profectus, in Ligusticos fines venit. Exierat tunc Mediolano Philippus, quod ferè aliàs nunquam consueuerat, & ad Pizicarium oppidum, quod passuum millia quinque supra triginta Mediolano abest, sese contulerat. Cùm verò post solitos honores de rebus pacis pariter conferre atque agere coepissent, & plerosque dies sermonesque super hisce causis conditionibusque protraxissent, nihil rectum Philippus, nihil integrum penitus sentire videbatur. Quod ut singulari prudentiâ Nicolaus animaduertit, quanquam dolore & molestiâ anxius, quicquid agi, dici, tractari, persuaderi potuit, experiretur; Neque eo magis proficere quicquam, aut flecti ad seruandam conuentorum fidem Philippus posse videretur: cùm quid ageret, amplius non haberet, certiorandum consulendumque summum Pontificem censuit. Erat tunc apud Nicolaum Thomas<sup>b</sup> & sacris & secularibus litteris eruditissimus,



simus, ex Serzano oppido Ianuensis regionis oriundus, qui diuturnam illi operam præstiterat. Hunc propter singulares virtutes, eximiamque doctrinæ, fidei, diligentiaque præstantiam Nicolaus vnicè diligebat, & primarium apud se constituebat, fideque atque auctoritate nemo apud illum gravior & carior erat. Est autem is, qui post Eugenium summæ Apostolatus paulò antè præfuit archi. Hunc Thomam ad Martinum summum Pontificem ire iubet, & quæ Philippo mens, quæ verba, quæ acta, quæ spes, quæ opinio concipi valeat, nota facere. Ipse cum Venetias venire constituisset, quòd grauius in vrbe pestilentia laborabatur, Mathemaucum venit, quod millia passuum quinque Venetijs abest; ad eum locum Nicolai gratiâ Princeps Venetus & senatus omnis accessit, summi que honores Nicolao habiti sunt, de rerumque statu sermones collati, & consilium actum.

*stis, ex cuius  
ore hæc Ze-  
nim narrat.*





POST DIUTURNOS TANDEM  
*labores pacem inter Florentinos Venetosq;*  
*confirmat.*

**I**Nde dissoluens cū mandata Pontificis præstolaretur, nunciata est insignis illa clades Philippo illata, qua apud Machilonium, (sic enim loco nomen est) illius militares omnes copię à Venetorum Ducibus profligatæ, ad internecionemque deletæ ferè sunt. Ea calamitate cū ferox ille Philippi animus, qui per superiora tempora flecti nullo pacto potuerat, mitior compressiorq; redditus esset, & pacē tam diu spretam supplex petere, atq; vtrò rogare adduceretur, rursus in pacis mentionē pertractationēq; ventum est. Ferraria<sup>a</sup> vrbs commoda & idonea, vbi conuenirent, est visa. Eo Nicolaus profectus, Oratores partium illuc etiam sunt secuti. Ducta est res diutissimè, & de pacis exitu sæpenumerò desperari visum. Graues enim inter partes esse videbantur dissensiones, neque in vnam poterant cōuenire sententiam. Subterfugere videbatur Philippus, & quanquam ad pacem procliuis admodum, & pronus apparuerat, instaurationē tamen quærere & petere nō desistebat. Ve-

neti

<sup>a</sup> Ferrarie  
 pax firmata  
 est, an. 1428  
 15 Kal. Iulij.  
 Ita Sigonius  
 cap. 10.  
 Paulò aliter  
 S. Antonin.  
 in Chron. 4.  
 22. c. 3. 5. 11



neti et si modestioribus animis viderentur, tamen quod partâ victoriâ facilè Philippi vires extingui posse arbitrabantur, lentius tepidiuſq; accedebāt. Florentinorum omnino erant prōptissimæ, ardētissimæque ad pacem mentes, qui fatigati fessi que diuturno bello, & sumptibus ferè intolerabilibus exinaniti, spem oēm quietis in pace defixerant. In tanta rerum atque animorum varietate, cū desperatis plerumque rebus digressuri infecto negotio Oratores partium viderentur, tanta tamen fuit in Nicolao prudentia, tanta diligentia, & patientissima tolerantia, vt<sup>a</sup> superatis difficultatibus vniuersis, paci tandem, (quippe post semestrem, quā agitari coepta erat) optatus commoduſque finis daretur, dictæ conditiones<sup>b</sup> præscriptæq; assensus partium omnium præstitus: supererat tantū, vt quæ conuenerant, integrè seruarietur. Eā ob rē Nicolaus nullo fractus labore, iteratō in Ligures profectus, ferè prouinciā oēm non sine grauissimis incōmodis pro rerum felici exitu peragravit; sæpè agresti tuguriolo pro locorum difficultate tectus, nonnunq̃ vilissimo etiā cibo indiguit, bellorū diuturnitate, & rapacitate atq; atrocitate militū passim regione omni exhausta, & mi-

rum

*S. Antoni  
in Chron.  
p. 3 tit. 22. c.  
3 an. 1427.  
in Martio.*



rum in modum rebus vsui necessarijs exinanitâ. Cæterùm etsi angusta omnia viderentur, non tamen, vt priùs inde digrederetur, quàm seruata executâque conuenta conspexisset, adduci potuit.

## CAPVT XII.

*MAGNA PRVDENTIA ANIMI  
verborumq; grauitate castigat insolentiam ci-  
uium seditiosorum.*

**R**EDITIS itaque ac restitutis demum oppidis, & pacatis, quietisq; vt videbatur, rebus, ex Liguriis Bononiam venit, eo animo, vt paulò post Romam, ad Pontificemq; rediret. sed dum Bononiæ moram trahit, Ecclesiæ & patriæ suæ causis quibusdam componendis, quæ imminebant, deditus, dissensiones nonnullas de Bergomensis & Cremonensi agro exortas, nunciatum est: vtq; controuersias eas quietas reddat, priusquam abeat, supplicatum. Quare grauitate rerum Nicolaum Bononiæ distinente, effectum est, vt partium Oratores ad illum Bononiam mitterentur. Missus à Venetis Sanctius Venerius Equestris ordinis vir, ea tempestate auctoritate inter Venetos præstans. Cùm his cogno-  
scen-

a Vide Vo-  
laterranũ l.  
4 Geogra-  
phie, vbi de  
Venetis a-  
git.



scendis componendisq; causis Bononię Nicolaus ageret, ciuitas rerum mutationes perpessa est, grauiusque intra urbem tumultuatum, & à clamantibus, *populum libertatemq; viuere*, ad arma concursus est: eoque tumultu effectum est, ut à Pontifice Ecclesiaq; deficientes, in libertatem sese Bononienses vendicarent. Grauis admodum & peracerba Nicolao ea urbis facta commutatio fuit, & ut parerat, summo illum dolore affecit, eoque magis, quòd succurrere<sup>b</sup> ipse tanto morbo & lapsæ iā rei non poterat. Cæterum & mœrori mœror, & perturbationi perturbatio accessit. Qui n. summę rerum in urbe præerāt, (seu q. Nicolai operā, quem Pōtifici gratissimum esse intelligebant; cōtrouersias cōponi posse cōfiderent, seu quòd, quippe quę studiosissimum Ecclesiasticarum partium, atq; ex eā re suspectum, suisque mutationibus aduersissimum existimabant, in illius excidium quicquā sœui machinarentur) euocandum ad sese suis consilijs decreuēre. Eam cum operam nūcio cuiuspiam vilissimo homini iniunxissent, illeq; mandatis obtemperans, ad Pontificem profectus, ut accederet, monuisset: in stuporem atque mœrorem exitium ea leuitas atque vesanja ciuium Nicolaum

<sup>b</sup> De tumultu isto Bononiensium agit Sigonius ca. 1. in vita.

D

ad-



adduxit. Cōtinuit tamen sese, & nuncio nihil graue, aut indignum, neque quicquā magis quā occupationibus distineri, ne accedere valeret, respōdit. Hāc suorum ciuium stoliditatem secum indignāti, aduenire ad eum sex ex primoribus ciuium nunciatur. Quare cū vereretur, ne quid violenti fieret, euocari familiam omnem iussit, ut quē ciues ingressi sunt, fores claudi; Iā ad cōspectum suū Pōtificis aderant, & proponere, nescio quæ, velle videbantur. Verū Nicolaus prior ad illos conuersus, durē atque asperrimē (ut res & culpa exigebat) increpare illos adortus; existimare se, *inquit*, omnino mente alienatos esse Bononienses ciues, se quē ob id summo dolore affici, cū eorū cura illi credita sit; consueuisse filios ad patrem ire; Ciues ad Præsulem; cōtra naturæ & iuris ordinem esse, neque vnquam auditum, ut ad inferiores superior euocatus accedat. Bononiēses, cū simplex illorum esset Episcopus, debitos illi semper honores exhibuisse: nunc cū Cardineo etiam apice fulgeat, & legationis etiam potestate premineat, in tam stolidam vefaniā illos adductos, ut per vilissimum nuncium euocare ad sese non erubuerint Iniuriā hanc nō sibi, sed Apostolicæ sedi illatam existimare, cu-

ius

e sic olim  
magnanimū  
se exhibuit  
S. Thomas  
Cantuar.  
Vide Surium  
tom 6 29.  
Decembris.



ius vices in eâ dignitate atq; legatione \* continet; spretum se esse à Bononiensibus, non sibi propter se, sed propter eorum errores ac peruersos, perfractosq; mores curæ & cordi esse; vereri enim se, ne iratum Deum breui ultorem sentiât: atq; propterea, vt ad rectam viam, & saniores se mores conuertant, hortari. Hæc atq; huiuscemodi cum summa grauitate atque auctoritate, paternaque caritate monuisset, qui aduenerant ciues, adeò muti atque elingues effecti sunt, vt nec<sup>d</sup> verbum vllum ex cuiuspiam ore prodierit, sed vt venerant declinatis ceruicibus abscessere.

\* forsan, sustineret.

d Ita & Spiridion Episc. obmutescere fecit garrulū Philo/ophū in Concilio i. Niceno. de quo Martyr. Roman. 14. Decembru.

## CAPVT XIII.

OB CIVIVM REBELLIONEM AD  
Romanum Pontificem abit, apud quem  
biennio manet.

**E**Nimuerò formidabilis res erat, & maiores motus eo initio expectandi videbâtur. Quos veritus Nicolaus, ne temeritati facultas delinquendi præberetur, prouidendum ratus, vt si quis fortè tumultus grauior ingruisset, nō se arbitrio suo Bononienses vti possent; euocato ad se



*a Sigonius  
cap. 11. scri-  
bit de habitu  
Dominica  
no. At Zeno  
magis cre-  
dendum est.*

<sup>a</sup> Carthusiensis Monasterij præside, permutatisq; vestibus, ut primùm inclinare cœpit dies, sub primas ferè tenebras, illum ut inferior profectus, ad Carthusiæ Monasterium venit, eamq; noctē ibi in eo egit. Postera verò die, ut primùm lux excipi potuit, urbem ingressus, cum paratos sibi extra portā, quæ Mutinam ducit, equos, ut constituerat, comperisset, Mutinam constanti itinere profectus est. Bononienses ut de Nicolai profectioe certiores redditi sunt, miris exagitari furoribus occeperūt, in contumeliosasq; erumpere voces, hostem publicum, ac Patriæ illum proditorem appellantes. Non destitère tamen, quin Oratores ad eum Mutinam mitterent. At Romæ, ut nunciata est Bononiensium defectio, Pontificis & Ecclesiasticorum dolore ac perturbatione affecit animos; cumque Nicolai operā posse labentibus rebus adhiberi remedia Pontifex <sup>b</sup> Martinus consideraret, cōfestim ad illum raptim perscriptis & exaratis litteris, ne Romam rediret, neve regione egrederetur iniussu suo, strictioribus mandatis iniunxit. Eam ob rem cum Mutinæ plerisque menses traxisset moram, neq; moveri Bononiensium indurati posse animi viderentur, cōponendæ controuersię gratiā, (quā

*b Sigonius c.  
12. addit à  
Pontifice Bo-  
nonienses fu-  
isse excom-  
municatos.*

occa-



occasione Cremonensis & Bergomensis agri exportam diximus) Ferrariam venit, quâ cōgruâ executione sedata, consulto primū Pontifice, Romam redijt, biennioque apud Martinum in Curia fuit vitæ sanctimonia, consiliorumque grauitate præcipuus.

## CAPVT XIV.

## TERTIO MITTITVR LEGATVS

*ad Venetos Liguresq̃, Item Gallos & Anglos bello certantes.*

CÆterū haudquaquam illi diuturnâ quiete perfrui licuit Nam cū Liguricum bellum longè acrius restauratum esset, Veneti que aduersus <sup>a</sup>Philippum, & ingentes terrestres copias militares, & classem Padanam amplissimam comparassent, Pontifex Martinus tot calamitatibus metuens, atque obuiare desiderans, habito cum fratribus de more colloquio, Nicolaū, (quem ad pacem rursus inter Venetos & Philippum cōficiendam, mitteret) elegit. Hac etiam adiectione adhibita, vt, postquam Liguricas extinxisset lites, ad perniciosum bellum, quod Anglos inter & Gallos iam antea viguerat, sedandum iter

*a Philippi  
huius res ge-  
stas Philippi  
descrip-  
sit.*

D 3

arri-



arriperet. Ita tertio iam Ligurici belli causâ, Româ profectus, in Veronenses primò diuertit, apudque Piscariam oppidum Veronensis quidē agri, sed cui tunc Mantuanus præerat Princeps, substitit. In armis siquidē erant omnia, & circumquaq; vniuersa regio militaribus fragoribus æstuabat. Quare per opportunum in eo belli ardore pertractandę paci id oppidum arbitratus, inde partium euocare oratores, & per nuncios litteralque rē gerere constituerat. Hęc dum meditatur paratque Nicolaus, molestissimū de Martini summi Pontificis funere nuncium accepit; Is enim decimo tertio Pontificatus anno, apoplexiâ correptus, fatalem Romæ apud sanctorum Apostolorum Basilicam, vbi residebat, diem summum obierat. Eo tam graui ac funestissimo nuncio, acerbo moerore affectus Nicolaus, quid ageret, quid cōsiliij capiendum foret, ancipiti dubioque animo peruoluebat; Romamne noui creandi Pōtificis gratiā proficisci, an Piscariæ manere, & cœptum pacis prosequi opus, seu noui Pōtificis creationem, & eius iussa præstolari satius esset. Melius cōsiliū visum, noua mandata à nouo expectare Pontifice: Quòd nec in tēpore ipse Romæ esse potuisset, & Ecclesię breuī à Patribus prouisum iri non dubitaret.

*b Ann. 1431  
Kal. Mart.  
vt Onuphrius  
testatur.*

CAPVT



## CAPVT XV:

*AB EVGENIO QVARTO R. P.  
confirmatur in sua legatione, & triennio inte-  
gro in Gallijs moratur.*

**N**Ec diuturna mora fuit, cùm delectum Ga-  
brielem Condulmarium Venetum, qui ex  
Patribus erat, Romanæ sedi summum Pō-  
tificem datum nouit. Is est, qui Eugenius Quartus  
est appellatus. Ad eum, vt par erat, cùm & nūcios  
& cōgratulatorias litteras exarasset, de rebus quo-  
que suis, quæ ad causam attinebant, interseruit: &  
cùm belli conditiones, & quō in statu cuncta ver-  
sarentur, & quid de pace agi & sperari posse confi-  
deret, (cuius exitum difficillimum, & ferè impos-  
sibilem iudicabat) significasset, summis à Pontifi-  
ce precibus petijt, vt etiam à Gallicana legatione  
illum absolueret, & sibi Romam redeundi faculta-  
tem, potestatem quæ facere dignaretur. Annuit i-  
nitio quidem Eugenius, & Nicolai precibus se  
morem gerere velle significauit; Paranti igitur Ro-  
mam proficisci, repentè cōmutatâ sententiâ, litteræ  
à Pōtifice redditæ sunt, quibus vt omnino in Gal-  
lias pergeret, id quæ quàm repentissimè, (sic enim res

*Electus est  
V. Non.  
Martij, anno  
1431. Sic O-  
naphrim.*

*b Litteras ip-  
sas habet &  
gonium. 13*

exi-



exigebat) mandabatur. Pontificis itaque iussibus  
 facturus satis, Piscaria discedens, superatis Alpibus  
 in Gallicanos fines venit. Fremebant vndique bel-  
 la, & per Gallicanā regionem oēm armorum fra-  
 gores resonabant; Nulla pacis vox audiri poterat,  
 nulla perficiendæ concordiaē spes esse videbatur.  
 Quæ etsi Nicolao haudquaquam obscura erant,  
 tentāda tamen primū omnia, & experienda ra-  
 tus, ad Principes pergere, hortari, monere, suadere-  
 que adortus, & quos ipse adire non poterat, per  
 nuncios & litteras alloqui, quicquid agi aut cogi-  
 tari posset, incredibili diligentia, patientiaq; pere-  
 git. Triennium continuum ea de re in Gallijs cō-  
 moratus, vniuersam Galliam peragrauit, neque  
 vlla ferè fuit insignis Galliarum ciuitas, quam ille  
 pacis gratia non adiret.

## CAPVT XVI.

*EX GALLIIS REVOCATVS MIT-  
 titur ad Concilium Basileense, in quo ipsius  
 summa authoritas refulsit.*

**D**VM in Gallijs Nicolaus protrahit moram,  
 in Germania ingens Eugenio Pontifici, &  
 Ecclesiæ bellum suscitatum est. Nam cū

Mar-



Martinus, priusquam vitâ excederet, Basileæ<sup>a</sup> co-  
 gi vniuersale Concilium indixisset: id creato iam  
 Eugenio ita coeptum, atq; adauctum erat, vt etiam  
 ex Patribus plurimi inuito & iniusso Pōtifice, fu-  
 gâ arreptâ, quasi à Pontifice deficientes, Basileā pe-  
 terent; & iâ ferè vniuersus eò cōcurrere, & ibi co-  
 gi coeperat terrarum orbis, & multa iâ aduersum  
 Eugenium ordiri videbantur. Et quanquam præ-  
 claros plerosq; suo illuc nomine Præsules Eugeni<sup>9</sup>  
 delegasset; tamen cū plurimum de Nicolai sin-  
 gulari virtute ac sanctitate cōfideret, ex Gallijs re-  
 uocandum, atque Basileam destinandum putauit,  
 vt Pontificio nomine Synodo præsideret. Habito  
 itaque & accepto hoc Pōtificio decreto Nicolaus  
 ex Gallijs in Germaniam trāsīens, Basileam<sup>b</sup> venit:  
 Est siquidem nobilis & clara Germaniæ vrbs, quā  
 Rhenus fluuius mediā ab alterā parte præterfluit.  
 Initio aduentus sui maximis & amplissimis exce-  
 ptus honoribus, urbem omnem, & Patres Eccle-  
 siasticosq; ordines incredibili voluptate comple-  
 uit. Atque quamprimū ad ea, quæ imminebant,  
 persoluenda conuersus, Pontificis partes singulari  
 fide prudentiaque tutatus, res Pontificias ad opti-  
 mum cōmodissimumque breui statum perduxit.

a De cō.ilio  
 Basileensi  
 vide S. An-  
 toninum,  
 Naclerū, et  
 Onuphrium.

a An. 1434.  
 Vt habet Si-  
 gonum cap.  
 14. in vita.

E

Erat



c Sic & Pog-  
gius in orat.  
fun Item  
Blondus l. 3.  
dec. 3.

Erat ipse id loci summâ auctoritate, ad eû vniuer-  
si, vt ferè ad Pontificè Maximum cõfluebant, fre-  
quentariq̃ue ita illius edes assiduo cunctorum cõ-  
cursu consueuerant, vt aliud separatum apud Ni-  
colaum agi consilium videretur. Effecit denique  
probatissimis artibus, vt tãetsi multorum graues  
in Pontificè essent mentes, irrita tamen malignan-  
tium studia redderentur. Mâsit autem eo in loco  
pauculis minus integro anno diebus: qui si diutius  
perstitisset, poterat profectò perturbationibus, &  
calamitatibus, quæ secutæ sunt, finem dare.

## CAPVT XVII.

*DESTINATVR A SYNODO AD  
Ligures, deinde à Romano Pontifice ad Gallos paci-  
ficandos, & postea interest Concilio Ferrariensi  
pro Græcorum unio-  
ne.*

**C**ÆTERVM cùm propter Ligusticum bellum,  
quod indies vehementiùs ingrauescebat,  
duos ex Patribus sedandarum rerum gra-  
tiâ vniuersa Synodus in Italiam mittere decreuis-  
set, Nicolaus potissimùm, qui ad id pacis opus de-  
lega-



legaretur, elect<sup>9</sup> est; comes illi alter ex Patrib<sup>9</sup> dat<sup>9</sup>  
 Card. S. Petri ad vincula, <sup>a</sup>ex Hispanijs oriundus.  
 Frequentissimo itaq; concursu omnium ordinū,  
 nec minori bene sentiētium mœrore extra urbem  
 deducti, in Italiam cū descendissent, Paduam  
 primū, inde Venetias petiēre, vbi pertractandæ  
 paci incumbere constituerant. Adhibita quidem  
 ab his est diligentia omnis, & nihil prætermisum,  
 quod ad rem perficiēdam pertinere potuisset: Sed  
 adeò incensierant partium animi, adeò prærupta,  
 & ardentia in bellum studia, vt conatibus in irritū  
 decidentibus, nihil proficere potuerint. Interea  
 dum hæc agerentur, Eugenius Pontifex Maximus  
 iniurijs contumelijsq; à Romanis affectus, vim et-  
 iam perpeffus, ignotus fugâ sibi consuluerat, & ex  
 Romanâ quidem fugâ Florentiam venerat. Quare  
 Nicolaus, cū pacis opera non succederent, mi-  
 nimè quidem Basileam sibi redeundum fore con-  
 stituens, ad Pontificem Florentiam venit, exposi-  
 tisq; superiorum temporum actionibus, apud  
 Pontificem Florentiæ manere decreuerat.

Cæterū cū per superiora tēpora Gallorum  
 Rex, & Burgundiorū Princeps acerrimo sepè inui-  
 cē ac diuturno bello lacerassent, oblataq; spes pa-

*a Hic fuit  
 Ioānes Cer-  
 uantes Ar-  
 chidiaconus  
 Hispalens. à  
 Martino V.  
 creatus Car-  
 din. S. Petri  
 ad Vincula,  
 anno 1426.  
 Ita Onuphri<sup>9</sup>  
 de Pontiff.  
 RR.*



*b Vide Robertum Guaguinū hist. Franc. li 10. anno 1435. & Sigonium cap. 152*

cis inter eos cōficiendæ visa esset, placuit Pōtifici, vt Nicolaus, quem propter vitæ sanctimoniā gloriosi apud illos nominis, & amplissimæ auctoritatis esse sciebat, & ob id paci huic aptissimum & per opportunissimum fore cōfidebat, denuò Gallicanas regiones peteret. Ex Florentiā itaq; in Gallias delatus, apud<sup>b</sup> Atrebatum, Burgundi Principis urbem constitit. Inde enixissimo studio ad peragendam pacem inuigilans, decimo & sexto, posteaquam illuc aduenerat mense, multis & grauib; difficultatibus tandem Principes ipsos perpetuā & salutare pace deuinxit.

*c Inchoatum est an. 1438. iuxta Oñphrium.*

Pacatis itaque sedatisq; Principibus, controuersisq; sopitis, in Italiam rediens, Bononiam venit, Pontificemq; illic cum Curiā confidentem comperit; sed cū Græcorum gratiā Ferrarię Pontifex Concilium indixisset, eò etiam Nicolaus Eugenium, vt par erat, est cōsecutus, obuiāq; Græcorum Imperatori, & Constantinopolitano Patriarchæ, qui vnionis celebrandæ causā ad Ferrariense<sup>c</sup> Concilium accedebant, Venetias à Pontifice missus, Ferrariam Græcos adduxit, celebrandæq; indefessus vnioni incubuit.

CARVT



## CAPVT XVIII.

*POSTREMAM OMNIUM LEGATIONUM suarum obiit ad Germanos: deinde interfuit Concilio Florentino.*

**C**VM ita totus in fidei rationib<sup>9</sup> disceptationibusque absorptus Nicolaus esset, vt ferè nihil magis cuperet & anhelaret; alia insuper peregrinatio iniuncta est. Nā quoniam in Germania affectæ, ac perturbatæ in Pontificem reserant, & nouum colloquium ad præfixam diem à Germanicis Principibus indictum: operæpretiū Eugenius existimauit, " Nicolaum ad statutum locum diemque accedere. Ille itaque, quanquam tot antea itineribus profectiōibusque fractus videri potuisset, tamen recens semper & integer animo, nec laboribus vllis aut periculis territus, dū Pontifici modò, & Ecclesiæ, aut cuiuspiam saluti obsequi valuisset, ex Ferraria mouens, iterum in Germaniam venit; adiumentoque non mediocri Pontificis iam apud Germanos labentibus rebus fuit; & quæ à Pontifice mandata erant, quoad eius fieri potuit, integrè atque inuiolatè persoluit.

Vbi verò nihil hisce in locis suâ opus esse morâ

E 3

intel-

*a latim hæc  
Sigonim ca.  
6. in vita,  
Poggini in  
orat funeb.*



b Ann 1439.  
iuxta Onu-  
phrium &  
Sigonium.

c Hec Zenus  
de seipso.

intellexit, Italiam repetens, Florētiā petijt. Nam ex Ferrariā<sup>b</sup> Florentiā Eugenius Concilium transtulerat; Fuit autem hæc extrema legationum suarum, itinerationum, peregrinationumq; finis. Habitauit autem Florētiæ apud S. Spiritus ædem, (sic enim Augustinensium locum Florentiæ vocant) eumq; ibi nos, cū primū ad curiam accessim<sup>9</sup>, commorantem cōuenimus<sup>c</sup> & salutauimus. Habitabat autē satis angustē, & familia ingenua quidem, & optimē honestissimeq; morata & instituta, verum nō lauta nimis & compta; sed modesta omnino, & quæ Præsulis sanctimoniam significaret: Ipse verò maximæ apud omnes venerationi erat, neque quicquam dignius, aut diuinius in ore hominum versabatur.

## CAPVT XIX.

## FIT SVPREMVS SVMMI PONT.

*Pœnitentiarius: estq; exemplo, consilio, & solatio omnibus ad salutem.*

a Succesit  
Vrsino Car-  
dinali. Ita  
Sigonius c.  
7. & Pog-  
gius in orat.  
fun.

PONTIFEX cum illi dignissimum summi Pœnitentiarij<sup>a</sup> cōtulisset locum, ei<sup>9</sup> cōsilio imprimis grauissimis potissimum in rebus maximè omnium vtebatur: neq; eum diligebat & a-

ma-



mabat solum, sed piâ etiâ veneratione colebat; & ubi quicquâ arduum immineret, audire illum antea cupiebat, & ferè omnia Nicolai consilio peragebat. Nicolao verò summę ac singulares virtutes inerant; simplicissima humilitas, præcipuaq; clementia, charitas in omnes, pietasque paterna, fidei & religionis exardens zelus, communi vsu austera & asperam satis ducebat vitam; Nec carnibus vescabatur, nec strato iacebat, Carthusiæ regulam etiam ad extremum inuiolatè seruauit; sacris litteris, posteaquē sese immortalī Deo dedicauit, operā eximiam adhibuit, neq; à sacrorum voluminum, cum per occupationes licebat, lectione cessabat, doctos<sup>b</sup> viros, virtutib. deditos, magno amore prosequabatur, egenisq; & inopibus Clericis opem plurimam ad litterarum studia cōferebat, in pauperes verò oēs, quicquid eleemosynarum poterat, assiduè distribuere consueuerat, affinium suorum neminē secum domi esse volebat, perturbare illos reliquam familiam dicens, ijs, qui illi ministrabāt, salaria mēstrua exhibere solitus erat, ne pro immeritis supplicare, & de spiritualibus illis satisfacere cogeretur, librorum copiosus fuit, quos ferè oēs in morte sacris locis, Monasterijsque legauit.

<sup>b</sup> Studiū & puritas Latine lingue tū resoruit per alumnos B. Nicolai, aliosque. id colligitur ex epist. Philippi.

CAEVT



## CAPVT XX.

*EX CALCULI DOLORIBVS MORITUR Vir sanctus, deploratur ab omnibus, & calculus exsectus in memoriam seruatur.*

*a Sigonius c.  
17 & Pog-  
gius in orat.  
funeb.*

**O** Bijt autem mortem Senis, cū ibi Pōtifex consideret. Cū enim Romam proficisci constituisset Eugenius, Florentiā abscedēs, Senas venit: quē Nicolaus quamprimū secutus, ita vt ingredientem Senas Pontificē comitaretur. pauculos verò post menses, calculi<sup>a</sup> morbo correptus, in horridos ac terribiles dolorum cruciatus incidit; ita vt miserandos cōtinuē clamores emitte-  
tere cogeretur. Et quanq̃ grauissimo & extremo morbo affectus, pati tamen non poterat, vt quicquam sibi de solitā Carthusiē obseruantia mutaretur. Cū verò fatalem sibi ægritudinem hanc fore cognosceret, Sacramentis Ecclesiasticis communitus, sacratissimoque Dominico corpore deuotè atq; affectuosissimè sumpto, de sui corporis sepulchro non immemor, vt in Carthusiensi coenobio, quod prope Florētina vrbem est, conderetur, edixit Ita aliquandiu flebiliter cū laborasset, tandem ægritudinis feruore & cruciatuū horriditate

con-



confectus, immortalī Deo spiritum<sup>b</sup> reddidit. Incredibile dictū est, quanto mœrore, quibus lacrymis atque suspirijs hæc Nicolai mors Pontificem, Patres, curiamque & urbem omnem, populumque compleuerit. Nam & splendorem & decus Ecclesiæ, illum concordi omnes, & consonâ voce iudicabant, & prædicare non desistebant. Cū verò in Basilicam, quæ Augustino Doctōri dicata est, (nam apud religiosos Augustino deditos, Senis locatus erat) exanime corpus delatum est, atque in media Basilica positum; tantus uniuersi populi, omniumque ordinum concursus effectus est manus pedesque deosculantium, ut cōprimere sese coeperint, & vix contineri sacris ædibus possent: foelixque sibi videbatur, cui illum cōtingere licuisset. Cæterū cū prohibēdi foetoris gratiā, (quippe, ut diximus, ad Carthusiæ Florentinum locum ducendum cadauer erat) exsecto vētre, viscera eduxissent; mirum dictū, lapis vastæ p<sup>ro</sup> humano corpore magnitudinis compertus est huius autem forma erat plus rotunditatis quàm longitudinis habens, simillimusque omnino in quantitate anserino ouo videbatur. Apparebat autem ex minutissimis arenulis paulisper concretis in eam magnitudinem deuenisse, quod qui-

*b An. 1443.  
p M. ij. ita  
igonum &  
Ciacom. &  
quidem ann.  
etatis 68. I.  
ta Poggium.*

*S. Antoni-  
um in Chyō.  
par. 2. tit. 15.  
cap. 22. §. 2.*

F

dem



dem diuturno admodum tēpore fieri oportuisse. Physici iudicabant. Experiri etiā pondus eius voluere, & bilibrem illum, vt afferebant, comprobauere; hūc nos ipsi vidimus, manibusq; attrectauimus, & solidissimum experti sumus; ex eo gypseæ plures formæ, ad illius effigiem, conflatae sunt, & instar mōstri ad varia terrarum orbis loca demissæ.

## CAPVT XXI.

*EXEQVIÆ IPSIVS HONORIFICENTISSIMÈ PERAGUNTUR, quibus ipse Romanus Pontifex interest: Et corpus Florentina in Carthusia sepelitur, anima verò in cœlis feliciter gaudet.*

**Q**UOD verò ad funera attinet, exactissima & splendidissima in principe Senensi Basilicâ celebrata sunt. Interq; alia pleraq; hoc illis præcipuum & singulare ac memoriâ dignissimum extitit, quòd Pontifex Maximus Eugenius corā ipse consistere interesseq; atq; ornare funus voluerit. Factum nunquam antehac patrum memoriâ celebratum; Neq; enim Pontificius, & Curiamos habet, vt in Cardinalis funeribus Romanus Pontifex vspiam intersit; neq; patratum antea vllâ

a Idē habet  
Poggini &  
Sigonim. ca.  
17.

ex



ex causa fuisse quispiam antiquissimorum nouerat. Commouere verò Pontificem Eugenium, vt tantum Nicolao decoris & ornamenti impensum vellet, non sanctitas modò & immaculata integritas, gloriâq; atque opinio de illo vniuersi terrarum orbis, & omnium hominū: Sed quòd amplissimis Nicolai de Ecclesia, atque Pōtifice meritis deuinctum & obstrictissimum sese illi arbitrabatur; quippe qui suarum partium indefessus semper ac validissimus fautor & propugnator extiterat: Innumera, quæ inferri detrimēta potuissent, auerterat, suis cōsilijs non vulgaria Eugenio emolumēta contulerat, auctoritateque & præsētia sua incredibiles illi semper fauores, & Principum cæterorumq; hominum studia compararat. Funeralibus egregiè celebratis, Thomas<sup>b</sup> Apostolicus Subdiaconus (qui familię præsidebat, & apud Nicolaum diutissimè manserat, quo illi nemo carior erat) nōnullis ex familia comitib<sup>9</sup> sumptis, corpus ad Carthusiē locum, qui parum Florētia abest, (vt à Nicolao viuente institutū fuisse diximus) detulit, & piè religiosissimeque sepulchro cōdidit, vbi ad hodiernam iacet diē; Anima, vt rectè iudicādum est, in superis gloriosa<sup>c</sup> fœlicitate beata.

<sup>b</sup> Hic postea  
fuit Nicola<sup>9</sup>  
V. Pont. Ro

<sup>c</sup> Lege quæ  
ex Philopho  
postea adiū-  
gentur.



## A N N O T A T I O N E S.

## I. DE IACOBO ZENO, HVIVS HISTORIAE SCRIPTORE, quis fuerit ille?



E hoc viro sic habet Blondus, de Italia Illustrata, regione Octaua, quæ est de Venetijs, quando Illustrium quorundam Virorum mentionem facit.

*Iacobus Zenus Feltrensis & Bellunensis, Dominicus Torcellanus, Episcopi non modò Iurium ciuilib & Pontificij, ac Theologia doctrinâ, sicut eorum decet professionem, abundè pleni: sed eloquentiâ quoq; ornatissimi sunt, ut ei mancipatorum studio peritorum multos atatis nostra scribendo dicendoq; aquent.*

Floruit Blondus anno 1435. iuxta Trithemium, qui regione nona de Marchiâ Taruifinâ differens, sic inter cætera scribit.

*Anaxo seu Planifluuio ad sinistrâ adiacent oppida Venetiâ, Limina, & Aquorin: & superius arduo in monte est Feltrû Ciuitas, Episcopo nunc Iacobo ornata Zeno, non minus doctrinâ, quàm gentis nobilitate conspicuo. Ad dexteram Plani primum hæret oppidulum Madirium: inde mediterraneis Veturium. Superius, ubi Varianus nunc Calorius auget fluuius, est oppidum Tesegæ; eidemq; amni Variano seu Calorio appositæ est Bellunum ciuitas vetustissima, quam Plinius cateriq; scriptores Velunum appellant: eidemq; nunc cum Feltro in eundem coniuncta Episcopatum idem Zenus præest Episcopus.*

De eodem Zeno sic testatur Trithemius de Eccles. script.

*Iacobus Zenus, Patritius Venetus, Episcopus Ecclesiæ Patauinæ, Vir in scripturis sanctis studiosus & eruditus, & secularium literarum non ignarus, ingenio subtilis, eloquio disertus, consilio promptus, & circumspectus, ac multarum rerum experienciâ insignis; scripsit quedam præclara volumina, quibus nomen suum ad Posteròs cum gloria transmissit, &c. Moritur anno Domini 1477.*

Posseuinus pauca de ipso habet, afferens vixisse ann. Christi 1474.

Quòd autem tam Trithemius, quàm Posseuinus ipsum vocent Episc. Ecclesiæ Patauinæ, fieri potuit, ut post Blondi tēpora ad hunc Episcopatum fuerit translatus. Nam alioquin in Dalmatia sub Aquileienf Patriarchatu continentur omnes hi tres Episcopatus,

Fel-



Feltrensis, Bellunensis, & Patauinus. Ita constat ex Notitiâ Episcopatum Orbis Christiani, quam R. D. Aubertus Myræus euulgauit.

*II. Annotatio, de Petro Barbo Veneto.*

Blondus in Italia Illustrata, regione Octaua, sic testatur.

*Alterum verò Pontificem paulò post habuere Veneti ex Condulmaria gente Eugenium 4. cuius gesta per historias nostras Orbi notissima, Pontificibus Rom. qui ante se fuerunt, præstantissimis parem, & aliorum turba multò digniorem eum reddiderunt. Quantum autem ad doctrinam litterarum, quibus hoc in Catalogo primas partes tribuimus, et si Eugenius Pont. nec Iuri, nec alicui scientiæ particulariter perdiscendæ animum adiecit: doctorum Ecclesiæ Oratorum, historicorum, & Latinorum libros omnes & legit assidue, & quo erat mirabili ingenio subtilissimè intellexit. Ornauit autem Cardinalatus dignitate Petrum Barbum ex sorore nepotem: qui adolescens optimus tantâ duodecim hætenus annis humanitate, atque etiam integritate, & simul liberalitate est usus, ut & alter Titus Vespasianus, & quod illi tribuebatur, Delitiæ humani generis sit appellatus. Vir autem factus, titulo S. Marci est ornatus, & patrio cognomine Cardinalis Venetiarum dictus.*

Hæc Blondus: ad quorum maiorem illustrationem ex Onuphrio Panuino pauca adiungam.

*Anno Domini 1440 Kal. Iul. Petrus Barbus Venetus, Protonotarius Apostol. electus Episcopus Ceruiensis, Diaconus Cardinalis S. Mariæ noua creatus est ab Eugenio 4. Pont. Rom.*

*Ann. Dom. 1449. 14. Kal. Ian. factus est presbyter Cardinalis tit. S. Marci à Nicolao V. Pont. Rom.*

*Ann. Dom. 1462. prid. Kalend. Sept. electus est in Pontificem Romanum, dictusq; est Paulus II. Reliqua vide in Onuphrio de Pontif. Roman. & prudenter caue Platinam cauillantem. Obijt idem Pont. R. ann. 1471. 5. Kal. Augusti, ut citatus Onuphrius affirmat.*

Ex hisce consequens est, historiam hanc à Iacobo Zeno fuisse conscriptam ante Christi annum 1462. & post annum 1449.

*III. Annotatio, de historie huius auctoritate.*

Melchior Canus, vir vnde quaque doctissimus, lib. 10. ca. 6. de lo-



cis Theologicis, tres adfert regulas ad fidem alicuius historiae agnoscendam.

Prima est, ex hominum probitate integritateque. quæ res locum habet, cum quæ narrant historici, ea vel ipsi se vidisse testantur, vel ab his, qui viderunt, accepisse. At eiusmodi historicus est Iacobus Zenus, qui ex ore Nicolai V. Pont. Rom. omnia recenset, & in testem vocat ipsum Paulum II. P. R. Petrum Barbum Venetum.

II. Lex siue regula est, ut eos historicos reliquis anteferamus, qui ingenij severitati quandam prudentiam adiuxerunt, & ad eligendum, & ad iudicandum. Quæ lex in ijs rebus locum habet, quas neque scriptores ipsi sunt intuiti, nec à viris fide dignis, qui viderint, audierunt. Hæc quidem regula non quadrat proprie in Zenum, sed in Sigonium, qui sua ex probatis monumentis familiae Albergatiana depromptit. Interim Zeni sapientiam ingeniumque audimus laudari à Blondo Trithemioque: ut de ipsius eruditione dubitandi locus nullus relinquatur.

III. Regula est, Si cui historico authoritatem Ecclesia tribuit, hic procul dubio dignus est, cui nos etiam authoritatem adiungamus. Contrà verò cui Ecclesia derogat fidem, ei quoque nos fidem iure ac merito derogabimus. Porro Zenus Ecclesiæ aduersarius non fuit, sed Episcopus & Lumen Dalmatiæ. Neque quicquam adferri à quoquam potest, quare illi non credamus.

Regulas enumeratas libenter suscipit Antonius Possevinus in sua selecta Bibliotheca lib. 16. cap. 5.

Quod insuper attinet ad Iacobum Zenum de B. Nicolao nostro scribentem; hunc accepi ex Carthusiâ Bononiensi. Ego autem mox eundem in capita distinxi, singulisque capitibus sua præfixi argumenta, ad beneuoli Lectoris maiorem Vtilitatem; scholijs insuper marginalibus, historicisque notis nonnihil illustraui.

#### *IV. Annotatio, de familia Albergatorum.*

Albergatorum genus antiquissimum est, ex quo præstantissimi ac celeberrimi Viri prodierunt. De pluribus paucos recensebo.

1. Antonius I. C. clarissimus, cuius consilia impressa habentur in consilijs Cumani.



2. Lucius Theologus eximius, qui plurima composuit opera Theologica, de quibus F. Cherubinus Eremita Augustinianus in historijs suis, vbi de familia Albergatorum.

3. Vgolinus Episcopus Nouariensis tempore Nicolai 3. Pontificis Romani.

4. Vianesius senior gubernator, & vicecamerarius Romæ, cuius mentionem facit Platina in Paulo 2. P. R.

5. Petrus Gubernator Campaniæ.

6. Dominicus Protonotarius, vicecamerarius, & vrbis gubernator.

Imò Posteriores à Paulo 2. alijsque Pont. Rom. promoti sunt ad summas dignitates, vt Vianesius iunior à Leone X. Nuncius in Hispaniam missus, & alij. Plura Sigonius in vita B. Nicolai, c. 1.

7. Hisce adiungere licebit Reuerendiss. ac Illustriss. Antoniū Albergatum, qui multis munijs publicis, tam spiritualibus, quàm temporalibus cum laude administratis, à Paulo V. factus Episcopus Vigiliarum, Sanctæ Apostolicæ sedis ad partes Rheni, & Germaniam inferiorem cum potestate Legati de Latere Nuncius Coloniam venit Anno Domini 1610. & in hodiernam diem præclaris vestigijs virtutibusque B. Nicolai nostri præclare insistit. Cuius in Germania præclare gesta narrabunt alijsuo tempore.

8. Quæ posterius mihi inquirenti Bononiâ missa sunt, consequentur hic locum suum, ex Italica lingua translata. Itaque Alidosius Historicus (Italus) refert F. Cherubinum dicere infra scripta verba de familia Albergatorum.

*Anno sequenti DCCCC. XXXIII. de nobili familia Albergatorum Bononiensium nate fuerunt in Germania due Illustrissima stirpes ex Gossino & Aurelio Albergatis: qui istis temporibus in Germania morabantur. Primo inde initium habet Baronatus in Visinghe, portans pro insignijs trabem argenteam in campo viridi. Etiam inde originem traxit Baronatus de Castello, habens in armis siue insignijs transversam trabem in campo viridi.*

*Anno DCCCC. LXXXIII. Lucius Albergatus Bononiensis, magna doctrina homo, & multarum linguarum peritus: in quibus mirabilis fuit, & admodum Catholicus: scripsit multa opera pro Ecclesia Dei; & inter alia,*



1. De Virginitate libros tres.
  2. De lapsu Angelorum libros quinque.
  3. Questionum super sapientiam Salomonis libros sex.
  4. Super Pentateuchum præclaros commentarios, in quibus expontur mirabilia opera Dei.
  5. De Ecclesia & Religione libros quatuor.
  6. De Vltimis temporibus, & tribulatione Mundi libros tres.
- V. Annotatio, Quibus in Carthusiis B. Nicolaus gesserit officium Prioris seu Superioris.

Hic primò annotandum ex Zeno cap.2. quòd per integrum decennium pluribus Monasterijs præfuerit. Secundò est obseruandum ex Sigonio cap.2. quòd Florentiæ Bononiæque Prioratum administrarit. Tertiò ex certis monumentis haud obscurè constat, ipsum Romæ ac Mantuæ hoc munus obijisse. Sic etenim ex Chartis Capituli generalis (quod singulis annis in Ordine Carthusiano celebratur) sedulò indagauit V. P. Bartholomæus Senensis, Florentinæ Carthusiæ hoc tempore Prior dignissimus.

Anno igitur Domini 1407. B. Nicolaus à Capitulo generali constituitur ex Priore Bononiensi Prior Romæ, & Ordinis totius generalis Procurator, hisce ipsissimis verbis: *Priori Bononia ad suā instantiam, ad Ordinis utilitatem & honorem fit misericordia*, (id est, absoluitur ab officio) & *præficimus eum in Priorem S. Crucis in Hierusalem Romæ: cui & iniungimus officium Procuratoris Ordinis* (hæc singularis dignitas est in Ordine nostro.)

Item in eadem eiusdem anni Charta hæc leguntur.

*Si quis indiget scribere ad Romanam Curiam, licitè poterit D. Nicolao quondam Priori Bononiæ, sed nunc Priori S. Crucis Romæ: quem etiam præficimus in Procuratorem Ordinis.*

Hic nota quòd Carthusia S. Crucis in Vrbe Romanâ sit translata post ann. Domini 1560. à Pio IV. Pont. Rom. ad thermas Diocletianas, vocataque Domus S. Mariæ de Angelis.

Porrò B. Nicolaus noster ex Priore Romano ordinatus est primus Rector Carthusiæ Mantuanæ, per Capitulum generale, tali formula verborum ann. 1409.

*Priori Romæ ad suā instantiā fit misericordia ab officio Prioratus & Procurationis Ord. & quia Magnificus Dom. Mantuan. valde seriò scrip-*

*fit*



*fit Capitulo generali, pro construendo Monasterio Ordinis nostri, ordinamus, ut sine notabili dilatione se transferat ad Praesentiam eiusdem; & si viderit, singulis consideratis, quod vult manum apponere cum effectu, praeferimus eum ibidem in Rectorem, &c.*

Hic nota quod Carthusia Mantuana constructa sit à Ioanne Francisco Duce Mant. qui ann. Domini 1407. praesse coepit, obiitque anno 1444. Ita refert Volaterranus lib. 4. Geographiae in rebus Mantuanor. Dies emortalis fuit 24 Septembris, ut constat ex charta cap. gen. nostri.

Mansit autem B. Nicolaus Mantuae in hoc officio annis septem, singulis annis à cap. gen. confirmatus. Tandem cum anno 1416. Carthusiae istius edificium esset absolutum, ipse quoque ab officio absolutus est, hisce verbis in charta cap. gen. *Rectori prope Mantuam sit misericordia, ad suam magnam instantiam, & ad honorem Sanctissimae Trinitatis, ad instantiam quoque Magnifici D. D. Mantuani (qui omnia, quae promisit, abunde adimpleuit,) eandem Plantationem in nomine Domini Ordini nostro incorporamus, volumusque, ut Domus S. Trinitatis prope Mantuam nuncupetur, &c.*

Ab hoc igitur tempore reuersus est Bononiam ad domum Professionis suae, videturque secundo eiusdem Carthusiae Prior, vel à Conuentu electus, vel à Visitatoribus institutus: Anno siquidem sequenti, id est, anno 1417. consecratus est Episcopus Bononiensis.

*VI. Annotatio, de obitu B. Nicolai.*

Quamuis Iacobus Zenus nullum annum diemque exprimat: certissimum tamen est, B. Nicolaum obiisse ann. Domini 1443. 9. Maij. Id si Carolus Sigonius, & Alphonfus Ciaconus, atque Onuphrius Panuinus tacerent, antiqua ordinis nostri monumenta sufficienter loquerentur. Indubitatum etenim habemus ex chartis cap. gen. ipsum ex hac vita migrasse anno

Domini M. CD. XLIII. 9. Maij.

Hiscetandum erit.





ORATIO  
IN FVNERE  
ILLVSTRISSIMI AC  
REVERENDISSIMI PATRIS

B. NICOLAI ALBERGATI,  
CARTHVSIANI, EPISCOPI BONONIENSIS,  
ET CARDINALIS S. CRVCIS,

*QVI EX CALCVLII DOLORE OBIIT SENIS IN  
Hetruriâ, anno Salutis M. CD. XLIII. VII. Idus Maij,  
Sepultus Florentiæ apud suos Car-  
thusianos;*

HABITA A POGGIO FLORENTINO, VIRO  
ISTIVS SECVLI ELOQVENTISSIMO DO-  
ctissimoque:

INVENTA EST AVTEM (IN VETERI MS. EXEMPLARI,  
*inter alia monumenta Carthusia Colonienfis: & cum duobus alijs exemplaribus  
diligenter collata, correctâ, ac restituta à  
F. G. Garnefelt.*

LECTORI BENEVOLO.



*Um reperissem in Carthusiâ nostrâ Orationem hanc fu-  
nebrem, agnoui ex stylo ab homine eloquentissimo i-  
psam fuisse conscriptam: Nullius tamen authoris no-  
men adiunctum erat: ipsum etiam exemplar admodum  
vitiose ac illegibiliter descriptum Gallico charactere.  
Nactus tandem alia duo exemplaria, Vnum ex Nobili  
Albergatorum familiâ Bononiâ; alterum ex Carthusiâ Bononiensi,  
vidi Poggium Florentinum esse authorem. Contuli igitur ea mutuò, &  
quod*



quod plenius correctiusq. videbatur, excudendum tradidi, & synopses causâ pauculas in margine addidi annotationes. Quantum attinet ad Poggium, hunc Trithemius hisce verbis depingit:

Poggius Florentinus, Philosophus & Rhetor facundus, Græco & Latino sermone ad perfectum instructus, literarum Apostolicarum multis annis scriptor disertissimus, &c. Claruit in Concilio Constantiensi personaliter sub Sigisimundo Imp. anno Domini M. CD. XX.

Hæc ille, qui ipsius tractatus recensens, testatur eundem varias orationes composuisse. Huc accedit, quod Ant. Possevinus asserat, hunc Poggium exarasse funebrem laudationem in obitu Nicolai; sed non exprimit, quisnam fuerit iste Nicolaus, an Cardinalis Albergatus, an alius quispiam. Exordium orationis est; Si ciues præstantissimi, &c.

Sed nostræ Orationis, quam exhibemus, aliud initium est. Idem Possevinus scribit, Franciscum Philelphum composuisse vitam S. Nicolai. Vbi etiam nihil apposuit ad personæ distinctionem. Sed non potui hanc vitam adipisci, ut viderem, an esset nostri Albergati, an Tolentini, aut alterius Nicolai; alioquin lubens publici Iuris fecissem.

Hæc cupiebam præmonuisse. Vale Opt. Lector, & ora pro me ad DEVM.





## ORATIO FVNEBRIS.



In maximo dolore; præstantissimi Pâtres, & acerrimo luctu, quem ex optimi, & sanctissimi viri morte suscepi, hoc mihi solatium mœroris videtur tribui, quod & ea proculdubio sim dicturus, quæ summo omnium consensu, summâ approbatione, summo favore accipiantur; & in virtutibus amplissimis tanti viri commemorandis, & si non debitum, at qualem facultas ingenij dabit, honorem sim vitæ omni cum laude exactissimæ præstiturus; Accedit, quod maximè ad viuentium spectat vtilitatem, vt in excellentium virorum exemplis, & vitâ recensendis, multi ad laudem & gloriam, ipsorum memoriâ virtutum, incitentur: conferunt enim non parum præclaris ingenijs gesta priscorum ante oculos posita: quæ nobis subdunt tanquam calcar & incitamenta quædam ad eorum, quos laudari videmus, imitationem. Equidem existimo, maiores nostros & orationes, quæ olim in præclarorum funeribus habebantur, & imagines, quæ priscorum memoriæ dicabantur, non tam defunctorum laudes & gloriam ostendere, quàm posteris consequendæ virtutis eorum exempla nobis præbere voluisse. Quamquam huic nostro omni laudè ornatissimo viro nullius gloriâ, nullius laudatione opus est, ad eius vitam in hoc funere exornandam; Neque hoc dicendi munus tanta virtus desiderat, quæ omnem orationem, quantumvis amplissimam, superare videtur: sua illa merita, sua virtutum ornamenta, sua sanctissimè acta vita, mores castissimi, sua in omnes pietas, sua religio adeò illum ornauit, vt nullo sit opus externo adiumento ad laudem hominum consequendam. Quo mihi facilius erit orationis cursus, cui datur ea materia ad dicendum, vt non verbis ornare hunc hominem, sed tantum, quæ ab eo acta sunt, referre satis esse pro eius meritis videatur. Sed profectò integerrimi ornatissimi quæ viri vitam explicaturus, dum eius in me, dum vixit, charitatem, dum in doctos viros beneuolentiam considero, dum eius virtutem, humanitatem, pietatem mente reuoluo, dum, quo præsidio Ecclesia, quo

auxi-



auxilio inopes, quo adiumento boni sunt spoliati, animaduertos; nequeo vlllo modo, quæ vltro etiam mihi inuito in eius commemoratione effluunt, lachrymas continere. Quis enim tam inhumanus, tam durus vel ferreus potius esset, qui in talis tam laudati, tam desiderati communis Patris memoriâ non moueatur animo, & ad fletum prorumpat? Quis est, qui cum eum nobis, qualem secula rara ferunt, creptum videat, non mente & animo ingemiscat? Subtractus est nobis vir vitâ, & moribus singularis, cui parem ætas nostra non protulit; Interijt, quanquam non interijt, sed ad meliorem profectus est vitam, vir summa prudentia & sapientia præditus, vir religione insignis, pietate præcipuus, excellens integritate vitæ, de omnibus optimè meritus. In quo nullorum; quamuis perspicaces oculi vllum vnquam locum maledicto inuenire potuerunt. Facultatibus egenos, subsidio imbecilles, consilio plurimos, opibus singulos, omnes patrocínio subleuabat, vt veluti parentem vnicum bonorum, ac calamitosorum refugium lugere & gemere compellamur; verum quoniam tempus requirit, vt ad eius laudum commemorationem posthabitâ tantæ iacturæ querelâ veniamus, complectar paucis vitæ institutionem, & mores eius: vt & ea, quæ ipsi nostis, tanquam in vestro conspectu, meis verbis postponantur; & quibus id animi est, eius viri proposito exemplo, occasio detur ad idem virtutis iter ingrediendum. Natus <sup>a</sup> est vir iste insignis Bononiæ, vrbe celeberrimâ atque antiquâ, & quæ inter Italiæ præclaras vrbes facillè adnumerari queat, honestis parentibus, & haud obscuro loco natis; sed qui filio per omnem vitam, quocumque esset in statu, possent esse ornameto. Cum pluribus annis luri ciuili operam dedisset, plurimumque in ea scientia profecisset: tandem cum legisset huiusmodi sapientiam apud Deum stultitiam esse, spiritu Dei ductus, qui eum in suum obsequium disposuerat segregandum, abiectâ legum curâ; relicto seculo, cōtempso <sup>b</sup> patrio censu, ordinem Carthusiensium est ingressus: eam professus religionem, quæ arctissima omnium iudicatur. Sunt plures viuendi formulæ propositæ his, qui se Dei cultui dicarunt: è quibus leuiiores quædam, & ad facilitatem vitæ propensiores existimantur; non leuem aliquam, non facilem, non vitæ & communibus moribus indulgentem e.

<sup>a</sup> Ortus B.  
Nicolai Al-  
bergati.

<sup>b</sup> in altero  
M.S. erat  
(paterno  
consensu)  
Fit Carthu-  
sianum Bono-  
niæ.



*Fit Prior  
Bononiæ.*

*Fit Episcopus  
Bononiensis.*

legit, sed illam potissimè, quæ est ardua inter omnes, difficilis, austerà, seueritatis & disciplinæ arctioris plena; magna proculdubio mutatio animi, maior corporis, quòd à licentiâ quadam vitæ communis ad tam laboriosum viuendi genus, ad tam insuetum onus religionis ascendit: non solum Religiosorum vitam<sup>o</sup> sumens, sed eam, in qua persistere difficillimum existimamus; & certè ea religio admodum grauis & toleratu difficilis putatur, ita paruis terminis circumscripta, vt nisi speciali dono Dei suffulti, in eâ diutius nequeant persistere. Sed omnia sunt volentibus facilia. Nihil tam durum, tam asperum, Christum recta via sequentibus, quin leue & molle conantibus fiat. Breui tempore effecit, vt omnes difficultates superaret, omnem victus austeritatem obedientia & patientia vinceret, compulit non multò post vitæ illius integritas sui Monasterij Religiosos, vt illum eligerent in suum superiorem. Quo in regimine ea fuit modestia, prudentia, temperantia, vt ab omnibus ipsius virtus celebraretur. Et quamuis in monasterio sedulus, atque abditus viueret, cultui diuino & gubernandi curæ intentus; virtus tamen & sanctitas claudi minimè poterat; Sed Bononiam vsque horum certa vestigia perlata omnes ciues in admirationem stuporemque perduxerant. Ipsi, quibus præerat, absque vlla inuidia (quam vitare difficile his, qui præfident cæteris) virtutes eius admirantes efferebant. Neque verò mirum, facile est eius laudem consequi illis, qui non præesse cupiunt, sed prodesse. Hoc vitæ curriculo, hac viri fama permotus Bononiensis populus, cum in defuncti Episcopi locum successor quæreretur, dissidente parum clero, (alij alium postulabant) vno consensu, vna mente in suum Pastorem, approbante clero, elegit. Permagnum sanè singularis hoc testimonium virtutis fuit, vniuersum populum sua sponte, nemine rogante, nullo dissentiente, (nescio cuius voce illum nominante, Dei voluntate emissâ) è vestigio in eius electionem exarsisse. Sperabant enim illum vnicum esse futurum Antistitem, in quo salus omnium sita esse videretur, cuius ope boni subleuarentur, & opprimerentur mali: qui mores lasciuientes ad meliorem frugem, & vitia posset ad virtutes traducere. Accitum ad urbem, per alterius rei simulationem, ignarum populi voluntatis, multis precibus omnes ciuitatis

ordi-



ordines hortati sunt, etiam reluctanter, ne onus sibi iniunctum recusaret. Ille multum diuque cogitans, quanti esset laboris ac periculi, animarum curam medelamque suscipere, quamve esset graue huiusmodi pondus illis, qui animarum salutem ex tali dignitate, non quæstum quærunt: cessit vix tandem vir optimus populi voluntati. Attamen ea conditione assensus est, primum vt omnia bona & Castella, quæ distracta erant, Ecclesiæ restituerentur, tum ne quid expenderet pro confirmatione Pontificis; sibi enim nummos non esse; Quæ verò ab Ecclesia subministrarentur, in alios vsus, hoc est, in pauperum alimenta distribuenda sibi esse assuecrat, quod vtrumque est vir sanctissimus assecutus. Nihil eo honore, nihil ea dignitate elatus, nulla in re vitam pristinam mutauit, eadem humilitate, eadem continentia, eadem vitæ austeritate vixit, victu tenui nullo apparatu contentus. O virum optimum, & cunctis seculis summis laudibus celebrandum! O virtutem raram, & quam rariores homines sequuntur! Recensete alios, & illorum vitam inspicite, qui simili sunt præditi dignitate; quem mihi dabitis, qui eiusmodi gradum non appetat, quærat, enixe procurret, cælum, terramque defatiget, vt illum consequatur? Quotumquemque reperietis, qui non infletur animo adepta dignitate, & intumescat? Qui dignitatem non habeat quæstuosam, qui non voluptatibus plus solito, & quieti corporis indulgeat, qui non deterior in diem fiat? At hunc nostrum virum sanctissimum omnia prioris vitæ seruante vestigia vidimus, nulla in re immutatū, nullā in partem à cura populi sui oculos deflectentem. Primum in id maximè multis reluctatibus incubuit, vt clerus, qui ad eam diem dissolutior fuerat, non solum vestibus, sed moribus quoque compositioribus vteretur. Tum populum à lasciuiā ad frugalitatem deflexit, non solum verbo, sed exemplo: quod plurimum valet ad animos hominum commouendos. Inprimis id statuit, etiam renuente in multis Pontifice, vt Iudæi certo signo à Christianis dignoscerentur. Religiosum quemdam ordinis Minorum ad reddendum depositum mulieri viduæ, quod negabat, re certis coniecturis cognita, licet reluctanter coegit. Pauperes, qui egestatem erubescabant, occultè perquirens, frumento aut pecunia clanculū domū missa subleuabat: virginibus egenis dotem subministrabat,

*Quibus conditionibus  
susceperit B.  
pietatum.*

*Nihil fit honore illo elatior.*

*Reformat  
subditos suos  
in omni statu.*

*Omnis  
Pater beneficus existit.*

con-



Dictum  
Platonis.

Mittitur in  
Galliam pro  
pace consti-  
tuenda.

Plurimum  
commenda-  
tur ab An-  
glis.

confluentibus vndecunque mendicis victum publicè largiebatur. Id agebat, vt omnes intelligerent, non vtilitatem aliquam, aut priuatum commodum ex Ecclesiâ, sed rationem pauperum, populi correctionem, Sacerdotum emendationem, ab illo esse susceptam. Erat in corrigendis superiorum temporum moribus, tum mitis, tum seuerus, prout vtilitas ouium sibi concessarum postulabat. Denique paruo tempore effecit, vt longè alius populus, alius clerus esse videretur. Etenim facilè est illi ceteros corrigere, qui sibi ipsi bene viuendi legem indixit, facillimèque in officio continentur homines ab eo, qui seipsum continet. Præclarè enim à sapientibus scriptum accepimus, *quales Principes in Republicâ fuerint, tales reliquos esse solere*. Hac autem laude, his virtutibus florentem Martinus Pontifex aptissimum iudicauit, qui ad componendam pacem inter Franciæ & Angliæ Reges legatus mitteretur. In Gallias igitur profectus est, & cum vtroque Rege sæpius collocutus, ad pacemque adhortatus, eos in admirationem sui attraxit; nulla munera, nulla dona accepit, sed solitam suam continentiam modestiamque seruauit. Et eum se tum vtrique Regi, tum etiam omnibus maximè vitæ continentia, grauitate, ac prudentiâ probasset; tamen in tanta sententiarum diuersitate difficilè fuit concordiam statuere; Id tamen egit, vt ob suas virtutes tam Gallis, quàm Anglis relinqueret desiderium sui, & à singulis vir rectissimus atque optimus putaretur. Re infectâ Bononiam redijt. sensi ego, qui in Anglia tunc morabar, quanti à Rege fieret, quanti virtus eius & sapientia æstimaretur ab omnibus, quantaque cum omnium commendatione munus sibi iniunctum obijisset. Prædicabatur ab his, qui à Rege veniebant, continentia huius, innocentia, integritas, religio: & hunc vnum ad se missum aiebant sine ambitione, sine cupiditate: in quo veræ sanctitatis specimen eluceret; Etenim facillimè humana contemnit, qui Christum rectè sequitur: neque externis, sed suis fultis bonis, nihil extra concupiscit, virtutum fretus conscientia. Peruenerat ad Martinum celebris harum virtutum fama, multorumque sermone eius laus indies increbrescebat. Et quamuis antea certior factus erat, hunc esse vnum, quem laudabant omnes, cuius virtutum exempla extollebant, in quo nulla Inuidia ad carpendum

locum



locum inuenerat; tamen hac legatione prudentissimè obitâ, & moribus sanctissimis ductus, cum designauit, nullius precibus, nullius intercessione, sed sua sponte Sanctæ Romanæ Ecclesiæ Cardinalem. Hoc ignotum ei esse voluit, quoad Romam (accerfuerat enim illum per alterius negotij speciem) veniret; cum iam prope urbem esset, rem illi significari curauit. nulla lætitiâ, nullo gaudio, nulla elatione motus, eodem, quo antea, vultu permansit: vt palam fieret, humani fastigij insignia parui ab eodem existimari. Honorem illum suscepit, ne beneficentia in se Pontificis contemnere videretur; Nihil ex eo ad virtutem, ad vitæ molestias multa addi cōspiciebat: vitam ita deinceps instituit, vt & dignitati cōsuleret, & Religioni; De priuata vitæ austeritate nihil mutauit, exteriora quædam auxit, quæ ad cultum spectarent, & tuenda tantæ dignitatis ornamenta; eadem integritas, eadem continentia, eadem pietatis officia, eadem benignitas permansit: & quod erat illo fastigio dignior, eò se magis indignum existimabat; nulla pompa, nulli fastus, nullæ opes impedimento fuere, quò minùs semper omnem vitam puram immaculatamque præberet. Quicquid dignitate aut austeritate poterat, ad præsidia hominum conferebat. Per magna quidem inerat patientia & æquanimitas, ita vt summam modestiam, summam temperantiam, summam benignitatem semper ostenderit. Nemini vnquam nocuit, nemini vnquam maledixit, nemini est iratus; In diuitijs paupertatem, in dignitate humilitatem, in fastigio tanti honoris pristinam humanitatem seruauit. Quid loquar de liberalitate, vel, vt rectius loquar, de charitate, qua egenis & mendicis est opitulatus? Nolo hanc eius præcipuam laudem pluribus verbis efferre, quoniam, quæ Christi causa facta sunt, non humanam gloriam quærunt, sed præmia æterna. Sed mihi de ratione vitæ huius integerrimi hominis dicenti Imago eius ante oculos obuersatur, quæ pro eius religione, & sanctitate vetat, me in huiusmodi oratione esse prolixum. Nam quæ ab eo acta sunt, ait se velle potius Dei, quàm hominum testimonio comprobari. Non enim ad inanem gloriam, non ad vulgi pompam, non ad aliquem fastum se asserit, sed ad veram laudem, ad honorem sui Creatoris, ad immortalis Dei commendatio-

*Fit Cardina-  
lis S. R. E.*

*Permanet in  
dignitate &  
que humilis.*

H

nem,



N B.  
Authorem  
huius ora-  
tionis.

Secundo mi-  
titur in Gal-  
liā Nancini  
pacis.

Eugenius  
Pont. Mar-  
tino succe-  
dit.

nem, vitam & mores suos composuisse; Nihil se quasivisse, nisi ut opera sua illi accepta essent, qui novit abscondita cordis. Hanc vero seculi inanem gloriam, semper hunc populi plausum contempsisse, quæ sunt potius ad viventium consolationem, quam ad defunctorum salutem comparata. Cuius voluntati licet parendum esse videatur, tamen aliqua ex parte meo desiderio, & ipsius in me meritis satis esse faciendum iudicavi. Cum igitur sanctissimi viri virtus summo in honore, magnâ in reuerentia apud Martinum Pontificem esset, cumque eum omnes velut exemplar honesti intuerentur, fama vero virtutum apud omnes esset vulgata, Legatus missus est Venetias ad statuendum pacem inter Ducem Mediolanensem, ac Venetos, Florentinosque, quos inter acre bellum vigeat; & recte ad pacem quærendam electus est is, qui pacis homo erat, & eam præ cæteris rebus salutarem mortalibus esse censebat. Quâ confectâ, licet postmodum conditiones non servarentur, & ob id bellum instauraretur, Romam reuersus est. Increbrescentibus belli malis, cum maiora discrimina imminere viderentur, denuò ad eandem pacem procurandam à Pontifice destinatur; cuius in tractatu cum sex menses consumpsisset, demum eius exhortationibus & prudentiâ Ferrariæ confectâ pace, ad Martinum (is tunc Ferentinum pestis evitandæ causâ secesserat) rediit, summâ omnium benevolentiam. Erat Martino admodum cordi Galliæ pax: ad hanc rem, (si quo consilio aut humana ope componi posset) procurandam, hunc optimum virum esse accommodatissimum ratus, rursus ad Galliam Legatum destinavit; sed antequam Italiâ excederet, Pontifex obiit diem. Huic cum successisset Pontifex Eugenius quartus, iter suum & legationem susceptam conficere iussus, biennio apud Gallos permansit. Non vilior eum iteratus aduentus (ut plerumque contingere solet) reddidit, sed admirabiliorem; virtus enim quò diutius tractatur, eò magis placet, præsertim nulla offensione interrupta. Multa itinera in diuersa loca confecit, multos subiit labores, cum sæpius ex morbo laterum & calculo maximè torqueretur. Sed virtute & constantia animi, infirmitates corporis superans, vtrumque Regem sæpius est allocutus, exhortans ad concordiam, & ad deponendam ambitionem; multa consilia Principum, & conuentus ha-

buit,



buit, plurimas consultationes, in quibus multum consilij ostendit, multum auctoritatis ad rei confectionem; bellorum pericula ante oculos proposuit; quot, quantæque calamitates vtrique Regno prouenissent, recensuit; sanctorum Patrum præcepta, sapientum virorum consilia, singula omnium scripta & sententias, quæ eam in rem conferre videbantur, ad permouendas mentes hominum enarrauit. Sed gloria, ambitio, cupiditas, honor sæculi cum inter se certarent, & communi bono obstarent, infecta pace abiit. Sed ita abiit, vt Regum vterque, & qui his aderant, profiterentur, nunquam se ei viro prudentia, fide, sanctimonia, vitæ integritate parem vidisse. Eadem enim & priori par integritas, abstinētia, continētia legationis fuit. Regū & cæterorū munera ab eo contempta; nihil horum appetijt, quæ alijs præclara & pretiosa videntur: satis sibi esse putans, licet operam perdidisset, se boni viri officia omnia in eo legationis munere præstitisse. Erat amplior dignitas, sed cupiditas minor. Nihil sibi præter honorem & laudem Pontificis reportandum existimauit. Et quidem cum multis pompa & apparatu rerum ac magnificentia sæculi inferior videretur: virtute tamen & continentia superior omnibus erat, magisque in eo humilitas admirabilis erat, quam in cæteris ornatus aut rerum cultus exterarum. Virtutum namque comitatu contentus, ea negligebat, quæ speciosa vulgus ducit. Rectè enim, vt Bias ille prudens, *omnia secum ferebat*, nullius exterioris cultus adminiculo egens. Non tamen obsoletam secum familiam habuit, sed quæ satis culta esset, & plus honestatis, quam splendoris circumferret; ita vt & contemptum fugeret, & superfluitatem. Ex Gallia rediēs, ex Pōtificis præcepto Basileam proficiscitur: vbi cum multos tumultuantes aduersus Pontificis sedisque Apostolicæ auctoritatem comperisset, neq; popularis infania reprimi a se posse videretur, Florentiam venit, ad quam Eugenius post discessum ab vrbe se contulerat. Inde tertio legatus in Galliam redijt præscripto Pontificis, qui pacem eorum Regum perutilem populo Christiano conspiciebat. Erat omnium opinio, aut huius viri sapientia & virtute, aut nullius alterius ope pacem eam esse futuram; nam is solus cum neutri parti faueret, tantum enitebatur, quantum communis vtilitas postulabat; nul-

Maximi estimatur à  
Franci Nicolam.

Disum Biā  
tis, Græcie  
sapientis.

Venit Basi-  
leam Nico-  
lam.

Tertio it le-  
gatus in Gal-  
liam.



*Iterum mittitur Basileam.*

*Mittitur legatus ad Albertum Regem Rom.*

*Fit maior Penitentiarum Pontificis.*

la affectione priuata, nulla beneuolentia mouebatur. Erat liber in consulendo animus, in decernendo æquus, nihil à recto declinans. Ibi consilio vtriusque gentis habito, communiq̃e desperata (propter diuersas sententias) pace, Ducem Burgundiæ, qui antea Regi Franciæ infensus erat, in gratiam Regis communemq̃e beneuolentiam reduxit. Quæ res & statui regni, & Regi plurimum conduxit. His actis summa cum laude Florentiam cum reuertisset, denuò Basileam mittitur, si qua ratione aut sanari, aut reprimi posset eius auctoritate multorum temeritas, qui contra Romanum Pontificem insurrexerant; Sed superante & conualescente in diem stultitia, ac nequitia eorum, qui pacem Ecclesiæ peruertere nitebantur, relicto malignantium conuentu, venit Bononiam, quò Pontifex ierat. Cùm autem postea celebrandi Concilij gratia, ad quod Græci venturi erant, Pontifex Eugenius Ferrariam concessisset, in Germaniam ad Albertum Romanorum Regem, qui erat Nurembergæ, legatus mittitur, ad agendos conuentus Principum Germaniæ: ad obuiandum schismati, quod postea Basileensium vesania confecit. Hic multa in eo conuentu locutus, quæ ad deterrendos homines à schismate Ecclesiæ pertinebant, hortatusq̃e ad Pontifici solitam fidem seruandam, Ferrariam regressus, postmodum mansit in curia, pauloque post à Pontifice in locum Cardinalis Vrsini (qui maior poenitentiarius erat, diemq̃e suum obierat) successit. Quo in munere summa optimi viri piissimique officia præbuit, id sibi munus demandatum arbitratus, vt salutem quæreret eorum, quibus Dei gratia lucem poenitentiae tribuisset. Mirum fortasse nonnullis videri potest, cùm tot Cardinales essent in curia, quibus hæ legationes tam variæ demandari potuissent, cur hic solus potissimum eligeretur: Sed erant in eo permulta, quæ ipsi beneuolentiam hominum conciliabant, & præclarum reddebant apud omnes. Primum, summa religio, summa integritas, & consummata sanctitas morum, cùm nihil in eo reprehendi posset: tum per omnem vitam temperantia & continentia singularis. Doctrina præditus erat ac scientia rerum plurimarum, vt viris doctissimis æquari posset. Erat in eo denique agendorum vsus ac experientia, quæ in eo summam prudentiam efficiebant. Accedebat consilij grauitas, & ani-

mus



mus in consultando omni passione vacuus. Auctoritas quantum in vilo homine esse potest, virtute & bene agendo contracta, mores probatissimi, ætas prouectior, nullo vnquam tempore vllâ vel paruâ vitiorum labe notata. In negotijs tractandis ac perficiendis sapientissimus habebatur. His virtutibus addebatur humanitas quædam & mansuetudo, quæ eum summè gratum omnibus reddebant. Dignè ergo eius operâ in rebus arduis Pontifices utebantur: cum non ad quæstum aliquem, sed ad laborem officiosum, nō ad propriam, sed ad communem vtilitatem se mitti arbitraretur. Etenim ex his, quæ ab eo in officio legationum concedebantur, nullum emolumentum prætendebat, gratis condonabantur omnia ab eo, qui didicerat; *Gratis accepistis, gratis date.* Bona Ecclesiæ Bononiensis, quæ ipsi à Pontifice credita erant, secundum canonicas sanctiones distribuit, maiorem partem in vsus pauperum & ædificiorum reparationem distribuens. Nam domos Episcopi instaurauit, & auxit pro dignitate Ecclesiæ & Urbis. Domum quoque in vrbe, magnâ ex parte construxit iuxta Ecclesiam S. Potëtianæ, in qua & habitauit remotus à strepitu populari, dum Romæ vixit; Parentibus, aut fratribus, aut alijs ex suo genere nihil ex bonis Ecclesiæ tradidit, asserens se dispensatorem à Deo, non largitorem esse constitutum. Familiam habuit honestam, quæ & honestatem seruaret, & contemptum vitaret: summam seruans in omni statu moderationem. Cibi fuit parcissimi. Nunquam post aditam religionem, neque in infirmitatibus, quibus grauabatur sapius, neque extremo vitæ tempore carnes comedit; vino utebatur, quod satis esset ad vitæ sustentationem. Religionis normam immaculatam seruauit, eam religionem sequens, quæ à Beato Iacobo Apostolo scribitur esse, *immaculatum se custodire ab hoc sæculo.* surgebat media nocte, orationi vacans; lineis utebatur vestimentis, cum semper cilicio interiùs vteretur, ac recubans in stramentis; sacræ Scripturæ continuum studium impertiebat. Cū quid otij ab oratione & negotijs publicis superesset, humanioribus quoque studijs tantam operam dedit, quantum sacrarum litterarum dignitas patiebatur. vitam hanc cum tanquam peregrinus & aduena transegisset, nihil in eâ aut spei aut momenti ponens, mortem quoque contempsit, cum se ad meliorem sciret vitam

*Sim præla  
re virtutes  
summas  
recensentur*

*Matth. 10.  
Quaratione  
ecclesiasti-  
cos reditus  
impenderit.*

*Iacobi 1.*

*Austeram  
semper du-  
xit vitam.*



*Laboret cal-  
culo, & ani-  
mam Crea-  
tori reddit.*

*Exequijs i-  
psius interest  
Eugenius  
Pontifex  
Rom raro  
exemplo.*

*N.B.  
Authorem  
huius ora-  
tionis.*

*Iudicia Dei  
abyssus mul-  
ta, & iu-  
stissima sint.*

profectorum; & cum summo dolore torqueretur ex calculo, qui postmodum ad libræ pondus in eo repertus est, tanquam sciens extremum sibi diem instare, & medicos cōtempnit, & dolores immensos summa patientia pertulit, agens semper gratias Deo, qui ipsum etiam in extremo Spiritu exerceri ad patientiam vellet. Deficiente natura, animam Deo reddidit, nihil de rebus externis curas, nisi ut & familiæ rationē haberet, & pauperū meminisset: obiit Senis sexagesimo octavo ætatis anno. Exequiæ eius in maiori templo celebratæ: quibus Eugenius Pōtifex, qui sanctissimum virum vnicè dilexerat, adfuit. Commendari profectò digna est, tum cæteris in rebus, tum in hoc maximè Romani Pontificis pietas, qui quod antea rarò auditum est, huic vni præstitit. Annos iā quadraginta in Romana curia sum versatus, vltra quinquaginta Cardinales mortem obiisse memini: nullius vnquam funeri Pontifex vllus interfuit; At & Eugenij egregia virtus, ac defuncti merita postulare videbantur, ut in eius funere vetus consuetudo intermitteretur. Itaque & erga viuum suam benevolentiam ostendit, & tali honore mortuo præbuit virtutum suarum testimonium sempiternum; laudanda est à nobis semper Diuina prouidentia, & in omnibus, quæ nobiscum agit Deus, gratiæ sunt agendæ: patienter verò ferenda, quæcumque eius sapientissimo nutu, licet nobis incognito, videntur accidere. Veruntamen cogor aliquando non solum admirari, sed etiam conqueri, parum videri prospicere tantam sapientiam rebus humanis, videmus enim tot nefarios homines, tot scelestos, (quorum opera in solam perniciem gētium spectant) versari in terris prospera valetudine, diutiusque viuere, quàm ferat communis salus: quos vtilissimum foret orbi aut nunquam natos, aut quàm primùm interiisse; eos verò, quorum est vita nobis salutaris, qui opere & exemplo profunt, in quibus multorum refugium consistit, aut morbo à negotijs impediri, aut citius eripi nobis, quàm ratio Reipublicæ patiatur. Quamobrem pluribus verbis deslerem huius singularis viri mortem, deplorarem publica incommoda, lamentarer priuata multorum damna, & communem bonorum parentem subtraham nobis quererer, nisi censuram Dei timerein: & nisi vererer, ne videremur eius gloriæ, qua nunc in cœlis fruitur, inuidere. Tā-

tum



tum dico, bonos omnes patre optimo, egenos sanctissimo, Eccle-  
 siam Romanam summo viro, sedem Apostolicam prudētissimo  
 consultore, esse hoc talis viri obitu spoliata: qui splēdorem Ro-  
 manæ Curia, laudem Religioni, dignitatem suo ordini afferebat.  
 Sed postquam ita visum est illi, cuius cōsilia sunt aterna, nos quo-  
 que in eius interitu consolemur, scientes ipsum in Beatorum nu-  
 mero collocatum. Doleamus, paululum, si libet, incommoda no-  
 stra: illius vicem latemur, qui nunc fert optatum fructum  
 laborum suorum. Prosequamur quoq; grato animo memoriam  
 eius, & virtutes infixas animo teneamus, conemur opera, & ante-  
 actam optimè vitam imitari, vt instar eius, eternam gloriam  
 nostris laboribus & actionibus diuina adiu-

uante gratia consequa-  
 mur.

D I X I.



VITA

*B. Nicolam  
 iuxta in  
 caelo est asso-  
 ciatum.*



VITA  
**B. NICOLA I**  
**ALBERGATI,**

EX CARTHVSIANO EPISCOPI BONONIEN-  
 SIS, ET S. R. E. CARDINALIS:

AVTHORE

*DOCTISSIMO, AC CELEBERRIMO VIRO CAROLO*  
*Sigonio, historicograui, & fideli, qui floruit anno Domini 1560. ean-*  
*demq. dedicauit Reuerendissimo ac Illustrissimo D. D. Gabrieli*  
*Palaeotto, Episcopo Bononiensi, & S. R. E.*  
*Cardinali.*

QVAE IAM IN PVBLICVM PRODIT STV-  
 DIO ET LABORE F. G. GARNEFELT, QVI EAM Bo-  
 noniâ ex Nobili Albergatorum familiâ acceptam in capita di-  
 stinxit, singulisq. capitibus sua praefixit argumenta; scholijs  
 etiam atque annotationibus margina-  
 libus haud segniter illu-  
 strauit.

**BENEVOLO LECTORI**

F. G. GARNEFELT.



D veras legitimasq. historias venandas Iustus  
 Lipsius requiri definiuit veritatem, explana-  
 tionem, ac iudicium. Hascenotastres nullus in Sigo-  
 nio desiderari dicet, qui iustus Censor esse volue-  
 rit. Nam imprimis ex verissimis monumentis  
 hanc vitam contexuit: deinde iuxta consilium

Dio-



Dionysij Halycarnassæi prudenter disposuit, copioseque explicauit: postremò Iudicij libram in omnibus adhibuit, quod Tacitus quoque monuit historico faciendum. Accedit ad Sigonij commendationem, quòd in hac historiâ ex antiquis documentis plurima adferat, quæ apud nullum scriptorem publicum inueniuntur; atque ideò apud eruditos lectores, & antiquitatum amantes maiori in precio habenda erit. Quod autem attinet ad Concilia Basileense, ac Florentinum, quorum hic mentio fit, sciendum est, quatuor esse genera Conciliorum. Sunt equidem 1. Generalia, 2. Nationalia, 3. Prouincialia, 4. Diœcesana. Et licet vtrumque, id est, tam Florentinum, quàm Basileense, inter Generalia Concilia referatur, tamen etiam hic quædam distinctio obseruanda erit. Generalia etenim quadruplicis generis sunt.

1. *Quædam sunt ab Apostolica sede approbata.*
2. *Nonnulla omnino reprobata.*
3. *Alia partim approbata, partim reprobata.*
4. *Sunt etiam quædam nec manifestè approbata, nec reprobata.*

Hinc Basileense Concilium est tertij generis. namq; approbatum est à Nicolao V. P. R. quantum spectat ad Ecclesiasticorum beneficiorum dispositiones quasdam; & in hac parte non restitit ei B. Nicolaus noster; reprobatum verò est in Concilio Lateranensi ultimo, sess. II. circa ann. Domini 1516. vt videre licet apud Surium Tomo 4. Conciliorum, pag. 683. quia volebat Concilium esse supra Pontificem Romanum: & in hac parte contrarius ei fuit B. Nicolaus. Porro Concilium Florentinum primi generis est, id est, approbatum in omnibus & confirmatum. huic igitur subscripsit

NICOLAUS ALBERGATVS. Lege Surium 4. Tomo Concil.

pag. 467. Plura de Concilijs inuenies Tom. 2. Bel-

larmini. Hæc te volebam scire

opt. Lector.



f

PRÆ.





• PRÆFATIO AVTHORIS.

AD ILLVSTRISSIMVM  
AC REVERENDISSIMVM IN CHRISTO PA-  
TREM, DOMINVM GABRIELEM PALAEOOTTVM,  
S. R. E. Cardinalem atque Episcopum  
Bononiensem.



*Vm pio Illustrissima ac Reuerendissima Amplitudi-  
nis vestra impulsu nuper Episcopos Bononiensis Eccle-  
sia, decessores vestros, ex veteribus monumentis erue-  
rem, ac facta dictaq; eorum illustria, quæ in magnis  
comperire superiorum temporum tenebris possem, bre-  
uiter litteris memoriaq; mandarem: in unum præci-  
pue incidi, cuius acta, uti parum hominibus cognita, sic mihi ad scri-  
bendum commemorandumq; amplissima visa sunt. Hic verò extitit F.  
NICOLAUS ALBERGATVS, Cardinalis, ciuis Bononiensis,  
ac clarus ex Carthusiensium familia Monachus: homo in maximis an-  
te centum amplius annos Reipublicæ Christianæ negotijs diu mul-  
tumq; insigni cum Virtutis consilijsq; laude versatus. Verum licet eafra-  
de, integritate, solertiâ, grauitate, atque in omnibus rebus agendis sa-  
pientiâ præditus fuerit, ut meritò homines tantam virtutis indolem  
admirari potuerint: externarum ferè tamen omnium auribus inaudi-  
tus est; quòd, qui de eo quidquam litteris consignarunt, eapassim sub no-  
mine Cardinalis sanctæ Crucis exararint. Ego verò, ut memoria San-  
ctissimi, sapientissimiq; viri consulerem, ac simul egregias multasq; e-  
ius actiones ab obliuione hominum, & litterarum silentio vindica-  
rem, NICOLAÏ huius separare vitam, ac de rebus eius seorsim ube-  
riore aliquantò, quàm scriptio Episcoporum illa deposcît, disserere ora-*

11one



tione decreui: praesertim verò multis ut abditis, sic praeclaris monumentis ( quae adhuc in hac ciuitate ac familiâ conseruantur ) adiutus. Hoc verò quidquid est, id totum in vestra potissimum amplitudinis nomine volui diuulgare: quod ipsa in hac eadem, quam ille tenuit, Ecclesiâ administrandâ, cum aliorum optimorum Antistitum, tum huius praestantissimi in primis ac religiosissimi summam prudentiam singularemq. virtutem omnium adhuc iudicio sic expressit, ut non tam eximio animi sui consilio, quàm praeipuo aliquo imitationis arbitrio, ad singularia eadem peruenisse cum pietatis studia, tum sanctitatis officia videatur.







# INCIPIT VITA.

## CAPVT I.

### STIRPS ILLUSTRIS, AC PRAECLARVM *studium Adolescentis.*



ICOLAUS igitur Bononiæ ex Albergatorum familiâ ortus est: cuius antiquitas præcipuè ex vetustis ciuitatis elici constitutionibus potest. In quibus Albergati circa annum Christi millesimum ducentesium ædes celeberrimi nominis, in eadem vrbis parte, in quâ nunc quoque habitant, coluisse feruntur, quæ iam tum Seragotia dicebatur. Cuius seculi spatio Guilielmum etiam Albergatum, Nouariæ Episcopum, virum insigni pietate præditum, ipsi Nouarienses, Nicolao & IV. eius nominis Pontifice sedente, concelebrant. Inde in dissidijs ac dissensionibus, quæ deinceps Bononiæ emersere, ciuilibus crebra ac perhonorifica ALBERGATORVM mentio reperitur. Nam anno millesimo trecentesimo tricesimo quarto ad veterem ciuitatis statum restituendum ipsi in primis inter alias quasdam familias adfuisse narrantur, ac mox ex ijs Petrus Nicolaus potissimum prædicatur. Qui, cum Bononiæ primùm Tribunos plebis, nouæ administrationis ergo, creari placuit, vnus ex ijs fuit, ad quos inchoandi magistratus insignia, & quidem maximâ cum auctoritate tunc temporis delata sunt. Idem etiam, vt maiorum suorum quasi vestigia sequeretur, ei factioni studebat, quæ *b Maltrouersa* dicta, consilia & machinationes impedire profitebatur duarum illarum, quæ inter se tunc temporis in Italia odio exitiabili digladiabantur (Gibellinos & Guelfos intelligo, ita primùm Frederico Secundo Imperato-

a Hic præf-  
se caput ann.  
1288. iuxta  
Onuphrium.

De hac fa-  
ctione Lean-  
der, aliique  
Bonon. scri-  
ptores. Item  
Blondus de  
ade 3. libr 3.  
Vide  
Nauic. gen.  
8. circa an.  
138.



ratore Germanico nomine vocatos.) Cæterum populari inuidia fuit ex vrbe depulſus, atque detrufus, nec niſi poſt ſeptennium reſtitutus.

Ex hoc igitur anno milleſimo trecentefimo ſeptuageſimo quinto natus eſt Nicolaus, de quo ſcribere inſtituimus. Is litteris à Patre eruditus fuit, prout puerilis ætas imbui conſuevit. Inde corroborator factus, ad ius & ciuile cognoscendum, Bononiensium iuuenum more, ſe contulit. Quo ſtudio necdum abſoluto, diuino ſpiritu ad grauiora vocatus, incredibili quodam Religionis, quæ pio Dei cultu continetur, deſiderio flagrauit, atque arctiori ſe Carthuſienſium Monachorum diſciplinæ deuouit. Id quod diuino quodam videtur conſilio contigiſſe.

d Anno etatis  
11. Zenon  
c. 1.

## CAPVT II.

*ASSOCIAT SE CARTHVSIANIS, INTER QVOS  
Prioratum tenuit Florentiæ, Bononiæ q.*

CVM enim (vt vulgò inter Monachos illos accepta per manus hiſtoriâ fertur) quodam die extra urbem ad Monasterium illud animi cauſa, vt ſit, inuiſendum ſeceſſiſſet, fortè ſauâ tempeſtate coortâ muris excluſus ibi pernoctare compulſus eſt: Quod primum ægrè ferens, demum pro ſingulari beneficio accepit. Etenim concubiâ nocte, vbi Patres ad Matutinas laudes in Eccleſiam conuenire non obſcuro campanæ documento cognouit, & ipſe rei nouitate permotus acceſſit. Ibi verò poſitus, humili ac pio illo Monachorum per noctis ſilentium cantu vſque adeò eſt illectus, vt ſtatim habitus eius aſſumendi, & ſolitariæ inter eos vitæ cum Dei laude agendæ cupido acris inceſſerit. Quod poſt dies aliquot à Patribus illis haud magno admodum negotio impetrauit.

a Factus  
Carthuſian<sup>9</sup>  
anno etatis  
20. vt ex  
Zeno liquet,  
ca. 1. Nam ab  
11. anno etatis  
ſtudit  
luri annis 9.

Cæterum Monachus factus, ſic in omni ordine, aſſiduitate, obedientiâ, humilitate, atque omnibus officijs Monaſtica profefſionis ſe probauit, vt à cunctis non humano impulſu, ſed diuino inſtinctu ad Religionis ſe contuliſſe ſtudio iudicatus ſit. Quin etiâ poſt annos aliquot ea prudentiæ documenta ſimul ac diligentia dedit, vt Florentino primum, deinde Bononiensî Monasterio præfectus ſit.

b Romano  
etiam &  
Mantuano,  
vt coſtat ex  
chartis Capituli  
generaliſ.



## CAPVT III.

RENVNTIATVR EPISCOPVS BONONIENSIS,  
*quamuis inuitus.*

*a Durantis  
ab an. 1414.  
vsque ad  
1417. quo  
anno in eo e-  
lectus est  
Martinus V.  
Ita Gnu-  
phius.  
b De his  
Aeneas  
Sylvius in  
Europae. 53.*

**A**TQVE eo quidem tempore ob insignem famam integritatis atque sapientiae celebratus, Bononiensis quoque Ecclesiae Episcopus, magnam populi consensione delectus est. Cui rei Deus hanc occasionem aperuit; Anno Domini M. CCCC. XV. comitijs Pontificijs diu, haud sine ingenti populorum admurmuratione in Concilio a Constantiensi protractis, cum post septem menses Pontifex adhuc in Ecclesia nullus esset, Canetuli b ac Bentiuoli, familiae duae illam tempestate opibus ac clientelis Bononiae praepollentes, tempus oblatum esse veteris libertatis recuperandae duxerunt: ac consilij inter se occulte compositis, sequenti anno pridie Nonas Ianuarias cum armatis factionibus in palatium irruerunt: ac Legato, quem Ioannes XXIII. Pontifex abdicatus imposuerat, exturbato, Rempubl. popularem, quem statum libertatis vocauerant, reduxerunt. Mox quoniam sexcentorum consilium commodè ad subitas conuocari consultationes non poterat, sexdecim viros constituerunt, qui consilij auctoritate ornati omnibus rebus prospicerent, quae celerem consilij explicationem desiderarent. Ita proximo anno Ioanne Episcopo IV. Nonas Ianuarij mortuo, Magistratus, penes quos ipsa fuerat Respubl. collocata, ius eligendi Episcopi ad se recidisse interpretantes, sexaginta viris, quorum iniussu nihil constitui poterat, aduocatis, plures eximia doctrinae probitatisque viros nominauerunt. Qui singulis diligenti atque accurata ratione perpensis, vnum NICOLAVM Albergatum Priorem Carthusiae praetulere. Eorum verò iudicium, deinde Antiani, ac reliqui magistratus, ac demum vniuersum sexcentorum consilium ita probauit, vt nemo planè de illius dignitate meritisque dissenserit. Itaque consilio tertiâ noctis hora dimisso, multi, patefacta urbis porta, magna properatione, vt tanti nuncij fructum praeriperent, Carthusiam adierunt, ac Nicolao iudicium & decretum ciuitatis aperuerunt, ei que honorem, & priuatim & publicè gratulati, vt postridie in urbem ad di-

gni-



gnitatem accipiendam, & gratias consilio ipsi agendas, accederet, inuitarunt.

## CAPVT IV.

CONSENTIENS TANDEM IN ELECTIONEM  
ab Archiepiscopo consecratur.

ILLE verò, qui studijs vitæ solitariae deditus, animo longè ab Episcopali officio abhorrebat, ac secreto contentus otio, lucem hominum, ac frequentiam fugiebat, neque Episcopalis obeundi officij difficultates, ac salebras ignorabat, coepit recusare, ac se neque honorem illum accepturum, neque ea de causa pedem monasterio suo moturum esse, asserere: deinde postquam se ciuium atque amicorum suorum & publico & priuato nomine agentium oppugnari postulatis atque vrgeri precibus vidit, vt corū à se impetum aliqua ratione propelleret, addidit sibi nō licere sine præfecti sui consensione eiusmodi onus accipere; si ipsius intercessisset auctoritas, se ciuitatis tam bene de se iudicatis in potestate futurum. His rebus postridie in urbem renunciatis, populus, vt hoc impedimentum amoliretur, extemplò Antonium Alberga- tum Iurisconsultum arcta ipsi necessitudine iunctum ad Carthusi- am in Galliam properare, atque ab ipso, qui ibi sedebat, Præfecto, NICOLAUM Episcopum petere præcipui loco beneficii iussit. Is Ianuario mense profectus, Maio b redijt, ac Præfecti, & Capituli Generalis assensum congruentem cum ipsa populi voluntate re- portauit. Hac accepta sententia, consilium nouis nuncijs missis, NICOLAUM ad se venire rogauit; cuius ille vplūtatī non obsequi turpe ratus accessit; Ibi verò ad accipiendam, quæ tātō ciuium stu- dio deferebatur, Ecclesiam obsecratus, primū indignum se, nec tanto onere sustinēdo parem excusauit: Deinde illorum precibus defatigatus, sic se assensurum adiunxit, si populi prærogatiuā Cleri iudicium confirmasset. Neque enim æquum videri, quenquam Clero præesse, quem non Cleri ipsius testimonium approbasset. Quare audita, consilium Canonicos statim coire, & NICOLAUM à se editum iussit deligere. Ita Canonici Capitulo aduocato sua sententia comitia populi confirmarunt. Hoc verò vbi NI- COLAVS præter opinionem accidisse suam animaduertit, in

o Copiosum i  
sta Zenon  
c. 3.

b In altero  
MS erat  
Martinus sed  
hoc mense  
Capitulum  
non solet in-  
choari.

c Quorum sit  
eligere Epi-  
scopos, vide  
Bellarm. de  
Cler. l. i. c. 7.

Con-



Consilium reuersus, vt alio moræ genere decreto animi sui aliquid subsidij compararet, nequaquam se vacante Romana sede, sine Archiepiscopi Rauēnatis auctoritate eiusmodi honorem initurum asseruit, atque extemplò Petrum Ramponum, & Andream Brunum Canonicos, Procuratores suos ad Archiepiscopum destinauit. Verùm & hi mense Maio *d* Ferrariam, vbi Archiepiscopus versabatur, profecti, nullo negotio illius assensionem obtinuerunt. Quibus decretis NICOLA VS cuius, tandem ad supplicationes se contulit, & ne se ascitam deferere disciplinam & susceptum secretioris vitæ propositum subigerent, obsecrauit. Populus autem eius preces aspernatus, atque eò vehementius ad ipsum euocandum accensus, Archiepiscopum ad eum consecrandum acciuit. Is cùm in exitu Iunij accessisset, hominem ad se in Palatium accersuit, & benignè ac comiter appellatum, vt adhuc recto populi reluctantem studio sensit, haud leuiter commotus, pertinaciam *e* eius vehementius inculcavit, atque ab eo se, ni pareret, rationem ouium sibi à Deo commissarum in conspectu diuini Iudicii repetiturum esse denunciauit; Nimirum haud sine diuino Numine tantum populi in eum consensum esse commotum, quem, graue nefas committeret, si qua ratione contemneret. Quibus verbis, quasi ex ipsius Dei ore emissis, NICOLA VS exterritus, atque vltra repugnare non ausus, se facturum, quod populus peteret, atque ille suaderet, ostendit.

## CAPVT V.

## IN EPISCOPATV PRAEEST LAVDABILITER exemplariter q̃.

ITA rebus constitutis, IV. Nonas Iulias ab Archiepiscopo in æde Carthusiæ, ingenti populi, qui auidè confluxit, astante frequentia, solemnem consecrationem accepit. Quo facto, Porta S. Stephani, vt moris est, vniuersa obuiam effusa, cum Magistratibus ciuitatem ingressus vsque ad ædem S. Stephani eques sub holoserica vmbella processit: inde positis calceis, pedes ad Basilicam S. Petri contendit, atque Ecclesiæ possessionem, ipso assiduè plaudente prælatitia populo, iniit. Exemplum inde S. Petronij, *a* atque eorum

rum

*d* In vno  
Miserat  
Martius.

*e* Aeneas  
Sylvius in  
Bohemia, ca.  
16 de Stra  
tigate.

*a* De quo  
Mart. Rom  
4 08.



rum, qui priscis temporibus floruerunt, Antistitum imitatus; Episcopi partes ita suscepit, ut se tamen Monachum esse haud fuerit oblitus. Nec se magis sancti Zamæ b primi Bononiensis Ecclesiæ Episcopi successorem, quam beati Brunonis Carthusiensium ordinis Institutorem æmulatorem esse meminerit. Etenim cum Episcopali dignitate simul & Monasticam disciplinam in omnibus officiorum generibus conseruauit: Siquidem eandem in corde humilitatem, in vestitu præsertim intimo vilitatem, in aspectu pudorem, in cibo potuque tenuitatem, in cilicio & ieiunijs asperitatem, in fundendis ad Deum precibus assiduitatem Episcopus tenuit, quæ c Monachus ascriptus assciuit. Nam & carne perpetuò abstinuit, & in culcitra non se collocauit, sed victum, cultum, ac stratum idem celebrauit, quibus se Monachalis primùm vinculo legis astrinxit. Tantum autem sibi de facultatibus Ecclesiæ reseruauit, quantum familiæ suæ, (quam moribus magis, quam numero spectatam alebat) sat esset; reliquum inopibus sustentandis, & maximè puellis nubilibus, quæ dote carerent, collocandis imperire solitus fuit. Eruditis autem hominibus, aut laudem aliquam ingenij cultioris habentibus, mirificè studuit, atque eis non solum angustiis rei familiaris oppressis præsto fuit, sed etiam quos idoneos esse iudicauit, ad Ecclesiasticos honores dignitatesque prouexit. Tantus enim est virtutis splendor, ut non minorem laudem consequantur, qui virtutem honorant, quam qui ipsam adepti sunt. Quorum duo ex ipsius domo, quasi ex quadam doctrinæ ac sanctitatis officina progressi, deinde Pontificatum d Maximum sunt adepti; vnus Thomas Sergianensis, quem ex domestico puerorū Magistro sibi ad scribendas epistolas ministrum assumpsit, ac post dignitate Canonicā decorauit. Alter verò Aeneas Syluius, Piccolomineus, Senensis, quem in Legationibus non tam peregrinationum atque itinerum comitem, quam actionum & consiliorum auctorem, participemque habuit. NICOLAUS V. ille, hic PIVS II. in Pontificatu vocatus; Tertius fuit Franciscus Philelphus, homo insigni Græcarum ac Latinarum litterarum cognitione, ac scriptorum nobilitate conspicuus, quem haud satis à fortunæ bonis instructum in amicis intimis habuit, atque amplexus ita fouit, ut multis eum commodis atque honoribus e auxerit.

h De quo  
24. Jan. M.  
R.

Idem habet Poggium  
in orat. fun.  
& Zenus c.  
19.

d Vide Platinam in Nicolao V. & Pio II.

e Addamus  
hiscæ alibi  
Poggium  
Florent ac  
Petram No-  
xetanum.



Suis autem, id est, consanguinitate coniunctis, nihil vnquam Ecclesiasticæ benignitatis impertijt, siue quòd eos ære familiari satis paratos beneficijs eiusmodi non egere sentiret, siue quòd bona Ecclesiæ non ad familias Episcoporum locupletandas, sed ad turbas egentium sustentandas, conferenda esse sibi persuasisset. Inde ad Clerum emendandum, quem ex deprauatâ seculi disciplinâ dissolutiorem putabat, laxiorem, ac molliorem eius habitum castigauit; atque vt angustiores & crudiores, sic grauiorem atque honestiorem effecit, ac sacris eum officijs maiori frequentia & insigniori modestiâ interesse præcepit.

## CAPVT VI.

REFORMARE NITITVR SVBDITOS SVOS  
*in omni statu.*

*a Idem habet Sigonim lib. 4. de Episc. Bonon.*

**C**VM porrò Iudæos a sine discrimine inter Christianos versantes videret, rem mali exempli, ac mirifici ad disciplinam nostram corrumpendam incitamenti ratus, circulum eos iussit luteum, vt à cæteris dignoscerentur, in pectore gestare, & festis diebus clausas tabernas habere, & Quadragesimali tempore ab emendis carnibus abstinere. Cùm res eò licentiæ processisset, vt se cum Christianis temerè commiscerent, atque ipso etiam die Paschæ tabernas vendendi causâ apertas haberent, & per ipsos Christiani ieiunij dies carnes à nostris emptas publicè esitarent, ac quodammodo instituta nostra ludificarent: mox vsuras eorum grauiores liberioresque coërcuit. Nam cùm senos denarios in singulas libras exigere instituisset, quaternis esse contentos statuit.

*b Sic & O. nuphrim.*

Interim post longas Patrum dissensiones, Martinus Quintus tertio Iduum Nouembris Pontifex declaratus est. Quod vt ipse audiuit, continuò ab eo Apostolicam Episcopalis dignitatis à populo cleroque delatæ confirmationem poposcit, seque totum eius auctoritati iudicioque permisit. Quod Martinus, compertâ hominis virtute, ac sanctitate permotus, sine vlla detractione, licet non mediocriter ipsi à se alienatæ ciuitati offensus, assensit.

*c Hic obiit anno 378. Sigonim de Episc. Bonon.*

Inde sequenti anno, vt antiquam Cleri disciplinam reuocaret, 13. Kal. Iunias Synodo præclaras constitutiones, olim à Bernardo Episcopo editas, instaurauit, quæ obsolescere perditâ seculi con-

tuma-



tumaciâ coeperant. Tum ad Monasteria, quæ tristi superiorum tēporum calamitate perierant, renouanda conuersus, duas Canonicas proximis bellis afflictas, ac Canonicis Regularibus vacuatas, accepto Pontificis decreto, restituit. Ex quibus vna fuit S. Gregorij extra portam S. Vitalis, quam ad vnum Priorem, Canonicumque d redactam, à veteribus Canonicis S. Augustini ad novos S. Gregorij in Alga traduxit. Altera S. Mariæ ad Rhenum, & S. Saluatoris in vrbe. Etenim cū Franciscus Ghisclerius earum Prior petijisset, vt cū Monasteria sua Canonicis propter bella prorsus exhausta essent, sibi liceret Stephanum, Ioānem, & Dominicum Senenses, & nonnullos alios Canonicos Monasterij S. Ambrosij Eugubini (eiusdem ordinis, sed alterius habitus & obseruantia) iungere, mandato Pōtificis, re cognitâ eos in vnum contraxit, ac Canonicos Regulares S. Saluatoris vocauit. Legi adhuc apud eos litteras Martini in hanc sententiâ datas Friburgi Lausamensis diocesis Nonis Iulij. Quibus actis, postremò oculis in Laicorum mores coniectis ludos & aleatorios magno animi dolore vulgò sic per urbem celebrari animaduertit, vt non solum ciues eò cum insigni Diuinæ legis contemptu & magno Patrimoniorum dispendio conuenirent, sed etiam publicum ex ea re vectigal institutum haberent. Quam consuetudinem ipse adeò improbauit, vt edicto grauiori proposito, & vectigal, & conuenticula illa damnarit. Pauperes autem ciuitatis, pro insito charitatis studio, miseratus tributo in fabricam S. Petronij cōferendo leuauit. Postremò Basilicam atque Episcopium contemplatus, cū multas partes vetustate obsolescentes instauratione egere videret, ne id quidem sibi putauit esse prætermittendum. Itaque campanarij fastigium ex ligneo lapideum fecit, ac totum laminis plumbeis cooperuit. In Episcopio verò aulam insignem, & multa cubicula ædificauit, ac Bibliothecam publico vsui magna supellectile librorum instruxit; quarum rerum nunc etiam vestigia aspiciuntur. Sed hæc posterius. Has autem omnes laudes apud populum cumulauit singularis humanitas, fac facilitas admirabilis, quòd aditus ad eū non minus patebāt Episcopum, ac si priuatus in ædibus suis egisset, aut Monachus adhuc in humili cellâ cōsideret. Quibus & eiusmodi alijs præclaris ad vitæ sanctioris opinionem institutis eam apud omnes homines

d Hunc Sig-  
conium lib.  
4. de Episc.  
Bonon. vo-  
cat conuersa.

c Vide Sig-  
nium de S.  
Bernardino  
Senensi, lib.  
4. de Episc.  
Bonon.

f Eandem  
virtutem  
Poggini lau-  
dat.



virtutis atque innocentiae famam adeptus est, ut cum non solum Ciues admirarentur; sed insolito etiam ijs temporibus cultu venerarentur; siquidem & genua praetereunti ponebant, & capita inflectebant, & in supplicationibus publicis incedentem multi nudis pedibus honoris eius ac reuerentiae causam prosequabantur.

## CAPVT VII.

MAGNA EST IN AESTIMATIONE APVD  
Martinum V. Pontificem Romanum.

a Est illa.  
urbs Galliae,  
in qua tunc  
Pontifex morabatur.

b De quo  
Hieronymus  
Rubens in  
hist. Rauenn.

**Q**Vibus rebus compertis Martinus Pontifex eidem tantum propterea tribuere coepit, ut cum solemniter fidelitatis iure iurando ipsum obstringere vellet, & tamen labore sui adeundi leuare, Sacramentum apud Mutinensem, & Immolensem Episcopos concipere iussit; extant adhuc ipsae ad Episcopos illos litterae, a Gebennis VI. Kalend. Augusti datae, quas in hanc historiam inferere libuit una cum alijs, quae apud ALBERGATOS seruantur, ex quibus ferme hunc commentarium contexuimus; sunt autem haec: Cum nos nuper electionem de personam Fratris nostri NICOLAI Episcopi Bononiensis, per dilectos filios Capituli Ecclesiae Bononiensis ad eandem Ecclesiam, tunc Pastoris solatio destitutam, nec non eiusmodi electionis confirmationem, & consecrationis impensionem, eidem NICOLAO Episcopo, per venerabilem fratrem nostrum Thomam Archiepiscopum Rauennatem, auctoritate ordinariam, sede Apostolica vacante, factas de fratrum nostrorum consilio, auctoritate Apostolica duxerimus ratificandas, ac etiam approbandas, nos volentes eiusdem Episcopi in illis partibus commorantis parcere laboribus, ac expensis, ne per hoc cogatur veniendo ad Romanam curiam personaliter laborare, fraternitati vestrae, auctoritate praesentium, committimus, ac mandamus, quatenus ab eodem Episcopo nostro, & Romanae Ecclesiae nomine fidelitatis debite recipiatis, seu alter vestrum recipiat iuramentum, iuxta formam, quam sub Bulla nostra mittimus interclusam. Hoc autem iusiurandum Martinus eo studiosius requisivit, quod Bononiam ab Ecclesiae auctoritate remotam acerbissime ferens, quantum ad eam recuperandam spectata NICOLAI Episcopi auctoritas habitura ponderis esset, non ignoraret.

ITA-



ITAQUE cum paulò post Constantiâ Mantuam accessisset, ac dies noctesque de Bononiâ recipiendâ cogitaret, ipsum statim ad se venire præcepit, atque humaniter in primis acceptum, per multos dies secum in eisdem ædibus habuit; Atque omnia, quæ ille postulauit, mirâ libertate indulgit; ac demum consilio suo nudato, Oratorem ad Bononiensem populum destinauit, petens ut sibi urbem ditionis nuper Pontificiæ restituerent, à qua vesano nonnullorum consilio discessissent. Nam se (quoniam Romam adire tumultibus intestinis exclusus non posset) Bononiæ sedem, aulamque Pontificiam constituere ad ipsius honorem & commodum decreuisse. Quod postulatum populus primò disertissimè abnuuit: Deinde saniore consilio, ne belli inferendi necessitatem inclementiore responso afferret, illud ipsum emendandum putauit, ac sequenti anno NICOLAVM eundem cum duobus alijs oratoribus remisit, qui ei sponderent, populum quotannis tributum septē aureorum millium, & certū equitum numerum arbitrio eius in sex menses daturum, si sua se uti Republica ac libertate permitteret, ac sacrâ Ciuitatis obedientiâ contentus, nihil præterea postularet. Quam ille conditionem difficultate vi potiundæ urbis deterritus in præsens accepit; Atque inde Florentiam per viam Rauennatem transcendit, quâ in vrbe per annum amplius mansit, ac liberaliter habitus, eam gratiam retulit, quòd Ecclesiam ad fastigium Archiepiscopale prouexerit.

c. *Novum cap.*  
4.

## CAPVT VIII.

EXORTO BONONIAE TVMVLTV CIVIVM,  
*quàm prudenter atq; constantè sese  
habuerit.*

POSTERO anno Antonius Bentiuolus, Ioannis (qui prioribus annis a dominatum urbis per aliquot menses administrauerat) filius patriam recuperare suâ auctoritate desiderans, VII. Kal. Februarias, propriâ adiuuante factione, Palatium introrupit, ac potestatem nactus, Canetulos sese cœptis eius obijcientes, primum foro, deinde decreto consilij vrbe eiecit. Quî Florentiam ad Martinum profecti, Antonium tanquam Pontificiæ urbis impe-

d. *Consule S.*  
*Antoninum,*  
*& Ioannem*  
*Villanum,*  
*& c. de rebus*  
*Florent.*

a. *vide Bion-*  
*dum dec. 3.*  
*lib 3. & Vo-*  
*laterran. li.*  
*4 Geogr.*



rium sibi temerè vindicantem, accusauerunt, atque ipsi se ad eam recipiendam præsto futuros esse polliciti sunt.

Quibus rebus Martinus in spem haud leuem recuperandæ vr-  
bis adductus, prid. Kal. Mart. oratores Bononiam misit, qui verbis  
suis denunciarent, nisi urbem sibi vltro darent, se quacunq; vi sub-  
acturum. Quibus consilium respondit, populum Bononiensem  
eo animo esse, vt antiqua vrbs suæ possessione & ciuitatis liberta-  
te decedere nolit, proque eâ fortunas omnes atque ipsum adeo  
sanguinem profusus sit: Pontificem autem submisit orare, vt  
conditionibus stare secum Mantuæ pactis velit, in quibus disertè  
ipse, se certo tributo, & sacro ciuitatis obsequio contentum fore,  
promisit: Deinde profectis illis, prid. Nonas Martij, iterum NICO-  
LA VM Episcopum cum duobus alijs ablegauit, ac coram eadem  
referre Pontifici iussit. Quibus cum madata exposuissent, sic Mar-  
tinus respondit: Ite, ac populo vestro renunciate, nisi urbem vsq;  
ad diem tertium Paschæ in meâ potestatē tradiderit, me illi sacra  
officia interdicturū, execrationes quàm atrocissimas possit Eccle-  
sia infligendum, ac firmissimū exercitū ad vastandum agrum atq;  
oppugnandam urbem missurum. Ac mox duobus Oratoribus di-  
missis, NICOLA VM retinuit, ac post quinq; dies domum repetere,  
& sacrorum officiorum *b* interdictum solemnī Ecclesiæ more pro-  
mulgare mandauit. Ita NICOLA VS in patriam VII. Kal. April. re-  
uersus, (cū Episcopum nodo Sacramenti deuinctum, auctorita-  
tem Pontificiam repudiare nefas esse putaret) mandata eius, quā-  
quam inuitus exhaustit; Etenim postridie, dum opera sacris daba-  
tur, in S. Petri Basilicam venit, ac silentio indicto, Interdictum,  
quod secum attulerat, ad aram maiorem pronunciauit; Deinde  
ad Valuas Basilicæ Sancti Petronij, & postes Palatij affigendum  
curauit: Demū ipsi Gymnasij Rectoribus ac Magistris accitis,  
nomine Pontificis publicæ professionis munus inhibuit. Quibus  
rebus perspectis, ciuitas suum sic erga illum animū *c* immutauit,  
vt, quem antea in oculis ferret, ac summis in cœlum laudibus tol-  
leret, tum planè alienata, maledictis asperioribus lacerare, vt pu-  
blicæ dignitatis hostem, ac Pontificis, quàm patriæ studiosiorem,  
institerit.

Quæ cū NICOLA VS comperta omnia plurimorum narratio-

ne ha-

*b* ZENUS c. 6.

*c* ZENUS c. 7.  
*hæc vberius*  
*tractat.*



ne haberet, atq; insidias etiam nonnullorum, quæ propterea sibi fructe dicerentur, timeret; vrbe egressus, ad Carthusiam, atq; inde Florentiam properauit. Mense inde Maio, Martinus missis Bononiâ oratoribus, apertè bellum (nisi dicto sibi audientes essent) indixit. Ac mox, vbi monita minasq; despici suas vidit, Braccium Perusinum Ducem suum cum exercitu validissimo in agrum immisit. Quo facto, Braccius castella fermè omnia duorum mēsum spatio in potestatem aut vi, aut pactione redegit, ac captiuos multos abduxit, & aquam Rheni in vrbem influentem aliò deriuauit, ac demum agro toto latè vastato, maximis ciuitatem opportunitatibus spoliauit. Cùm autem propediem castra se vrbi quoq; admoturum ostenderet, Antonius Bentiuolus, qui Principem in vrbe agebat, ne ciuitatem in maius discrimen adduceret, veritus, consilium vrbis dedendæ cœpit, ac prid. Idus Iulij in castra (in quibus erat d Cardinalis Pontificis Legatus) processit, ac pactis conditionibus, in vrbem regressus, relatione de bello finiēdo factâ, ex consilij auctoritate deditionem constituit. Ita XII. Kal. Aug. Braccius cum Cardinale Legato, & parte equestrium copiarum ingressus, vrbis possessionem accepit; Inde 7. Idus Augusti Oratores Florentiam à consilio missi, vrbem Pontifici æquis, vt voluerunt, cōditionibus tradiderunt. Post VII. Kal. Sept. Alfonsus Diaconus Cardinalis S. Eustachij, Legatus, vrbem iniuit, atque eam nomine Pontificis ex pacto administrare cœpit.

Eodem etiam tempore NICOLA vs Episcopus ad Ecclesiam suā reuersus, atq; à populo benignè acceptus, aduocatis Magistratibus, decretum Pontificis recitauit; quo ipsi Centum & Plebem oppida, & triginta quinq; ante annos Episcopo adempta, reddere iubebantur: ac subinde, illis non repugnantibus, per Episcopum Immolesensem Vicarium suum, solemnem eorum possessionem adiuit. Inde rebus Ciuitatis compositis ad pristina boni pijque Pastoris officia per otium concelebranda se contulit, indies magis eximie prudentiæ, probitatifque suæ opinionem confir-  
mans.

*1 Hic fuit  
Gabriel Cō-  
dulmerius:  
vt cōstat ex  
Zeno c. 7.*

*c Sigonius l.  
4. de Epise.  
Bonon. ad  
dit. Maxu-  
maticum op-  
pidum.*



## CAPVT IX.

LEGATVS DESTINATVR IN GALLIAM  
*Pontifice Romano ob pacis fœdera consti-  
 tuenda.*

*1 An. 1452.  
 quo obiit Rex  
 Gallie Caro-  
 lus VI vt  
 Gordonus  
 habet.*

*b Quod est  
 in Picardia  
 stium  
 Copiesius  
 hæc Robert  
 Gaguin li. 9.  
 circa finem*

*S. Antoni-  
 nus in chro-  
 n. 3 tit. 22 c.  
 9. 5. 7.*

Taque biennio post, ac cum res incidisset, quæ præstantis, ac singularis viri operam auctoritatemque apud Gallicos inter se armis fauientes Principes postulatet, Martinus ad eam pro dignitate Ecclesiæ transigendam, ipsum ex omnibus aptissimum iudicauit. Res autem erat huiusmodi; vetus inter Ioannem Ducem Burgundiæ, & Carolum sextum Regem Franciæ bellum gerebatur: quod accensis vtriusque mutuis offensionibus eousque processerat, vt Ioannes Lutetiâ Regni Gallici sede occupatâ, Carolum Regem ac Reginam, & Catharinam filiam in potestatem adduceret. Quo facinore perpetrato, accessit, quod cum Ioannes Dux, ac Carolus Delphinus, ipsius Caroli Regis filius, in oppido *b* Monasterioli, de communi pace acturi conuenissent; altercatione fortè de præteritis iniurijs ortâ, Ioannes ab vno ex Delphini comitibus repentè gladio educto per iracundiam fuit occisus. Qua re audita, Philippus Ioannis filius, qui Lutetiæ erat, exacerbatus, Carolum Regem cum Regina, & filia, Henrico Angliæ Regi (veteri ipsius Caroli hosti, atque armatum exercitum in Galliam habenti) tradidit. Ex quo bellum atrocius, quàm antè recrudit, Burgundo & Anglo aduersus vnum Delphinum, communi armorum fœdere sociatis. Quod quieti, & commodo Christianorum vehementer obesse sentiens Pontifex, nuncium sibi mittendum ad eiusmodi sedandas discordias, & conciliandos, si posset, animos arbitratus, neminem ipso NICOLA O potiore existimauit; in quo non summa solum solertia, sed singularis etiam splenderet innocentia, quas plurimum illi auctoritatis & fidei conciliaturas esse apud Reges Transalpinos putauit. Quamobrem ne illi sui Romam adeundi (nam eò paullo antè Florentia venerat) necessarium onus imponeret, litteras Bononiam, vnâ cum ipsius rei tractandæ commentario misit, quæ adhuc seruantur apud Canonicos in hæc verba:

*Cum*



Cum dudum gravi & atroci diffensione Principum Gallorum pestiferum bellum suscitatum in Regno Franciæ & vicinis partibus vigeret, & vigeat de presenti, cum exterminio illarum Gentium, & iactu-  
ragravissima totius Reipub. Christianæ, nos cupientes tantis malis finem imponere, & indurata Principum corda placare, & ob hanc piam  
causam tam necessariæ & sanctæ pacis ad partes illas Nuncium Apostolicum destinari, qui in conspectu Principum & populorum iustus &  
idoneus predicator, & suaser pacis, & Charitatis existat; te ad hoc sanctum opus ex omnibus Prælati eligimus, dignissimum nuncium tantæ  
pacis, profecturum ad Charissimum in Christo filium nostrum d. Henricum Regem Angliæ illustrem, & ad dilectos filios nobiles viros Delphinum, &c. & Ducem Burgundiæ, & inter ipsos pacem ac concordiam tractaturum. Nam post omnipotentis Dei misericordiam plurimum in  
tanto negotio de tua sapientia & singulari virtute cōfidimus, & speramus, quod ultra profundos sensus tui naturalis ingenij subministrabit  
Spiritus S. devotioni & humanitati gratiā; ut verba nostra ex ore tuo cū fructu exaudiantur. Quare fraternitatē tuā in Domino hortamur,  
& affectuosè rogamus, ut in tanti & tam communis boni procuratione nos adiuves, & pium hunc laborem non refugas: sed pro tot populorum  
quiete, & salute fidelium, promptā ac latā mente suscipias. Caterum hac de causa te ad nos venire nolimus, & laborem itineris duplicare:  
sed pro informatione tua inclusas presentibus agendorum instructiones mittimus, & litteras nostras, cum copijs ipsarum litterarum, quas Principibus ipsis scribimus super ista materia; volentes, quod instructionibus supradictis dicendo, & agendo, & negotium hoc tractando, addas & minuas, secundum quod circumspectiōni & prudentiæ tuæ videbitur expedire. Datum Roma apud S. Petrum VI. idus Febr. Pontificatus nostri anno V.

Hic fuit  
Henricus V.  
Vide Polyd.  
Vergil.

Quibus litteris acceptis, NICOLAUS honestæ voluntati Pontificis in re tanti momenti aduersari non ausus, sese ad iter instruxit; ac VII. Kalend. April. cum eximio Bononiensis Nobilitatis flore profectus, in Galliam properavit, ibique liberalibus officijs propter eximiam virtutis ac vulgatæ sanctitatis opinionem exceptus, rem tractare cum utraque parte summā curā instituit. Verum cum ab vna parte parentum sororisque captiuitas, ab alterâ cædes paterna, ipsa iuuenum pectora non solum versarent, sed ad



vlciscendum etiam inflammarent, atque ad rem armis conficiendam pro vtriusque obtinenda dignitate percellerent, nihil efficere potuit. Quare subsecutâ Regis quoque Henrici morte deteritus, sequenti anno Bononiam VI. Idus Aug. e re infectâ reuertit.

## CAPVT X.

*CREATUR A ROMANO PONTIFICE CARDINALIS, & ablegatur ad Venetos Florentinosq. conciliandos.*

**E**odem anno Martinus Gabrielem Condulmerium Cardinalem Legatum in urbem misit: ac proximo (quod Florentinis contra Ducem Mediolanensem secum foedere iunctum adesset) reuocauit; atque eidem Ludouicum a Archiepiscopum Arelatensem suffecit, qui V. Idus Iunias Bononiam profectus, conuocato consilio, Pontificis voluntatem exposuit, quâ Gabrieli legationem abrogabat, & Florentinos milites ab eo conductos dimitti præcipiebat; quæ cum latinè (erat enim Gallicus) edidisset, NICOLAUS Episcopus, qui accitus aduenerat, Italico sermone retulit.

BIENNIO verò interiecto, idem cum rebus Romanis aliquando constitutis Cardinalium numerum plurimorum morte imminutum sibi augendum existimasset, inter ceteros, quos illo honore, virtutis gratiâ, decorandos putauit, NICOLAUM ipsum animo destinauit, atque cum consilio dissimulato ad se venire iussit. Deinde IX. Kalend. b Iunias eundem cum ceteris Cardinalem renunciauit, atque ei iam ad urbem aduentanti obuiam ipsa dignitatis insignia misit. Quæ ille miratus, eadem, quâ antea Episcopatum, animi magnitudine respuit. Verum paullo post Pontificis in conspectum progressus, cum adhuc eiusmodi abs se honorem auerteret, sacri tamen anathematis intimatione commotus assensit. Atque ita Idibus Iunijs Presbyter tituli S. Crucis in Hierusalem est vocatus. Quem titulum adeo gratum habuit, ut postea pro insigni gentilitio ipsam solam Crucis effigiem tulerit. Cuius rei cum plurima adhuc in Episcopio apparent vestigia, tum Franciscus Philelphus est auctor, in epistolis inquit; *mitatus es eum, cuius crucem pro signo geris, Christum Optimum Maximum.* Quem dein-

de Tho-

e Zerus c. 8.  
ait ipsum 18.  
mensibus in  
Gallia man-  
siss: & tunc  
Romam post  
Bononiam  
rediisse.

a De quo  
Blond. dec.  
2. lib. 3. &  
Æneas Syl-  
uius in Euryo  
p. 4. c. 42.

b In Maio  
fuisse creatum  
etiam Blon-  
dus testatur  
dec. 3. libr. 3.  
At Onuphri-  
us & Ciacomus  
habent 9.  
Kal Iul ann.  
1426.



de Thomas ipsius discipulus imitatus, ubi ad Pontificatum peruenit, clauēs & ipsas pro Familiæ signo asciuit. Cæterum NICOLAUS sic honorem hūc gessit, vt S. Antonino teste, *ad quem admodum Episcoporum insigne exemplar extiterat, sic clarissimum speculum Cardinalium fuerit*; Nec maiorem dignitatis splendorem ab sacra nito repurpuræ coeperit, quàm ipse claritate virtutis suæ ei tradiderit.

Neque verò Martinus hoc illum ornamento cohonestasse satis habuit, quin etiam insigne ac magnificū in primis legationis munus adiunxit. Huius verò decernendæ legationis hæc materia data; Philippus Mediolani Dux, iam pridē animo ad Italiæ dominationem aspirans, bellum Florentinis internecinum intulerat, & cum Martino ipsa huius belli consilia sociarat. Quare cōpulsi Florētini, sese Venetis suspectas iam pridem Ducis ipsius opes habētibus iūxerant, ac maximo exercitu cōgregato, Philippi ditionem adorti, Bergomum ei ac Brixiam & magnā cum Castrorum Cremonensium parte ademerant. Itaq; Martinus, Philippo socio in maximas rerū suarū difficultates adducto, cōsulare, atq; imminētia Italiæ mala propulsare desiderans, pacem inter eos cōciliare constituit, ac propterea ad eam tractandā ac transigendam NICOLAUM Cardinalē spectatæ multis in rebus auctoritatis ac sapientiæ virum decreuit. Quare NICOLAUS cum his mandatis Romā profectus, XV. Kal. Octob. Bononiam adiit, à Magistratibus & vniuersā occurrente ac gratulante ciuitate receptus, atq; omnibus honoribus, qui Episcopo & Cardinali Legato à Latere Pōtificis missō debētur, affectus, mox oratoribus eorū, ad quos bellū pertinebat, cū mandatis conuenire Ferrariam iussis, ipse eo quoq; 13. Kal. adiuit, ubi summam Nicolai Marchionis erga se humanitatem atque hospitalitatem expertus, vtriusq; partis Procuratoribus euocatis, ei cognitioni operā dare singulari animi æquitate instituit. Causā verò vtriusq; magno animorum ardore, ac partium cōtentione tractata, & varijs iniectis postulatis, querelisq; distracta, cū pax ad optatum perducī exitum haud posset, nisi ipse cum Principibus in colloquium congressumq; veniret, primò Venetias, deinde Mediolanum accessit; Venetias autem profectus, ac summis honoribus à Senatu illo ornatus, sic cum Francisco Foscaro Duce causā egit, vt Senatus retentis vrbibus atque oppidis bello partis, se pacem compositurū

Ita patet  
in Platina  
nouiter ex  
caso Colo-  
niæ.  
d In Chron.  
p. 3 tit. 22. c.  
7. 5. 3.

e Blondus  
dec. 3. libr. 3.

f Hic fuit  
Nicolaus E-  
stensis, de quo  
Philosophus,  
& Syluius  
in Europa,  
c. 52.

g Lege Ant.  
Sabellum  
de Venetorū  
rebus. Item  
Volaterran.



esse promiserit. Pridie inde Kal. Octobris (litteris ab eo de tuto per Lombardiam itinere sumptis, (quæ adhuc apud Albergatos leguntur) Mediolanum ad Philippum decessit, atque hominem allocutus (licet grauissimè de Venetorum auaritiâ & Florentinorum superbia conquerentem) ad Bergomum & Brixiam dimittendam adduxit. Quare sequenti anno Bergamo profectus, ad Venetos in possessione cæterorum locorum constituendos procedens, Brixiam adiit. Eam verò urbem, ramum oliuæ præferens, iniit, ab Episcopo, Clero, & Magistratibus vniuersis exceptus: qui vsque ad riuum Mellam cum crucibus & vexillis, gratias Deo solemnibus hymnis concinendis agentes, obuiam prodierunt. Cum autem in agrum inde Brixianum exisset, vt castra ipsa vrbi apposita, quæ à Philippi custodibus tenebantur, Venetis Magistratibus præsentibus ex pacto tradi iuberet: omnes præclusis portis inuenit, assentes, se neque Venetos, neque eorum amicos intra oppida recepturos. Quod ex tacito Philippi *h* mandato factum, occulta aliqua bene gerendæ rei spe oblata erecti, putatum est. Quod vt NICOLAUS vidit, vehementer permotus, reuerti ad Philippum voluit; sed Venetorum Præfecti prohibuerunt, qui rem non verbis, sed armis decernendam esse dixerunt, atque ad singula, quæ resistebant oppida, deinceps Senatus auctoritate exercitum adduxerunt. Ita NICOLAUS re irrita VI. Idus Febr. Bononiam rediit.

Inde VI. Kal. Martias Romam ad reddendam impeditæ legationis rationem progressus, ibi quatuor menses peregit; per quos Veneti omnia Brixiana castra, Philippo frustra resistenti, eripuerunt. Quod vt ipse audiuit, XVIII. Kal. Septembris Bononiam se eo consilio retulit, vt verba iterum de pace inferret, ac Cremonensia oppida ad Ollium spectantia, quæ à Venetis postulata adhuc controuersiam faciebant, restituenda curaret. Itaque post triduum Mediolanum ad Philippum reuertit, dum iterum Ferrariæ ad audiendas partes confedit, remque cognitam maiori ex parte sequenti anno XV. Kal. Maij constituit, ac mox pridie Nonarum pacem factam, maxima cum populorum lætitia publicauit. Inde Idibus sese Bononiam retulit, atque in loco extra urbem semoto, ad sanctam Mariam Vallis viridis sedit, vt commodius componere reliquum controuersia posset. Ita XV. Kalen. Iunij, exercitibus

vtrin-

*h Philippi  
ingeniū de-  
pingit Syl-  
uius in Eu-  
ropa, ca. 49.*

*i S. Antonin.  
in Chron. p.  
3. l. 22. c. 8. §.  
11. ait pacem  
in Martio  
factam, ann  
1427.*



utrinque dimissis, miseræ ciuitates aliquando tandem à diuturnis belli calamitatibus respirarunt.

## CAPVT XI.

*A SEDITIOSIS CIVIBVS BONONIAE INDIGNE tractatur, ideoq. ad Pontificem Romanum se confert.*

**I**NTERIM NICOLAVS audiens gladios passim impune à ciuibus in vrbe gestari, ac quodammodo ciuili tumultui a perniciosum aditum aperiri: vicem ciuitatis suæ sollicitus, Kal. Aug. in vrbem se summo mane recepit, ac rei diuinę opera data, opportunitam opem diuini Numinis implorauit. Hora inde sequētis noctis secunda, Canetuli Ecclesiæ aduersarij, iam pridem in patriam restituti, cum factione sua armati sese in forum proripuerunt; eoque occupato, ad terrorem aduersariorum, ignem in quasdam tabernas ligneas iniecerunt, & Palatium cum Legato capere contenderunt. Quare percepta, Bentiuoli signo campanæ regionis suæ dato, continuo se cum parte Pontificia compararunt, atque in forum procurfare aduersus Canetulos instituerunt. Quod ut NICOLAVS accepit, imminēti seditioni, ac cruento certamini occurrere, & statum seruare Ecclesiasticum properans, sese illis obuiam ad adem S. Donati tulit, atque eos orare pro salute patriæ, & liberorum suorum incolumitate instituit, vt paulisper conceptum animi impetum inhiberēt, nec noui quicquam vsq; ad reditū ad illos suum tentarent. Nam se Canetulos ad ponenda arma, & saniora capienda consilia deducturum. Inde in forum progressus, *b* Baptistam Canetulum, factionis Principem seuocauit; ac multis verbis factis, demum rem ita cum eo composuit, vt Antianos crearet, & publicis quibusdam vectigalibus eos ad sumptus necessarios sustinendos instrueret. Pontifex autem centum equites, totidemque pedites conductos haberet, qui Legato Sacramentum dicerent. Officia verò urbana ac castrensia ciuibus ipsis paterent, atque in has conditiones Baptista, & socij se ab armis discessuros, neque aliud in vrbe molituros, fide interpositâ promiserunt. Inde ad Palatium adiit, vt hæc pacta confirmari Legati ipsius subscriptione cu-

*a Vide Zenā  
c. 12. & Blō  
eum libr. 3.  
dec. 3.*

*b De hoc  
Syluium in  
Europa c. 53.*



raret; atq; ad fores progressus, ipsas sibi ac suis aperiri à custodibus iussit. Quas patentes vt attenti Canetuli cognouerunt, repente in eas fide violatâ impressionem fecerunt, ac stationibus in cassum obnitentibus superatis, ipsam ianuam occuparunt. Comites autem NICOLAI, cum periculum, indignitatemque viderent, ipsum exâguem, ac propè in illa turba elisum à foribus retraxerunt, ac domû (ne occideretur ab infestis capiti eius Canetulensibus) reduxerunt. Interim Palatium ab illis captum, & foedè direptum, & Legatus *c* in custodiam datus est. Quæ vt Bentiuoli acceperunt, haud ultra sibi conandum rati, porrâ S. Donati vrbe se præcipientes effuderunt.

Nonis inde Aug. Magistratus, quibus Respublica fuerat cōmissa, pro certo habentes Martinum irâ accensum, urbem armis oppugnaturum, atque hanc iniuriam vi quacunque persecuturum: Centum & Plebem castella sibi eo bello accommodata futura putantes, NICOLAVM ad se venire iusserunt, eo nimirum consilio, vt ab eo castra illa repeterent, & si abnueret, potestatem hominis nacti, præbere compellerent. At ille edicti superbiâ, atq; euidenti rei indignitate *d* permotus, quâ Episcopalis & Cardinalitia dignitas in ordinē cogebatur, se iturum negauit, ac mox insidias eo nomine sibi parari sentiens, sub noctem *e* assumpto fratris Prædicatorij ordinis habitu vno cum comite ad Monasterium S. Dominici adiit, ac postea vt his se fluctibus eriperet, summo mane per portâ S. M. amæ vrbe excessit, atque ad Carthusiam, & inde Mutinam abiit. Inde X. Kal. Sept. legatus, qui apud Canetulos seruabatur, vrbe dimissus, 4. autem Id. Sept. familia Episcopi Episcopio pulsa; postridie verò consilio aduocato, ac multis verbis in Episcopum & Pontificem, pro cuiusq; ingenio ac libertate grauissimè dictis, decretum est, vt in locò NICOLAI alius Episcopus ederetur, ac statim *f* Bartholomæus Zambeccarius, Caroli filius, Abbas S. Bartoli Ferrariensis, est nominatus. Qui professus se Centū & Plebem populo traditurum, cōtinuò ad Episcopium, nullo comitante Canonico, sed solis Magistratibus prosequentibus, adiit. Inde Canonicis, vt eū de more eligerent, imperatum. Quibus se eligere posse negantibus, qui à populo fuisset electus; respōdit Vexillifer, populi nominationem esse; Canonicorum verò electionem; cuius rei cum Canonici ad Iurisconsultos iudicium retulissent, illi responderunt,

non

*c* Gabriel  
Condulme-  
rius. postea  
Eugenius 4

*d* Copiosè  
hæc Zenus  
c. 12.  
*e* De Mona-  
chali habitu  
meminit et-  
iam Blondus  
li 3 dec. 3  
Zen. ca. 13.  
de Carthu-  
siano.

*f* Sigon. li. 4.  
de Episc. Bo-  
non.



non vacante Episcopi sede, Canonicos electionem celebrare non posse. Veruntamen Bartholomæus se pro Episcopo gessit, & Vicario constituto, ius per annum integrum dixit.

## CAPVT XII.

**RESTITVTVS A ROMANO PONTIFICE IN SVAM**  
*sedem, iterum ablegatur in Franciam, pro pace*  
*urgenda.*

**Q**uibus rebus cognitis, Martinus vehementius inflammatus VI. Kal. Sept. edictum promulgauit: in quo grauissimas a detestationes in Canetulenses, & sacrorum interdictum in ciuitatem explicauit: quod Legatum suum, & ipsum vrbis Episcopū & Cardinalem, turpiter in sui contumeliam execissent, his verbis: *Nam dilectum filium nostrum NICOLAVM, tituli S. Crucis in Hierusalem Presbyterum Cardinalem, perpetuum administratorem Bononiensis Ecclesie, auctoritate Apostolicā deputatum, suum conciuem, & patrem animarum suarum, taliter pertractarunt, contra omne debitum charitatis in proximum, & reuerentiam tanti Patris, quod prafatus Dominus NICOLAVS Cardinalis coactus est clandestinē, & tanquam incognitus excedere ciuitate, & diœcesi supradictis; neq. comodo, quo decebat Cardinalem incedere, sed mutato habitu (quia aliter inde recedere nullatenus permisissent) eundem libertate priuarunt, in dedecus & opprobrium nostrum, & Apostolicæ Sedis vilipendium & contemptum.* Deinde Duces cum militaribus copijs suis Bononienses inuadere iussit; qui direpto agro ad urbem progressi, acrius oppugnare ex diuersis partibus insisterunt, vnde bellum varijs detrimentis inferendis, in proximum est annum protractum. Quibus demum Canetulenses impulsī, Oratores XV. Kal. Iulias Immolam destinarunt, vt cum *b* Lucido Cardinali Ostiensi, Legato, & NICOLA O Episcopo ibi posito, de compositione tractarent: qui profecti, nihil æqui obtinuerunt. Inde III. Kalend. Septembris iterum missi, pacem commodis sanè conditionibus retulerunt; in quibus illud præcipuè continebatur, vt Bartholomæus Episcopatum NICOLA O dimitteret; Pontifex verò Abbatiam sancti Bartoli Bartholomæo ademptam reddi à Marchione curaret. Ita VII. Kalend. Octobris, Legatus in urbem ingressus, postridie Magistratus

*a Blondus  
loco cit.*

*b Hic Lucius de Comitibus Diaconus Card. S. Mariæ de Colmediis, obiit Bononiæ, an. 1437. Ita Onuphrius.*

iplos



ipsum apud se fidelitatis Sacramentum concipere iussit, ac NICOLAVM suæ sedis restituit. Postero verò anno, cum exiguas se aduersus florentes Canetulos opes ad retinendam dignitatem habere videret, vrbe egressus, Centum abiit, ac Baptistam moderatorem vrbis, ut moliebatur, reliquit. Quare accepta, Martinus accensus, conceptum iam pridem animo virus euomuit, ac Nuncio VI. Nonas Iulias in urbem missò, integrum sine vlla exceptione vrbis imperium postulauit; ni darent, se bello interneciuo persecuturum demonstrauit. Cui populus respondit, se pactas paullo antè cum eo conditiones custodire paratum esse, neque de eis quicquam demere velle. Ita bellum multo quàm antè acrius renouatum.

c. Fuit Caro  
lm VII. R.  
Franc &  
Henricus  
F. I. R. Angl.  
Vide Amy  
lium, & P.  
lydorum.

d. Serpiti: eo  
tempore he  
resis Husi  
tarum, de  
qua Prætor  
lus.

Interim gliscente inter novos Reges, Carolum & Henricum Franciæ, Angliæque certamine, Martinus experiri omnino studens, si qua æquitate rem ad otium deducere posset, NICOLAVM Legatum ad eam rem in Franciam destinauit, ac post ad cumulandam auctoritatem nouo hoc priuilegio insigniuit, V. Kalend. Decembris: Cum te ad pacificandum regnum Franciæ commissio tibi plena legationis officio, ut pacis Angelum destinemus, nos volentes tibi ea concedere, per quæ animarum saluti valeas providere, circumspeditioni tuæ omnes & singulas personas, tam Ecclesiasticas quàm Seculares, quæ à Catholica fidei, & S. Matris Ecclesiæ documentis deuiantes, in hæresin & quomodolibet collapsæ fuerint, postquam ad veram & Catholicam fidem redierint, & errores suos abiurauerint, & reconciliandi, & dispensandi tenore presentium plenam, & liberam concedimus facultatem. Inde litteras has ad Henricum Regem Angliæ, II. Kalen. Ian. scripsit, orans, ut se exorabilem ad rem constituendam præberet. Ad pacem procurandam dilectum filium nostrum NICOLAVM tituli S. Crucis in Hierusalem Presbyterum Cardinalem, Apostolicæ sedis Legatum, tanquam pacis Angelum destinamus; sperantes in Domino, quod ipsius profectio, & ipsi Deo erit accepta, & hominibus salutaris. Tuam verò clementiam exhortamur, & cum paternâ charitate rogamus, ut abolitâ omni memoriâ iniuriarum, & extinctis incendijs odiorum, & omni aliâ affectione depositâ, Cardinali te exorabilem præbeas & placatum.

CA-



## CAPVT XIII.

*POST VARIOS LABORES ITINERAQUE, VENIT  
tandem ad Concilium Basileense, & litteras accipit à  
Francisco Philelpho.*

**Q**uin etiam bellum terminare Bononiense cupiens, ad eundē mandatum rerum cum populo Bononiensi componendarū plenissimum misit. Ille verò rebus omnibus ad iter paratis, sequēti anno pridie Non. Febr. Ferrariam adiit, ac mandatum, quod habebat, cum Marchione *a* communicauit. Marchio verò Bononiensibus indicauit, NICOLAVM apud se esse, ac liberum pacis componendæ à Pontifice mandatum habere; eo ipsum vsurum, si aures verbis de compositione vellent adhibere; & si integrum vrbis imperium tradere Pontifici in animum inducerent, facultatem paciscendi vberimam attulisse; cui ipsi rescripserunt, oblatas conditiones non recusare; verum idoneos sponsores, ac fideiussores ad res tantas desiderare. Quare inani incepto NICOLAUS Venetias abiit, atque inde in Galliam ire perrexit. Interim Martinus missio Iuliano Cæsarino Cardinale Legato, Cōcilium *b* Basileæ instituit, ad Hussitarum heresim profligandam, Ecclesiamq; constitendam; prout Concilium Constantiense faciendum esse decreuerat; atq; hoc factō, X Kalendas Martij obiit; cui statim Eugenius *c* IV. (qui fuerat Gabriel Condulmerius Cardinalis) successit. Hic & Concilium continuandum decreuit, & pace commodis conditionibus Bononiensibus redditā, urbem recepit, & NICOLAO, quem item omnium plurimi aestimauit, munus pacificandæ Franciæ confirmauit.

NICOLAUS autem primū immaturā Martini morte deterrius, seriū aliquantō rem est aggressus; deinde causam omnium opinione impeditiorem est nactus. Neq; enim Principes. (presertim Regem Angliæ) ad locum edendum, quō Oratores rei discutiendę gratiā mitterent, impellere potuit: quamuis in eam curam toto pectore incubuerit, ac neq; laboribus, neq; periculis, neq; sumptibus ullis rei obtinendæ causā pepercerit; quod ipsemet Carolus *d* post in epistola ad Basileense Cōcilium confirmauit: *Cum superiore*

*a Hic fuit  
Nicolaus E.  
stensis, mul-  
tum laudat  
à Philelpho,  
Syluio, &  
Volateran.*

*b Vide Nau-  
clerum gen  
48. an. 1430.*

*c Ele. fuit est  
ann 1431. 5.  
Non Mart.  
ita Onuphr*

*d Vide Sar.  
Tom. 4. cō-  
cil. pag. 340.  
edit prioris.*

M

tem.



e Sigonius  
hanc episto-  
lam ex ar-  
chiui Alber-  
gatorum ac-  
cepisse vide-  
tur.

tempore, inquit, pia atque deuota supplicatione carissimi ac dilecti ami-  
ci nostri Cardinalis S. Crucis res ipsa non modica disceptatione varijs  
assignationibus agitata fuerit; quanquam labori, periculis, atque expen-  
sis minimè ipse pepercerit, tamen ad optatum portum non peruenit. Qua-  
re cum multis transactis mēsis nihil profecisset, Eugenius re co-  
gnitā, non maiore admiratione, quā labore accensus, sic post, I-  
dibus Maij ad eum e scripsit: *Miramur & dolemus, quod cum circum-  
spectio tua, ex commissione nostrā, pacem regni Francie tanto studio ac  
diligentiā, tantoq; persona tua incommodo & labore procurarit, & pro-  
curet, non fuerit adhuc inter illos principes, quorum necessarius est  
consensus, concordatum de loco, in quo Oratores partium, pro pace tra-  
ctandā apud te debeant conuenire. Commendandus est autem multum  
Philippus Dux Burgundie, qui paratus est obsequi voluntati meae, cui  
super hoc scribimus; atque item carissimo in Christo filio nostro Carolo  
Francorum Regi illustri, hortantes eum ad pacem, ne ex leui discrepan-  
tiā relinquatur practica tanti boni; pro cuius consecutione, non graue-  
tur tua singularis bonitas laborare, donec perfeceris, vel saltem mani-  
feste cognoris, per manus hominum non posse concludi. Nam si tu non  
feceris auctoritate nostrā, & Ecclesie, & prudentiā ac diligentiam tua,  
non videmus, per quem hominem fieri possit.*

f Naucler  
gen. 48  
Poggini in  
orat. fun.  
Zenit c. 16.

g In Chron  
p. 3 t. 22.  
c. 10. §. 4.

NICOLAUS verò, vbi se ad æquitatem adducere Regem Anglię  
variè tergiuersantem non posse perspexit, inde ex Pōtificis aucto-  
ritate discessit; ac quemadmodum prudentes medici, quos ægros  
salutaria remedia recusantes, ac diligētiæ suæ reluctantes aspiciūt,  
tanquam deploratos extremā Dei ope sanandos relinquunt, offi-  
cio satisfecisse suo putantes, vbi industriam fidemque suam adhi-  
buerint; sic ipse, postquam accensa se principum inexpiabilibus  
offensionibus odia extinguere dicēdo non posse animaduertit, eo-  
rum leniendorum curam Deo, ipsi humanarum infirmitatum v-  
nico curatori permisit. Cum autem ex itinere Basileam f progressus,  
audisset Patres in Concilio conuocatos, nouo exemplo consti-  
tuisse; Pontificem Concilij dimittendi iure carere, verū tāmquam  
ipsius Concilij decretis obnoxium, dicto illius audientem esse o-  
portere; aliaque multa ad sacrosanctam illam potestatem debili-  
tandam insidiosè parare; vehementius (vt S. Antoninus g scripsit)  
homo antiquæ probitatis exarsit, ac grauius Concilium, factum-

que



que eius increpuit, & vt in auctoritate Summi Pontificis ipsius Christi vicarij permaneret, admonuit; atque inde Bononiam ad Ecclesiam suam reuiscendam accessit.

Quo facto, statim ad Franciscum Philelphum litteras misit, statum eius cupiens cognoscere; & si tempora poscerent, aliquo insigni beneficio subleuare; quem morem ille ab initio Episcopatus instituerat, neque postea aliquo fortunarum suarum interueniente naufragio destituerat. Hic vir eruditissimus, ac, (prout illa ferebant tempora, quibus nondum exulta ac perpolita adeo dicendi ratio fuerat) disertissimus Florētiæ inter sauos fluctus discordiarum ciuiliū versabatur, ac de sua incolumitate, in magna æmulorum inuidia laborare compellebatur; & propterea litteris eis acceptis exhilaratus, ita respondit; vt NICOLA o se totum tanquam amplissimo litteratorum omnium Patrono commiserit; sic enim scripsit: *Thomas h Sarzanēsis, vir per humanus & eruditus, Amplitudinis tue Secretarius, Pater clementissime, tuo nomine litteras ad me dedit; quibus, quod mihi erat sole (vt aiunt) clarius, non amice minus, quam eloquenter ostendit, quanta sit tua erga me caritas, monuit, vt tibi significarem, quam me Florentia delectet; preterea si qua in re tua opera opeq. uti velim, scriptorio calamo ne parcam; te enim semper paratum fore, vt mihi benefacias. Vt ago tibi & habeo immortales gratias, Pater humanissime, quod ex qua die primū me Bononia vidisti, ac tuam in clientelam accepisti, te mihi Patronum semper, te Patrem, te beneficium prastiteris: Et id quidem nullis meis de te meritis, sed sola tua mansuetudine, atq. benignitate. Imitatus tu sanē eum, cuius crucem pro signo geris, Christum Optimum Maximum, qui vt cunctis mortalibus beneficeret, sibi ipsi non pepercit, &c. Exponit inde lubricum rerum suarum statum, atque ad extremum infert; Quæ cum ita sint, clementiam tuam rogo etiam atq. etiam, oro q. vt huic meo desiderio consulas; quidquid ipse de me statueris, indubitato persequar; operamq. dabo, vt tua de me opinio te nunquam fallat; nam neq. fidei vnquam deero, neq. industria; neq. diligentia.*

*Ex Florentia X. Kal. Oct. Anno natali Christiano*

*M. CD. XXXII.*

*h Litteras i-  
stas suo loco  
integras de-  
di.*



## CAPVT XIV.

*CV RAT CIRCVMFERRI IMAGINEM B. V. MA-  
ria, ac deinde non absq; fructu iterum interest Concilio  
Basilensi.*

*Latius de  
a is Sigonius  
lib. 4. de Ep.  
Bonon.*

*b De hac i-  
magine scri-  
psit historiā  
Ascanius  
Persius, quā  
hic circa finē  
totam repe-  
ries.*

*c Quod etiā  
num sit ma-  
gna populi  
religione.*

*d Vide Ze-  
num c. 16.  
e Exiāt alie  
literæ Euge-  
nij in Conc.  
Basil. apud  
Surium To.  
4. pag. 317.  
¶ seqq.*

**I**Nterim verò dum NICOLAUS officio vigilantis ac pij Pastoris in Ecclesia sua capeſſenda fungitur, occasionem adeptus est rei præclaræ, atq; ad memoriam posteritatis insignis instituendę. Proximo quippe anno, cū assiduæ ac vehementes pluuiæ, a ac tetra & immoderata tempeſtates maximā curam omnibus inieciſſent, ne, vt sæpè contigerat, ſegetes iam matureſcentes extinguerēt: cæteris frustra imploratis auxilijs, ipſe vnà cum Antianis decreuit, vt imago ex ore Deiparæ Virginis, manu S. Lucæ expreſſa (quæ ante complures annos Conſtātinopoli ballata, in æde S. Mariæ montis Guardia ſeruabatur) intra mœnia deferretur, atq; illa religioſe in pompâ perlatâ, ſupplicatio de more adhibitis ſacris ac prophanis ordinibus ageretur. Eâ curâ deuotis Hospitalis S. Marię mortis mādātâ, ipſi IV. Nonas Iulias imaginem deportarunt, atq; in æde Virginum S. Matthiæ collocauerunt; quæ ipſam in monte Guardia conſeruabant. Poſtero verò die, tertio & quarto, Epiſcopus inde ſumptam, in pompa ferri, atq; ab omnibus ad tria templa ſolēnes Deo preces adhiberi præcepit. Quo factō, lux ſtatim optatæ ſerenitatis adfulſit. Quare imago ex decreto publico religione ciuiū aucta, ad montem relata, ac cuſtodiri diligentius ac ſanctius cœpta, in urbem quotannis in hunc uſque diem e defertur.

Eodem anno Eugenius Pontifex, comperto Baſileenſis Concilij Epiſcopos nihil aliud moliri, quā vt poteſtatem Pontificiam aut proriſus euerterent, aut certè vinculis arctiſſimis alligarent: tū alia remedia temerarijs illorum cœptis admouit, tum Legatos nouos veteribus addidit, qui lubrica ac periculosa illorum conſilia interpellarent, atq; acrius pro Pontificia dignitate pugnarent. Inter cæteros autem, (quorum prudentiā, fide, ac virtute rem Eccleſiæ aut lapſam reſtitui, aut labentem ſuſtineri poſſe putauit) NICOLAUS ipſe d principatum obtinuit. Itaq; XVIII. Kalen. Ianuarias, litteras ad eum e dedit, quibus pleniffimam ei poteſtatem omnia

ſuo



suo nomine, pro fide ac iudicio suo constituendi concessit: quæ ipse ad salutem ac dignitatem Ecclesiæ pertinere putaret. Profectus autem NICOLAUS nullum officium, vel pietatis, vel prudentiæ prætermisit, quo vel imposita Ecclesiæ vulnera accuratè sanaret, vel imponendis maturè obuiam iret. Verùm exulceratos aduersus sedem Apostolicam Patrum illorum animos nactus, infesta eorum tela omnia propulsare non potuit. Cuius rei argumento illa sunt, quæ illi egerunt; Etenim sequenti anno, sessione f. XVII. ipsum quidem ut Legatum Pontificis admiserunt, verùm ita, ut neque ipsos inuitos ad agendum vrgeret, neque rationem agendi eatenus obseruatam inuertere posset.

Inde 5. Idus Maij eidem quædam Pontificis nomine postulanti, maiore, quàm decuit, libertate negarunt; ac postremò, ut ipsum hominem prouidentiore, atque acriorem à Concilio remouerent, atque Eugenij dolorem multò magis accenderent, ipsum cum Petro Cardinale S. Petri ad vincula, VIII. Kal. Aug. Legatum ad Eugenium, ac alios Principes Italiæ pacificandos, & bona Ecclesiæ occupata recuperanda destinauerunt. Huius legationis neque in actis, neque alibi vspiam mentio reperitur; verùm inter ipsius Cardinalis scripta, familiæ Albergatorum relicta, certa monumenta feruantur, quæ hoc loco referre opportunissimum visum est: *Sacrosancta generalis Synodus Basileensis, in Spiritu sancto legitime congregata, vniuersalem Ecclesiam representans, dilectis Ecclesiæ filiis NICOLAUS tituli S. Crucis in Hierusalem, & Ioanni h. S. Petri ad vincula, S. R. E. Presbyteris Cardinalibus, nostris & Vniuersalis Ecclesiæ Legatis salutem, & omnipotentis Dei benedictionem. Ad tria maximè sancta opera, extirpationem videlicet hæresum, reformationem morum, ac pacem inter cunctos Christicolæ auctore Domino procurandam, hic in Spiritu sancto legitime congregati, circa ea, per quæ ipsius veræ pacis & perfectæ quietis desideranda tranquillitas, in singulas orbis partes, Deo propitio, subsequi valeat, libenter extendimus vigilantia nostra curas. Proinde leuantes in circuitu nostros oculos, & considerantes, de quo ab intimis præcordijs anxiamur, quot discordiarum fomenta, guerrarum turbines, calamitates & strepitus diuersas Italiæ partes hætenus, (proh dolor) lachrymabiliter concusserint, ad id ut nisi celeriter occurratur, penè totam ipsam Italiam bellis & discordijs innumeris in præ-*

Vide Suriū  
Tom 4 Cōc.  
pag 52. anno  
414.

g Meminit  
etiam huius  
Zenus c. 17.

h Hic fuit  
Ioānes Cer  
uantes Hi  
spanus, qui  
obiit anno  
1450. iuxta  
Omphrium.



sentiarum undique flagrare, & ebullire videamus: ut autem tantarum guerrarum debacchans furor suppressi, & iam prae paratum extinguere valeat incendium, hodieque vigentes guerra conticescant, ac singula in ipsa Italia discordiarum fomenta, ne deterius inde contingat, Omnipotenti Deo coelitus inspirante, in bonum salutaris concordiae & firmioris unitatis feliciter commutentur, de vestrae circumspeditionis industria (quam potentem opere pariter, & sermone in magnis expertam & arduis, eximia probitate, fidelitate, magnitudine consilij, morum elegantia, scientiae claritate & alijs gradibus virtutum titulis, earum largitor Dominus multifariam insigniuit) sumentes fiduciam specialem, quod ea, quae vobis duxerimus committenda, exactissima ac per uigilio operam curabitis adimplere, vos, & quemlibet vestrum in solidum, tanquam pacis angelos, nomine vniuersalis Ecclesiae & nostro, ad partes Italiae Deo propitio duximus destinandos, & destinamus vestram diligentiam, & solerti indefessaque opera, tam apud sanctissimum Dominum Eugenium Papam Quartum, quam inter quoscunque Italiae Principes, dominia, communitates, provincias, ciuitates, terras, & loca, gentiumque armigerarum Capitaneos, ut discordiae, differētia, dissensiones, atque guerra de praesenti vigentes, & quae quodammodo in futurum suboriri contigerit, de medio tollantur, & penitus extinguantur, indubitanter tenentes, quod inspirante Regum Rege pacifico, Italiam ipsam ex quotidianis pene guerrarum strepitibus ad metam salutaris concordiae, & pretiosum pacis thesaurum reducetis. Rursus, cum nonnullae ciuitates, terra, castra, & loca ad S. R. Ecclesiam spectantes, & spectantia, à quibusdam fuerint, & detineantur occupata, quarum recuperatio ad pacem, quietem, & bonum eiusdem Rom. Ecclesiae pertinere dignoscitur, cum omni solerti cura ac diligentia, per quoscunque modos possibiles, & magis accomodos elaborabitis hac loca huiusmodi ad obediētiā, & subiectionem ipsius S. R. Ecclesiae, & dicti D. Eugenij Papae, ac sacri Collegij Cardinalium, redintegrare, & reducere, ipsaque regere, protegere, ac gubernare, &c. ad extremum; Nos enim sententias, quas vos, aut alter vestrum rite tuleritis, & poenas, quas inflixeritis in rebelles, nec non caetera, quaecumque vos, vel alter vestrum in praemissis, & circa praemissa feceritis, ratas & rata habebimus, & faciemus auctore Domino, usque ad satisfactionem condignam inuiolabiliter obseruari. Datum Basileae, 8. idus Aug. anno Natiuitatis M. CD. XXXIV.

g. Alie literae à Concilio Basiliensi ad eosdem sunt to. 4 Concilio rum apud Sarium, pag. 163.

CAPVT



## CAPVT XV.

*MITTITVR A CONCILIO BASILEENSI AD  
Eugenium R.P. & ab ipso Pontifice in Franciam  
tertiò ablegatur.*

**H**OC verò negotium NICOLAUS inuitus quidem suscepit, sed refragari præcipiti tot Patrum, Ecclesiam vniuersalem (vti asserebant) repræsentantium studio, vel potius cupiditati, non nisi maiore cum rerum detrimento se posse putauit. Itaque ad Eugenium (qui Florentiam à Columnensibus Româ pulsus, IX. Kal. Iul. venerat) ilicò adiit, & cum eo accuratiùs de re vniuersa deliberauit. Dum aut̃ ibi esset, iterum Patres litteras ad eum scripserunt, *Sacri Concilij, & Vniuersalis Ecclesiæ Legatum* appellantes: quibus Procuratorem ei Prosperi Columnæ Cardinalis, a capitalis Eugenij inimici & hostis, commendauerunt, vt ipsius ope Ecclesiastica quædam ab Eugenio beneficia obtineret. Quod factum Eugenius omnium indignissimè tulit. Itaque vt parem eisdem, à quibus prouocabatur, molestiam doloremque referret, NICOLAVM Basileam redire, ac Legatum actionibus eorum omnibus non solum interesse, sed etiam accuratè præesse, & quoad posset, sese (si à Sto deflecterent) obijcere iussit.

Inde postero anno III. Kalend. Martij litteras ad eum dedit, quæ quidem in actis intextæ *b* non leguntur, quibus nominatim potestatem subortæ de *c* Annatis, (vt vocabāt) controuersia, seu potius discordiæ sedandæ indulgit. Quod præceptum cum ille summa fide industriaque singulari curasset, Deus noui illi pro Christiana Rep. suscipiendi laboris patefecit occasionem: Placuit enim Eugenio, eundem iterum *d* in Galliam proficisci, ad pacem (quæ coalescere nondum potuerat) inter illos Principes sancendam. Iniquo scilicet animo vir optimus audiebat, regionem illam Catholicæ pietati ab antiquo tempore deditissimam teterrimo ipsorum Principum odio deuastari, ac malefanis hominum consilijs vltima perniciæ deformari. Itaque omnia sibi tentanda putans, si qua ratione posset tanto malo mederi, neminem ad id aptiorem esse constituit, quàm eum, qui bis eam

rem

*a Vide Ouphrium & Platinam, quorum hic in Eugenio IV. causas inimicitie refert.*

*b In vno M. S. aberat (non.)  
c Tractat de hisce Concil. Basil. sess 21. de cõ. ule Æmylium in Carolo VII. R. Francor.*



rem, causamque summâ industriâ tractauisset. Itaque sic ad eum ornandâ illius, ut sit, potestatis gratiâ scripsit: *Dilectio filio N. COLAO tituli S. Crucis in Hierusalem Presbytero Cardinali, Apostolica Sedis Legato, salutem & Apostolicam benedictionem. Cum te ad pacificandum regnum Francia, commisso tibi plena legationis officio, ut pacis Angelum destinemus: nos volentes illa tibi concedere, per quâ personis partium illarum te valeas reddere gratiosum, circumspeditioni tuâ dispensandi, cum viginti quinq. personis Ecclesiasticis, (infra limites dicti regni, & partium adiacentium consistentibus, & defectum ætatis patientibus) de quibus circumspeditioni tuâ videbitur, ut earum qualibet, postquam vicesimum secundum suæ ætatis annum peregerit, possit ad sacerdotium promoueri. Inde VI. Nonas Maij Renatû Ducẽ e Andegauensem hortatus est, ut NICOLAO ad pacem conficiendam adesset: Ex singulari affectione, inquit, quam habemus ad bonum statum & quietem regni Francia, mittimus denuo pro illius pace procurandâ & componendâ dilectum filium nostrum NICOLAVM, tituli S. Crucis in Hierusalem Presbyterum Cardinalem, Apostolicæ sedis Legatum, virum utiq., ut nosti, omni virtutum genere excellentem, qui eam materiam hætenus laudabiliter tractauit. Quoniam autem scimus Zelum, quem tu quoq. habes ad dictam pacem, hortamur in Domino tuam excellentiam, ut ad hoc bonum pacis adhibeas consilium & operam tuam, assistendo eidem Legato, cõsilio, auxilio, & favore, in quibuscunque rebus poteris, ut hæc sancta conclusio fieri possit.*

Interim NICOLAVS eruditis aliquot viris in comitatum assumptis (inter quos præcipuè AENEAS SYLVIUS, f. PICOLOMINEUS nomen) in Franciam venit, ac rem insigni animi magnitudine aggressus, litteras ad ipsos Principes misit: placere sibi significans, ut quatuor inter se mensium inducias facerent, quò liberius ac tutius vtrò citroque à partibus commeari, ac disceptari de conditionibus ineundæ concordie posset; & ut iidem Oratores cum plenis mandatis ad certam, quam significauit diem, Niuernum mitterent; nam se eò ad partes audiendas, & controuersias dirimendas, illâ die esse venturum. Quibus litteris Carolus Rex ex Ambrosia IV. Idus Iunias, Gallico (prout scriptum apud ALBERGATOS reperitur) sermone, in hunc maximè modum rescripsit: *Litteras vestras accepimus, quodq. præcipitis de inducijs quatuor mensium facien-*

*dis,*

e Hunc Ga-  
guinum libr.  
10 videtur  
vocare ducẽ  
Barrensem.

f Hic postea  
in Pont. Ro-  
voca: m est  
Pim II.

g Est oppidũ  
Francia.



dis, cognouimus; simulq. diem, quo conuenire Oratores ab utraque parte debeant, intelleximus; Quae omnia summopere approbamus. Itaq. litteras etiam fidei publicae testes, pro securitate partis aduersariae mittimus, & urbem Niuernensem ad conueniendum aptissimam iudicamus. Quibus rebus ita constitutis, inde conuentus Niuerni est actus; in quo, cum varijs disceptationibus habitis, spes haud leuis oblata esset, fore, ut res facile conueniret, visum est omnibus expedire, ut alter conuentus Kalendis Iulij ad Atrebatum haberetur, ac rei stabiliendae causâ Legatos quoque eò suos Concilium Basileense mittere rogaretur. Eius verò rei curâ Carolus Rex sibi assumptâ, ad Synodum ita scripsit: Proximis h. diebus nouissimè celebrata est in materia componendae pacis cum Duce Burgundiae apud ciuitatem Niuernensem conuentio & ad eandem nostrâ ex parte cum decenti ac sufficienti potestate Ducem Borbonij, & Comitem Richemundum constabularium nostrum, & fideles Consiliarios nostros Archiepiscopum Rheimensem, Cancellarium nostrum, & Christophorum de Haricuria consanguineum nostrum transmisimus. Et cum res ipsa post longam disceptationem, optimam ad ea, quae pacis sunt, dispositionem habuisset, cupientes omnes etiam partes, eodem & unanimi consensu & fauore pacis & unitatis praestantius agere, in alterius diei & conuentionis apud ciuitatem nostram Atrebatensem, ad primam diem mensis Iulij proximè instantis concordarunt: consentientes etiam, ut res tanta efficaciam habeat ampliorem & certiore, ut pro parte Sanctissimi Patris nostri, Cardinalis S. Crucis, & Arelatensis, à sacro Concilio Basileensi Cardinalis de Cypro, & S. Petri ad Vincula, ad ipsam assignationem, & locum transmittantur. Quamobrem amicitiam vestram oramus, ut ad diem illam praefatos Cardinales de Cypro, & S. Petri transmittere vestri ex parte velitis.

Kal. inde Iulij ipsi pacis arbitri Atrebatum i conuenere, NICOLAUS Cardinalis S. Crucis, & Cardinalis Cyprius, sex stipati Episcopis; pro Carolo Dux Borbonij, Comes Richemundus Connestabilis, Archiepiscopus Rheimensis, & Christophorus de Haricuria; pro Anglo Cardinalis Vicestrensis, & Archidiaconus Eboracensis; pro Burgundione autem Cameracensium & Atrebatensium Antistites. Ibi cum omnes ordine confedisent, NICOLAUS loqui exorsus, primum commoda pacis, & belli detrimenta, & maximè

h. Littera i  
ste pleniores  
sunt in Conc.  
B. fil. apud  
Sarium To.  
pag. 540.  
col. 1.

i Prolixius  
hec Gaguin.  
lib 10. &  
Polyd. lib 21.  
anno 1455.



quæ ex præfenti discordia miseræ Galliæ essent illata, cædes, incendia, vexationes, direptiones, vastitates, & reliqua eiusmodi calamitatum genera, longâ atq; apparatâ oratione commemoravit: deinde quanto Eugenius Pontifex huius compositionis arderet desiderio, ad quietem & trāquillitatem non ipsius solum Galliæ, sed totius etiam Christianæ Reip. docuit. Atq; omnes ita ad firmam veramque concordiam contrahendam, remotis, quæ adhuc morā intulerant controuersijs, est cohortatus. Vbi verò perorauit, Legati Anglici dicere sententiā iussi, sese ad rem finiendam paratos esse asseruerūt, ac propterea Carolo, quidquid Rex suus in Francia ultra & citra Ligurim possideret, offerre, cum eo vt pro commodo vtriusque partis, aliquorum inter se oppidorum commutatio fieret. Quam conditionem Franci libētibus animis accepere, ac contra Hērico, quidquid teneret Carolus in Ducatu Aquitanix, & totum Ducatum Normandiæ sponndere. Verū hanc conditionē Angli superbē repudiāru, atque illicō ē conuentu egressi, alia se die redituros dixerunt. Inde profectis illis, NICOLAUS interritus mentionem veteris inter Francum & Burgundum sarciendæ gratiæ studio intulit, atq; vtrumq; multis verbis ad superiores terminandas controuersias obsecrauit. Tum Nicolaus Raulinus Burgūdio, Principis sui nomine diu meditatam orationem instituit, quæ ea, quæ à Carolo rege Dux Burgūdius posceret, enarrauit. Quæ omnia quanquā graua admodum videbantur, tamen oratores Franci, nomine Regis sui comprobauerunt. Illa verò imprimis erāt, vt Carolus confiteretur cædem Ioānis Ducis iniquē patrata fuisse, spōderetq; se eam pro virili parte vlturū, ac sacra pro salute eius, atq; eorum, qui cum eo, aut pro eo occisi fuissent, quotannis fieri curaturum: & in loco, vbi sepultus esset, eodem ac monasterium cōditurum; vbi verò cecidisset, crucem lapideam excitaturū, quæ memoriā facinoris propagaret, eo sumptu, qui NICOLAUS Cardinali visus fuisset. Multa etiam addita alia, quæ actis / Cōcilij Basileensis mādāta, hoc loco interponere visum est alienum. Quibus acceptis Oratores partium ambarum in conspectu Legatorum iurarunt se daturōs operam, vt ea sanctissimē custodirent. Atq; ita pax per caduceatores, magnā omnium populorū gratulatione vulgata est. Quibus reb⁹ magna vtriusq; partis voluptate peractis, NICOLAUS

egre-

Paulus Æmylius in  
Carolo VII  
fol. 462. an.  
435.

Apud Suerium Tom.  
4 Concilio  
p. 227. &c.



egregiè ab omnibus collaudatus, in Italiam se recepit, ac cranium  
*m* S. Annæ matris B. Virginis ab Henrico rege dono acceptū, prid.  
 Kal. Dec. Bononiam attulit, atq; ingenti ab vniuersis honore acce-  
 ptus, Monachis suis Carthusiensibus dono dedit: qui ei oratoriū S.  
 Annæ in viâ S. Iſaiæ condiderunt: vbi nunc etiam aſſeruatur. Inde  
 Non. Dec. ad Pontificem Florentiam *n* abiit, atque omnia à se acta  
 renunciavit. Ex quibus Eugenius magnum fructum lætitiæ toto  
 cum Cardinalium collegio cœpit.

## CAPVT XVI.

*Q*UANTAE FVERIT AVTHORITATIS IN CONCI-  
 lio Ferrariensī, & Florentino, imò & Basileensi.

**P**roximo inde *a* anno Eugenius liberum tandem Bononiens-  
 sis vrbis imperium nactus, Florentiā Bononiam venit, inter  
 ceteros Cardinales ipsum etiam NICOLAVM habens in comi-  
 tatu. Ibi cum Basileense Conciliū, (ad quod iam pridem contume-  
 liæ non honoris causa adesse à patribus iussus fuerat) abrogare, atq;  
 vnā honoris aliquid amicæ ciuitati tribuere cuperet: Concilium  
 alterum Bononiam in proximum *b* annum indixit; qui annus vbi  
 venit, tum mutato iustis de causis consilio XIV. Kal. Oct. nouo e-  
 dicto proposito, illud Ferrariam tranſtulit, cui edicto NICOLAVS  
 quoque subscripsit.

Eo verò qui inſecutus est anno, *d* nuncio de Sigismundi Impe-  
 ratoris morte accepto, iusta ei de more in Basilica S. Petronij sol-  
 uit, ac mox VI. Kal. Febr. Ferrariam adiit, ac IV. Non. Ioannem Pa-  
 læologum Imperatorem Constantinopolitanum aduenientem  
 excepit: quem post quatuor dies Ioseph Patriarcha Constantino-  
 politanus est consecutus.

Eo tēpore; gliscente indies magis manifesto Eugenium inter ac  
 Basileensē Cōcilium diffidio, cum Cōcilium sibi principatū atq; au-  
 thoritatē in Ecclesia supra Pontificē vendicaret, atq; omnia ad tra-  
 hēdos in suā ſententiā populos permisceret: Eugeni⁹ in suspiciōē  
 adductus, ne Germania ad partes cōtrarias inclinaret, aut certē ne  
 aliquo modo ab autoritate sua hac arrepta occasione deſciſceret:  
 nō alienū eſſe duxit, graui miſſa legatiōe Principes illos in fide atq;  
 officio cōtinere; Mun⁹ aut hui⁹ legationis ipsi quoq; Nic. e mādauit

N 2

qui

*m* Etiam  
 Marcoduyē  
 ſes habent  
 partem de  
 capite S. An-  
 næ.  
*n* Zenus cap.  
 17. eſſerit  
 Eugenium  
 tunc tempo-  
 ris Bononiæ  
 reſediſſe.

*a* An. Dom.  
 1436.

*b* An. Dom.  
 1437.

*c* Tom. 4.  
 Concil. Surij  
 pag 325. col.  
 2.  
*d* An. 1438.  
 Nam præce-  
 denti ann. 9.  
 Dec. obiit  
 Sigismundus  
 Imp. Ita  
 O: uphrim  
 & Gordo-  
 nus

*e* Zenus cap.  
 18. & P. g.  
 gim in orat.  
 ſum i. ſtan-  
 tur de hac  
 legatione.



qui ad placandum vniuersum terrarum orbem Diuino destinatus consilio videbatur; ac mox potestatem omnes ad se Ecclesiasticos Principes euocandi, atque homines omnibus contractis peccatorum labibus expiandi cōcessit. Huius legationis nulla in actis Conciliorum est mentio; at litterę Pontificis apud ALBERGATOS conseruata testimonium locupletissimum perhibent, omnes 3. Idus Septembris Ferrarię data: quarum vnę huiusmodi sunt: *Dilecto filio NICOLAO tituli S. Crucis in Hierusalem Apostolica Sedis Legato salutem & Apostolicam benedictionem. Cū te ad partes Germaniæ, pro nonnullis bonum Ecclesię, pacem, & quietem populi Christiani concernentibus negotijs peragendis, commisso tibi plena legationis officio, ut pacis Angelum destinemus, & utilitatem Ecclesię, & prosperitatem negotiorum magnam verisimiliter possis afferre, si partium illarum Pralati & Religiosi de tuo mandato insimul congregentur, circumspeditioni tuę Pralatos, ac Religiosos ordinum quoscumque, exemptos, & non exemptos, in partibus prædictis consistentes, quoties tibi expedire videbitur, ad locum congruum & aptum; ac tempus certum insimul auctoritate nostrā conuocandi, & congregandi, eisq; ex parte nostrā iniungendi, quę ad exactionem negotiorum huiusmodi nostrumq; & Romanę curię statum necessaria & utilia fore perspexeris: alia quoque ordinandi & disponendi, quę in præmissis, & circa ea necessaria fuerint & opportuna, plenam tenore præsentium concedimus facultatem. Datum Ferrarię anno Incarnationis M. CD. XXXVIII. III. Idus Septembris.* Alteris verò permisit, ut is per se, vel alium idoneum presbyterum pœnitentiarium suum confessiones quarumcunque personarum audire, & auditis pro commissis debitam absolutionem afferre, & in casibus maiori Pœnitentiarij reseruatis valeret. Inde alias ad Othonem & Stephanum, comites Palatinos f. Rheni, Guidinum Ducem g. Brunsvicensē, & Episcopum h. V. Vormatiensem, omnes eodem exemplo scripsit his verbis: *Pro nonnullis negotijs honorem Dei, pacem Ecclesię, & bonum Republ. Christianę concernentibus, dilectum filium nostrum NICOLAVM, tituli S. Crucis in Hierusalem presbyterum Cardinalem, Apost. sedis Legatum, ac venerabiles fratres Ioannem Tarentinū Archiepiscopū, Petrum Dignensem, ac Antonium Vrbinatem Episcopos; nec nō dilectos filios Franciscū de Capitibus Liſtæ I. V. Doctore, & militem Ioannē*

de Tur

f Consul:  
Marq. Fre-  
berum.  
g De ducib.  
Brunsvi-  
censibus agit  
Chronicon  
Chronicon  
par. 3 p. 884.  
h H. c. f. u. i. E-  
piscopus  
LX Fride-  
ricus à Dom-  
negk, qui o-  
biit anno  
1445. Ita  
constat ex  
Bruschio.



de Turrecremata sacri Palatii magistrū, & NICOLAVM de Cusa Decretorum Doctorem, Oratores nostros ad partes Germaniæ mittimus: quibus circa præmissa aliqua tibi nostrā parte referenda commisimus. Quare præfatis Legato & Oratoribus, in præmissis nobilitati tuæ referēdis, fidem plenam impertiri velis, illisq; in omnibus opportunis (cū ab eis requisiti fueritis) assistere, sicut de deuotione tua in Domino confidimus, atq; speramus. His mandatis litterisq; NICOLAVS acceptis, non tamen in Germaniam (vt puto) processit: Siquidem primæ actioni, quæ post 8. Id. Oct. in Concilio Ferrariæ habita est, interfuit, inter sex Latinos Doctores relatus, qui cum totidē Græcis de Spiritus S. processione differerent, cū Græci ipsum à Patre duntaxat, Latini à Patre, Filioq; procedere affirmarent. Græci fuere Marcus Ephesius, Isidorus Ruthenus, Bessarion Nicænus, Theodorus Xanthopulus, Siluester Balsamon, Gregorius Gemistus: Latini verò ipse Nicolaus Cardinalis tituli S. Crucis, Iulianus Cæsarius Cardinalis tituli S. Sabinae, Andreas Archiepiscopus Colossensis & Foroliuiensis Antistes, ac duo Monachi in Theologia præclari. Ex quo suboritur suspicio, ipsum aut Ferrariā non exiisse, aut certè statim ab Eugenio ex itinere reuocatum se recepisse; neq; enim, si in Germaniam peruenisset, ac litteras illas superscriptas Principibus reddidisset, eorum autographa suis propinquis, vti fecisse eum diximus, relinquere potuisset. Garimbertus tamen, illum ad Albertū Cæsarem adiisse, atq; ab eo reuertisse, scribit: cuius rei cū ego nullam in Germanicis annalibus significationem inueniā, neq; præterea certi quidquam aliunde haustum habeam, rem nec opinione mea affirmare, nec pro vana prætermittere volui.

Eo anno populus Bononiensis à Præfatis Eugenij malè habitus, rursus sese Ecclesiasticæ ditioni subtraxit. Quippe auctoribus Bētiuolis, Gubernatorem ab eo impositum vrbe expulit, & Nicolaum & Picininū, Ducis Mediolani Præfectum, statua non longè habentem, primū auxilij causā accersuit: Deinde aduersus vicinos populos occultè contra se cum Eugenio coniurantes, & libertatis custodē, & vrbis administratorem instituit. Qui cū Cētum & Plebem oppida, ad se ab auctoritate NICOLAI Episcopi auertere contendisset, proposito excidit: oppidis illis Episcopo potius, quàm populo obtemperare optantibus. Ea res vehementer Eugenium

i Hor etiam  
affirmant  
poggium in  
orat fun. &  
Z. num. c. 13.

K Huim cre-  
brum memi-  
nerunt Blon-  
dum, Syluim,  
Philelphum,  
& Volatier.  
&c.



1 S. Antonin.  
in Chron. tit.  
22 c. 1. §. 16.  
in An. 1459  
iuxta Onu-  
phrium.

n Vide Su-  
rium Tom.  
4 Concil.  
pag. 467.

a Hic obiit  
anno 149.  
4 kal. Iun.  
vi ex Onu-  
phrio constat.

b De hoc  
schismate  
Platina, O-  
nuphrius,  
Nauclerus,  
Cranzium,  
etc.

perturbauit; Itaque cum pridem Ferrariæ laborari pestilentia coeptum esset, atque indies truculentiùs lues illa defauiret, sequenti ineunte *m* anno Florentiam transuersis itineribus, ne Bononiensem agrum attingeret, festinauit, atque eò Concilium aduocauit; quem Imperator, Patriarcha, ceterique studiosè secuti sunt. Ibi actio prima IV. Kal. Martias, vltima pridie, (apud Surium est, prid. Non. Iul.) Kal. Iulij habita est: in qua quæstio de Spiritu sancto, & de Romanæ Ecclesiæ principatu cum Græcis ex nostrorum sententia est transacta. Ei actioni quoque NICOLAUS interfuit, ac Concilio eodem die perfectò ipse ceteris cum collegis suis *n* subscripsit: quemadmodum ipsius Concilij acta demonstrant.

## CAPVT XVII.

DEPUTATUR SUMMVS QVAESTOR PONTIFICIS  
*Romani, laborat calculo, moritur, ac sepelitur.*

**D**Um autem ibi esset, haudquaquam Ecclesiæ suæ immemor, quæ ipsi assidue in medullis hærebat, eam duobus Sacerdotibus, quos nominant *Mansionarios*, commendauit, atque ipse summo quæsturæ Pontificiæ honore, mortuo Iordano a Ursino Camerario ab Eugenio auctus est. Quæ res causam attulit, ut nunquã postea ab aula discedere Pontificia quiuerit; Inde prid. Kal. Septēbris Imperatorem à Concilio reuertentem Bononiæ regio apparatu excepit: quem diem festum magnâ lætitiâ obuiam ciuitas progressa concelebrauit.

Eodē etiam anno Patres Basileenses, postquam Eugenium sæpius à se citatum non adesse viderunt, eò vecordiæ processerunt, ut Pontificatum illi abrogarint, & pro eo Amadæum, Ducem Sabaudie, Felicem V. appellatum *b* subdiderint. Quo facto vehementer nō solum Eugenij animum multis perturbationibus ægrum perculerunt, sed vniuersam etiam Remp. Christianam vix ipsis iam hærentem ossibus grauissimè vulnerarunt.

Eugenius autem cum persequentes tres annos Florentiæ permansisset, demum anno millesimo quadringentesimo, quadragesimo tertio, Nonis Martij Senas concessit; atque ibi spatio aliquot mensium substitit. Interim NICOLAUS, qui ab illius nunquam la-

tere



tere discedebat, grauius tentari & calculo cœpit: quem ex superiore victus ratione, & præteritorum laborum susceptione contraxerat; quocum per aliquot dies patientiâ magis & virtute, quàm remissione doloris aut spe aliqua vitæ luctatus est; quam libenter secum meliore atque optabiliore commutaturum esse dicebat. cum autem sic affectus decumberet, Eugenius, qui illum vnicè diligebat, nocte sæpè solus inuisit, ac bono fidenti què animo esse iussit. Verùm consolatione vir fortissimus, & Diuinæ misericordiæ memor non eguit; cum ipse se & alios confirmare, vel opportuna sacrarum litterarum lectione vel præclara vitæ institutione iam inde ab ineunte pueritia didicisset. Inde morbi grauitate (nam & intimus ardentissimæ febris æstus accesserat) ac doloris pertinacia victus, VII. Idus Maias, anno ætatis suæ d. sexagesimo octauo est mortuus, ritè omnibus Sacramentis Ecclesiæ, quæ identidem ipse petijt, expiatus.

Quod vt Eugenius sensit, amici desiderio vehementer afflictus, illico vesicam aperiri, & calculum extrahi iussit, atque apud se pro concepta sanctitatis eius opinione retinuit. Inde in Basilicam vrbis elatum, solemnes super eum preces effudit, atque ibi honestæ sepulturæ mandauit. Huius mortis nuncio Bononiam perlato; ingens extemplo omnes ciues mœror inuasit. Itaque tabernæ clausæ, Iustitium indictum, atque omnia intimæ ac variæ tristitiæ signa edita, quæ ad decorandum summi alicuius Principis obitum edi potuerunt; iusta etiam per triduum in Basilica magnificè persoluta, quæ Antiani & Magistratus præsentiam suam afferentes, opifices verò ab operibus suis ad tertiam vsque horam cessantes, honestauerunt. Inde cadauer Florentiam ad monasteriũ Carthusiense translatus, atque in eo hoc qualecunque elogium est incisum: *Sepulcrum omni laude dignissimi, & Reuerendissimi Patris NICOLAI tituli S. Crucis in Hierusalem presbyteri Cardinalis. Hic natus Bononia, primum ex Priore Carthusiensi, petente populo Bononiensi, Episcopus: tum à Martino Pontifice Cardinalis designatus: post plurimas susceptas legationes, Senis diem suum obiit, ætatis suæ anno sexagesimo octauo, vir piissimus mitissimusq., vitæ integritate singulariq., virtute omnium testimonio comprobatus. In gradibus autem hi versus additi sunt:*

c Poggini in  
orat. fun.  
Z. num. c. 20.  
O. S. Antonium,  
c. c.

Idem as-  
firmat Tog-  
gius in orat.  
fun.

Hodie es-  
seruatur Flo-  
rentia in  
Carthusia  
magna cum  
veneratio-  
ne.  
Confirmat  
hæc Viza-  
nus seu Vil-  
lanus.

Car-



g Idem epitaphium habet Nomenclator S. R. E. Cardinalium.

h Hoc est anno Dom. 1433.

*Carthusia g me terra tegit, quem sumpsit alumnus,  
Ac dedit esse patrem; vatiua Bononia tandem  
Me sibi pastorem tenuit de iure vocatum;  
Cardinis Ecclesia compulsus pondera sumpsit,  
Et crucis in titulo mihi fulsit rubra thiara.  
Mille quater centum denos quater egerat annos,  
Tres etiam h cyclas solaris, dum NICOLAVS  
Mente petens cælum sub saxo corpore claudor.*

Hodie quoque ad perennem sanctitatis eius memoriã Monachi illi calculum eius è vesica exemptum, & Põtificiale superpellicẽ, & sandalia, in sacrario magnã veneratione custodiunt; Bononien- ses verò crucem argenteam, quam Legatus præferebat, & alteram quam sacris operans in pectore gestabat, item acerram & thuribulum eius Ecclesiæ suæ relicta ostendunt.

## CAPVT XVIII.

## B. VIRI LAUDES SANCTIMONIA QVE.

**M**emorabile autem illud, quod paucis post mortem diebus idem Thomæ Sergianensi, familiari suo, obitum suum impatienter ferenti, ac fletu lachrymisq; prosequenti in somnis se obtulit, ac dolorem omittere, & sine curâ ipsum degere iussit: nã præclare secum Christi beneficio agi, illum verò mox Pontificatum Maximum adepturum. Quod memoriæ prodidit Franciscus Philadelphus in oratione ad Xystum a Pontificẽ, his verbis: *NICOLAVS V. cum NICOLAI ALBERGATI, sapientissimi imprimis, & sancti viri, Cardinalis Bononiensis, obitum molestius ferret, hunc tandem per somnum ad se venire existimavit, & ita anxius appellare: Thoma fili, quid diutius gemis? quid adeò te affligis? pone lachrymas, & te collige; nobis enim bene est benignitate Iesu. Itaq; surge, atq; accingere; ad breue enim tempus graue tibi subeundum est munus Petri gubernandæ nauiculae. Quã quidem somni visionẽ haud ille dissimulãter præ se tulit. Nã cum alijs nonnullis familiaribus, iũ etiã mihi, cum hac iter faceret, Germaniam petens, ab Eugenio Legatus, cum inter loquendum in sermonẽ incidissemus de mansuetudine & grauitate NICOLAI, id omne somniũ coram veluti iocabundus retulit, subdidit enim: Cum hoc euenerit, Philelphe mi, fructum recipies veteris nostræ consuetudinis. Qui verò vi-*

uenti

a Hic error ircepit, aut s gonim memoria la p'us est. Scribit etenim ea Philadelphus ad Antonium Marcellum Venetum



uenti beneuolentiam, idem post etiam mortuo humaniter ac pie memoriam prastitit. Siquidem Pontifex creatus, se ab illo NICOLAVM V. vocauit, atque icone manu eximij pictoris efficta, in ea S. NICOLAVM Episcopum, in ipsius patris ac patroni sui memoriam, exprimendum curauit, quæ nunc quoque in ara maiori Carthusiæ Bononiensis, cum litteris id significantibus visitur.

Cæterum NICOLAVS, vir haud dubio fuit, & sira & Patrum memoriâ magnus, vel potius summus, ac singularis: eò verò maior atque admirabilior, quòd in solitudine fermè atque in angulis, lōgè à ciuilibus turbæ & forensis multitudinis conuersatione, atque ab ipsa rerum gerendarum arte educatus, nullius tamen earum rerum expertus & rudis fuit, quas ij tenere solent, qui omnem ætatē in communi consuetudine, nec non in erudito gymnasiorum aularumque curriculo contriuerunt, seseque varijs curarum negotiorumque publicorum meditationibus ac tractationibus assidue exercuerunt. Ex quo facile conijcere possumus, excellentem quādam ingenij ac iudicij in eo fulsisse indolem: qui omnia, quæ susceperat, prudenter ac commodè peragebat. Etenim quia natura ad otium & contemplationem factus tantummodo videbatur, ea prudentiæ documenta, atque eruditi cuiusdam consilij dedit, quæ vix multi in aulis Principum conflictati cōsequi potuerunt. Quicūq; verò is fuit, sanctitatis certè eam sibi opinionem perpetua ac constanti ipsius vitæ innocentia peperit, ut à Monachis suis in hūc vsque diem BEATVS NICOLAVS, cognomine à maioribus accepto, vocetur. Quare Franciscus Philadelphus postea scribens ad NICOLAVM V. Pontificem, eum *Diuum* conuenienter huic opinioni vocauit: *Reliqua*, inquit, *si sanctissimus ille spiritus Diui NICOLAI Cardinalis Bononiensis, tibi quondam Patris, dum erat in viuis; nunc verò sanctimonia tua filij (cui nosti me carissimum extitisse) altioribus melioribusq; intētus obsequijs ingerere memoria tua distulerit: ea, quæ mea interfuerint, omnia tibi Pater Amplissimus Mediolanensis Cardinalis Henricus verbis meis coràm exponet.* Et sanctus Antoninus Archiepiscopus Florentinus, æqualis eius, eundem *virum Religiosissimum* appellare non dubitauit, qui vitam huius verbis his d breuiter est complexus:

*h Idē legitur  
de S. Hugo  
ne Episcopo  
Lincolniēsi,  
apud Suriā  
17. Nou.*

*c Epist. li. 6.  
ep. 22. anno  
1447.*

*d In Chr  
par. 3. tit. 22  
ca. 7 § 3.*



e Idem S.  
Antoninus  
tit. eodem,  
c. 8 § 9. vo-  
cat ipsum,  
virum san-  
ctissimum.

Creauit Martinus Pontifex plures Cardinales, & inter ceteros vi-  
rum & Religiosissimum Dominum NICOLAVM, ordinis Carthusiensis.  
Hic NICOLAVS Bononia, cum esset Prior dicti Ordinis, una voce cleri  
ac populi vocatus fuit in Episcopum Bononiensem, cum vacaret Ecclesia.  
Quem plurimum remitentem confirmavit & instituit Martinus, Con-  
stantia Pontifex creatus. Episcopus autem factus nihil dimisit de obser-  
uantia & austeritate ordinis sui, & in humilitate eximia Domino ser-  
uiens, redditus suos pauperibus erogabat, & reparationi Ecclesie, & cul-  
tui diuino amplificando; multa bona opera operatus est Dominus per eum  
in diocesi sua Bononiensi. Quorum ciues ingrati & immemores, quia ci-  
uitatem rebellem Ecclesie, de mandato Martini Papae interdicto suppo-  
suit, mortem ei intenterunt. Sed occulte mutato habitu fugiens, impetum  
furoris eorum euasit. Qui postmodum Cardinalis presbyter a Pontifice  
creatus, sicut in Episcopatu fuerat Antistitem exemplar in signe, ita in  
Cardinalatu extitit Cardinalium speculum. Destinatusq; Legatus ad  
hoc inter Florentinos & Venetos colligatos ex una, & Ducem Medio-  
lanensem ex parte altera; iam fessos expensis & laboribus diuturni belli  
composuit pacem; Legatusq; postea missus in Galliam Transalpinam, sa-  
tis laborauit ad concordiam ponendam inter Regem Fraciae, ac Ducem  
Burgundiae. Demum reuersus, cum Eugenius successor Martini suam cu-  
curiam Senis resideret, infirmatus ex calculo, nullo remedio fieri potuit,  
ut illum eiceret. Nec mirum; nam corpore post mortem exenterato,  
reperitus est lapis in collo vesicae incarnatus, grossus f ad modum oui par-  
ui gallinae. cuius exequijs honorabiliter funeri exhibitis, praesente Pon-  
tifice, delatum est corpus ad monasterium Carthusiense S. Laurentij  
prope Florentiam, ibiq; in Ecclesia sepultum, prout ipse mandauerat.  
Haecenus sanctus Antoninus.

t Idem ait  
Zenus. c. 20.  
& Pogg. in  
orat. funeb.

## F I N I S.

Hucusque extendebantur exemplaria, quae ego fueram consecutus. Verumta-  
men an integra, an mutila fuerint, non possum diuinare. Sunt tamen, qui af-  
ferant cum vno M.S. quod vidi, facile folium vnum circa finem deesse: quo conti-  
nerentur, quae spectarent ad illustrem familiam Albergatorum. Vbi ex Italicis ty-  
pographijs plenius quid in lucem prodierit; poterit suo tempore hic defectus fa-  
cile suppleri. Ego elargior, quod accepi.

VARIA



VARIA

V A R I O R V M  
AC CELEBRIVM SCRI-  
PTORVM TESTIMONIA:

DE VIRTVTIBVS, PRVDENTIA,  
SANCTIMONIA QVE B. NICOLAI  
*Albergati:*

NON SINE LABORE COLLECTA ET IN BO-  
NVM ORDINEM REDACTA A F. G.  
*Garnefelt.*

BREVIS SATISFACTIO  
AD LECTOREM.

**S**Eptem orbis miracula à veteribus mul-  
tis laudib<sup>9</sup> celebrata sunt, Opt. Lector.  
At verò facies humana tātum admira-  
tionis habet, vt *Josephus dicitur*, i. miraculū  
miraculorum vno sapiētum virorum cōsensu me-  
ritò vocari queat. Cū etenim tot millia hominū  
in vniuerso terrarum globo viuāt, aut nulli, aut ra-  
rissimi reperiuntur, qui sibi per omnia lineamenta  
secundū faciē similes existant. Si igitur tanta est  
facierum humanarū varietas, quanta erit ingenio-  
rum, iudiciorum, ac voluntatum? Facies equidem  
(nisi morbo, senio, vulnere aut casu aliquo vitien-



tur) in suâ ſemper permanēt formâ: at voluntatum  
tāta mutatio eſt, vt quod vnus idemq; homo ho-  
die laudauit, cras contēnat: quod pridie elegit, po-  
ſt ridie reprobet. Experiūtur hoc tum alij plurimi,  
tum potiſſimū ij, qui elucubrationis aliquid in lu-  
cē proferunt, quod typis expreſſum pervniuerſum  
vagetur orbem. Hi equidem tot fermē inueniunt  
Cenſores, quot Lectores, & quod omnium into-  
lerabilius eſt, etiam ignauiffimi homines aliorum  
grauiffimos labores reprehendere nō verentur. Sūt  
præterea, qui inter pocula & conuiuia ſuum hiſce  
de rebus exerceāt tribunal, & cum Cerere ac Bac-  
cho Muſas copulare conētur. Ego quidē magna-  
nimorum virorum exēplo roboratus, eiufcemodi  
cenſores generoſo animo ( vt anſerum ſibilos ) fa-  
cilē contemno: at intermittere nequeo, quin pau-  
cis Inſtituti mei reddam rationem.

1. Quando quidē B. Nicolai Albergati vita nū-  
quā typis impreſſa fuit, operæpretium erat anne-  
ctere plurima Illuſtrium virorum teſtimonia, ex  
quibus ille ſanctitatis titulum cōſequeretur. Sie-  
nim ( vt Saluator noſter affirmat ) in ore duorum  
aut trium ſtat omne verbum, quantò magis in ore  
oſtodecim aut viginti?


2. Hunc modum obſeruafſe video Eruditum,

ac



ac Religiosum Patrem Henricum Sedulium in sua historia Seraphica : quem non piguit in simili materia imitari.

3. Si vnicuiq; credendum est in sua arte, etiam Bibliopolis fides adhibenda est. Hi porrò ex longo usu didicerunt, Lectoribus atque Emptoribus ingratum esse, si nuda citatione ipsi Authores allegentur, vbi ipsorum verba dari possent. 1. Quia plurimi sunt, qui Authores citatos nō habent, ideoq; à cibo desiderato manent ieiuni. 2. Quia etiam ij, qui habēt, publicis arduisq; negotijs impediti, varios codices aperiendo ac voluēdo tēpus terere abhorrescūt. 3. Quia mens prius re collecta nimium distrahitur tot libris & Authoribus indagādis atq; legendis. Quę regula licet in omni genere scriptio- nis obseruanda non sit, hīc tamen obseruari potuit debuitq;. Habes igitur, Opt. Lector, breuem pro me satisfactionem; quā acceptā, si Zoilum ac Sy- cophantam agere volueris, per me licet. Ne- minem porrò lædes, nisi te ipsum.





EX LIBRO II. EPISTOLARVM

FRANCISCI PHILELPHI, EQVITIS  
aurati, epistola X.

FRANCISCVS PHILELPHVS NICOLAO  
CARDINALI BONONIENSI  
salutem.



Thomas Sarzanensis, vir perhumanus & eruditus, Am-  
plitudinis tuae Secretarius, Pater clementissime, tuo no-  
mine litteras ad me dedit, quibus, quod mihi erat sole  
(ut aiunt) clarius, non amice minus, quam eloquenter o-  
stendit, quanta sit tua erga me charitas; dein monuit, ut  
tibi significarem, quam me Florentia delectet; prae terea si qua in re tua  
opera opeque, uti velim, scriptorio calamo ne parcam. Te enim paratum  
semper fore, ut mihi beneficias. Et habeo tibi, & ago immortales gra-  
tias, Pater humanissime, quod ex qua die primum Bononiae me vidisti,  
actuum excepisti in clientelam, te mihi patronum semper, te patrem,  
te beneficium praestiteris; & id quidem nullis meis de te meritis, sed sola  
tua mansuetudine atque benignitate. Imitatus tu sum eum, cuius crucem  
pro signo geris, Christum Optimum, Maximum, qui, ut cunctis morta-  
libus beneficeret, sibi ipsi non pepercit. Nunc ad ea, quae verbis tuis mihi  
Thomas tuus scripsit; Et de Florentia primum. Quem Florentia minus  
delectarit, is certe nulla bonitate floret. Est enim eiusmodi urbs Floren-  
tia, cui tanquam Pandora cuiquam Deum omnes, ut ad Poetas redeam,  
singuli bona singula dono dederint. Nihil enim huic urbi deest, quod  
ad humanam accedat felicitatem. Caterum inter rosas etiam sunt spi-  
nae, & in terra nihil est tam ex omni parte perfectum, quod non ali-  
quid habeat, quod offendit. Equidem uniuersa ciuitati sum charissi-  
mus, meque viri omnes boni ac praestantissimi ciues & colunt, & faciunt  
plurimi. Nec est mihi apud Florentinos optandum quicquam, quod  
sperare non liceat. Vix primarij ipsi ciues in rebus etiam maximis plus  
habent auctoritatis, quam ipse ego. Omnes mihi gratificari student, ob-  
sequuntur omnes. Nihil à me, neque mea, neque amicorum causa frustra

peti-



petitur. Caterum quò magis valeo apud Florentinos vel auctoritate, vel gratia; eò magis mihi cauendum est, ne quid magni mali inuidia mihi aliquando pariat. Sunt enim aliqui fucati litteris, quos mea praesentia idcirco plurimum turbat, quòd sperent, si ipse abessem, sese in maiori aliquo pretio futuros. Itaque dignitati meae clam semper insidiantur. Qui etsi mihi nihil obesse possunt, metuendum est tamen. Nam ingenia Florentina acerrima sunt, & in omnem partem strenua. Quid multis? Nisi adhuc in proximum annum publico docendi muneri essem obstrictus; operam darem omnino, ut inuidia cederem, & in aliquem tutiorem portum ex huiusmodi fluctibus me reciperem. Nam quamquam vniuersa me Florentina Respublica & diligit plurimum, & facit maximi: ea tamen est hominum natura, ut non minus pauci atque imbecilli nocere possint, quam vniuersa manus potentiorum prodesse cuiquam. Misferentur sanè omnes, & permolestè ferunt, si cui bono viro inferatur iniuria; Succurrit autem nemo. Nec id de peregrinis solum usu venit, sed de ipsis etiam praestantioribus ciuibus. Sunt qui sicarios parauerint, per quos Nicolaum Guzanum virum primum in Republica interimerent. Detectis insidijs, non modò nullum de his supplicium sumptum est, qui sicarios instruxerunt: sed tentatum potius, ut Nicolaus ipse plecteretur, qui & vir grauissimus esset, & in Republica potentissimus. Nam sicarij feruntur instructi à duobus Soderinis fratribus; Nicolao ac Thoma, iuuenibus promptis, & audacibus: quorum pater fuerat (ut vulgò dicitur\*) publico iudicio obtruncatus, quoniam esset insimulatus inijisse consilium, nescio quod aduersus Rempublicam. Què ergo ipse minus mihi metuendum putem, qui & iuuenis sem, & nullarum virium, cum videam virum tantis fretum clientelis, tantis opibus, tantis factionibus in vltimum propè periculum adductum, quoniam aduersus fontes fontis causam persequeretur? Nam alterius factionis princeps dicitur Cosmus Medices, vir, ut scus, Florentinorum omnium pecuniosissimus. Eoq; mihi res videtur per mutua animorum odia irritamentaq; processisse, ut nobilissima hac ciuitas non admodum longè abesse possit in tantis procellis ac fluctibus atristi & miserabili naufragio. Accedit ad hanc mali suspicionem, quòd hi, qui liuore me, atque odio insequuntur, ipsius Cosmi vtuntur veluti patrocinio. At Cosmus quamquam videtur amantissimus mei; eiusmodi tamen virum esse animaduerto, qui & simulet, & dissimulet omnia. Estq; usque

\*machina-  
tore & au-  
thore ipso  
Nicolao.

adco



adco taciturnus, ut ne ab intimis quidem familiaribus, ac domesticis queat intelligi. At Laurentius huius frater ingenio est & aperto, & leui; cui Cosmus etsi vir est grauiſſimus, tamen, ut audio, nequaquam audet aduerſari. Ego autem neutram pendeo in partem; aequè omnibus morem gero, illudq; Ciceronis studioſiſſimè tucor: non oportere peregrinum in aliena republica eſſe curioſum. Caterum quum in naui obnoxia naufragio nemo poteſt tuto nauigare; ego hinc quàm libentiſſimè abfuerim. Duo in Italia loca ſunt, quorum alterutrum non inuitus optarem; Mediolanum, & Romana Curia: ſue enim apud Pontificem Maximum, ſue apud inclytum ducem Philippum Mariam mihi honeſtus daretur locus, eum non modò non reiſcerem, ſed ceteris omnibus iucundiſſimè præferrem, atq; amplecterer. Tenes tu, Pater Reuerendiſſime, & ſtudia mea omnia, & conſilium, & voluntatem. Quàtum mihi prodeſſe poſſis, non ſum ignarus. Quantum etiam velis, iam pridem expertus ſum. Quæ cum ita ſint, Clementiam tuam rogo etiam atq; etiam, oroq;, ut huic meo deſiderio conſulas. Quicquid ipſe de me ſtatueris, indubitato perſequar. Operamq; dabo, ut tua de me opinio te nunquam fallat. Nam neq; fidei vnquam deero, neq; induſtria, neq; diligentia. Valeat quàm diutiſſimè Integritas Sanctimoniæq; tua, Pater Clementiſſime, tibiq; certò perſuade, me ita eſſe in poteſtate tua, ut omnia de me tibi polliceri queas. Ex Florentia X. Kal. Octob. anno Natali Chriſtiano M. CD. XXXII.

Ex eodem Philelpho.

ET quantumuis idem Franciſcus Philelphus plures dederit litteras ad Thomam Sarzanenſem, B. Nicolai alumnum, uti libro I. epistoſularum, anno 1428. libr. 2. epist. II. ann. 1432. atque epist. 16. ann. 1433. libr. II. ann. 1453. Item anno 1454. & licet eundem Thomam laudet libr. 13. epist. I. ann. 1456. ad Calliſtum III. Pontificem Romanum, & libr. 14. ad Pium II. Pontificem Romanum, anno 1458. tamen nullibi adeo præclaram mentionem facit beati Nicolai Albergati, quàm libr. 6. epist. 22. ann. 1447. ad ipſum Thomam, cum electus eſſet in Pontificem Romanum, vocatusque Nicolaus V. ubi inter cætera ſic ſcribit:

*Et ne maximis occupationibus tuis, vel intempeſtiuor accedam,*

*vel*



vel importunior; iam de his satis. Nam reliqua si sanctissimus ille spiritus Dni Nicolai Cardinalis Bononiensis, tibi quondam Patris, dum erat in vivis; nunc verò sanctimonie tuae filij, (cui nosti me charissimum extitisse) altioribus melioribusq; intentus obsequijs, iugere memoriae tuae distulerit ea, quae mea interfuerint, omnia tibi Pater amplissimus Mediolanensis Cardinalis Henricus verbis meis coram exponet.

Agnoscat igitur Philéplus, beatum Nicolaum iam corpore exutum coelestibus rebus occupari, id est, aeternā perfrui felicitate. Verū de hac beatitudine audiamus ipsum manifestius differentem. Sic autem habet in oratione ad Iacobum Antonium Marcelum, Patritium Venetum: quem doctissimis rationibus de obitu Valerij filij consolatur.

Sed haec horumq; similia, si cuiquam fortasse videantur antiquiora, exemplis item duobus tempestatis nostrae contentissimus. Gabriel Condulmerius (qui postea Eugenius nominatus, summa cum dignitate, & gloria Romano Pontificatui praefuit) cum vehementius egrotaret, essetq; de eius salute à Medicis omnibus desperatum: illi iam de morte non tam sollicito, quàm nihil certius expectanti, & Petrus & Paulus Apostoli duo apparuerunt in somnis, utq; bono animo esset, hortati sunt. Nam & bonam valetudinem ei redditam esset, & propediem fore, ut Summus Pontifex crearetur. Quod quidem virumque secutum est. Nam tum simul cum somno illum reliquit febris; tum non multo post, cum Martinus Columna, prudentissimus ille & amplissimus Pontifex quàm fortunatissimè, & cum mirifico Ecclesiae Romanae incremento vitam finisset, Pontificatui ille praefectus est. At Nicolaus V. optimus ille ac eruditissimus planè vir (in cuius munificentissimi Patris obitu docti omnes ingenioq; praestantes extremum naufragium passi sunt) cum Nicolai Albergati, sapientis compressis, & sancti viri, Cardinalis Bononiensis obitum molestius ferret, hunc tandem per somnum ad se venire existimavit, & ita anxium appellare. Thoma fili, quid diutius gemis? quid adeò te affligis? Pone lachrymas, & te collige. Nobis enim bene est, benignitate IESU. Itaque surge, atque accingere. Ad breue enim tempus graue tibi subeundum est munus Petri gubernandae nauiculæ. Quam quidem somni visionem haud ille dissimulanter praese tulit. Nam cum



alijs nonnullis familiaribus, tum etiam mihi (cū hac iter faceret Germaniam petens ab Eugenio Legatus) cū inter loquendum in sermonem incidissemus de mansuetudine & grauitate Nicolai Cardinalis, id omne somnium coram veluti iocabundus retulit. Subdidit enim: Cū hoc euenerit, Philelphe mi, fructum recipies veteris nostrae consuetudinis. Cumq; intra Alpes eodem itinere obuiam habuisset Aeneam Syluium, integerrimum & eloquentissimum Episcopum Trigestinum (qui à Friderico Austro, Romanorum rege orator veniebat ad Philippum Mariam, inclytum Mediolanensem Ducem) simulq; uterque vesperi diuertissent in quandam cauponulam, & Aeneas parcius sumptus faceret (utpote qui ab eo Rege legaretur, qui Stoica eruditus instructusq; disciplina, non minus parcimoniae nummorum, quā vitae frugalitati continenter studet) tum ad Aeneam conuersus Thomas: Reuerendissime Pater, inquit, quid est opus tanta vtamur parsimonia, cū vterque in Ecclesia Romana Pontifices Maximi futuri sumus? Quam quidem rem non serio minus quā loco eum prae dixisse, certus ostendit euentus. Videmus enim alterum summā suā cum laude summum Pontificem concessisse naturae: At Aeneam (cui nunc Pio II. nomen est) non secus fortiter quā constanter Pontificatum gerere. Hæc ibidem..

Errant igitur, qui asserunt Philelphum hæc scribere in oratione ad Xystum IV. Pontif. Rom. in qua huius rei ne verbo quidem mentio fit.

Porro ex hoc fonte, id est, ex hac Beati Nicolai reuelatione & apparitione videntur ea profluxisse, quæ Philelphus scribit libro 44. epistolarum ad Pium II. Pontificem Romanum, anno 1458. ubi post alia sic habet: Neque videri voluisti oblitus, quod, viuo adhuc & omni ex parte incolumi Callisto Pontifice, afflatu illo vel Poetico, vel Diuino fore prae dixi, & id quidem hoc ipso presenti anno: ut & Callistus ex hac luce migraret, & ipse tu (quod omnium votis fortunatissime contigit) tantis Christianae Religionis tenebris lucem esses per optatissimum tuum Pontificatum allaturus.

Item libr. 16. ann. 1461. ad eundem Pium secundum Romanum Pontificem: Voluit tandem sanctissimorum operum retribui-



ter DEVS, ut in supremo Christianae Religionis folio Sacerdos Maximus constitutus vicem Christi in terris gereres. Quâ certè unâ re diu à me antea non minus, ut scis, prædictâ sapè, quàm expectatâ nihil unquam audiui in vniuersa vita neque optatius, neque iucundius.

Ex historijs Flauij Blondi.

**H**abuit autem paulò supra etatem nostram Bononia Ioannem Andrea Calderinum, iureconsultorum etatis suae celeberrimum. Gaudemusque etatem nostram tulisse Nicolaum Albergatum, qui primò Carthusia Monachus, pòst Bononia Episcopus, demum Romana Ecclesia Cardinalis, vir fuit tum celebris sanctimonia, tum etiam sapientia singularis.

Hæc ille in Italia à se illustrata: vbi de Flaminia seu Romandio-la, & in specie de Bononia tractat.

Meminit etiam eiusdem Nicolai idem Blondus libr. 3. Decad. 3. de Inclinatione Imp. Romani, hisce verbis:

Decem eodem mense (id est, Maio) Pontifex ipse creauit Cardinales, quorum duos ex Bononia tunc accepit, petentem efflagitantemque vnum Arelatensem illum Bononia gubernatorem; alterum enixissimè reluctantem Nicolaum Albergatum, Bononiensem & Ciuem & Episcopum, maxime virum sanctimonia, cui Ecclesiararissimos etate nostra habuerit Prælatos adsimiles.

Ex epistola 188. A Ence Syluij, qui postea Romanam  
Sedem meritus, dictus est  
Pius II.

**V**idimus unâ Genuam Ligurum metropolim; superauimus Apenninum, ac transmissis Pado Philippum illum inclytum Longobardorum Ducem, apud Mediolanum Ducem adiunimus. transmisimus Calo vicinas Alpes, & formidabilem Pontum, & Lucrinum lacum, & campos Heluetiorum. Venimus Basileam, & sub dominio Cardinalis tui (qui tunc sancta Maria in via lata cognominæ fuit, nunc sancta Crucis appellatur) in



*Concilio magno fuimus. Quam dulcis conuersatio nostra fuit? quam suavis in omni fortuna societas? Nihil mihi graue, te comite, videbatur. Memini adhuc Petre, cum simul vno cubiculo dormiremus, quoties mihi ad multam noctem vigilianti, ac nunc vnum, nunc alterum Poëtam legenti, subridens dixeris: Quid te maceras, AEneas? Doctus aequè ac indoctis fortuna consulit. At cum Dominico, (quamuis is esset benignus & optimus Pater) cum paupertate eo tempore premeretur, perseuerare minime potuimus. Disiuncti aliquot annis fuimus; sed iterum nos fortuna coniunxit apud Nicolaum S. Crucis venerandum Patrem, & omnium opinione sanctissimum, &c.*

Hæc AEneas ad Petrum Noxetanum Equitem & Comitem Palatinum: cui ex vrbe Neapolitana scripsit ann. 1456. referens quomodo ab imis ad altiora ascenderit.

Consule hac eadem de re Platinam in Pio II.

Porro Cardinalis ille, quem AEneas ob paupertatem reliquit, fuit Dominicus Capranica, Romanus, LL. Doctor, Secretarius & Protonotarius Apostolicus, qui à Martino V. anno 1426. factus est Cardinalis Diaconus sanctæ Mariæ in Via lata (non Inuiolata, vt mendosè habet editio Basileensis in operibus AEneæ Syluij) postmodum verò ab Eugenio IV. creatus est Cardinalis Presbyter S. Crucis in Ierusalem, succedens scilicet B. Nicolao nostro. obiit tandem maior Poenitentiarius ann. 1458. vt ex Onuphrio demonstrari potest.

Quod attinet ad Petrum Noxetanum, hic cum adhuc esset Scriptor Apostolicus, scripsit eidem AEneæ conquestus suam fortunam. Vbi inter cætera sic habet de nostro B. Nicolao.

*Dum adhuc vixit Cardinalis sanctæ Crucis (cuius memoria nunquam ex me delebitur) spes mihi erat non mediocris, quæ tota cum illo cecidit.*

Data est epistola Romæ anno 1443. 18. Nouembr. eo scilicet anno, quo hinc migravit beatus Nicolaus. Est in operibus AEneæ tota. Epistol. num. 180. quam integram exhibere necessarium non est.

Ex Chro-



Ex Chronico S. Antonini, part. 2. tit. 15.  
cap. 22. §. 2.

**E**X hac Religione (scilicet Carthusiensium) assumptus ille vir venerabilis, Nicolaus nomine Bononiensis, ad Episcopatum Bononiensem inuitus: & postea ad Cardinalatum à Martino Papa V. semper seruans rigorem suæ Religionis: Speculum sine macula omnibus Curialibus & Presidentibus, Pauperum Pauperum, inter Principes sæculi discedentes pacis reformator, schismatis impeditor: demum sub Eugenio Papa Senis migravit ad Christum ex infirmitate calculi cui exenterato repertus est lapis grossus ad modum oui in fundo vesicæ, quasi incarnatus, &c.

Item part. 3. tit. 22. cap. 7. §. 3.

**C**reavit ipse (Martinus Papa V.) plures Cardinales, & inter ceteros virum religiosissimum Dominum Nicolaum Ordinis Carthusiensium. Hic Nicolaus Bononiæ cum esset Prior in monasterio Bononiensi dicti Ordinis, una voce Cleri & populi vocatus fuit in Episcopum Bononiensem, cum vacaret Ecclesia; quem plurimum renitentem confirmavit & instituit Martinus, Constantiæ Pontifex creatus. Episcopus autem factus, nihil dimisit de obseruantia, & austeritate Ordinis sui, & in humilitate eximia Domino seruiens, redditus suos pauperibus erogabat, & reparationi Ecclesiæ, & cultui diuino ampliando: multaq; bona opera operatus est Dominus per eum in diocesi sua Bononiensi. Quorum ciues ingrati & immemores, quia ciuitatem rebellem Ecclesiæ de mandato Martini Papæ interdicto supposuit, mortem ei intenterunt. Sed occultè mutato habitu fugiens, impetum furoris eorum euasit. Qui postmodum Cardinalis Presbyter à Pontifice creatus, sicut in Episcopatu fuerat Antistitem exemplar insigne, ita in Cardinalatu extitit Cardinalium speculum, destinatusq; Legatus ad hoc inter Florentinos & Venetos colligatos ex una, & Ducem Mediolanensem ex parte altera, iam fessos expensis, & laboribus diutini belli, composuit pacem; Legatusq; missus postea in Galliam Transalpinam, satis laborauit ad concordiam ponendam inter Regem Franciæ, & Ducem Burgun-



dia. Demum reuersus (cū Eugenius successor Martini cum sua Curia Senis resideret) infirmatus ex calculo, nullo remedio fieri potuit, ut illum eijceret. Nec mirum, nam corpore post mortem exenterato, reperi- tus est lapis in collo vesica incarnatus, grossus ad modum oui parui gal- line. Cuius exequijs honorabiliter funeri exhibitis, praesente Pontifice, delatum est corpus ad monasterium Carthusiense S. Laurentij prope Flo- rentiam, ibiq. in Ecclesia sepultum, prout ipse mandauerat.

Item cap. 8. §. 9.

**M**artinus Pontifex (cuius opera, ut credebatur à multis, bel- lum antea tractatum fuerat) Cardinalem sanctae Crucis, virum sanctissimum Nicolaum, prudentia & aequitate insignem, primò Vene- tias Legatum misit.

Ex Platina de Vitis Pontificum, in Nicolao V. 217. Pontif.  
qui ante Pontificatum vocatus est Thomas  
Sarzanus.

**S**unt autem, qui scribant, Thomam Pisis natum, Luca educatum, Bo- nonia literas & bonas artes didicisse: maxime verò Philosophiam & Theologiam, adiutus beneficentia sanctissimi viri Nicolai Alber- gati, Cardinalis sanctae Crucis, adolescentis ingenio delectati. Hanc ob- rem in Pontificatu hominis de se bene meriti nomen sumpsit. Cū ve- rò Magistri nomen in Gymnasio consecutus esset: acerrimis disputatio- nibus probatus, Cardinalem sanctae Crucis secutus, familiae tanti viri oeconomus factus, in numero Scriptorum Pœnitentiariae primò refer- tur: deinceps Subdiaconatum Pontificium adeptus, bene agendo, vitamq. sine inuidia & amulatione ducendo, maiora mente conce- pit.



Item



Item in Pio II. 219. Pontif. qui antea dictus est  
Aeneas Syluius.

**A**eneas Nicolaum sanctae Crucis Cardinalem secutus, Patrem  
certè optimum, ac omnium opinione Sanctissimum: qui  
Atrebatum profectus Eugenij iussu, ubi conuentus Gallorum princi-  
pum habebatur, pacem inter Ducem Burgundiae (qui cum Anglis sentie-  
bat) & Regem Francia composuit. Redeunte autem in Italiam Nico-  
lao, quem Veneti, ac Philippus Mediolani Dux auctorem componenda  
pacis requirebant, Aeneas non admodum Eugenio gratus, Basileam  
proficiscens, magno semper in honore apud omnes est habitus.

N O T A.

**E**x hisce colligis, Opt. Lector, duos ex beati Nicolai nostri alu-  
mnis in Pontifices Romanos sublimatos. De priore testatur  
etiam sanctus Antoninus in Chron. tit. 22. cap. 12. hisce verbis:  
Hunc in studijs enutritiuit Dominus Cardinalis Carthusiensis: &  
propter probitatem eius postmodum in socium Secretarium  
suum & in Legationibus, & in Curia assumpsit.

Ex Pauli AEmylj Veronensis, de rebus gestis Francorum,  
libr. 10. in Carolo VII.

**D**vobis Romanis Legatis Cardinalibus, viris sanctis, ultro citroq;  
commeantibus, efficitur, ut in Atrebates Anglorum Ducum (Rex  
enim Henricus in Angliam à continenti transmiserat) Franciq; Regis,  
ac Burgundionis Ducis Oratores convenirent. Ibi de pace agi coeptum,  
anno eius saeculi tricesimo quinto, &c.

Quamvis autem AEmylius non exprimat nomina horum  
Cardinalium: constat tamen tum ex Sigonio, tum ex Concilio  
Basileensi, horum alterum fuisse beatum Nicolaum Albergat-  
um, alterum Arelatensem, id est, Ludouicum Alamannum,  
Gallum: qui vulgò Arelatensis appellatus est, ut ex Onuphrio  
constat. Fuit enim Archiepiscopus Arelatensis, & obiit Arela-  
ti anno. 1450. 13. Kalendas Nouembris. Hunc post mor-  
tem miraculis claruisse inuenio, in libro Benefactorum

nostro.



nostrorum minorum: cui suffragatur Aeneas Syluius, id est, Pius II. Pontif. Rom. in sua Europa, cap. 42. Ponit eundem Canisius 16. Sept. inter sanctos.

Quamquam Robertus Gaguinus libro 10. de historia Francorum, alterum horum Cardinalium vocet Cyprium. Quis autem fuerit ille Cyprius, quem Carolus VII. Rex Francorum petijt à Concilio Basileensi, vocatque consanguineum suum, facile exponet Onuphrius, qui vocat hunc Hugonem Lusignanum, regis Cypri fratrem, asseritque à Martino V. factum Cardinalem Diaconum S. Hadriani, anno 1426. sed postmodum ab Eugenio IV. designatus est Card. Episcopus Prænестinus; obiitque anno 1442. in Sabaudia priuatus. Veruntamen hunc sanctitatis nomen obtinuisse non legi. Arbitror igitur AEmylium loqui de B. Nicolao Alberгато, & B. Ludouico Arelateni.

Neque interim incredibile cuiquam videri debet, si hic Ludouicus Arelatenis miraculis claruisse scribatur: cum alioquin aduersus Eugenium Pontificem Rom. schisma fouerit. In Sanctis etenim non tam vitæ cursum, quam finem consideramus. Multi equidem aliquando ex preposterio zelo aberrarunt, qui tamen postmodum ex diuinæ gratiæ lumine illis affulgente resipuerunt. Ex hisce fuit S. Paulus Apostolus, S. Guilhelmus Dux Aquitaniæ, alijque in orientali ac occidentali Ecclesia per plures. Demus igitur etiam B. Ludouico poenitentiae locum, quem ex grauiissimo Historico possum demonstrare. Onuphrius equidem Panuinus satis ostendit, hunc ad vnitatem Ecclesiæ rediisse sub Nicolao V. Pontif. Rom. hisce verbis: Ludouicus Alamannus, Gallus, Archiepiscopus Arelatenis, priuatus ab Eugenio IV. restitutus à Nicolao V. Presb. Card. tit. S. Cæciliæ. Quid ipse Amadeus Dux Sabaudiæ, qui contra Eugenium IV. & Nicolaum V. in schismate sedit Antipapa, dictus Felix IV. reuersus est ad Ecclesiæ vnitatem, & sancto fine quieuit? Hoc idem Onuphrius apertis verbis attestatur.





Ex Polydori Vergilij libr. 23. rerum Anglicarum.

**D**um autem ita Angli Franciq. de potentatu, de Principatu, de vita deniq. certant, in terra Gallie per bellorum licentiam mortaliū omnium facultates rapiuntur, thesauri sacri spoliuntur, homines passim occiduntur, aut conuulnerantur, cruciatu & supplicio afficiuntur, matronæ constuprantur, virginum raptus fiunt ex complexu parentum, quotidie oppida capiuntur, quotidie diripiuntur, atq. oppidanorum opes aliò exportantur, edificia, viciq. incenduntur, ac nullum deniq. crudelitatis exemplum in miseros Francos non editur. mitto sexcenta alia calamitatum genera, quibus pariter premebantur. Nec Anglia eiusmodi iniuriarum experta erat, quæ in singulos dies suorum funera, cedes, vulnera, ac tributis assiduis opes suas diminui videbat, ita ut communia propè mala essent, ploratibusq. utriusque gentis totus Occidens sonaret, ac fama tristimonie plenissima in omnes orbis partes peruaderet. Quapropter non erat, qui non miraretur, quomodo hi duo populi ad patiendum satis essent, ac maxime misereretur, & cum primis id faciebat Eugenius quartus Romanus Pontifex, qui cupidus in eundem rationis, quâ importunissimi belli finis fieret, Nicolaum Cardinalem sanctæ Crucis in Gallias misit ad conciliandam pacem inter reges. Is ubi eò peruenit, ad Carolum primum adit, eiq. exponit mandata Pontificis, inde eadem Bedfordiensis refert, hortatur pacem, demonstrat, declarat, argumentatur eam semper honestiorem esse, quàm bellum in Christianis Principibus, qui suorum commodis seruire, qui iustitiam seruare, qui se ratione regere, qui remittere semper aliquid de ira, de iniuria deberent, quæ per bella fieri non liceret. Ista in animos principum inducere conanti Legato uterque respondit, se paratum ad omnia descendere. ceterum cum res capta est agi, tantum absuit, ut honestis conditionibus essent contenti, ut etiam magis atque magis in pertinacia permanerent. Id Cardinalis animaduertens, desperat à pace, ut ne frustra tantum laboris subiisse diceretur, inducias in sex annos confecit, quas ut agrè ambo Principes rogatu Cardinalis concesserunt, ita post eius discessum subito fregerunt.

Non nemo ex recentioribus auctoribus tradit, Francos priores illas violasse, qui passim Anglorum Burgundionumq. amicos multarint. Quo

2

factum



factum est, ut irritatis utrimq. animis, acrius solito ad arma itum sit.  
Fuit ille annus salutis humanae 1433.

Ex eiusdem Scriptoris lib. 23. rerum Anglicarum.

**E**Vgenius proinde Romanus Pontifex certior factus de eiusmodi hominum mentium motibus, quasi pro certo habens, pacem conuenturam, primo quoque tempore Nicolaum Cardinalem rursus in Gallias misit, qui ubi eo peruenit, conuentum ad Atrebatium ciuitatem indixit, quo conuenire Henrici Regis Legati, Henricus Vintoniensis Cardinalis, Henricus Eboracensis Antistes, Gulielmus Suthfolchia, & Ioannes Huntynghona Comites, eius legationis principes. Item Franci Legati, Rhemorum Archiepiscopus, Dux Borboniensis, Arthurus Comes Richemondia, ac honesti equites nonnulli. Burgundio etiam suos misit, Leodiensem, Cameracensem, & Atrebatensem Episcopos, cum plerisque heroibus viris equitibus. In hoc frequenti consensu, post longam disputationem, Nicolaus Cardinalis homo spectatus in iudicandis rebus, fit omnium consensus rei disceptator: is rursus singulos sententiam rogauit, quod secundum iustitiam iudicaret. Petebant Angli, ut Carolus declararetur Henrici beneficiarius, contra Franci alterius factionis Carolo imperium liberum, non precarium esse volebant. Nicolaus his auditis, nihil de possessione tunc decernendum iudicans, leges fœderis in publico proposuit, quas pro presenti rerum statu, utrinque dandas & accipiendas iure censibat. Has tamen uterque respuit. Atque ita negotio infecto à conuentu discessum est. Ea res fecit, ut Burgundiones & Franci cœperint mox inter se de concordia agitare, quam multis de causis, ut supra planum fecimus, ipse Philippus Burgundio diu antea optarat. Conuenit itaque pax eiusmodi conditionibus, ut Carolus Burgundioni præter nonnulla loca Burgundiae finitima, quæ eius maiorum ditionis fuissent, Arthesio, & oppidis Ambiano, Corbia, Perona, Fano Quintini, Abbatissilla, ac Pontui & Bononiæ comitatibus cederet, &c.

Fuit hic annus, cum hæc gesta sunt, humanæ salutis M. CD. XXXV.



EX ONUPHRIO PANVINO, DE  
Pontificibus Romanis.

**Q**Vandoquidem non cuius peruia sunt, quæ Concilium Basileense ac schisma istius temporis concernunt: de quibus mentio fit in actis B. Nicolai apud Zenum Sigoniumque: Volui in gratiam beneuoli Lectoris adiungere ex Onuphrio, quæ plurimum lucis adferre possunt. Sic autem habet.

Concilium Basileense, & schisma XXIX. in  
Romana Ecclesia.

**I**NDixerat Concilium Basileense, ex præscripto Concilij generalis Constantiensis, Martinus Papa II. in quo de componendis moribus tam Clericorum, quàm Laicorum nimia licentia iam labefactis, itemque de Ecclesia Romana reformatione agendum esset: iamque ad id inchoandum Legatum Cardinalem Iulianum Casarinum maxima cum auctoritate miserat, quum rebus humanis exemptus est. huius successor Eugenius IV. Martini institutum sequutus, Concilium ipsum à Martino indictum auctoritate sua confirmavit, atque approbavit, & ut inciperetur à Legato Iuliano Casarino voluit. quum autem maxima pralatorum multitudo ex uniuerso orbe Latino Basileam indies conflueret, atq. 14. Kal. Aug. anni 1431. Pontificatus Eugenij Papæ IV. primo, Concilium inchoatum esset, multa de Ecclesia Romana reformatione tractari cæpta sunt; in quibus sub prætextu reformandi Rempubl. Christianam, plerique Ecclesia Romana priuilegia, & ea quæ erant magis necessaria omnino tollere, & antiquare studebant; id veritus Papa Eugenius IV. Concilium Basileense, licet illud iam pridem approbasset, Legato Apostolicæ Sedis reuocato, ob eiusmodi causam dissoluere iussit, idque Ferrariam transtulit, hac occasione, quod diceret Græcos cum Ecclesia Romana in fidei articulis, in quibus Græci aberrabāt, conuenturos eundem locum sibi delegisse, quæ omnia eò tendebant, ut Concilium Basileense dissolueretur, quo cognito Pralati Concilij Basileensis, quorum signifer, & dux erat Ludouicus Alamannus Cardinalis Arelatensis, qui ab Eugenio IV. cum quo graues inimicitias habebat, ad eos confugerat, nulla ratione unquam compelli potuerunt, ut Eugenio



obtemperarent, quamobrem non solum Basileam non discesserunt, sed ipsi cum Cardinalibus omnibus ad Concilium Basileense legitime congregatum citauerunt. Ipse autem Basileam omnino accedere renuens, quo illud Concilium vel omnino tolleretur, vel infirmaretur, Ferrariam, ubi suo nomine Nicolaus Albergatus Cardinalis tit. S. Crucis Apostolicae Sedis Legatus 5. Idus Aprilis, anno 1438. Concilium generale ab se iam pridem indictum inchoauerat, cum suis Cardinalibus profectus est Pontificatus sui anno 8. in quo de omnibus controuersis transactum est, quae unquam inter Gracos & Latinos emerferint. verum nono, postquam inchoatum fuerat, mense, repentina pestis vi Ferrariae ingruente, Pont. Eug. coactus est illud Florentiam transferre, ubi anno sequenti 1439. pridie Nonas Iulij finitum est, quum per annum, & tres ferè menses partim Ferraria, & partim Florentiae perdurasset: in eo autem Graecam Ecclesiam cum Romana in eis articulis fidei consensisse ferunt, de quibus olim maxima inter utraq; Ecclesias exorta fuerat controuersia. Interim verò Basileenses, quum Eugenium IV. suosq; Cardinales Basileam ad Concilium sepe citassent, nec unquam vel accedere, vel aliquem suo nomine mittere voluisset, ipsum tunc Florentino Concilio insistentem damnauerunt & anathemate notatum, in publica XXXIV. sess. 7. Cal. Iulij anni 1439. Romano Pontificatu priuauerunt, sacerdotij sui anno 8. mense 3. & die 23. atq; ad alterius Pontificis electionem hac ratione eodem anno processerunt.

Priuato Romano sacerdotio Eugenio IV. Prælati Concilij Basileensis, quibus Cardinalis Arelatensis Eugenio IV. insensissimus præsidebat, de noua Rom. Pont. electione pertractare cæperunt, atq; post multas disceptationes tandem in hanc sententiam deuentum est, ut Triumuiro nominarentur, qui ex Concilij corpore nouem, & viginti alios electores omnes viros religiosos, & in sacris ordinibus constitutos, legerent, quorum suffragijs cum ipso Cardinali Arelatensi nouus Rom. Pont. eligeretur: tunc prid. d. Oct. anni 1439. ex sententia Guillelmi Archidiaconi Metensis, postea Cardinalis, frater Thomas Abbas de Donduno Scotus, Ioannes Segobiensis Hispanus, & Thomas Corcellus, viri graues, & prudentes, eximieq; probitatis existimati, ac SS. Theologiae Doctores electi sunt, cum auctoritate, ut singuli tot collegas ex quatuor nationib; quae Concilio intererant, Italica videlicet, Gallica, Hispana, & Germanica sibi cooptarent, qui cum ipsis XXXI. numerum complerent. Statutum

enim



enim in Concilio fuerat in electione Pontificis futuri addendos esse Cardinales, qui electioni esset adfuturi, duos & XXX. alios electores, octo scilicet ex unaquaque natione: quo autem hac commodius perfici possent, Triumviri 9. Kal. Nov. quartum sibi collegam adsciscunt Christianum de Grex Germanum: nam totidem erant nationes, qui simul iuncti s. Kalend. Nov. in publica XXXVII. Concilij Basileensis sessione, XXVIII. alios electores elegerunt, pari numero ex omnibus nationibus, septem videlicet pro qualibet natione, quae quatuor erant. porro autem inter ipsos electores fuerunt Episcopi XI. Abbates VII. Theologi V. Interluminati ac Doctores IX. omnes in presbyterij ordine constituti, quorum suffragijs, & lectione novus Rom. Pont. crearetur.

Eodem anno 9. Kal. Nouemb. locus conclavis in Episcopali palatio constructus est, & cellula Romano more omnibus diuise.

Eodem anno 3. Kal. Nov. Officiales, conclavis videlicet custodes numero XI. Clerici caeremoniarum duo, Promotor unus, & Soldanus unus in Concilio creati sunt.

Eodem anno & die, videlicet 3. Kal. Nouemb. cantata missa Spiritus sancti per Dominum Cardinalem Arelatensem, omnibusque electoribus sacra Eucharistia relictis, electores ipsi numero XXXIII. cum ipsomet Cardinali conclave ingressi sunt paratum in Episcopali palatio Basileensi pro noui Pontificis electione, ubi sex diebus commorati, septimo postquam conclave ingressi fuerant die, à depositione verò Eugenij Papae IV. mense 4. & die 12. hoc est, Nonis Nouembris mane, hora tertia, facto scrutinio, sex & viginti electorum suffragijs Amadeus, olim Sabaudiae Dux, tunc verò in solitudine Ripariae Gebennensis diocesis, vitam eremiticam agens Romanus Pontifex in schismate renunciatus est, qui electioni de se facta assensum praebens, Felix Papa V. appellatus est.

Ex Chronographia Ioannis Naucleri de iisdem Concilijs,  
Basileensi scilicet ac Ferrariensi.

**E**Vgenius Florentiam discedens, Bononiae circiter annum Domini 1436. Basileense Concilium Ferrariam transtulerat, quod diceret, ibi conuenturam cum Romanam Synodo Graecam Ecclesiam. Hac translatione non obstante, Patres Basileae congregati (ut refert Antoninus) obtinuerunt aures suas, non audientes vocem Domini, & autoritate



*sua temeraria presumptionis cœperunt Eugenium ad Concilium citare: sollicitante ad hoc Philippo Maria duce Mediolani, agrè Pontificatum illius ferente. Visus enim fuit fauere Venetis. Sigismundus tunc Imp. omnino sub excommunicatione hoc prohibuerat, cum schisma nuper prateritum cum maximo labore fuerit ablatum. Cardinalis etiam sanctæ Crucis, Ordinis Carthusiensis (qui à Martino Legatus fuerat in Franciam missus, ad pacem inter Regem, & Burgundia Ducem componendam) superuenit ad obuiandum malis, & idem omnino dissuadebat.*

De Ferrariensi Concilio idem testatur Hartmannus Schedelius, Medicus Nurenbergensis, in suo Chronico hisce verbis: *Mortuo Sigismundo Imperatore (à quo Basileense Concilium incrementum habuerat) creato Alberto Duce Austria, Concilium Ferrariense (Eugenij nomine) Cardinalis S. Crucis inchoauit.*

Eadem iisdem ferè verbis habet Albertus Crantzius in Metropoli lib. II. cap. 43.

Ex quibus intelligere licet, quantæ fuerit sapientiæ, quantæque authoritatis B. Nicolaus Albergatus: utpote, qui prudentissimum consilium aptissimamque viam inuenit, ad Basileensem coitionem dissipandam, & Eugenium Pont. Rom. propugnandum, qui alioquin in maximis videbatur angustiis constitutus.

Ex Arnoldo Bostio Carmelita, de Viris Illustribus Ordinis Carthusiani, cap. 22.

**N**icolaus Albergatus, Cardinalis sanctæ Crucis, & Bononiensis Ecclesiæ magnus Antistes, toti salutifer orbi, & velut alter Helias pro domo Domini zelosus, sanctorum cathedram meritis eximijis implere satagit. Vir enim fuit tum celebris, & maximæ sanctimonix, tum etiam sapientiæ singularis, humanarum diuinarumque rerum cognitione præter ceteros ornatus. Hinc Reipublicæ Christianæ, & Diui Petri nauicula, dum secundis vteretur ventis, maximo semper ornamento extitit: dum verò aduersis procellarum turbinibus quateretur, adminiculo & subsidio singulari. Qui primæ ætatis tyrocinium vias Domini duras in domo Diui Hieronymi Bononiæ, studiorum matri vicina deuotissime professus, vita & ordine Carthusiensis continuè permansit; varijs deinde auctus dignitatibus (quas ordinante Deo titulos,

virtu.



virtutum & gratiarum dotes, quas in eo plantauerat, tractus sanè, & inuitus, imò vim passus & enixissime reluctans) suscepit. Rigorem itaque religionis semper seruans, non secus ac lumen cœlitus emissum, imitatus est eum indefesse, cuius crucem pro signo gessit. Et ut pretiosissimi sanguinis eius fructum quàm diligentissime colligeret, innumeris per orbem fidelibus, veluti salubre quoddam offulgēs rebus humanis sydus, voce viuâ & epistolarum eruditissimarum instructionibus ad salutem profuit. Cōtinuo studio, perenni cura ac diligentia, semper lingua calamoq; cœlestem animi sui pulchritudinem penè sensibilem praeferente, sapientis Ecclesiae architecti scitè & doctè adimplens officium. Nusquā igitur potuit delitescere sapientia, nota gregalibus, nota nobilibus, nota principibus, nota regibus summis, notissima deniq; sæculi sui Pontificibus. Fuit verò vita eius totius sanctitatis exemplum, eloquentiae stupor, doctrinae miraculum. Speculum enim sine macula extitit Prælati omnibus, pater pauperum, inter Dominatores orbis dissidentes pacis reformator, impeditor schismatis, errorum excidium, Christiana q; Reip. propugnaculum. Omnia retulit ad Deum Opt. Max. quo semper præsente, vidēte, audiente direxit ac perfecit salutiferos suos cogitatus. Quò tamen minus laudem appetebat & gloriam, eò magis eum sequebantur. Tandē verò anno Christi sexto & quadragesimo a post 1400. tam præcipuum omnium virtutum decus, post opera permagnifica, post tantos labores ac sudores, è corpore mortis Senis in Hetruria emigravit, ex infirmitate calculi. Exenterato autem eo, repertus est lapis grossus ad modum oui in fundo vesicae, quasi incarnatus. Tota hunc fleuit ciuitas, tota plāxit Italia: cuius voces ubiq; ferè locorum Angeli lætātes, demones contremiscentes, mortales omnes obstupescētes audierunt. Corpus terra suscepit, anima Christo reddita est: cui duro & diuturno martyrio viuētem sui corporis hostiā immolarat. O fortunata mors, quæ naturæ debita, Deo Opt. Max. potissimū data est. Si quis felices eius actus, alta præconia, dignitates præcellentes, legationesq; cum plena & ampla potestate celeberrimas (quorum equidem prosequutio neque loci, neque temporis huius est) ad integrum noscere velit, Poggij Florentini, aliorumq; præstantium virorum compluriū de vita eius (cuius utiq; nulla pars laude vacauit) legat opuscula ubiq; gentiū longè lateq; diffusa. Hoc unum duntaxat tamen addidero, in singulare amplissimū atq; in Deum fragrantissimū Patris præconium, quod nimirum ex eius insigni

fami-

a An 1443  
iuxta veris-  
simas anti-  
quitates.



familia, Thomas videlicet Sarzanensis, & Aeneas Syluius Senensis, ad Pontificatum Maximum etiam meritisimè prouecti sint. Quorum primus Nicolai quinti, alter verò Pij secundi nomen accepit. O magnū & insignem Cardinalem, ex cuius familiaribus duo Maximi claruere Pontifices, dignitatis tantæ fastigium summopere extollentes & adaugentes. Non secus ac sol aureus radios salutare per orbem uniuersum spargentes, suisq; gestis illustribus eorum, qui clarè vixerunt, Pontificum famam non modò æquantes, sed apprimè superantes, uti b Bartholomæus Platina libro de Pontificum vitis, testis est locuples.

b Ab alijs  
Baptista  
vocatus,

Ex Chronico Petri Dorlandi Carthusiani, libr. 7. cap. 1.

**N**icolaus Albergatus, illustri ortus prosapia, cum esset adolescens positus Bononiæ ad Gymnasia Philosophorum, ad eò in liberalibus scientijs emicuit, ut ei in ipsa uniuersitate nullus haberetur secundus. Erat etiam non minùs bonus, quàm doctus: quippe qui lubricum adolescentiæ iter magno semper studio declinarat, pius, sobrius, humilis, timoratus. Hinc pro sua virtute, proq; scientiæ suæ claritudine, omnibus erat & honori plurimum, & amori. Porro ille sciens scriptum esse, Iustus iustificetur adhuc; domum D. Hieronymi Ordinis Carthusiensis, quæ Bononiæ sita est, mirantibus uniuersis, est ingressus. Cuius cõuersionis initia magnis claruere virtutibus. Nam sicuti erat ceteris doctior, sublimiorq; ita cunctos humilitate, obsequio, mansuetudine praecebat. Huius erat meditatio accesa, oratio indefessa, contemplatio porrecta in supernis. Omnes suam vitam aspernabantur, dum huius pji Patris vitam virtutibus plenam contuerentur. Hinc creuit eius illustris opinio per Bononienses populos; quem suo Prasule defuncto unanimis votis in Episcopũ elegerunt. Trahitur ergo lucerna ardens & lucens è cella, quasi de suo modio, & super candelabrum ponitur, ut luceat omnibus, qui in domo sunt. Trahitur autem inuitus, & quasi vim passus, ipso plurimum bachrymante, ac renitente. Sciebat enim alios esse mundi turbines, & aliam silentis cella internam requiem, & quietudinẽ. Assumptus nunquã cilicium, nunquam humilem Monachi habitũ permutauit, eisdem semper, ut antè, cibis & potibus utens. Et cum sibi esset rigidus & amarus, omnibus tamen humanum, placidum se, ac suauem exhibebat. His laudũ titulis à summo Pontifice est euocatus, & Cardinalis S. Crucis creatus. Hinc factus est toto (uti Arnoldus dicit Bostius) salutifer orbi: quippe

qui,



¶ ut alter Helias, pro domo Dei Zelū acus, dignitatis suae Cathedrā sublimib. meritis cōdecorauerit. Erat enim vir ubiq. celebris, & ob sanctimoniae suae eminentiā inter Cardinales singularis. Inerat illi de supernis affluens sapiētia, humanarum diuinarumq. rerum cognitione admodū illustrata. Hinc Reip. Christianae & ipsi Petri nauicula in prosperis & aduersis ornamento fuit, & subsidio. fungebatur etiā saepe Legati officio ac dignitate, missus à Latere: quod quidem strenuē exequebatur, plenissimo fungēs potestatis honore. Et ut suis maximis curis dignus haberetur, studijs assiduus incumbēbat, crebrō per populos verba Dei sonabat, dictitabat sermones, Epistolas ad diuersos ornatissimas trans mittebat, tanquam sapiens Architectus scitē doctēq. suum implens officium. Has sua sapiētia & Regibus, & Principibus, & Magnatibus ubiq. innotuit. cuius vita Sāctitatis exemplum; cuius mores, instituta Ecclesiarū; cuius eloquētia, stupor; cuius doctrina, miraculū putabatur. Hic tersum virtutis speculum, hic Praesulum & Pralatorum gloria, hic pater pauperū, refugium miserorū, dissidentium magnatum pacis cōciliator, schismatis impeditor, errorum excidium. Hic Christianae religionis propugnaculū: qui quicquid agebat, aut praecipuū cogitabat, ad Deum Patrem luminū humilis referebat. Laudes hominum, ut virus pestiferum fugiebat, sed fugientiē laus illū & honor omnis insequēbantur. Hic pro maiestatis suae reuerentia Eugenium a Papam, & Aeneam Syluium. (qui & Papa Pius post dictus est) alumnos, familiares, ac cōmensales habuit, viros nimirū & sapientia, & eruditione clarissimos, quos hic Pater ad Pontificatus apicē sua potestate promouit. Sed si vis, de hoc nobili Principe maiora cognoscere. lege ipsum Aeneam, lege Poggium Florētinum, lege Bartholomaeum Platinam (qui Pontificum vitas diserto sermone conscripsit) lege Arnoldum Bostiū Carmelitā; & inuenies, quod huius almi praesulis vita nullā ex parte laude vacauerit. Tādem anno Christi sexto & b quadagesimo post 1400. hoc decus hominum, hoc clarum Ecclesiae iubar, post innumeros labores, post multas patiētia coronas, in ciuitate Senarū, ex molestissima calculi afflictione moritur, caducarum opum vacuus, sed plenissimus meritorum. Moritur, non vitā perdens, sed meliorem ac permāsuram recipiens. Exenterato eo, ut balsamo condiretur, inuentus est in fundo vesicae habere lapidē grādem, instar oui: qui omni ex parte illic carne obuolutus hārebat. Has calculi passiones immanissimas mirādum viueret patientiā tolerabat. Tota hunc Italia virum planxit; pau-

¶ forsan  
Nicolāū V.  
dicere vo-  
lebat.

¶ An. 1443  
ut habet  
certior  
Chronolo-  
gica anno  
ratio.

R

peres



peres verò maximè, & calamitosi; quos muneribus & adminiculis sepe leuaret. Corpus terra suscepit, animā SS. Angeli cum laudib. exceperūt; quam ad superna euehentes, sanctorum cœtibus inseruerunt.

Ex Petro Sutore de vita Carthusiana, libr. 2. tract. 3. cap. 7.

Colonienfis editionis pag. 593.

a de cratire-  
rum.

**N**icolaus Albergatus, ex insigni familia ortus, Cardinalis S. Crucis, & Bononiensis Ecclesie Præsul: humanarum diuinarumq; a rerū cognitione mirum in modum ornatus, sanctimonia præcipuus, fama percelebris: post primæ ætatis florem mundi oblectamenta deseruit, & vias Domini duras ingressus, Carthusiæ ordinem professus est. In quo quidem cum annos aliquot laudabiliter exegisset, multis dignitatibus (licet refragrans ac enixissimè reluctans) donatus est. Quas consecutus, diligentissimè studuit pristinum religionis rigorem obseruare, bonumq; Præsulē in omnibus referre, & Reip. Christianæ subsidio adminiculoq; singulari semper esse. Sed & visidus ubiq; refulgens omnibus prodesset, multas scribere curauit epistolas eruditissimas, cœlestem animi sui pulchritudinem ac sapiētiam penè diuinam referentes. Tandem post multos felices, præclarosq; actus, post labores sudoresq; varios, post legationes cum plēna & ampla potestate celeberrimas, post grauem deniq; calculi morbum (quo ad mortem usq; fatigatus fuit) rebus excessu humanis. Quo vitæ defuncto, tota fleuit ciuitas, tota plāxit Italia: de quo meminit multa cum laude Poggius Florentinus, extollit & eum magnificè Bostius, dicens: Nusquam sua potuit delitescere sapientia, nota gregalibus, nota Regibus, summis notissima seculi sui Pontificibus. Fuit vitæ eius, Sanctitatis exemplū: eloquentia, stupor: doctrina miraculum. Speculum itaq; sine macula extitit Prælati omnibus, pater pauperum, & inter dominatores orbis disidentes pacis reformator, impeditor schismatis, errorum excidium, Christianæq; Reip. propugnaculum. Omnia retulit ad Deum summum. Max. quo tanquam semper præsentē, videntē, audientē direxit ac perfecit salutiferos suos cogitatus. Quod tamen minus laudem appetebat & gloriam, eò magis eum sequebantur. Deniq; promeruit duos de sua insigni familia (scilicet Nicolaum V. &

Pium II. qui antea Aeneas Syluius dicebatur) in  
summos Pontifices sublimari.

Ex Ca-



Ex Carolo Sigonio de Episcopis Bononiensibus, lib. 4.  
circa initium.

**Q**uarto inde libro exordium dabit praeclarus Nicolai Albergati Episcopatus, cum omni caritatis pietatisque exemplo nobilitatus, tum in varijs ac difficilibus pro patria ac Repub. Christiana negotijs periculisque versatus. Is vero à noua Reip. mutatione principium duxit, Anno enim millesimo quadringentesimo sextodecimo Bentiuoli, ac Canetuli, ciues tum in vrbe opibus excellentes, simul ac Ioanni Pontifici abdicationem neminem suspectum propter dissidium Cardinalium cognouerunt, prid. Non. Ian. impetum in Palatium, cum parata factione fecerunt, ac legato exacto statum Populi reducerunt. Itaque cum proximo anno Ioannes Episcopus 4. Non. Ian. decessisset, populus libertatis memor extemplo animum ad successorem ex sententia sua subrogandum adiecit: ac Fr. Nicolaum Albergatum, Petri Nicolai filium. ciuem Bononiensem, Carthusiamque Priorem, spectata illa tempestate virtutis, sanctitatisque, virum hoc modo substituit. Prid. Non. Ian. comitijs creando Episcopo habitis, ex multis selectis unus ipse omnibus à consilio sexcentorum praelatus est. Idemque subinde, quoniam constanter honorem repudiabat, rogatu populi primum à Praefecto suo probatus, deinde à Clero Bononiensi electus est. Itaque consentientis ciuitatis voluntate tandem euectus, sese 4. a Nonas Iunij consecrari permisit. Atque eam rem magnam Populi frequentiam in ade Carthusiam celebratam, urbem solenni pompa iniuit, ita ut eques usque ad S. Stephanum venerit, inde sine calceis ad S. Petrum pedes processerit. Huius egregie ac laudabiliter facta multa, sed hac maxime illustra. Studio pristinae disciplinaret cetero, victui suo parcens, facultates Ecclesiae pauperibus sustinendis, et praecipue puellis nubilibus collocandis impertijt. doctos homines, atque ingenij laude aliqua excellentes, omni benignitatis genere fuit. Carne abstinent, in culcitra non cubuit, Iudeos luteum signum, ut à ceteris dignosceretur, in pectore ferre, et festis diebus clausas tabernas habere precepit. Huic porro Martinus V. post in Concilio Constantiensi Pontifex 3. Id. Nou. declaratus tantum tribuit, ut non solum Episcopum, sic. n. ab eo postulatum est, primo quoque tempore confirmaret: sed etiam apud Mutinensem, et Imolensem Episcopos iusiurandum solenne concipere iusserit, ne sui ad eundem laborem suscipere cogeretur. Postero anno idem in instituto suo persistens, usuras Iudeorum in Christianos grauiores coercuit, ludum talarium interdixit: synodo habita

al. 4. No-  
nas Iul.



cōstitutiones Bernardi olim Episcopi cōfirmavit. monasteriū S. Gregorij extra portā S. Vitalis, ad unū Priorem & conuersum redactū, à veterib. Canonicis S. Augustini ad nouos S. Georgij in Alga, Pōtificis mādato traduxit. Sequenti verò, Canonicis S. Mariae Rhenana, & S. Saluatoris, qui ad unū Franciscū Ghiselerium Priorem deuenerant, Canonicos S. Amb. Eugubini, (regularibus illis quidē, sed diuersi habitus, & obseruantia, à Gregorio XII. probatos,) itidem ex decreto Martini Pont. copulauit; qui nunc S. Saluatoris dicuntur. Interim Martinus Pont. priorem erga Bononienses animum immutauit, & cuius ciuitatis certo tributo se contentum fore à principio ostenderat, eius integrum imperium postulauit, ac Nicolao Episcopo oratori ad se à ciuitate Florentiam pro rerū cōpositione misso, tātum abfuit, ut quidquam ex ijs, quae petebantur, concesserit, ut ipsum etiā reuocatū sacris ciuitati interdicare iusserit. Quo mādato exhausto Nicolaus, ubi se animos offendisse ciuitum sensit, urbe secessit. Martinus inde cum per legatū urbē recipere nequiuisset, exercitū ad eā oppugnādā immisso, 12. Kal. Aug. ad obsequium reuocauit. Quo facto, Nicolaus III. 1d. Sept. Centum, Plebem & Maxumaticum, à populo eorū tūpotiente, recuperauit. inde anno 1422. nuncius in Franciā Pont. iussu contēdit, ad conciliandā pacē inter Frāciā Principes in expiabili inter se odio decertantes. Postero Gabriel Cōdalmarius, qui postea Eugenius IV. Pont. fuit, Martini legatus urbē iniiuit, ac graui ciuitatē vexari pestilentia cernens, subitō populū, ut supplicatū Deo procederet, est hortatus. Sub eos inde dies S. Bernardinus Senēsis\* in urbē venit, is, q. monasteria Fr. Minorū, quos ab antiqua S. Frāncisci seueritate sensim recessisse videbat, ad veterem disciplinā reuocādā, at q. obseruādā adduxit. Sordidus erat corporis eius amictus, mira ieiunijs cōtracta macies, asperit atē ac rigiditatem vndiq. spirans indoles, ita ut qui eum cernerent, B. ipsū Franciscum, cuius se imitatore profitēbatur, se videre putarent. Huic igitur benignē excepto Nicolaus auctōr fuit, ut in foro more suo concionaretur, & cū cetera populi vitia reprehenderet, tum maximē alea studium, cui tum deditissima erat ciuitas, increparet. Quod ille p. gradib. S. Petronij stans, frequentī admodum audiente concione diligentissimē praeiuit. Nam inueteratam lusus consuetudinem ita coarguit, ut ab ea damna, probrāq. omnia cum manifesta Dei hominumq. iniuria diceret proficisci. Errat enim, inquit, si quis aleatorem vno tantū se obstringere scelere putat: omnia in se piacula concipit, quem eiusmodi occupatio stu-

dum-

\* Vide Sur.  
tom. 3. 20.  
Maij.



diuue delectat. Etenim ut perniciosam temporis iacturā omittam, cui<sup>9</sup> ab illo exacta demū ad calculum ratio reposcetur, nō solum patrimonium projicit suum, quod ad vitam sustentandam, & senectutem subleuandā & sibi, & posteris, & Christi pauperibus debuit cōseruare: sed etiam inuadit alienum, cum ciui, ac sapissimē amico eripit id, quod si boni viri, aut ciuis fungi officio vellet, proprium custodire, ad duriora illorum tēpora cōueniret: in victoriā profusus & insolens, in offensione adeo vesanus & amens, ut quam iram in se exercere deberet, eam sapē in uxorem innoxiam & in ipsum diuinum Numen auertat, ac modò Deum & Virginē gloriosā impura & petulanti lingua proscindat, modò ea cecitate animi rapiatur, ut ferro in eorū imagines sanctissimas inuchatur. Quod flagitiū ipsi sapē presentē inflētā plagā, atq; vltimo illato supplicio vindicarūt. Quae omnia cum opportuna exemplorum, ac diuinorum oraculorū auctoritate firmaret, ac magno animi ardore, ac summa pro rei grauitate dicendi copia exaggeraret, tantum profecit, ut multi iustolusus odio incitati abacos, calculos, tabellas, tesseras, ceteraq; perditae aleae instrumenta ad eum deferrent. Quae cuncta post 4. Non. Maij in foro populo ipso approbāte combusta sunt. Accidit autem, ut faber quidam, qui tabellas lusorias pingere, & familiā ex eare suam alere instituerat, eo quaestu priuatus ad sanctum virum adierit, & se in extremam necessitatem illo dempto vitae praesidio perductum iri conquestus sit, cum se nihil aliud pingere didicisse adiungeret; cui S. Bernardinus respondit: Si nescis aliud pingere, hanc imaginem pingere, nec te omnino pigebit. ac circulo factō solem in eo formauit, atq; in medio nomen IESV nouis quibusdā literarum formis effinxit, quale nunc etiā sub porticu Boni IESV cū ipsius Beati effigie cernimus. Quod cum ille fecisset, confluentibus ad emendam imaginem ex Bernardini auctoritate plurimis, magnas ex eare pecunias comparauit. Anno 1426. Nicolaus campanarij fastigium ex ligneo lapideum fecit, & plumbo contexit. Martinus autem virtutem eius iā pridem admirans, cum Cardinales allegeret, ipsum in eum quoq; numerum retulit, ac Romam ad se venire iussit 3. \* Non. iul. pileum, quē obuiam missum in itinere recusarat, repugnāt adhuc atq; inuito imposuit, ac presbyterum Tit. S. Crucis in Hierusalem declarauit: ex quo ille signum Crucis pro insigni gentilitio ferre coepit. Vnde Franciscus & hilelphus ad eum scripsit: Imitatus es eum, cuius crucem pro ligno geris, Christum Opt. Max. Bononiam inde Septembri mēse reuersus, atq; in-

\* aliter Sigon. in vit. ipsius c. 10.



genti honore ciuitatis exceptus, post triduum ad pacem inter Senatum Venetum, & Ducem Mediolanensem componendam legatus Ferrariam adiit, atq. ibi utriusq. partis procuratorib. audiendis operā dedit. Quo facto, ubi se rem ad exitū perducere non posse vidit, semel iterūq. Venetias ac Mediolanū, hoc & sequenti anno contendit, atq. ita demū ex sententia rē confecit. Inde Bononiā reuersus pauperes ab onere fabricæ tēpli S. Petronij liberauit; aulam aquilonarē in Episcopio renouauit; Hospitale S. Mariae Mortis ad forū refici opere magnificentiore inceptū, & Deuotorū S. Hieronymi sodalitatem à 24. pjs iuuenib. institutam probauit. Postero autem anno, cum Canetuli ciuitatem ab auctoritate Ecclesiæ, pulso Legato, iterum auocarent, illi incommodo maturè occurrere properans, penè in ipso tumultu populari occubuit. Quare accepta Martinus adeo irā non tenuit, ut ciuitati sacra iterum interdixit, bellumq. redintegrarit. Magistratus autem ciuitatis Centum & Plebem oppida, bello illi opportuna futura, repetere cupientes, Nicolaum ad se venire, ut abnuentem reddere cogerent, imperarunt. ille verò re prouisa, indignitate periculoq. permotus, vrbe occultè discessit.

Hic interponebatur alius Episcopus Bononiensis, scilicet Bartholomæus Zambecarius.

**N**icolaus autem ad Ecclesiam suā reuersus, postero anno 1430. Legatus à Martino de concordia inter Reges Francia, & Angliæ confirmanda perrexit in Angliā: Iacobus verò Insulanus Cardinalis in Franciam. Eodem anno Martinus liberum urbis dominatū deposcens, tertium Bononiensib. intulit bellum. Quo ipsi permoti monasteriū S. Michaelis, licet optimè adificatum, ne in potestatem hostiū perueniret, inflāmauerunt, atq. Oliuetanos intra mœnia receperunt. Sequenti Iacobus legatus ex Francia rediens Mediolani mortem obiit. Eugenius autem V. Pont. Martino mortuo subrogat<sup>9</sup> optatā pacē Bononiensib. reddidit, atq. aquis conditionibus urbē recepit. Idem monasteriū S. Felicis superiorib. bellorum turbinib. dirutum, & monachis vacuū, Congregationi monachorū S. Iustinae Patavinae, quæ paucis ante annis reformatā fuerat, dedit. Sequenti Oliuetani in vrbe parū cōmodè habitātes monasteriū S. Mariae Misericordiae ad portā Castellionis impetrauerūt, virginibus Congregationis Cisterciensis, quæ ibi degebant, ad monasterium sanctæ Ursulae transportatis, Fantino Dandulo Protonotario Apostolico, urbis gubernatore rem ex auctoritate Eugenij comprobante. Postero prodigia cæle-

stia



stia plura diuinas minas, ut vulgò rebantur homines, ostentātia, variè  
 ciuitatis pectora perculerūt. Hi fuere mēse Maio sauisimi terramotus,  
 quorū impetu plurima adificia corruerunt. iunio verò sol usq; adeò post  
 meridiē obscurat⁹, ut ipsas noctis tenebras adequaret. Præterea asidua  
 & vehemētes pluuiæ, ac fædæ adeò omnis generis tempestates, ut nō solū  
 instanti mēsi impedimentū afferrent, sed ipsis etiā segetibus iā maturis  
 exitiū intentarent. Qua de re cū Episcopus vehementer animo ange-  
 retur, cōsensu Antianorū, triduo supplicationes fieri iussit. quibus cū ni-  
 hil profecisset, s. alias addidit. quas ubi irritas itē, atq; inanes agnouit,  
 deinde in alios 8. dies indixit. Interim sermo inter Antianos remedia  
 imminenti inopia anxie cōquirentes obortus est, cōsueuisse in eiusmodi  
 periculorū articulis Florentinos tabulā quandā, in qua imago ex ore B.  
 Virginis manu S. Luca esset expressa, pferre, ac sapē opportunū subsidiū  
 retulisse. Tum interfatus ex ijs vnus: Et nos idem, inquit, facile facere  
 possumus; siquidē alteram eius similem, ab antiquo tempore in monte  
 Guardiæ retinemus. Cui cū ceteri assensissent, re cū Episcopo cōmu-  
 nicata, ex communi consilio constitutum est, ut hæc in urbem omni ad-  
 hibita religione deportaretur, atq; eius rei officiū Deuotis Hospitalis S.  
 Mariæ Mortis non recusantibus est mandatum. Ita Deuoti 3. Idus Iu-  
 lias summo mane in collem se receperunt, atq; eam sub umbella, cum ce-  
 reis accensis longo instructo agmine detulerunt. Antiani verò, ceteriq;  
 magistratus vnā cū Clero, atque omnibus Religiosorum Ordinibus,  
 ad portam Saragotiæ occurrerunt, atq; apud Virgines S. Matthiæ col-  
 locauerunt. Inde per octo dies in pompa ingenti honore gesserunt. Qua  
 re perfectā cū statim optatæ serenitatis ac tranquillitatis lucem im-  
 petrauissent, Deuoti tabulam ad montem eodem ordine reuexerunt.  
 Ita messe ac trituratione laie confecta, cū ciuitas se ex ingenti pericu-  
 lo euasisse cælesti eiusmodi beneficio iudicaret, Marcus Episcopus A-  
 uenionensis, atque urbis Gubernator decretum 3. Kalen. Septemb. fecit,  
 ut posthac Deuoti S. Mariæ Mortis deferenda & referenda tabula  
 potestatem haberent, eamq; dum in urbe esset, apud se custodirent, &  
 ut tabula relata armario includeretur, ac tribus clauibus mandare-  
 tur, quarum vnā Antiani, alterā Virgines S. Matthiæ, tertiam  
 Deuoti ipsi S. Mariæ tenerent. & quoniam 3. Nonas Iulias initium  
 huius deportationis felicititer fuerat factum, uti quotānis in prima Do-  
 minica Iul. ea tabula eodem honore, atque eadē religione deueheretur:



ac proximo anno ad basilicā S. Petri solemniter portaretur, atq; ibi Mis-  
 sarum solemnia prasente populo fierent, reliquis inde ad reliquas Eccle-  
 sias ordine seruato iretur, ac postridie per deuotos ad mōtem tabula re-  
 ferretur, atq; ibi ad honorem Dei, & salutem populi Bononiensis con-  
 seruaretur. quod nunc etiam obseruatur. Atq; eodem anno Nicolaus ite-  
 rum in Franciā legatus de Principum pace perrexit, eaq; cōfecta reuer-  
 tit, ac crāneum S. Annae matris B. Virginis ab Henrico Anglia rege dono  
 acceptum prid. Kal. Dec. Bononiam retulit, atq; ingenti ab vniuersis ho-  
 nore acceptus, Monachis suis Carthusiensibus dono dedit; qui ei oratoriū  
 S. Annae in via S. Isaiæ condiderunt, ubi nunc etiā obseruatur. Eugenius  
 autem Pont. integrum urbis dominatum obtinuit post 7. annos, quā Ca-  
 netuli à Martino ciuitatem auerterant. Itaq; proximo, Florentiā; ubi  
 diu Romā pulsus manserat, Bononiam benignē ab omnibus acceptus mi-  
 grauit, atq; in die Assumptionis Sacra in basilica S. Petronij fecit; astāte  
 inter ceteros Antonio Corrario Bononiensi quondā Episcopo, atq; adhuc  
 Cardinali Bononia nominato, ac Monasteriū S. Proculi Martini Abba-  
 tis cōmendatoris interitu vacans, Congregationi Monachorum S. iusti-  
 nae dedit; postero verò monasterium S. Felicis cum oratorio S. Mariae in  
 monte ipsi monasterio S. Proculi tribuit, ac sequenti iustis Sigismundo  
 Imp. mortuo in basilica S. Petronij persolutis, 6. Kal. Feb. Ferrariā ad Cō-  
 cilium abiit, ac Nicolaum Episcopum legatum de pace in Germaniam ad  
 Albertum Caesarem destinauit. Eodem anno (is fuit 1438.) cū tetra pe-  
 stilentia lues urbem incolis exhauriēs ingentem curam omnibus inie-  
 cisset, placuit ad diuinum propitiandū numē, vt ciuitas triduo oratum  
 ad tria templa procederet, atq; iterum imago Deiparae Virginis, cuius sa-  
 lutarem deportationē experti pridem in auertenda pluuiā infestissima  
 fuerāt, deferretur, atq; ita re ex cōstituto ordine administrata, ciuitas  
 voti cōposita vberimum aliorum pietatis sua fructum accepit. Eodē  
 anno Populus à Praefectis Pontificis malē habitus, pristinū libertatis sta-  
 tum instaurauit. Sequēti verò cōperto vicinos principes occultē aduer-  
 sus se cum Pōtifice coniurare Nicolaum Picininū Philippi Mariae Ducis  
 Mediolani praefectum, libertatis custodem, atq; urbis Gubernatōrē asci-  
 uit, qui Vicarium suum Franciscum filium misit: eo anno mense Ianuar.  
 Eugenius Ferrariā Florentiā se recepit, atq; ibi Concilium habuit. Itaq;  
 Nicolaus Episcopus ei subscripsit: atq; Ioan. Palaologū Imp. Constantino-  
 polis, Bononia à Concilio redeuntē regio apparatu excepit. Florentia verò

positus



positus Ecclesiā suā, duobus Sacerdotibus, qui maiora sacra concelebraret, adauxit.

Anno Millesimo quadringentesimo quadragésimo sexto VI. idus Decembris nix cælo manare cœpit, atq; inde quotidie vsq; ad mēsis exitū seuā præter solitū furentē tempestate, manauit. quare cum ad inusitatā ac feruē prodigiosā altitudinē succreuisset, culmina tectorum sub pōdere gemētia sic oppressit, ut multa sustinere nequiuissent. Præcipue autē recēs tectū basilicæ S. Petronij pæne totū cū magno omniū dolore procubuit: cui malo ut oportunā cito Eugenius medicinā afferret, edictū misit, ut qui tribus diebus Pētecost. Ecclesiā S. Petronij pīs admotis manibus inuisissent, ij omniū peccatorū, ac peregrinationum remissionem haberent. Quod edictum sexto nonas Maij campanis ac tubis præ honore atque lætitiā perstreptibus, pro concione vulgatum est. Eodem Anno nempe Millesimo quadringentesimo quadragésimo tertio, Nicolaus Pontificij præfectus ararij constitutus Senis, quo profectus Pontificem fuerat, 7. idus Maij ex calculo perijt. Eugenius ut uiuentem hominem magni fecerat, sic mortuum eximie coluit. Nam & calculum eius exemptum pro sacro munere sibi habuit, & iusta ipsi sollemnia soluit, & corpus in Carthusiā transferri Florētiæ iussit. Cuius autem non magnificis solum exequijs, sed etiam dolore, ac lachrymis quanti illum æstimaret, ostendit. Eiusdem post mortem sanctitatis multa documenta fuerunt: singulare vero illud, quod in somnis Thomæ Sergianensi alumno suo aperuit, atque illum Pontificem futurum prædixit, ut Franciscus Philelphus scripsit in Orat. ad Xylum Pontif. a

a De hoc loco superius admonui.

# EX ALPHONSI CIACONII PRÆCLARO ILLO

VOLVMINE DE VITIS ROMANORVM PONTIFICVM

pag. 879. Edit Rom.

**N**icolaus Albergatus, Ciuis & Episcopus Bononiensis, ordinis Carthusianorum, Presbyter Cardinalis tit. Sanctæ Crucis in Hierusalem; qui humanioribus litteris instructus, quum postea iuri Ciuili strenuè operam nauasset, religionis feruore stimulatus, quum esset vir bonis moribus, & vitæ integritate conspicuus, religionem Carthusianorū professus, ita in ea, dum vixit, excelluit, & morum sanctitate in cæterorum exemplū refulsit, ut per omnes gradus suæ religionis, & dignitates ascendēs, Bononiēsi Ecclesiæ, Clero & populo postulante, dignè præficeretur. Qua dignitate honestatus non

S

iam



iam (ut plerique efficere solent) suae religionis aut habitum per osus, fratrum suorum consortia, aut familiaritates exhorruit, nec quicquam de prioris vitae austeritate remisit, nec humilitati, aut mansuetudini resignavit, sed eadem homini in conuersatione facilitas, eadem vitae perfectio, & si fieri potuit, per amplior, atque illustrior fuit. Nihil enim, quod ad religionis (quam esset professus) dignitatem, quod ad mansuetudinem, quodque ad rerum humanarum contemptum attinere videretur, omisit: quin potius eo magis se, ut virtutum omnium exemplar ac formam exhibuit, quoniam non sui ipsius modo, sed vniuersi gregis sibi commissi rationem se nouerat Domino redditurum. Quare & populorum moribus optimis instituit, tranquillitati & paci studens, amplissimisq; eleemosynis sua gratia & virtute fouit, ob quod omnibus carus & gratissimus fuit. Vnde Martinus Quintus audita tanti viri fama & sanctitate ipsum Romam accersuit, quem Nūcium ad Regis Francorum & Anglia bello certantes, ut pacem inter eos componeret & oratione sua (qua maxime pollebat) pacaret, misit: quod & feliciter praestitit. Romam reuersus Cardinalis à Martino creatur, à quo legatus iterum fuit ad Venetos, Florentinos, & Ducem Mediolanum, ut eos inter se federe vniret. Mortuo autē Martino V. à successore eius Eugenio IV. ad diuersos Principes & provincias pro fidei negotijs missus, omnia fideliter & strenuè gessit. Fuit vir pius & sanctus & studiosorum amator: ex cuius contubernio & schola duo Romani Pontifices prodire, nempe Nicolaus Quintus, & Pius II. Ad Concilium Basiliense legatus fuit cum plena potestate, ut locus profuturo Concilio eligeretur, id maxime petentibus Graecis. Praefuit Legatus primae Sessioni in Concilio Eugenio Ferraria inchoato, & Florentiae finito, ubi & Graeci conuenerunt. A Rege Anglia sibi dono datum fuit Cranium B. Annae matris Beatae Virginis, quod Carthusiensibus donauit. Sanctae Romanae Ecclesiae Camerarius fuit, ex calculo obiit Senis in Tuscia, corpus in Carthusianorum Cœnobio tumulatum &c. Hucusque Ciaconius &c.

Creatus fuit B. Nicolaus in Cardinalem cum alijs XIII. anno salutis M.C.D.XXVI.—IX. Kalend. Iulij, Pontifice Martino V. iam agente in sua sede annum IX. Ita Ciaconius pag. 877. Editionis Rom. qui ipsius obitū ponit sub Eugenio IV. Pöt. Rom. pag. 908. hisce Verbis.

F. Nicolaus Albergatus Bononiensis, Ordinis Carthusianorum presb.

Card.



Card. tt. S. Crucis in Hierusalem, obiit Senis 7. Id. Maij, anno Domini. 1443. Pöt. 13. (512. Eugenij 4.). Sepultus ad Carthusianos. &c Hęc ille; Vbi intellige ipsum sepultū Florentiæ apud Carthusianos.

EX QVODAM ANONYMO SCRIPTORE, QVI

AD CIACONIVM QVAEDAM ADIVNXIT, ET S. R. E. Cardinalium Nomenclator inscribitur. Impressus autem est Tolo-  
sæ in 4. apud Dominicum de la Case, anno 1614.

**N**icolaus Albergatus, Civis & Episcopus Bononiensis, ordinis Carthusianorū Cardinalis, ex cuius contubernio & schola Nicolaus 5. & Pius. 2. Pontifices Maximi prodierē, Purpuræ accessione ne latū quidem unguem instituto decedere voluit: quinimo in ieiunijs supra morem frequens, verberum & cilicij (ut carnis contumaciam edomaret) usum nullo non tempore retinuit, studiaque maiore operā repetijt, scripsit

1. Recollecta multæ lectionis.
2. De inexcusabili peccatoris nequitia.
3. Orationes ad Venetos, & Philippum Vicecomitem Mediolani Ducem pro pace.
4. Sermones multos.
5. Epistolas eruditissimas, vt habet Petrus Sutor; obiit Senis anno 1443. ibidemque in Ecclesia Carthusianorum sepultus est, cum hoc Epitaphio (Pogio Florentino in eius funere orante.)

Sepulchrum omni laude dignissimū, ac Reuerendissimū Patris Nicolai, tit. S. Crucis in Hierusalem Presbyteri Cardinalis. Hic natus Bononiæ primum ex Priore Carthusiense (petente populo Bononiense) Episcopus, tum à Martino quinto Pontifice Cardinalis factus, post plurimas susceptas, atque omnium commedatione peractas legationes, Senis diem suum obiit, ætatis suæ anno 68. vir pijsimis mitissimusque, vitæ integritate, singularique virtute omnium testimonio cōprobat.

Carthusiæ me terra tegit, quæ sumplit alumnum,  
Me dedit esse Patrem: nativa Bononia tandem  
Me sibi Pastorem tenuit de iure vocatum:  
Cardinis Ecclesiæ compulsus pondera sumpsi:  
Et crucis in titulo mihi fulsit rubra Tiara;  
Mille quater centum denos quater egerat annos,



Tres etiam cyclus solaris, dum Nicolaus  
Mente petens cœlum sub saxo corpore claudor.

*Hæc ille, quisquis fuerit nominis sui occultator.*

**V**erum enim uero quemadmodum Ciaconius errauit in loco sepulturæ, ita & hic. Nam B. Nicolaus obiit quidem Senis; Florentiæ tamen sepultus est apud Carthusianos; ut ex Sigonio clarum est: qui sepulchralem Inscriptionem eandem describit. Quæ autem scripta hic enumerantur, operæ precium esset indagare, discutere, ac in lucem proferre. Hic labor Bononiensibus incumbet: qui decus Urbis suæ alacres & gaudentes exornare conabuntur. Spes sanè affulget, hæc scripta posse adhuc apud illos reperiri, aut in Episcopali domo, aut in Cellulis Carthusianis. Ad istam indagationem instituendam plurimum exstimulabit Viri huius authoritas, prudentiaque. Nam (ut mihi persuadeo) multum energiæ habebūt sermones isti, quibus Vir sanctus durissima Principum pectora emolliuit, & ad pacem ineundam inclinauit.

Ex Vizano siue Villano quodam, qui Italicè scripsit, cuius verba in Latinum sermonem translata sic habent.

**E**t his finitis, instabat annus 1443. quo (relictis in terra manifestis signis Beatitudinis) moritur in ciuitate Senensi Cardinalis Nicolaus Albergatus, Episcopus Bononiensis: qui ob suam bonitatem & sanctimoniam fuit deploratus ab vniuerso populo Bononiensi, qui eundem solenniſſimis exequijs honorauit &c.

Hæc il Vigiano.



SACRÆ IMAGINIS  
**DEIPARAE**  
 VIRGINIS,

*QVAE IN MONTE GVARDIAE BONONIAE  
 adiacente,*

IN S. LVCAE OPIFICIS  
 fui Templo asseruatur,

**HISTORIA:**  
 ASCANIO PERSIO,  
 AVCTORE.



COLONIAE AGRIPPINÆ  
 Apud IOANNEM KINCHIVM sub Monocerote.  
 ANNO M. D. C. XIX.



## BENEVOLO LECTORI.



nter testes pro sanctitate B. Nicolai Albergati addu-  
ctos agmen claudebat Ascanius Persius, cuius aliquot  
solummodo versus ex hac ipsius de Imagine Deiparæ  
Virginis historiâ ad B. nostrum Nicolaum spectantes,  
Bononiâ mihi missos hoc loco subiunxeram.

Cum autem postmodum sub prælo iam sudante  
hoc opusculo, totam ipsam historiam, bonâ fortunâ nactus fuisset, vidis-  
semq; eam succinctam & perelegantem esse, eaque de B. Nicolao nostro  
plura, quàm ego acceperem, contineri, Lectoribus rem non ingratam me  
facturum existimaui, si historiam illam, reiecto italico ac græco idio-  
mate (erat enim Italicè, græcè, ac latinè conscripta) integram darem;  
præsertim cum in Germaniâ typis nunquam vulgata fuerit, plenaque sit  
egregijs miraculis ad dictam Deiparæ imaginem patratis, quæ, præci-  
pue pjs eiusdem B. Virginis cultoribus, haud iniucunda sint futura.

Quâ in re præclare emulatus est Ascanius celeberrimos scriptores,  
qui B. Virginis laudes ac miracula ad posteros transmiserunt; inter  
quos Ioannes Trithemius collegit duos libros miraculorum de imagine  
B. V. Mariæ propè Dittelbach in Franconia.

Item alios tres libros de imagine B. V. in Hailbrun VVirtzburgen-  
sis diœcesis.

Iustus autem Lipsius ingenio & calamo erudito celebrauit imagines  
B. Virginis Hallensis, & montis acuti in Brabantia, cui ipsam suam pen-  
nam (operis sui instrumentum) obtulit, ac dedicauit.

Quid referam Horatium Tortellinum, qui B. V. Lauretanæ plus at-  
tulit ornamenti suâ elucubratione, quàm alij auro vel argento?

Sunt etiam qui B. Mariam Montis-serrati suis scriptionibus conde-  
corarunt.

Et sanè quid mirum, quod Christiani, Christi matrem, ac cælorum  
reginam laudibus prosequantur, ipsiusque gesta, honoremque quâ verbo,  
quâ scripto diuulgare ac propagare studeant, cum & ipsi Saraceni à fide  
Christi alieni, & Mahometis pseudoprophetæ præstigijs in crassissimos  
alioquin errores abducti, eam colant ac venerentur?

En igitur causas, ob quas hanc historiam integrè subnectere volu-  
erim: tu eâ optime, Lector, ad Dei Diuæque Virginis honorem fruiere  
ac vale.

Sacræ



SACRÆ IMAGINIS DEIPAR-  
RÆ VIRGINIS,  
QVÆ IN MONTE GVARDIAE ASSERVATVR  
HISTORIA.



Vo tempore Orientis Imperium Comnenus Manuel: Occidentale Fridericus cognomento Ahenobarbus obtinebat, vir quidam in Græcia fuit vitæ innocentia, ac religione cum primis venerandus: quippe qui, vt diuinum numen sanctius colere, vitamque ab omni noxiæ labe puram exigere posset, cum in sola, ac deserta secessisset loca; ibi diu austerè admodum, ac duriter vixerat. Hic aliquando Constantinopolim profectus, vbi ipsam inijt urbem, rectà in fanum Sanctæ Sophiæ tetendit; in quo veneratus Deum, lustrare inde templum oculis, quæque in eo digna visu cernebantur, contemplari cœpit. Ibi inter multas Tabula visebatur, in quâ Imago inerat Virginis Deiparæ, in vlnâ puerum gerentis, vmbilico tenus picta. Subtus autem huiuscemodi legebatur inscriptio:

TABVLA. HAEC. LVCAE. EVANGELISTAE. MANV. PICTA. IN. FANVM. EIVS. MONTI. GVARDIAE IN- AEDIFICATVM. FERENDA. IBIQ. SVpra. ALTARE. LOCATA. SANCTISSIME. COLEND A.

In hac ergò defixis oculis vir solitarius, mirâque Imaginis eius reuerentiâ, ac religione ipsius animum subeunte, commo- tus, eam pronus adorauit: dein litteras legit. Quæ vbi homi- nem mirâ incenderunt cupiditate cognoscendi, quis nam ille foret locus, in quem transferri Imaginem iubebant, eius fani Sacerdotes de eâ re continuo adit, à quibus ita responsum, se à parentibus accepisse eam Tabulam, summâ semper religione habitam, easque litteras ibi diutissimè fuisse, nec dum tamen, cum de Monte Guardia perquisitum sedulo foret, compertum esse quidquam. Tum ille ijs vltro pollicetur, si sibi Tabulam concedere velint, terrarum se vsque eo peragratum or- bem, donec ad eam ignoratum diem reperiatur locum, vbi ip-

Tabula I-  
maginis in  
ade Constan-  
tinopolita-  
na.

sam



nam deponat. Mirum sane, & vix dignum fide. Sed quid non facile credas euenire posse auctore Deo? Impetrat continuo hisce dictis homo ignotus, ignarusque loci Tabulam eam, ne notissimo quidem, gnaroque loci tam facile committendam. Et si, uti gnotus nec ne ille fuerit, haud nobis satis constat; sic contra, cognitum fuisse ijs, præclarâ vitæ sanctimoniâ; Græcum præsertim Græcis, longè verosimilius nonnulli putant. Ergo ferunda illi creditur Tabula, quam in perula, quæ ipsi sub ala pēdebat, reconditam, diligenterque prius obuolutam, consalutatis ijs lētus inde auehit. Non desunt, qui asserant, auctores, Eremitam non è lectis illis literis, at diuino quodam viso, incitatū, ut sumptam Tabulā aliò deferret, quorū princeps Carolus Sigonius. Is enim in eo, quod de Episcopis Bononiæ conscripserat, volumine, in Gerardo, hæc scripta reliquit:

*Postero anno (M C L X) insignis Tabula Bononiam est delata; in qua Imago Deiparæ Virginis, D. Luca, ut ferebatur, manu erat depicta. Hanc ut fama est, ex Templo S. Sophiae Constantinopolitano sumptam Eremita quidam post humeros detulit, cum diuino viso admonitus, Montem Guardia sedem illi Imagini destinatam, diligentius per regiones Italiae quæreret. Quem cum non longe ab urbe Bononia tribus abesse millibus accepisset, locum nactus, reposita Tabula diuturna peregrinationi, atque inquisitioni suæ finem imposuit.*

Ceterum, quando id, quibus nixus fundamentis, tradiderit Sigonius, nos later, ego ijs, quæ priora narrauimus, subscribā, cum de publicis Tabulis, quas inspexi egomet, optima fide sint descripta. Vt ad ea ipsa redeam, ubi Tabulam vir pius accepit, alias per diu, atque alias errabundus regiones obiit, locum, percontando, frustra inquirens. Tandem fessus quæritando, spe propemodum abiecta inueniendi loci, Romam petere decreuit, ut, si neque ibi, quo ex omni orbe concursus mortalium fieri solet, de Monte Guardia certi aliquid didicisset, Tabulam ibidem in æde Sancti Petri relinqueret; vel (quod magis ut credam, inclinatur animus) in Græciam remeans, unde illam acceperat, eò referret. Ad urbem ergo conuertit ille iter. Quo ubi peruenit, dum rectè ad SANCTI PETRI adoratum se confert, ipsum forte vir Bononiensis prætereuntem de fe-

nestra



nestra conspicatur. Nomen illi Pascipouero fuit, è nobili pro-  
 gnato genere Pascipouerorum, qui tum in Vrbe Senatoris  
 Romani munere fungebatur. Hic, vbi post humeros Eremitæ  
 non nihil de perula extantem videt Tabulam, miratus quid il-  
 lud foret, accersito ad se homine, rem ab eo percontatur. Ille o-  
 mnia enarrat ordine, quid gesserit, vnde, & quo ferat: ex quo Mō-  
 re Guardiae Diuiq; Lucę tēplū nominatim memorat, Senator,  
 vbi eū locū nominari audit, hæc fieri diuinitus, conijciens, i-  
 deoque sibi iniectam cælitus curam, quid ille ferret, obortis  
 gaudio lacrumis, Bono, inquit, latoq; animo es, Peregrine: nō  
 te enim ad me, vt video, tam nostra quam diuini vox spiritus  
 vocauit. Quem tu Guardiae Montem, quod in eo Monte San-  
 ctæ Lucæ fanum tantopere quæris, neutrum amplius (vtroque  
 nimirum iam nūc abs te inuento) quæres. In agro nostro Bo-  
 noniensi mons ille, illudq; fanum est, altero haud longius la-  
 pide ab vrbe distant. Hæc vbi vir sanctus accepit, cum indaga-  
 tum tandiu locum inuentum iam esse, quod ferè desperauerat,  
 ac propius adesse, quàm existimasset, intelligeret, summā  
 perfusus lætitiā fuit, ita dignū eius, quo Senatorē affecerat, gau-  
 dij fructum continuo cepit. Ergo detractā sibi ex humeris pe-  
 rā depromptam inde Imaginē ab inuolucris vindicat, ac Sena-  
 tori contemplandam offert. Quam ille non semel exoscula-  
 tus, atque intimis sensibus deueneratus, per liberaliter acceptū  
 Eremitam, quæ consecuta est, nocte apud se retinuit. Cumq; ei  
 nihil quidquam fieret longius, quam tanto Patriam munere  
 collocupletari, postridie eius diei iussu Eremitam, quem ei  
 parari mandauerat, equū conscendere, cū famulo, quem ipsi du-  
 cem viæ addidit, cumq; Imagine latum, atq; alacrem Bononi-  
 am mittit. literas ei ad magistratus dat, quibus ipse aduentus e-  
 ius causam docet: simul, vt tantum Thesaurum ab eo inue-  
 ſtum, quā decet, reuerentiā suscipiant, atque in præfinita à Di-  
 uino numine sede collocatum sanctè assēruent, & tanquā ma-  
 xime Dei Opt. Max. in eam ciuitatem beneuolentię monumē-  
 tum semper colant, adhortatur. vbi Eremita Bononiam venit  
 litteris Magistratibus statim redditis, ac perlectis, dicendi ipsi  
 potestas fit: tum ille, peregrinationem suam omnem, repetito

*Venit Bono-  
 niam per-  
 itor gratus*

T

aius



altius initio, cōmemorati inde detectam Imaginem in cōspe-  
ctum iis dat. Commoti mirum in modum eo spectaculo fuē-  
re cunctorum animi; queis vna sacrum quendam horrorem,  
mistamq; letitiā reuerentiam incussit: Vniuersamq; ex templo  
urbem eius rei peruasit rumor. Quippē omnium ordinum ci-  
ues pictam Tabulam, nō vt ab homine oblatam, sed tanquam  
de cœlo, cernentibus ipsis, delapsam, venerabundi, atq; exultā-  
tes excipiunt. Indictę mox tridui supplicationes, quas amplissi-  
mā pompā, religione summā obiēre, cēleste illud donum per  
urbem circumlatū festo cantu, ac psalmate cōcelebrātes. Ter-  
tio in vesperum inclinante die frequentissimus populus, per-  
petratis supplicationibus, Tabulam vsque ad montem Guar-  
dię prosequutus est. Quam in templo, quod in ipso montis ca-  
cumine Sancti Lucę titulo positum extat, supra Aram, vt scri-  
pto monebantur, ritē collocarunt; Eremitę, quem singulari  
humanitate publicē, & priuatim exceperant, si hic quod  
supererat vitę traducere vellet, vbi haud ipse minus, quā in  
Græcia, si ita videretur, solitudinem colere; atq; ipsam etiā ac-  
colere Imaginem posset, in eodem Monte domum, qualē optas-  
set sibi, in ædificaturos polliciti: At ille, cū iis egisset grates, re,  
quā sanctē suscepserat, perfectā familiārē suam Græcię secessum,  
fortassē eodem diuinitus vocatus, repetiuit. Ipsi curā Imaginis  
mulieri ciui, quę Angelica vocabatur, eundem hunc cum so-  
ciis mulieribus, religionis studio, incolenti locū permiserunt.

*Guardia*  
*Mons vnde*  
*vocetur.*

Mons ipse, qui ab Vrbe passuum millia, nonnullis auctoribus  
tria, re tamen vera haud plura duobus, in meridiem, occasum-  
que abest, inter primos Apennini Aquilonares situs, nec per  
inde obliquo tramite, nec longo admodum ascendentibus ad  
cacumen sit peruius: flumenque alicubi radices eius tantum  
non alluit Rhenus. Guardię nomen inde traxit, quod, cū quo-  
tidianis fere præliis Bononienses cum Mutinensibus conten-  
derēt de finibus; atq; hi, viribus impares, Parmēnsibus, Regiensibusq;  
ad societate belli adscitis, in agrū Bononiēsem excursio-  
nes facerēt, statuit Senatus, Populusq; Bononiensis, ne hostis  
imparatos, imprudētesq; adoriretur, in eo Mōte habendas ex-  
cubias; quas Itali *Guardias* appellamus; vt aduentus eius longe  
prospici



prospici, & maturè ciuitati ad ipsū propulsandū nūciariposset. Ex eo mōs acceptū nomē postea retinuit. Ita vt excubiæ ille cū stodiæq; vrbis imago ac typus fuisse videātur veræ illius custodiæ, quæ in eodē locata Mōte vrbē eandem à quocunq; hoste, quin & à quocūq; malo seruatura foret. Sicuti autem Mons ipse primus omnium circa montium, quod alij obseruarunt, à religiosis colicæpit, sic non multo ante allatam illuc Imaginē S. Lucæ fanum in summo ipsius iugo cōstructum liquet. Vt nō mirum sit, si, cum tot ante sæcula in hunc locum transferendā eam scriptæ, vt dictum, literæ præcepissent, è Constantinopolitanâ tamen S. Sophia Basilicâ tantò post diuino est ablata nutu; si quidem nec fuerat prius ad excipiendam parata sedes. Anno enim à Christo nato millesimo octogesimo septimo (vt rē supra repetam) Bononiensis puella, nomine Angela, in Montem hunc, ad sanctiorem vitam à Deo vocata, paternæ domus commodis, vrbisq; posthabitis voluptatum illecebris, clam parentibus commigrauit: quam ybi dies complures genitor eius anxie quæsisset, hic tandem in tugurio solam, quod sibi ipsamet excitarat, submissis genibus, manibusque in cælum sublati Deo supplicantem deprehendit. Multâque hanc prece, & lacrimis frustra in urbem è solitudine retrahere conatus, inuentam eiusdem fere ætatis, atque eodem incensam pietatis studio mulierem ex vrbe vicissim in solitudinem abducit, atque ipsi adiungit sociam, humilemque vtrique casam ad habitandum, & parvam ad Dei cultum ædiculam struit. Hinc Angelæ ipsi Eremitidis nomen vulgo factum. Cumque religionis earum fama indies percrebresceret, hac impulsu Canonici Regulares Sanctæ Mariæ Rhenanæ, quorū in are mons erat, vltro ipsū ijs, ac cæteris, quæ per successione eas excepturæ foret, elargiuntur. Inde Angela ad nouas extruendas ædes animū adiunxit, cū & aliæ postmodum ad conuictum eius se cōtulissent: in queis & Angelica, de qua supra iniecta mētio. Hęc, cū Angelā nō magis nomine, quā factis, & vitæ sanctimoniā imitata videretur, vbi illa naturæ cōcessit, à socijs demortuæ sublecta, curā earū suscepit. Quæ postquā grādiori tēplo, & ampliori cōtinentiū adiū extruccioni, quatenus

*Angela V.  
Bononiens.  
eremiticam  
vitam ducit  
in monte  
Guardia.*



scilicet haud satis ampla ferebat area, fundamenta iecisset, à Canonici Regularibus, quorum decessores locum Angelæ dono dederant, factum illud in controuersiam vocantibus, inhibita, summum Pontificem ipsamet adisse fertur, & ab eo, re narratâ, ius suum, hoc est, donationis eius (loco sibi, post peroratam vtriusque causam adiudicato) cōfirmationem impetrasse: nec multo post (anno scilicet millesimo cētesimo quinquagesimo, circave id tempus) cēptam ædificationem absoluisse. Fanum porro ipsum à principio S. Lucæ dicatum, eidem ad annum millesimum centesimum sexagesimum sacrū permansit. Quo quidem anno, perlatâ in id Imagine, & Angelicæ concredita, S. Marię montis Guardię tutelare nomen accepit, eiusque deinceps natalis in eo dies, qui Septembris octauus est (câ fortè de causâ, quod illuc pictam Tabulam per id tempus Eremita intulisset) celebratus fuit: & si hodieque Sancti Lucę Templum vocitatur, ibiq; dies illi sacer, qui Octobris duodeuigesimus, agi solet quotannis, non amplius Deiparę natalis, cum enim famulus Virginum Sacram ipsam ædem accolentium, fructus eius loci, custodiæ ipsius, & curę mandatos. Septembri iam mense maturos, à non nullis, qui eo per occasionem festi illius dici, atque eius celebritatis profecti erant, illos diripientibus, mordicus tueretur, in rixâ interemptus dicitur. Inde ad declinanda eiusmodi in posterum mala, vetus ipsi fanum & nomen, & sacrum restitutum fertur. Templi ergo huius erectio illatam Tabulam pauculis annis antecessit. Virginum autem ipsarum, quę in Mōte degebant (vt & hoc dicatur) aucto inde numero, nouum iis domicilium proximè urbem ad Fossam Circulam (quem nunc locum mœnia, prolato Bononię pomœrio, occupant) attributum. Inde rursus intra urbem, quoniam foris agere ob latrocinia, Barbarorumq; in Italiâ populationes haud tutò licebat, receptæ, ad ædem Sancti Matthiæ, positis sedibus, perpetuò mansêre. Vnde è corpore ipsarum in montanum cœnobiū pauculæ ad custodiã, cultumq; sacrę Imaginis mitti solitæ, exacto ibi biēnio, aliis in locum per vices succedentibus, relinquunt. Proinde Imago ipsa cū defertur in urbem (quibus de causis, quo id tempore fieri moris sit, postea innotescet) primo die in urbico earum tem-

plo des



plo deponitur: tribus enim sequentibus in æde sacrâ nos loco-  
mij S. Marię Mortis post matutinas ipsius circumuectiones cu-  
stoditur.

### SACRÆ IMAGINIS DESCRIPTIO.

**C**eterum à propòsita realienum haud erit, Sanctæ huius pi-  
cturæ Imaginis, quam nostris ipsi oculis accuratè cõtem-  
plati sumus, ita repræsentrare verbis, vt ferme legentium aspe-  
ctui subijci videatur; & si minimè nos latet, hac operâ mortali-  
um plerumque curiositati potiùs, quam religioni satisfactum  
iri, humani scilicet vitio ingenij, rerum studio, quantumuis  
grauium, ad vana propensius abutentis. Tabula igitur ipsa, in  
quâ picta Imago est, duùm in latitudinem palmorum, veterum  
scilicet Romanorum; ac digitorum ferè quinque; in longitu-  
dinem verò trium, digitorum circiter quatuor, protenditur.  
Hæc ita ætatem tulit, vt quantum quidem patet oculis, vix dũ  
senferit cariem, suæ ne vi naturæ, an peculiari potiùs eius, qui  
supra naturam omnem est, numine, incertum mihi, cui genus  
eius ligni ignoratur. Damna etiam (ab æuone, an ab homini-  
bus, an vtrinq; veriùs?) in colore pusilla sunt. Quippe id cre-  
dimus, quod credi procluius, tot ætatum crebrò aut piè deos-  
culantium, aut aliquid contrahendæ religionis ergò, admo-  
uentium appulsu, vnam, aut alteram, quam videmus, in pictu-  
ra, labeculam non aliunde factam. alioqui pigmenta ipsa (quæ  
aut ex ouo, aut ex glutino illita videntur) tot centuriis anno-  
rum, fermè vt recentia seruantur. Eâ in Tabulâ cum matre,  
non quidem ad pedes vsque expicta, sed vt initio dictum, ven-  
tre tenus, puer est Deus homo: quem illa in sinu ad sinistram  
fouet, caput & ipsa eodem leuiter inclinans. Facies non puel-  
læ, sed maioris natu mulieris, atque adeo senescentis, neque id  
temerè. Si quidem post Resurrectionem, atque in cœlum cõ-  
migrationem filij excepisse eam Lucas penicillo videtur, Ma-  
tre videlicet, haud incertâ amplius apud nostros diuinitate fi-  
lij nobilitari cœptâ, atque vt haud dubiè habitâ Deiparâ, ita e-  
riam visendâ maximè: & vbi visendæ ipsius nō esset copia, sub-  
eunte animum Imaginis saltem eius desiderio. At pone ab eo



pictam ante excessum Filij, cum scilicet discipulus huius ille foret (factum enim ante id tempus ratio nulla suadet) Certè nisi discipulus Iesu prius fuit Lucas, quàm se ille magistrum profiteretur, nec professus est ante vnum ac trigesimum ætatis suæ annum, quo primum Euangelij promulgationem ocepit, neque ille ergo ante id tempus Iesu Matrem effinxerit: tum autem esse eam non potuisse quadraginta quinque minorem annis, facillè tempora supputanti liquet. Falluntur igitur vulgo, dum natu minorem existimant ex eo, quia in manibus eius infans est Filius. id enim non tam ad historiæ fidem, quam ad iudicium pingentis, esse factum, licet conijcere, qui, vt ex amplexu nati agnosceretur Mater, in sinu longæuæ puerum collocauit Iesu, & si nec tum amplius puerum, nec fortassè in terris commorantem. Quem vero latet Pictorum in hoc genere licentia? Ita, quod inerat genuinæ venustatis in vultu adolescentulæ, id non solum sanctitate vitæ, hoc genus bona deterente, verum etiâ grauitate maturioris æui, quasi victû succubès (quod scitè expressisse videtur Pictor) quandam ei affert in sui victoriâ dignitatem, vt venerabiliorem efficiat. Collum antèrius candido à pingente obtectum velo, nulla sui parte nudum apparet. Manus quoque ac vestem quo minùs inspicere liceat argentea prohibet multis ab hinc annis imposita lamina, quâ, præter faciē Matris, ac faciem nati, quidquid in Tabula pictû inest, operitur. Eas olim qui vidēre, oblongas testantur esse, vt & flauum capillum, qui nunc sub lamina ipsa later. Facies à frōte summâ ad mentum imum nouem ferè digitos: latitudo eius vbi maxima, sex tantum patet. Colorem, habitumque oris, lineamenta que non aliis, quam Epiphaniij verbis à Nicephoro relatis, quibus ille formam expressit viuentis, explicare queam aptius, adeò hæc conueniunt: vt illum hæc habuisse ante oculos Tabulam, in describendâ, dixeris. *Maria (inquit) colore fuit triticum referente: capillo flauo, oculis acribus, subflauas, & tanquam olea colore pupillas in eis habens. Supercilia ei erant inflexa, ac decenter nigra. Nasus longior: Labia florida: Facies nō rotunda, aut acuta, sed aliquāto longior. Manus simul, ac digit i longiores.* Hæc quidē ad vnguē, expressa ōnia picta nobis Tabula exhibet. Nasus porro ipse non so-

Epiph.  
 Niceph. l. 2  
 cap. 23.



non solū longus, verū etiā nō nihil ad aquilinū accedēs. Frons quoq; magnitudine in partē neutrā peccante, sed modicē ampla, ac decens. Oculi non demissi, nec semiclausi, quales in huiusmodi iconum plerisque cernimus: sed satis patentes, ac rectā obtuentes. Pictores Imaginem hanc plures scimus imitari conatos: Vnus tamen (quod sciam ipse) omnium optimē eā assequutus pictura videtur, Ludouicus Carracius, Augustini, Annibalisque Carraciorum patruelis, quos tria eius artis clarissima lumina haud falso voces. Pueruli faciem, quia iconi cam non putamus, ideo nec describere operæ precium ducimus. Litteræ à nobis initio commemoratæ, propter argenteam illam, cuius paulō antē meminimus, laminam nullā videntur: nec quā lingua exaratæ, nobis liquet. Sed cū diuinitus aut scriptas, aut scribenti vel dictatas, vel inspiratas liceat credere, id ipsum de iis suspicari aliquos subit, quod de Apostolorum loquelā in eorum actis idem Lucas scriptū reliquit; nimirum illos, statim atq; afflati fuissent Spiritu Sancto, ita locutos, vt ab omnibus, quantumuis linguā diuersis intelligerētur. Haud secus enim hi fortassē characteres Hebraicē primū Hebræis, dum Tabula in Palestina fuit (si modo longæuos adeo putemus) idem postea Græcis Græcē, dum eam Græcia habuit, nunc Latinis Latinē & leguntur, & intelliguntur, Scriptum tamē reperio, partē quidē litterarum, eā scilicet, quæ artificis nomē indicaret, in Tabula ipsa, at quæ locū Tabulæ destinatum, subtus, aut certē prope eā in pariete, vnde ablata, & Eremitę tradita est, inscriptā fuisse. Illud ergo cōstat inter omnes, Imaginē hāc, Sancti Lucæ esse opus, vt & ipsum vnā Medicū, Pictoremque extitisse, germanosque vultus Christi Iesu, & Beātissimæ Matris eius, Petri item, Pauliq; Apostolorum accuratē pictura retulisse. Nicephorus<sup>b</sup> porro à Pulcheriā Augustā in templo τῶν ὁδῶν, id est viæ ducum, ab eādē Cōstantinopoli erecto, Antiochiā missam Deiparæ Imaginem dedicatam fuisse est auctor, quam Lucas Euāgelista suā ipse manu depinxisset, illā adhuc viuente: quæ & Tabulam ipsam vidisset, gratiamque illi (vt verbis eius vtar) formæ suæ immisisset. An autem nostra hæc illa sit, cuius meminit Nicephorus;

an alia

<sup>a</sup> Id testatur Nicephorus lib. 2. cap. 45.  
<sup>b</sup> Niceph. l. 14. cap. 4. Item lib. 25 cap. 14.



an alia quidem, manu tamen eâdem (nam plures fecisse dicitur Lucas) hîc non disputo. Rem integram aliis relinquo.

Imago quidem ipsa in penetralibus Templi, edito parietis posita loco; ita, vt Arc̃ eius principi, à quâ paries ipse perâgustâ intercapedine seiungitur, impendat, scalis vtrunque lapideis aditur: Ligneoque pereleganti, atque egregiè picto armario, siue, vt vocant, Tabernaculo, conclusa, reliquiis eam ambientibus Sanctorum compluribus, varioq; ornatu decorata, religione maximâ custoditur, haud minore ostenditur, pluriû tutelæ clauium commendata.

*Mos deportandi Imaginem.*

Ad Urbem quotannis ob solennes trium dierum supplicationes, quas Rogationes appellamus, deportatur. Ibiq; Cleri ceterorumque ferè Ciuitatis Sacrorum ordinum, Deutorum item (videlicet laicorum sodalium, qui in supplicationibus sub propriis instructi vexillis ingrediuntur) longis agminibus, nec non Artium, quæ in vrbe exercentur, collegiis spectabili pompâ præeuntibus, Magistratibus subsequenter, reliqua comitante Ciuitate, per tres eos dies matutinis horis ad certa delubra ferri solet. Exportatur prætereâ, atque in urbem deferitur, noxiâ impensè frugibus, humanis ve corporibus cœli intemperie, grandi ve alio præsentē, aut imminente malo sanctiores populo comprecationes indicente.

*1 Anno Domini 1528.  
Ita Surius in commentario.*

Quamplurimis ac prope innumeris miraculis fulget. Ea quippe votiuis oppleti parietes tabellis, cereisq; & argenteis, atque aureis etiam donarijs affatim indicant: quæ vix illi capiunt, & si tam multæ desiderantur tabellæ (vt cetera taceam Anathemata) quæ in transitu<sup>a</sup> Borboniano, vastante omnia eius exercitu à Germanis iconomachis refixæ, atque igni absûptæ magna Templum ex parte denudarunt. Qua iactura priorum ferè omnium eius Imaginis miraculorum intermortua memoria est.

Summę eius Templi religioni satis illud argumēto sit, quod in solo situm loco, nec vrbi propinquo admodum, quo etiam cliuosa cōtenditur via, vt memoratū, nihilo tamen ferè seciûs, quam si in media sit vrbe, adorantium in eo quotidie, ac sacrificantium, aut aliquid piè agentium (qui vndique confluunt)

concur-



concurſu frequentatur. A ſummis verò pontificibus, aliisq̃  
Eccleſiæ Præſidibus vnicuique cum locum piè inuiſenti libe-  
rales peccatorum indulgentiæ conſeſſæ fuerunt.

Summa huic alioqui diligentia Fratres Dominicani, quoti-  
die in eo ſacra celebrantes inſerviunt, quorum ipſe ſub cura S.  
Matthiæ Virgines: quippe & ipſa habitu, ac diſciplina Domi-  
nicana. Eſſi enim Angela illa, quæ (vt dictum) præ ſolitudi-  
ne Montis urbem contempſit, atq; hanc Virginum ſodalita-  
tem inſtituit, Eremitico, qualem ipſa geſtabat, habitu induit ſu-  
as: is tamen cum habitu deinde Canonicoꝝ Regularium:  
hic tandem cum Dominicano, quo hodieq̃ vtuntur, anno  
ſcilicet ſalutis milleſimo ducenteſimo octogefimo commu-  
tatus fuit.

## S A N C T Æ I M A G I N I S.

## M I R A C V L A.

**E**Narranda iam nobis glorioſiſſimæ huius Imaginis Mira-  
cula ſuperſunt. Cùm autem, quocunq̃ licuerit, collige-  
re, aut eorum etiam pleraque explicare longum nimium ſit,  
pauca ſat fuerit perſcribere, quot ſcilicet ſatis fore lecturis ad  
verũ de hac Imagĩne ſenſum aut induendũ eorũ animis, aut  
conſirmandum videantur. Neque verò quidquam, aut ex va-  
nò hauſtum aut leui nixum teſtimonio, ſed certiſſima omnia,  
ac ritè conſeſſata, & ea quidem quam breuiſſimè referemus.  
Quoniam autem miracula hæc ad duo fermè capita redigun-  
tur: quædam enim ſunt quæ Imago ipſa (id eſt, in Imagine, Deus  
Opt. Max. miraculorum ſolus reapſe opifex) ſuæ potiſſimum  
tuendæ dignationis: alia verò, quæ ferendâ laborantibus ope,  
ac mortalibus quauis aliâ iuuandis ratione perpetravit: nos à  
priori capite exordientes, principiò illud, quod huc ſpectet, ad-  
monemus, ſcriptis ſcilicet in tabulâ, aut iuxta eã, litteris, quas  
in initio protulimus, duo præcipi; Alterũ, vt Tabula ipſa in Mon-  
te Guardia ferretur; Alterum, vt foret ibi ſanctiſſimè colenda.  
Cum ergo extra hunc Montem fruſtra illi ſedem quæri: & in  
qua ſit, haberi, adiriq̃ non niſi piè, ſanctèq̃ licere miracul s

*Duplicis  
generis mi-  
racula.*



Primi ge-  
neris mira-  
culum I.  
de Raptori-  
bus.

compluribus declaratum extet, nos hic ex ijs pauca omnium prima enarrabimus.

Cū enim Imago ipsa Miraculis inclarescere cœpisset, eaque propter ad se plurimos non indigenas modò, verum & è proximis exteros, longinquisque regionibus exciuisset, certatim votiuā propter latam sibi præsentem opem, aut quouis nomine alio comportantes dona, impulit mercatores quosdam maiorum materies ingentium Auaritia de imagine hac turpis innire consilia lucris: quæ, vt nullum auctoribus speratum quæstum, sed grandem potius infamiam: sic contra summam imagini ipsi peperere gloriam. Surripere hanc illi, & Venetias aduectam Reipublicæ Venetæ magnis commutandam præmijs tradere constituunt: Quasi vero quæ tantum fuerat maris, ac terrarum emensa, vt sedē sibi hic in longinquo figeret, in eandem redire abrepta è proximo neglectura foret. Conscendunt igitur Montem, & sanum ingressi, tanquam voti rei, totum ibi diem per speciem supplicantium traducunt, &, quasi pijs ipsorum comprecationibus dies non suppetere, rogant, vt sibi illic pernoctare detur. A Sacris virginibus, quæ tum ibi degebāt, facilē eos, vt ceteros item homines, è suo ipsarum animo, atq; ingenio fingentibus, haud ægrè impetrant. Ergo vbi illæ cubitum iuerunt, nocte intempestā inuadunt hi in armarium, in quo tabula recondebatur. Sublatâq; inde Imagine verâ subditiā Beatę Virginis effigiem, quam ipsi attulerant, subiiciūt, Venetiasq; petunt. Persensere cum primâ luce id Virgines facinus. Igitur mœrentes, inopesq; consilij ad preces, indicto sibi tridui ieiunio, confugiunt, diuinum numē nō sine gemitu, ac magnâ lacrumarum vi obsecrantes, vt thesaurum ipsis restitui suum velit. Mercatores ipsi tertiâ à discessu nocte, cum proxime Venetiis abessent, inusitato odore in, quo vebantur, nauigio afflati, vnde nam ille fragret, admirantes exquirunt. Loculos tandem surreptæ Imaginis adeūt, si fortē inde manet, eosque incredibilē fūdētes suauissimi, caelestisq; odoris vim, ac vacantes, relicto ibi tātū Imaginis, quę desiderabatur, inuolucro, deprehēdūt. Stupor inde, atq; animi consternatio consequuta diu mutos, & elingues eos habuit. Cōiectura deinde rem

asse-



assequuti, repetuisse scilicet prodiosè locum suum Imaginē, vno omnes accusantes ore, atque execrantes quod item vno omnes animo designārant, facti penitentiā corripuntur. Et quos infamia sacrilegij fugare lōgius debuerat, eos magnitudo miraculi, pollicita flagitij impunitatem, reuocat ad Guardie Montem. Ibi Virginibus rem enarrant; eas orant, ignoscant sibi peccatum: supplicesq; & procumbentes humi, veniam, ac pacem à læso numine exposcunt. Ille verò eodem die, nondum conscia miraculi, metum tamen, mæroremque in spem, lætitiāq; conuerterant, mox in armarium conscenderant, & remigraſſe veram Imaginem, subditiuā inde exturbatā (quæ hodieq; de templi pariete in propatulo suspensa, monumentum eius facinoris conspicitur) summā cum animi voluptate comperant.

Hæc eadem quanta haberi, atque inuisi religione velit, nec semel nec adeo obscuris declarauit exemplis.

Anno enim Christi Dei millesimo quingentesimo decimo quinto Frater quidam Dominicanus (cuius sibi haud ignoti, nomen consulto Leander Albertus, qui hæc scripsit, silentio premit) cum à Sacris custodibus foret præmonitus, quanta hæc asservari veneratione, atque adiri soleret, vt pote & miraculis, & opifice ipso Sancto Luca nobilis, ipse contra, eleuando rem, ac subridendo, se non multum tam multis, tam miris, quæ de eā prædicabantur, habere fidei ostendere. Clauibusque allatis cum eam curiositate potius, quàm religione ductus, inspicere properaret: vix dum ijs seræ insertis, pauore quodam, ac tremore correptus, offusa oculis caligine, vsurā se eorū omnē amisisse, meritasq; dare pœnas existimauit, quod rem sanctissimam haudquaquā, vti par erat, sanctè adijſſe, ac magni fecisse visus foret. Ergo statim resipiscens, cuius se affinem agnouit culpæ, eam vltro accusando, vt condonaretur sibi, ademptum que lumen restitueretur, effusis largiter lacrumis impetrauit. Vniusq; tātum horæ interuallo cæcus fuit. Et vt primum optatissima frui luce datum, quā maxima potuit religione Imaginē cōtemplatus, atque actis Deo gratijs, ad Virgines cōuersus, multas quidē se vidisse Imagines Gloriosissimæ Dei parētis mi-

2. Miraculum de Irriſore.



raculis illustres, nullā cum hac tamen oris maiestate conferēdam affirmavit.

2. Miraculū  
de ficto sa-  
cerdote.

Anno autem eiusdem seculi trigesimo quinto vir quidam ingressus templum id, sibi clauim orat armarij huiusce Imaginis, vt eam, quam se religiosissimē venerari profitebatur, inspicere posset. Cui responsum neque fas, neque morem esse à profanis hominibus Sacrum eius Imaginis Tabernaculum adaperiri: At ille continuò se esse Sacerdotem assimulat. neq; verò eum falsi aut vultus, aut ornatus corporis coarguebat. Igitur instando euicit, vt sibi afferretur clauis. Quam dum serā admouet, subitā percussus vi, atque obstupescit humi pronus concidit. Vnde agrē alleuatus, vbi dolum euentus prodidit, grauitè eius temeritate, atque audaciā offensis ijs, qui forte aderant, vehementer confusus animo cum comite, quicum vna venerat, re infectā protinus abscessit.

4. Miraculū  
de meretri-  
cibus

Anno eiusdem seculi octogesimo octauo duæ mulieres, quæstum corpore Bononiæ facientes, quarum altera inter sui ordinis primarias, collectā sibi multorum gratia, opibusque florebat, templo adito conueniunt custodes, Imaginemque, vtr sibi commonstrent, exorant. Aeditua ipsa ad patefaciendam eam profecta, clauiq; serā indita, diu frustra lustrata est, vt eius vertigine pessulū propelleret. Ad extremū socias aduocat, si id illæ perficere possint. Quod cū neq; iis succederet, meretrices, frustrato euentu, inde decedunt. His digressis, cū virgines de re inusitatā, ac noua conquiescere non possent, armarium repetunt, atque id ipsum denuo pertentant. Statim id infixā clauui resignatur. Inde exorta suspicio, mulierum illarum culpā cōtumacē serā fuisse. quæ fortē impudicitiae labe coinquinatæ, huiusce intuitu Imaginis indignæ forent. Paucis post hæc diebus elapsis ad templū reuertitur nobilis illa meretrix, atque appellatis Virginibus, quæ sua illuc vsq; fuisset vitæ conditio, ingenue fateretur. hinc, ne mirentur, ait, si inanem operam, dum sibi ostendere Imaginem contenderent, diebus superioribus sumpsissem. Grauari enim purissimæ Virginis simulachrum se se impuræ foeminæ conspiciendum offerre. Ex eo itaque conscientiae stimulis haud secus atque cestro percitam, cū tot ad-

missa



missa ab se flagitia, toties diuinum offensum numen dies, noctesq; versaret animo, decreuisse, ad id sibi æternâ pace cõciliandum, humanis se rebus abdicantem, turpissima lustra, ganeumque cum honestissimis Conuersarum mulierum claustris cõmutare; vt paulò post factum. Maximas igitur se gratias agere Virgini Delparæ, quod maximum ipsi, negato suæ Imaginis adspectu, beneficium dedisset, ex eâ re scilicet ad frugem correctæ.

Dux item alię mulieres haud longo interiecto tempore huc conscenderunt, totumque ferè, cum sacris Virginibus colloquētes, traduxere diem, ab iis acceptæ perhumaniter, cum se patricias facerent: & quidem tales eas esse, rerum ignaris liberalis earum forma, & magnifica vestis auro distincta, gemmisq; facillè persuaderet. Cumque præcipitans ad occasum iam dies maturandum discessum moneret, rogant illæ Virgines, vt vnum, alterumve elargiantur sibi ex ijs, qui Sacram Imaginem exornabant, flosculis. Se enim religionis ergo eos domũ ferre, & habere velle dicunt. Non est negatum. At dum vna è virginibus flosculum è Sacra reuellit Tabula, mutato confestim cœli statu, quod sudum, vt cum maximè fuerat, clarissimus dies repentino nubium concursu tenebricosissimarum in noctem vertit caliginosissimam: additoque crebro, & perpetuo ferè tonitru, ac fulgure postremum fere mortalibus rebus impendere exitium; templum quoque ipsum valido non semel succussu agitatum præsentem comminari ruinam videbatur. Ex quo Virgines enarrati superius exempli recenti ad huc memoria, ratæ, quod res erat, impudicas eas, & quæstuaras esse feminas, quas tantopere Imago ipsa auersatur: veritæ etiam ne flosculis illis ad profana, quin & ad veneficia vti vellent, quod facere improbis quibusdam mulierculis nulla est religio, nimirum vt sacris, ac Deo dicatis rebus eo modo abutantur, subirata eas inde emiserrunt. Emisissis, pristinam in faciem omnia redierunt. Porro, quo magis mira hæc censeas, tantum procelle non nisi iis, quæ intra fanum erant, coortum traditur. Non solum enim rustici accollæ negarunt eodie se vel nubeculam in cœlo vidisse, sed & contubernales virgines, quæ à templo abe-

*s. Miraculũ  
simile.*



rant, domi seruantes, liquido serenum sibi eodem die illuxisse perpetuo coelum asseuerabant.

Annumeretur & superioribus miraculum, quod sequitur, ut & ipsum (ni fallor) ad hoc idem caput referendum.

6. Miraculū  
de v. surpa-  
toribus te-  
merarijs.

Anno Christi millesimo quingentesimo seprimo cum Bononiensis Reip. moderatores huiusce possessionem, ac procurationem Imaginis ad se vnos pertinere censuissent, ea fortasse de causâ, quod ab initio Pascipouerus eam non nisi ciuitatis Rectoribus scriptis litteris commendasset: atque vnam armarij, in qua illa asseruatur, clauim ipsi, alteram custodes eius in Monte Virgines, tertiam Deuoti Hospitalis Sâctę Marię Mortis, haberent, primum omnium obserandi, ac referandi eius potestatem ad se omnem traducere decreuerunt. Missis eo igitur, qui nouas ob id seras armario Imaginis infingerent, cum Virgines ipsę quiritantes, eaq; se indignas esse iniuriâ clamitantes, nihil quidquam proficerent, ad inuocandam sibi nunquam frustra vocatam Sanctę Imaginis opem sine morâ conuertuntur: eamq; obsecrant, ut sua ipsarum, atque adeo sua ipsius tueri iura velit. mira q. confestim eorum, qui missi illuc à magistratibus fuerant, pterrefactio consecuta. Qui cum etiam, neque illi manus admouere, neque propius ad locum accedere vnquam potuissent, sed, ut prorsum ire connitebantur, ita pedem referre, tanquā ab aliquo Imaginē ipsā, ac Virgines propugnāte repulsi, cogerentur, irritō incepto in vrbē remeandū cogitarūt. A quibus de represso prodigiosē ipsorū conatu edocti proceres, consiliū nouandi quidquā protinus abiecerunt, cū iā periculo satis didicissent, ei tabulę, ut nullus illo carior in terris est locus, sic Virginū custodiā, ac ministerio decentius esse nihil.

Hactenus prioris generis miracula, quę ad stabiliendam sibi maiestatem, ac fidem imago ipsa designauit. Pauca nunc de innumeris, quę ad genus attinent posterius, subnectamus. Innumeris enim ferē editis signis Imago hæc, quā priuatim quā plurimis, quā reipublicę consuluit, profuitque, ita ut alia eius in homines beneficia vocari publica possint, alia priuata. publica quidem (vnde initium dicendi faciemus) ut coeli tempestatum mutationes ad nimiam, hoc est, ad perniciosam frugibus, ac satis auocandam pluuiam, cohibendamvè siccitatem:

hostilis



hostilis item ab vrbe impetus; ad hæc grassantium in populo morborū, aliorūq; huiusmodi propulsatio malorū. Primā autē in hoc genere virtutē ab ipsā editā, Sigonij verbis referemus.

Is ergo de Bononiensibus Episcopis libro quarto in Fr. Nicolao Alberгато: Qui quidem (licet id obiter dixisse) apprimē insignem inter Episcopos eius vrbe, atque adeo inter. S. R. Ecclesiæ Cardinales promeruit locum, ea viri sanctimonia, & eruditio, atque in conficiendis negotijs sollertia extitisse fertur, vt Christianæ etiam Reipub. maximis suis in rebus fuerit perspecta; sicuti in hoc de Bononiensibus Episcopis libro, ac multo plenius in eius vita seorsim ab eodem Sigonio conscripta fusiū edocemur, quam Fabius Albergatus, tanto viro, vt genere proximus, sic & virtute simillimus, nondum editam feruat. Sigonius igitur in Nicolao: *Postero* (inquit) anno (millesimo quadringentesimo trigesimo tertio) prodigia celestia plura diuinæ minas, vt vulgorebantur homines, ostentātia variē ciuitatis pectora perculerunt. Hi fuere mense Maio sensissimū terramotus, quorum impetu plurima adificia corruerunt. Iunio vero Sol adeo post meridiem obscuratus, vt ipsas noctis tenebras adæquaret. Præterea assidua, & vehementes pluuie, ac fædæ adeo omnis generis tempestates, vt non solum instanti mēsi impedimentum afferrent, sed ipsis etiam segetibus iam maturis exitium intentarent. Quā de re cum Episcopus vehementer animo angeretur, consensu Antianorum triduo supplicationes fieri iussit; quibus cum nihil profecisset, quinque alias addidit: Quas ubi irritas item, atq; inanes agnouit, deinde in alios octo dies indixit. Interim sermo inter Antianos remedia imminenti inopia anxie conquirentes, obortus est, consueuisse in eiusmodi periculorum articulis Florentinos tabulam quandam, in qua imago ex ore Beatæ Virginis manu Sancti Luca esset expressa, proferre, ac sæpe opportunū subsidium retulisse. Tū interfatus ex ijs vnus, Et nos idem, inquit, facile facere possumus, si quidem alteram eius similem ab antiquo tempore in Monte Guardia retinemus. (Hunc, cuius nomen suppressit Sigonius, Gratiolū Gratiolium, spectatæ pietatis, ac sapientiæ virū fuisse legimus) Cui cum ceteri assensissent, re cum Episcopo communicatā, ex communi cōsilio cōstitutū est, vt hæc ad urbē omni adhibitā religione deportaretur: atq; eius rei officiū Deuotis Hospitalis Sactæ Mariæ Mortis nō recusantibus est mandatum. Ita Deuoti iij idus Iulias (pro, idus, legen-

Secundi generis vtraculum.  
1. a duersus tempestates.

Nota Bene.  
de B Nico-  
lao Alber-  
gato

dura



dum puto, Nonas) summo mane in collem se receperunt, atq; eam sub  
 umbellâ cum cereis accēsis longo instructi agmine detulerunt. Antia-  
 ni verò, ceteriq; Magistratus unâ cum clero atque omnibus religio-  
 sorum ordinibus ad portam Saragotia occurrerunt; atque apud Virgi-  
 nes Sancti Matthia collocauerunt. Inde per octo dies in pompâ ingē-  
 ti honore gesserunt. Quare perfectâ, cum statim optata serenitatis, ac  
 tranquillitatis luccm impetrauissent, Deuoti tabulam ad Montem eo-  
 dem ordine reuexerunt. Ita, messe, ac trituratione latè confectâ, cum  
 ciuitas se ex ingenti periculo euasisse cœlesti eiusmodi beneficio iudica-  
 ret, Marcus Episcopus Auenionensis, atque urbis gubernator decretum  
 iij Kal. Septembris fecit, ut post hac Deuoti Sanctæ Mariæ Mortis de-  
 ferendæ, & referendæ tabula potestatem haberent, eamq; dum in vr-  
 be esset, apud se custodirent: & ut tabula relata armario includeretur,  
 ac tribus clauibus mandaretur, quarum unam Amiani, alteram Virgi-  
 nes Sancti Matthia, tertiam Deuoti ipsi Sanctæ Mariæ tenerent. Et  
 quoniâ iij. Nonas Iulias initium huius deportationis feliciter fuerat fa-  
 ctum, uti quotannis primâ Dominica Iulij ea tabula eodem honore, at-  
 que eâdem religione deueheretur: ac proximo anno ad basilicâ Sancti  
 Petri solēniter portaretur: atq; ibi Missarū solēniâ præsente populo fie-  
 rent; reliquis inde ad reliquas Ecclesias ordine seruato iretur: ac po-  
 stridie ad Montem tabula referretur, atque ibi ad honorem Dei, &  
 salutem populi Bononiensis conseruaretur. Quod nunc etiam obserua-  
 tur. Hæc Sigonius. Ne vero fortè aliquis de postremis eius  
 verbis erret, ut quæ de Imagine decreta ille scribit, quemad-  
 modum constituta ab initio fuissent, ita prorsus obseruari om-  
 nia putet, sciendum, multò ante Sigonij ipsius ætatem institutu-  
 tum, ut non amplius prima Iulij Dominicâ, sicuti fiebat prius,  
 sed eâ, quæ Festum diem Christi in cœlum ascensus præcedit,  
 Sacra hæc Tabula deportaretur in urbem: ac tribus eam con-  
 sequentibus diebus, in quæ anniuersariæ Rogationes, iam-  
 pridem introductæ ab Ecclesia fiunt, solenni urbem lustraret  
 pompa. Quod huc vsque perpetuò seruatum est: & nunc etiâ  
 seruatur, uti diximus superius. Illud verò parum caute à Sigo-  
 nio scriptum est, nimirum, *Ac postridie ad Montem Tabula refer-*  
*retur:* perinde enim est, ac si vnus tantum dici, videlicet primæ  
 Iulij Dominicæ, Auenionensis Episcopi decreto, quotannis  
 retinen-



retinendæ in vrbe Imagini, spatium statui dicatur: cum tamen  
 re verâ Dominico quidem die deuehendâ, tribus autem sequen-  
 tibus solēniter per urbem gerendam esse, decretum ab illo fue-  
 rit: vt & Leander Albertus, vir in minutijs quibusdam enarran-  
 dis admodum accuratus, testatur. Apud quem etiam scriptum  
 extat, eo anno, nimirum millesimo quadringentesimo trigesi-  
 mo tertio, non quidem octo, vt ait Sigonius; sed tres tantum  
 (quod verisimilius) publicè circumuectam Tabulam fuisse; pri-  
 moque statim die ad ingressum eius in urbem dissenauisse,  
 vento derepentè exorto dispulsis nubibus: populumque ( ad  
 quattuordecim millia illuc hominum conuenisse prodit) sum-  
 mo clamore (cum vberibus lacrimis ex ingenti erumpenti-  
 bus lætitiâ) permisso, Dei Misericordiam, Virginisq; Deipa-  
 ræ efficacem adeo apud Filium deprecationem concelebrasse.  
 Sed & Sigonij verbis addere, pretium operæ videtur, postero  
 anno, nouo decreto sancitum à magistratu, vt Tabulam de  
 Monte ad urbem, indeque rursus ad Montem prosequerentur  
 quidem, quos memorauimus, Deuoti, at suis humeris soli eā  
 gererēt Clerici Apostolici (quos Iesuatos vulgo dicunt) queis  
 ad S. Eustachij extra portam S. Mamæ domicilium est. Nec alijs  
 ab eo tempore ad hanc vsque diem ferunt: nisi cum Tabula i-  
 psa per urbem in pompâ circumfertur. tum enim intra sacras  
 quidem ædes duobus diebus primo scilicet, ac secundo, Cano-  
 nici hanc Ecclesiæ Metropolitanæ, tertio verò die Insignis Col-  
 legiatæ Ecclesiæ S. Petronij Canonici suis portant humeris: ex-  
 tra autem eas eodem modo inter se partientes vtriusque Ec-  
 clesiæ Sacerdotes Assidui, quos Mansionarios appellamus. At  
 contrectare hanc, dum è propriâ emota sede, abest, in altaribus  
 deponere, inde amouere, vnus ferè ius est Iesuatis, præterea ne-  
 mini: vt non alijs ornandæ eius, atque amiciendæ, quàm San-  
 cti Matthiæ Virginibus.

Porro cum eodem anno Mcccxxxiii. serenitate, vt dictū,  
 impetratâ, ad autumnum vsque per tres menses perpetuos ste-  
 rili prorsus imbrium celo, Sol ita excoxisset agros, vt, summâ  
 obducta duritie, nullo subigi instrumento ad cultum possent,  
 imperandas demum in triduum supplicationes ad eliciendam

1. Miracu-  
 lum aduer-  
 sus aëris  
 siccitatem.



pluuiam, eamq; obrē adhāc refugiendū Imaginem ciuitatis moderatores decreuerunt; Eiusdem prope gnari benignitatis esse, redundantes humore terras, opportunē, ac quantum satis sit, arefacere: & nimium arefactas, siccitateq; hiantes saluari imbre perfundere. Eā igitur ad urbem deportatā, perq; eam solenni religione, ac pompā perlata, in collēque relatā, temperata quēdā cōtinuō pluuiā occēpisse fertur, quā ita per triduū madefacta tellus, nihil vt optari aut fingi opportuni<sup>9</sup> potuisset.

3. miraculū  
aduersus  
pluuias.

Anno autem millesimo quingentesimo octogesimo nono (quod nostris ipsimet hausimus oculis) cū ab ante diem iij. Kal. Maij, quo cōpēre, ad xij. vsque Kal. Iulij nunquam pānē intermittētib; pluuijs obruta fere essent omnia, & messis impendentis p̄cisa spes videretur, arcessita hāc eadem in urbem Imago fuit. Cuius vix reſerato ad ipsam proferendā Tabernaculo, veluti recluso carcere Aquilonib; nubes citatissimē diffugiētes, cālū, ac Solē mortalib; optatissimū ostēderūt.

4. miraculū  
aduersus  
hostes.

Tradunt item, aliquando cum obsideretur, oppugnareturque vrbs, hominesque pij vtriusque sexūs religiossimē pro patriā incolumitate vota huic Imagini nuncupassent, visam à compluribus Dei genitricem inter Sāctos Petronium, Dominicūque Patronos eius vrbs stantem pro mōenibus, atque hostium aciem aspectu suo perterrefaciētē: ex quo eos referre pedem, ac sol. tā obsidione inde statim abscedere subegerit.

Ingruentes etiam in ciuitatem morbos quoties hāc ipsa depulerit, auerruncaritq; vt longum fuerit referre, sic vnum saltē eius rei pro multis exēplū nō ab re erit ē veterē annalium memoriā protulisse. A publicis deinde ad priuata descēdemus.

5. miraculū  
aduersus  
hostes.

Sigonius in Fr. Nicolao Albergato: anno (inquit) millesimo quadringentesimo trigesimo octauo, cū m. t. a. pestilentia lues urbem incolis exhauriens, ingentem curam omnibus inieciſset, placuit, ad Diuinum propitiandum numen, vt ciuitas triduo oratum ad tria templa procederet: atque iterum Imago Deipara Virginis, cuius salutarem deportationem experti pridē in auertendā pluuiā infestissima fuerant, deferretur. Atque ita, re ex constituto ordine administratā, Ciuitas voti compos facta, vberimum alterum pietatis suae fructum accepit. Hāc ille.

Nunc



Nunc publicis priuata succedant, quorum initium vnde melius, quam ab ipsis, ut Graeci dicunt, laribus sumatur?

Anno igitur millesimo quingentesimo vigesimo septimo; cum Carolus Borbonius, Caroli Imperatoris eius nominis Quinti copiarum in Italia ductor, infesto Romam exercitu petens, ad agrum Bononiensem, qua transiturus erat, aduenteret: militesque eius, quocunque inferrent gressum, populabundi nullius non insolentiae, aut immanitatis vestigia imprimerent (quippe exercitus is magnam partem ex hominibus à Catholica pietate auersis, nempe è Lutheranis, erat conflatus) occurrendum haud cunctanter ingruenti malo decreuit Senatus Bononiensis, uti scilicet, conditione aliquà proposità, pacatum per suum agrum à Borbonio transitum redimeret. Sacram interea Imaginem è monte in urbem transuehendā, intactamque à Lutheranorum, quos facile eò euasuros suspicabatur, impietate, sacris priuatim Imaginibus infensissimorum, seruandam curauit: Virginibus eius custodibus bono esse animo iussis: Si enim nihil tandem aequi à Borbonio impetratum foret, curaturum se, ut ipsae etiam ad urbem maturè deducerentur: Cum ex improviso proxima monti hoste occupante loca, nonnulli è Germanis in eum conscendere montem, cœnobiumque irrupentes, Virgines ipsas in Templum compulerunt, ubi illae trepidantes, ac Deiparae implorantes fidem ad vesperum vsq; se se continuere. Commodum verò eius Templi subiit porticum dux quidā cum armatā militum manu ad triginta. ibi ille interea labantes mulierum animos confirmare. haud ijs metuendum, dicere, ne illa, cuius asseruauerāt Imaginem, seruare vicissim eas, ac tueri, & presenti eripere periculo nolit. Se etiam ibi adesse, ut eas, ubi sit opus, auxilio iuuet. Primis inde tenebris Germani audito Templi illius Campanae occentu, qui consalutandam Dei Matrem de more admonēbat, quasi dato receptui tuba signo, confestim in castra redeunt. Tum iis consuadet miles, ut fugam ornent: Germanos decreuisse postridie eius diei, cum primā luce eo reuerti, cunctaque diripere, quaecunque sibi vsui forent, asportare, cetera subiecto igne corrumpere, omnia pro libidine agere, ut postea euenit.

6. Miraculū  
aduersus  
militū furo-  
rem.



Quare optimum factu, illuni fauente nocte, in urbem se, & sua quaecunque auferri possent, conferre: Ijs sese offerre itineris ducem. quippe eas illò perducturum incolumes. Iam enim omnia obsideri loca suburbana, vt vix etiam noctu, solæ si proficiscantur, satis tuta esse fuga videatur. Parent illæ eius dictis, & se, suaque homini concedunt, è sermone, vultu, humanitate ciuem, aut certè indigenam arbitratè. Conuasatis ergo quæcunque licuit, adiutantibus onera militibus, cum summum omnibus à Ductore silentium per medios ituris hostes foret indictum, se in viam dant. Urbemque versùs iter faciunt. Vbi ad Monasterium Virginum Sanctæ Mariæ Magdalænæ, (hodie S. Iosepho dicatum, & à Seruitis Fratribus habitatum, quod paruo admodum interuallo ad vrbe distat) tunc ferme vacuum, peruenère, Dux ipse, quasi haberet clauim, fores vestibuli referat, atque ibi eas noctem illam traducere iubet. Ingradientibus iam, vnam ex ijs desiderari nunciat. Hanc perhibent è Marsilia gente adolescentulam fuisse, Leonam nomine, nullis quidem ipsam eius cœnobij initiatam sacris: sed eò à parentibus erudiendi causâ missam; Romæo Foscarario post hæc connubio iunctam. Eam igitur duo milites perquisitum eunt. quam in fossam nacti prolapsam, inde educunt, ac reducunt ad suas. Illa cùm inter vias pedem in lubricâ ripâ incautè posuisset, in subiectam fossam prouoluta, casum suum clamore euulgare minimè ausa, ne proderet cæteras, imperatû sibi silentium propriâ salute potiùs duxerat. Saluis iam omnibus, crastinâ luce, inquit Ductor, in urbem ingrediemini. præsto enim erit, qui vos actutû intromittat. Ego interea loci cû meis vestem vestram omnem, ac supellectilem ad Sancti Matthiæ cœnobiū perlatam vestris reddam. Ingressus ille in urbem, omnia, quo dixerat, ferenda curauit: atque eius cœnobij Antistitæ Hippolytæ Castellæ tradidit, saluas esse Virgines, & breui affuturas nuncians. Pauca hæc præfatus, cum suis, qui cuncta fide summâ, ac silentio reddiderant, vale dicto, abit. Cumque mox à famulo Monasterij renocaretur, vt se vnâ cum suis parato sibi ientaculo reficeret, se statim cum iis ex oculis eius abstulit, ira, vt euanescere viderentur. Paulò ante eius aduentum quædam



quædam è contubernalibus, cui nomen Columbae Aldrouandæ fuit, insigni pietate virgo, antistitæ visum hoc renunciârât. Cum ipsa in communi omnium trepidatione ac turba sui sodalitij virgines, quæ in Monte Guardia commorabantur, summo studio Matri Virgini commendasset, ne illa famulas suas hostibus prædæ ac ludibrio esse pateretur, ac paululû postea conquiesset, visam videre sibi Præfectum Deuotorû S. Mariæ Mortis se prehensam manu perducere ad Templum, in quo ei multa, ac varia à Beata ipsa Virgine edita miracula in pariete picta digito commonstrabat, tandem recens, nec dum vulgatum ostendebat illi miraculum huiusmodi: Inerant in pictura Montes, & colles nemorosi. Ibi passim milites fixis tentoriis, eaturmatim percurrentes loca, villas deuastabât, pecora, & quæcûq; esui forêt, abducebât, obuiû quodq; agebât, ferebât: cû interim per medios ipsos agmè mulierû Dominicano indutarû habitu procederet magno Angelorum comitatu stipatû. Tû illi Præfectus: Nostin' locû, & mulieres? Nosse mihi, inquit illa, videor; Mõs Guardiae hicce est, hæ Societatis nostræ mulieres, Sacrà in Mõte Imaginem custodiètes. Ergo, inquit Præfectus, nunc illæ è mediis euadentes hostibus à caelestium cateruâ iussu Deiparæ deducuntur in urbem. Hactenus Columbae visum. Mox igitur ubi S. Lucæ Virgines peruenire in urbanum cœnobium, conferendo hæc, quæ Columbae in somnis oblata, cum euentis, re vera milites illos, qui eas ad Monasterium S. Mariæ Magdalene deduxerant, Angelos fuisse in faciem versos humanam est iudicatum; idq; cõ liquidius, quod, cû diligentissimè requisiti per urbem fuissent, quinam forent, quâ portâ ingressi, nunquam reperiri quitum.

Anno supra millesimum quingentesimo octogesimo quinto IV. idus Iunij, qui tunc secundus è tribus sollennibus Sacre Pentecostes agebatur dies, magna accolarum vis in hoc S. Lucæ Templum conuenerat. Cumque è vehementiore æstu, atq; è via plerique contractâ siti aquam à Virginibus peterêt, duas illæ hydrias, quas è longinquo implèdas, ad vsum cœnobij procurarant (arefacta scilicet ex ingenti calore loci eius cisterna) exhauriendas sitientibus per liberaliter obtulêre. Verû is per-

7. Miraculū  
aduersus si-  
tim..



breui siccatis, cū subinde noui succederent aduenæ potum rogantes, eā quidem aquæ inopiā Virgines, quod supeditatā omnibus abunde voluissent, mirum in modum angebantur, nec quō se verterent, sciebant: cum ecce tibi Virgo sacri earū coētūs Honoria Blanchetta, hydriarum alteram, quæ ambæ iā inanes sepositæ fuerant, plenam optimę reperit aquę. Quā quidem omnes conspectā, vix suis ipsarum oculis, vix sibi ipsis à primo credere: mox vero prodigium id, ac diuinum planè esse factum, dubitatione omni amotā à cunctis est affirmatum, ac prædicatum, quod satis constaret neminem tum ingressum, qui eam inferre potuisset, ac domi ne guttam quidem esse aquę relictam, Solaq; illa satis fuit omnibus. Sed & post bienniū quā hęc facta, mirum ferè huic consimile eodem in loco accidisse liquet.

3. *Miraculo  
vinum au-  
getur.*

Cū enim Paulla Maria Garzoniam huiusce Monasterij Vicaria præfecturam suam, expleto iam biennio, relinqueret nouā, videlicet Febroniam Buttrigariam: ac rem illi omnem domesticam singillatim perscriptam, vt moris est, contraderet, imperatum ab ea Thomæ Stiuanio monasterij famulo fuerat, vt vasa omnia vinaria, quæcunque vacarent, elueret, vt rectè curata Vicariæ ineunti traderentur. vini in cellā perexiguum inerat, quod vix in pauculos sufficeret dies, itaq; magna de providendo potu sollicitudo Buttrigariam incesserat: cū interea famulum mirabundum audiunt mira domi euenisse clamātem: Maximum dolium, quod ipsemet aquā iniectā perluerat ac defæcarat, mero & quidem generosissimo se inuenisse plenum. Summā omniū admiratione (vt par erat) exceptā re, statim in mentem ijs venit portenti, quod in vacuā euenerat hydria: subiitq; simul eas, non semel declarasse Deiparam, peculiari sibi ipsas esse curæ. Igitur cæleste id ipsius esse subsidium hand sibi ægrè persuadent. Quippe eā non minùs nunc domesticis suis, vini laborantibus inopiā, quā aduenis olim ibidē aquam petentibus, succurrendum censuisse. Cū ergo ad cellā omnes vinariā rei visēdæ adeo nouæ studio procurrissent, nihil mentitum inueniunt hominē: dolium, quod nuper inane esse certò sciebāt, vino iā plenu apertè vidēt. Ingenti igitur lætitia

ingen



ingētes Deo, patronæq; Virgini, ac laudib. mistas grates agūt.

Gerardus fuit Bingardus Mutinensis presbyter: qui mirificā Imaginem hanc religione colebat. Is anno millesimo quingētesimo quadagesimo secundo cū Ecclesiā Argellatēsi operā nauaret, (est Argellata vicus agri Bononiensis) Sigismūdū Malauoltam Curatorem Stofionensis Ecclesiæ (quæ in Mutinēsi est) Mutinēsē & ipsum, in maximis eius angustiis mutuo datā pecuniā plurimum iuuerat. At ille amici benignitate, quē benē nummatū existimabat, ad insidias per summū scelus fortunæ eius, vitæq; struendas abuti cogitans, hominē rogauit, vt sibi hospitio ipsius per dies aliquot vtiliceret. Bingardus humaniter suis illum laribus, proprioque excepit cubili. Verū cū breui is, quid ille animo agitare facinoris, intellexisset, honestā commentus causā, contubernio hospitem excludit. Ille vero intentatū huic frustra exitium alio confert, Bondanellēsisq; Rectorem Ecclesiæ (quæ in agro est Bononiensi) obtruncat, compilatq;. Cumq; ipsum cōquirentibus ex parricidio satellitibus, nullum is sibi tutiorem putaret conuictum, quā facinorosorum hominū, quos pariū scelerū conscientia ad obfidendas vias patrandaq; latrocinia adegisset, in eorum se recipit gregem: nec Gerardi oblitus, vna cū ijs in caput ipsius cōiurat. Ergo templū eius matutino ingressi (octo iij fuere) offendunt hominem, inchoatū paullō ante sacrificiū Missæ celebratē, cui tum paucissimi, vix scilicet quatuor ex utroq; intererāt sexu. Hos ille armatos conspicatus, quid venerint, cōtinuō suspicatur. Itaq; puero in sacrificio subseruienti summā vocē præcipit, vt citato gradu rusticos euocatū eat, qui sibi à latronib. circumuento opē ferant. Sed Malauolta, re animaduersā, prius, quā ille mandata exhaurit, sacerdotē stricto aggredi pugione occupat. Ille statim in ipso periculo articulo huiusce recordās Imaginis, se ei suppliciter cōmēdat. Mirū dictū, magis visu mirū, Malauolta Bingardū ne cōtingere quidē, nedū vulnerare, potis vnquā fuit: cū tamē sublato aliquādiu brachio plagam infligere anniteretur. Tādē humi corruēs, pugionē à se lōgē proiecit. Id vbi socij vidēt, vnā oēs irruūt cū validis hastis, vt quē ille nō potuerat vnus, cōfertim oēs confodiāt. Sed ille

9. Miraculum aduersus ingratos sicarios.

inno-



in nocentiâ vitæ, ac sacræ potissimum Imaginis præsidio munitus horum ictus, tanquam ferro vndique septus, cum tamē omnino foret inermis, ita excipiebat, ut hasta ex illis cōfringerentur omnes. Hi itaque rei nouitate ac prodigio conterriti, in fugam effusi, tanquam aliquibus ipsos insectantibus, sibi salutem quærunt. Verū breui à satellitibus comprehensi dignas factis pœnas publicè dederūt. Gerardus gratijs actis Deo ac Deiparę seruatoribus, fragmenta illa collegit, quæ ad insignis miraculi memoriam asseruabat : ac lubens cuiunque monstrabat.

10. Miraculo  
puer furio-  
sus curatur.

Anno eiusdem seculi quinquagesimo tertio, puer è Marano, Bononiensi pago, correptus rabie, cum notitiam necessariorum, ac familiarium omnium ex mali vi amisset, obuiū quęque promiscuè, ut rabidi solent, morsibus appetebat. Tū parentes puerum, nullā scilicet hominum curā sanabilem, ad S. Lucę Templum sibi esse ducendum statuunt. Cum autem dum eò contenderent, Imaginem ad urbem esse deuestam cognouissent, cœptum nihilominus pergentes iter in fanum ascendant. Cumque ij puerum in altari, quod pro Imaginis Tabernaculo est, imponere cupientes, id non auderent, quædā è famulis cœnobij, quæ fortè aderat, arreptum eum audacter in mediā arā collocauit. Statim atque eam insedit, latratus ille frequens, qui rabiosis familiaris, consiluit, furor conquieuit, mira que eum consequuta māsuetudo est, ut placido mox vultu parentibus subblandiretur, neque vllum inde domum tanti retulit vestigium mali.

11. miraculo  
languidus  
sanatur.

Puer quidam Bononiensis anno eiusdem seculi quinquagesimo quarto, corpore per quadriennium ita affecto, ut se vix commouere, nedum ingredi valeret, cum membra suis defecta viribus proprias obire functiones nulla possent, à medicis, quos acciuerant domestici, eorum, qui medicinam in vrbe faciebant, facile principes, destitutus, atque à suis deploratus iacebat. Tum Monasterij S. Lucę famula quædam, quæ stipē ostiatim cœnobio rogabat, Ioanna nomine, ad eum forte intromissa, atque eius cognitā inualitudine, Pete, inquit, votis conceptis à Beata Virgine huic malo medicamen, haud tua

(fat



(sarcio) in irritum vota cadent. Certo enim, ac breui conualesces. Dein cruce, quam attulerat, ob partam sibi ex huiusce Imaginis contactu vim, ac religionem iam pridem nobilitatâ, ipsum consignavit. ille stupentibus cunctis, nullo temporis interiectu, morbo omni liber incedere pedibus suis cœpit.

Iulij Veronensis è Sancto Petro in Casali, Bononiensi itidē pago, vxor, contractâ cæcitate, per biennium vsu omni caruit oculorum, ita vt sensum aspectûs amissum non magis (humana quidem ope) recipere eam posse, quàm de integro è matris utero prodire, medici distitarent. Illa verò quod à mortalium nemine sperare licebat, id ipsum calitûs dignâ, vt impetraret, fiduciâ petit. Cumq; de Imagine hac mira prædicari sæpenu-mero audisset, inde in spem pristinæ valetudinis erecta, cum viro agit, vt ad fanum eius adducatur. Ille, quod æquè atq; ipsa optabat, id haud sibi minus, quam ei sperandum ab hac Imagi-  
ne ratus, nullum precibus eius reliquit locum: atque ipsemet dux illi itineris fuit. Quod anno millesimo quingentesimo nonagesimo quinto, ipso peruigilio assumptionis Deiparæ Virgi-  
nis susceperunt. Vix dū illa in Mōtis Guardiae radices intulerat pedem, cum clamare occœpit se iam humum cernere virentē: mox & arborum frondes, herbarumq; folia oculorum acie distinguere. Et quo scandendo montem, sacram propius ædē accedebant, eò magis nox illa cæcitatē cernendi vi, quasi illucescenti concedens diei, recedebat. Tandem mulier, vbi fanū est ingressa, elarissimè oculis videre cœpit, perinde ac si nunquam eâ corporis parte laborasset.

Angelus Galuanus Ferrariensis anno eiusdem seculi nonagesimo sexto, cum degeret Tridenti, atque ibi in culmen ædiū domesticæ fortassè negotij gratiâ, inscendisset, magno inde præcipitans lapsu, Imagini huic sibi tantum famâ notæ pro salute vota fecit. Concursum statim ad ipsum vndique factus est eorum, qui prope erant, vt cadauer potius, quàm spirantem hominem contruerentur. Atque ille sanè cum reliquum corpus vehementer labefecerat, tum vero dextrum crus, brachiū-  
que itidem dextrum miserè p̄sfrigerat. Medicorū curæ mādatus, plurimum ijs exhibuit negotij, cum de salute eius diu

12. miraculo  
caca mulier  
visū recipit.

13. miracu-  
lo ex lapsu  
conclusus re-  
stituitur sa-  
nitari.



multumque dubitasset. Ipse interim Imaginem hanc usque in ore habere, atque omnem valetudinis spem suam in eam collocare. Breui homo quinquagenarius conualuit, sic tamen, ut brachium illud, quod una cum crure ex afflictu perriperat, motu plane destitutum omni, crus item altero breuius, monumentum sui illa ex praeterito ruina reliquisset. Ille nihilominus non quidem arti medicae, quod viueret, sed Deiparae ipsius ad Filium precibus acceptum referens, ut primum confirmauit vires, illico ad sacram hanc visendam Imaginem contendit. Vbi sanum ille attigit, serius tamen, quam voluisset, sacris iam, ut videbatur peractis, impetrat nihilo secius ab editu, cui una ac socijs Virginibus causam eius itineris explicarat, ut sibi Imago commonstretur. Dumque prostratus humi gratias illi quam maximam potest religione agit, nouum in se portentum videt. Brachium eius antea iners, expersque motus, viribus reuocatis sponte commouetur. Mox, dum tantam ille rem miratur unam ac Deiparam secundum Deum laudibus & gratijs veneratur, superuenit nec opinantibus sacerdos, & sacrum celebrat. Eo diuinis operato alterum homini miraculum euenit. Inde enim, ubi dum sacris interesset, supplex procubuerat, exurgens, crus illud breuius & firmitate & longitudine exequatum alteri animaduertit. Ita, dum seruatum se Deiparae auxilio, huiusce gratia Imaginis pie credit, dum se tanti memorum beneficij, & gratum ostendit, alia ille maxima, atque in veris haud dubie numeranda miraculis ab ea consequutus, unde membris captus discesserat, eo integer vixque a suis agnitus reuertitur.

14. miracu-  
lo alius qui  
dam morbi  
dus sanatur.

Parem in re non ita dispari Deiparae benignitatem, hac eadem intercedente Imagine, expertus fuit Thomas Ferrarius Bononiensis Iesuatus, qui quidem quadragesimum iam fere annum eam, quoties in urbem defertur, ferre solet. Cum enim dextrum eius pedem, anno millesimo quingentesimo septuagesimo sexto, ac manus anno eiusdem seculi octogesimo secundo tanta vis inuasisset mali, ut ijs neque uti in praesens valeret, nec valiturus in posterum videretur, vanaque medentium remedia conperisset, ijs damnatis ad ultimum supplex medelam ab hac Imagine poposcit: & quam ille poposcit, praesentem sensit opem, ab viroque statim



statim malo, simul eam implorauit, vindicatus. Par erat scilicet vt qui tot annos Imagini huic religiosissimè gerendæ inseruisset, ab eadem impetraret, vt tot consequuturos sanctum, ac sibi periucundum prastare eidem famulatum posset.

Cum pauca hactenus enarrata miracula haud paruum videantur specimen celestis illius dedisse virtutis, quam in hac effigie innumerabilibus conspicuè editis signis præpotens effulgere voluit Deus; Placet igitur, vt quod sequitur miraculum, sicuti omnium, quæ patrata ab ipsa Imagine hucusque sunt (quod equidem sciam) nouissimum est, sic etiam postremum commemoretur.

Mulier est Bononiensis, cui Margaritæ nomen, M. Antonij Tumbæ vxor, huic Imagini mirum in modum addicta, cuius & exemplum ipsa depictum habebat domi, de cubiculi pariete suspensum. Ea hoc anno, qui salutis reparatæ præter millesimū duodecescentesimus numeratur, pleuritide tentata, atque in magnum adducta vitæ discrimen, dum ita decumbebat. Imagini illi, cuius in obtutu ex aduerso pendentis defixa erat, sese identidem commendabat. Cumque à longiore vigiliâ quietis desiderium obreperet, eos, qui aderant, discedere illinc, & cubiculū claudere iussit, vt somnum capere, arbitris remotis, facilius posset. Id ubi factum, cum se illa ad dormiendum comparasset, vocari se paullò post nominatim audit. Ergo, vt erat semisomnis vocem esse opinata domestici alicuius, orat, ne se inturbent dormitantem. Mox de integro appellata, ubi aures atrexit magis, hæc accepit verba: *Scito, Margarita, Calorum Regina, cuius precibus à Deo salutem iam impetrafti, placere, vt primo quoque tempore desurgas, & quam eius Imaginem in cubiculo habes, eam in sacram aliquam ad eam transferendam cures.* Ad hæc dicta obstupuit primū agrotā, dein vero erecta consedit in cubili: doloreque leuari sibi visa, & morbo, quos abire iusserat, cōtinuo introuocat. Dūq; ijs miraculū enarrat, animaduertūt pictā illā Imaginē, quæ de pariete pēdebat in lecti ipsi<sup>9</sup> ceruicali sitā. Quæ quoniā humana emota manu haud videbatur, maior accessit miraculo ab ea enarrato fides. Mirūq; altērū alteri fidē fecit. Eā igitur Imaginē Alphōsus Palcōttus Archiepiscopus

15. miraculo  
Pleuritica  
mulier cu-  
pauit.



pus Bononiensis, re prius diligenter cognitâ, transferendâ curauit in fanum mulierum Conuersarum. Silentio illud minimè prætereundum, quandam scilicet ex ijs, Veronicam nomine, variâ tredecim mensium inualetudine cruciatam, statim receptâ in suam ædem Effigie, valetudini pristinæ fuisse restitutam.

Ita Imaginis illius gratiâ, quæ editarum virtutum magnitudine, ac numero tantopere emicat, virtutes etiam in illis elucent, quæ ex illa effictæ, eius etiam studio coluntur.

Ad gloriam Vnius, Trinique Dei, qui vnus omnia potest: Cui Vni Bona omnia referre omnes accepta debemus.

En tibi, Deipara Virgo, Sola Mater Virgo, quò me damna-  
sti, scribendæ huiusce votum Historiæ persolui. Gratum uti-  
nam Tibi, quidquid id est, quod præstiti, acceptumque sit; uti  
iucundissima mihi mirificeque salutaria accidere quæcunq;  
in me Tuæ non semel indigentem opis verè admiranda diui-  
nitùs impetrata beneficia contulisti. Certè ut quàm  
id tibi gratissimum existeret, Te ipsa mihi  
(yti credo) conscia, quoad eius  
facere potui, contendi.

( \* \* \* )



Tabu-



Impp.	Pont. Rom.	Anni Cardinalatus.	Anni Episcopatus.	Anni Conuersionis.	Annivita.	Anni D.N. Iesu Christo.
					1	1375
					2	1376
					3	1377
					4	1378
					5	1379
					6	1380
					7	1381
					8	1382
					9	1383
					10	1384
					11	1385
					12	1386
					13	1387
					14	1388
					15	1389
					16	1390
					17	1391
					18	1392
					19	1393
					20	1394
					21	1395
					22	1396
					23	1397
					24	1398
					25	1399
					26	1400
					27	1401
					28	1402

**TABVLA CHRONOLOGICA, IN QVA VNO  
QVASI INTVITY CONSIDERARE  
licebit vitam B. Nicolai Albergati S. R. E. Card.**

Nascitur B. Nicolaus Bononiæ, ex  
patre Petro Nicolao Albergato, &  
matre Philippa, *Zenus c. 1. & Sigonius*  
*c. 2.*

Incipit studere Turi Ciuili, continu-  
atque annis 9. *Ita Zenus c. 1.*

Induit habitum Monasticum in  
Carthusia Bononiensi, *Ita colligitur.*  
*ex Zeno cap. 1.*

Hoc tempore absque dubio admi-  
nistravit Prioratū primo in Car-  
thusia Bononiensi, dein in Florenti-  
na. *Ita colligitur ex Sigonio c. 2.* quam-  
uis anni certi non queant designari.

Y 3

Quo



Sigismundus R. Hungariae.

Martinus V.

Imp.	Pont.	An Card.	An. Epif.	An. cōuer.	Anni vitæ	Anni Dom.
				10	29	1403
				11	30	1404
				12	31	1405
				13	32	1406
				14	33	1407
				15	34	1408
				16	35	1409
				17	36	1410
				18	37	1411
				19	8	1412
				20	39	1413
				21	40	1414
				22	41	1415
				23	42	1416
				24	43	1417
				25	44	1418
				26	45	1419
				27	46	1420
				28	47	1421
				29	48	1422

Quos studiosius indagabunt istorum  
Cœnobiorum Religiosi Patres, ex antiquis  
Monumentis.

Constituitur à Capitulo generali Prior  
Carthusiæ Romanæ ac generalis Procura-  
tor Ordinis nostri fungiturq; eo officio an-  
nis 2.

*Ita insinuat Charta Prouincialis.*

Deputatur à Capitulo generali primus  
Rector nouæ Carthusiæ Mantuanæ manet-  
que in illa administratione annis 7.

*Ita indicat Charta Prouincialis.*

Absoluitur à Rectoratu Carthusiæ Mā-  
tuanæ.

*Ita habet Charta Prouincialis.*

Eligitur Episcopus Bononiensis 4. Ian.  
& consecratur Iulij 4. &c. *Sigonius c. 3. & 4.*  
In Episcopali synodo reformat subdi-  
tos suos in omni statu Idque 20. Maij &c.  
*Sigonius c. 6.*

Agit causam Bononiensem apud Marti-  
num V. Rom. Pont. &c. *Sigonius cap. 7.*

Ob interdictum Pontificis publicatum  
Bononia periclitatur de vita &c. *Sig. c. 8.*

Bononia redigitur sub Pontificis Ro-  
mani potestati tem *Sig. c. 8.*

Legatus in Galliam proficiscitur, 26.  
Mart. à Pont. Rom. missus &c. *Sig. c. 9.*

Reuertit-



P.	Card.	Ep.	Conu.	Vitz.	Anno Dom.	
		7	10	45	1423	Reuertitur Bononiam, 7. Aug. suarum onium curam
		8	31	50	1424	habet, &c. <i>Sig. cap. 9.</i>
		9	32	51	1425	
	1	10	33	52	1426	Creatur S. R. E. Cardinalis, 23. Iunij. Onuphrius.
						& mittitur à Rom. Pontif. Legatus ad Florentinos
						Venetosque, 19. Septemb. <i>Sig. cap. 10.</i>
	2	11	34	53	1427	Venit Brixiam, reuertiturque Bononiam, 8. Febr.
						Inde Romam proficiscitur, & post 4. Menses Mediola-
						rum Nuncius Pacis, &c. <i>Sig. c. 10.</i>
	3	12	35	54	1428	Publicat Mediolani pacem, 6. Maij. <i>Sig. ibidem.</i>
						Revertitur ad Bononienfes, eosdemque ob seditionem prudē-
						ter relinquit, 6. Aug. &c. <i>Sig. c. 11.</i>
	4	13	36	55	1429	Restituitur iussu Pontificis Rom. in suam sedem ab
						Apostolico Legato, 25. Septemb. <i>Sig. c. 12.</i>
	5	14	37	56	1430	Iterum à Pont. Rom. in Gallias, ad reges Fran-
						corum & Anglorum conciliandos mittitur. 27. No-
						vemb. <i>Sigonius ibidem.</i>
	6	15	38	57	1431	Missus à Pont. Rom. contendit Ferrariam, inde Ve-
						netias, tandem ad Concilium Basileense, quod de ali-
						quibus reprehendit, &c. <i>Sig. c. 13.</i>
	7	16	39	58	1432	Reuersus Bononiam accipit literas à Francisco Phi-
						lelpho, 22. Septemb. &c. <i>Sigonius ibidem.</i>
	8	17	40	59	1433	Bononiæ curat circumferri imaginem B. V. Mariæ
						(quam S. Lucas depinxit: cum ingenti fructu, 4. Iul. &c.
						Deinde 15. Decemb. mittitur ab Eugenio P. R. ad Con-
						cilium Basileense, cum amplissima potestate; &c. <i>Sig.</i>
						<i>cap. 14.</i>
	9	18	41	60	1434	Destinatur à Concilio Basileensi ad Italiam pacifi-
						candam: 6. Aug. Verum ab Eugenio Pontif. remitti-
						tur ad Concilium ipsum, ut Pontificis partes defen-
						det. <i>Sig. c. 14. &amp; 15.</i>
	10	19	42	61	1435	Tertio à Pontifice Rom. in Galliam ablegatur, pro
						pace componenda: quam in Conuentu Atrebatensi fe-
						licititer confirmavit, 1. Iul. Reuertitur inde Bononiam
						cum capite S. Annæ, venitq; Florentiæ: in ad Eugenium
						4. <i>Sig. c. 15.</i>



I.	P.	Card.	Ep.	Conu.	Anno	Doin.	
Fredericus 3. I	Albertus dux Auftriaz	11	20	43	62	1436	Eugenius P. R. libero Urbis Bononiensis imperio potitur, eamque ingressus cum B. Nicolao, aliisque Cardinalibus, cogitat ibidem Concilium generale inchoare. <i>Sig. cap. 16.</i>
		12	21	44	63	1437	Ferrariense Concilium indicitur ab Eugenio P. R. cui subscripsit Nicolaus Card. 18. Sept. Bononiæ. <i>Surius Tom. 4. Concil. pag. 325. Sig. c. 16.</i>
		13	22	45	64	1437	Interest Concilio Ferrariensi. 8. octob. <i>Surius Tom. 4. Concil. pag. 370. Sig. c. 16.</i>
		14	23	46	65	1439	Nouissimam quoque Legationem obiuit ad Germaniæ Principes, & Albertum Imp. missus à Rom. P. Zenus cap. 18. & Poggius in orat. fun.
		15	24	47	66	1440	Adest Concilio Florentino, & subscribit 6. Iulij, constituiturque maior poenitentiarius Pont. Rom. siue summus Quæstor. <i>Sig. c. 17. Zenus c. 19.</i>
		16	25	48	67	1441	Eugenius Pontifex à Concilio Basiliensi repudiatus Florentiæ mansit per annos tres, ac B. Nicolaus Card. cum illo. <i>Sig. c. 17.</i>
		17	26	49	68	1442	
		27	50	....	....	1443	Eugenius P. venit Senas 7. Martij, & cum illo B. Nicolaus, qui exinde calculi doloribus afflictus est. Obiit ibidem 9. Maij eodem anno. Anno vitæ 68. Ita Sigonius cap. 18. & Poggius, ex quo intelligimus ipsum natum post mensem Maij, in Iunio, Iulio, Aug. &c.
							Anno Conuersionis 50. Ita colligitur ex Zeno.
							Anno Episcopatus 27. Id constat ex Sigonio de Episcopis Bononiensibus l. 4.
							Anno Cardinalatus 17. Vt ex Onuphrio liquet.
							Anno Pontificatus Eugenij 13. Ex eodem.
							Anno Frederici Imperatoris quarto. Ita Gordonus.
							Sepultus est B. Nicolaus in Carthusia Florentina, in qua olim Prioris officium administrauerat.

Cardinales



CARDINALES ALIQVOT SAN-  
CTITATE ILLVSTRES, QVI POST AN-  
NUM DOMINI M. FLORVERVNT.

**T**homas Bozius, vir doctissimus & in omni historia versatissimus  
tom. 1. lib. 9. c. 5. de signis Ecclesie enumerat quosdam Cardina-  
les Sanctitate conspicuos, qui post annum Christi M. floruerunt: qui-  
bus ego alios paucos adiunxi, hos igitur lubet simul ex ordine temporis  
recensere.

1072 B. Petrus Damiani ex monacho factus S. R. E. Cardin. & Episcopus  
Ostiensis, obiit anno Domini 1072. vt Baronius contendit tom. XI. annal.  
Hieronymus tamen Rubens in Historia Ranennatum lib. 5. asserit ipsum obij-  
se anno Christi 1080. Vitam Surius reposuit tom. 7. 22. Februar. In marty-  
rologio Rom. de ipso nihil habetur. Mylius in noua editione Surij adfert alia  
vitam ex M. S. S. codicibus quam conscripsit Ioannes eius discipulus, cuius &  
Baronius facit mentionem.

1086 S. Anselmus Mantuanus monachus ord. S. Bened. & Episc. Lucensis  
creatus est Cardinalis presbyter ab Alexandro 11. P. R. vt Ciaconius asserit. o-  
biit autem an. Christi 1086. 18. Martij, vt habet Posseuinus; quamuis Ciac-  
conius ponat annum 1087. vterque autem illi sanctitatis nomen ascribit,  
testaturque post mortem plurimis miraculis claruisse. Agit de eodem mar-  
tyr. Rom. die assignato. Extat ipsius vita cum miraculis M. S. S. in cenobio  
Benedictino agri Mantuani, vt affirmat Arnoldus VVyon. Meminerunt etia  
ipsius ta Vrspergensis, qua Sigebertus in Chron suis. Trithemius quoq. in Scrip. Eccl.

1089 B. Petrus cognomēto Igneus Episcopus Albanensis Apost. Sedis le-  
gatus, & S. Rom. E. Cardinalis obiit anno 1089. vt affi- mat Baron. tom. 10.  
annal. vbi eiusdem acta prosequitur. Faciunt & alij huius mentionem, vt  
Surius to. 4. 12. Iulij in vita S. Ioannis Gualberti, Vrspergensis in Chron. Fran-  
ciscus Binus, Ioannes Bapt. Hertonsis, Petrus calcearius, Ioannes monachus Vallis  
Vmbrosae de Abbatibus istius loci. Et hos citat Bosius loco designato.

1130 B. Hugo de S. Victore natione saxo, professione Canonicus regularis  
S. Augustini Parisijs, atq; ibidem Abbas à Ciaconio pag. 415 inter Cardina-  
les numeratur. Hic sanctitatis opinionem consecutus est apud Hartmannū  
Schedelum, Thomam Gorzonium, Alphonsium Ciaconium, aliosque diuersos scriptores.  
Floruit circa annū Domini 1130. Familiaris S. Bernardo Abbati Clareual-  
lensi. Meminit etia ipsius cum laude Trithemius de script. Ecclesiast. & B. ron.  
in annalibus. anno 1196. videturq. de ipso loqui Petrus Abbas Cellensis lib. 7. ep. 19.  
1133 S. Bernardus Parmensis Episcopus creatus est S. R. E. Cardinalis  
ab Urbano 2. R. P. vt Onuphrius testatur. qui scribit ipsū antea fuisse Abbatē  
Vallis Vmbrosae, Porro ipsius natalis ponitur in marty. Rom. 4. Decbris. V-  
bi Baronius annotauit ipsum fuisse Cardinalem tit. S. Chrysogoni, & obiisse  
anno 1133. quemadmodum habet Breuiarium Vallis Vmbrosae.



Non est autem hic Bernardus ille Cardinalis ac Episcopus prænestinus, ad quem extant epistolæ Petri Abbatis Cellensis lib. 8. ep. 21. & lib. 9. ep. 1. & 2. qui apud Carthusianos lubentissimè commorabatur.

1135. B. Mattheus Gallus Rhemenfis ex monacho Parisiensi ordinis Cluniacensis creatus est Episcopus Cardinalis Albanus, doctrina & vitæ sanctitate præstans. Obijt anno Domini 1135. 25. Decembris miraculis clarus, cuius vitam eleganter conscripsit *Petrus Mauritius Abb. Cluniacensis*. Ita *Ciacconius* pag. 398.

1159. S. Guarinus Bononiensis, Episcopus Cardinalis prænestinus, (cuius vitam conscripsit *Augustinus Ticinensis*, quam *Surius* habet To. 7.) obijt an. salutis 1159. Vt *Carolus Sigonius* demonstrat in *Episcopis Bononiensibus*. Ponitur hic in *Mart. Rom. 6. Feb. legendus etiam est Sigonius de regno Italiae*. Onuphrius scribit ipsū creatum in Cardinalem à Lucio 2. P. R. anno Domini 1144. ex Canonico regulari monasterij S. Crucis de Mortario, quod est Bononiæ.

1175. S. Galdinus de Sala ciuis & Archidiaconus Mediolan. creatus est ab Alexandro 3. an. 1165. Presb. Cardinalis T. T. S. Sabine. Ita *Onuphrius*. Factus est autem postea Episcopus Mediolanensis obijtq; anno 1175. Vt *Boetius* asserit. *Recolit illum Mart. Rom. 18. April. Vbi Baronius annotat Mombriciū Tom. 1. habere ipsius res gestas, & constantissimè eundem adhaesisse Alexandro 3. aduersus schismaticos: ita ut maluerit exulem vitam agere, quam habitare in tabernaculis peccatorum. Tractat de eodem Sigonius in lib. de regno Italiae.*

1275. S. Bonauentura balneoregionensis, ex Franciscano electus est Cardinalis à Gregorio X. obijtq; Lugduni anno 1275. 3. Id. Iul. à Sixto IV. inter Sanctos relatus. Ita *Onuphrius*. At Vero in *Mart. Rom. ponitur prid. Id. Iulij* vitam ipsius habet *Surius* Tom. 4. 14. Iul. Plura adfert *Henricus Sedulius* in *hyst. seraphica* ex *Petro Galefinio*, alijsque. Laudat etiam hunc præclarum virum *Gerson* supra modum. Fuit autē Episcopus Albanensis, & Doctoris nomen in Ecclesia Latina meruit obtinere.

1294. B. Latinus, nobilis Romanus, ex Monacho Dominicano factus est Cardinalis Ostiensis à Nicolao 3. Patruo suo, ut *Leander Albertus* asserit, (vel potius auunculo, ut *Onuphrius* habet: qui ponit electū an. 1278. 4. Id. Maij) & scribit obiisse anno 1294. mense Nouembri. At *Onuphrius* testatur perusij Spiritum exhalasse 4. Idus Augusti, corpusq; Romam translatum ac sepulturæ traditum esse in Ecclesia S. Mariæ super Mineruam. Porro quod rei caput est, huius Natalis inscriptus est in Martyrologio P. P. prædicatorum, in quo dicitur doctrina, sanctitate, miraculisque claruisse. Quod sufficiens testimonium erit. cætera apud *Leandrum* lib. 3. aliosque Scriptores rerum Dominicanarum.

1387. B. Petrus de Lutzenburg, Guidonis filius, Gallus, Comes S. Pauli Diac. Card. S. Georgij in Velabro, creatus est an. 1386. à Clemente 7. Ita *Onuphrius*, qui testatur ipsum Avinionē obiisse an. 1387. 3. Non. Iul. Ponit illum eundem



eundem in Mart. Itho Canisius 13. Iul. Fit etiam ipsius mentio in Luscinia Spiritu-  
li, quam Conradus Butgenius recenter Colonia impressit: Vbi recitatur oratio que-  
dam ab ipso composita.

1389. B. Bonaventura Patavinus ord. S. Augustini Eremitarum, Cardina-  
listit. S. Cæcilie vocatur à Trithemio Martyr, & à Possuino ex Iosepho Pam-  
philo. Obijt anno 1389. Romæ, vti Onuphrius notat. 10. Iun.

1419. B. Ioannes Dominici Ordinis Predicatorum, Cardinalis tit. S. Sixti  
Obijt Budæ in Vngaria anno 1419. vti Onuphrius affirmat. Laudant hunc Tri-  
themius & Possuinus, item S. Antoninus in chron. tit. 23 c. 11. qui huius viri discipu-  
lus fuit, item Albertus Leander. lib. 3. vbi vitam eius ponit miraculis claram.

1443. B. Nicolaus Alberghatus, de quo satis actum est. Huius res gestas  
si Bozcius legisset, etiam absque dubio hunc inter sanctos numerasset. Sed  
quis potest aliquid iudicare de ijs rebus, quæ inter occultos parietes deli-  
tescunt?

1450. B. Ludouicus Almannus, Gallus, Canonicus regularis, V. I. Do-  
ctor, ex Episcopo Maclauiesi Archiepiscopus Arelatenis, Vicecamerarius  
& Prolegatus Bononiensis, electus est à Martino V. anno 1426. Presb.  
Cardinalis TT. S. Cæcilie. Ita Onuphrius, qui asserit ipsum obiisse anno 1450. 13.  
Cal. Nouembrii. Hunc Canisius ponit in suo Mart. 20. Octob. quem miraculis claris-  
se post mortem scribit Aeneas Syluius cap. 43. in Europa. Sedit ille quidem aliquā-  
do cum Concilio Basiliensi contra Eugeniū 4. at resipuit. Cadit Iustus &  
resurgit. Vide obsecro, quid dicat Mart. Rom. 30. Ian. de S. Hyppolito  
Presb. & Mart. qui quondam Nouati schismate deceptus est, at per gratiā  
Dei rediit ad Ecclesiæ Vnitatē, pro qua & in qua postea illustre Martyriū  
cōsummauit, dicens eā Fidem esse seruandā, quā Petri Cathedra custodiret.  
1535. B. Ioannes Fischerus, Episcopus Roffensis in Anglia, creatus est à  
Paulo 3. Presbyter Card. TT. S. Vitalis: qui suam purpurā, sanguinis effusi-  
one rubricauit, atque insigne Martyriū subiit pro fide ac vnitatē Ecclesiæ  
anno 1535. 23. Iun. Ita testatur Onuphrius, Surius in commentario, aliq. Anglica-  
rum rerum scriptores. Ponit hunc Canisius 23. Iun. in Martyrologio suo.

1584. S. Carolus Borromæus, Archiepiscopus Mediolanensis & Cardinalis  
creatus anno 1559. à pio IV. Obijt anno 1584. 3. Nouemb. vti habet ipsius Vi-  
ta. Canonizatus est anno 1610. à paulo V. cum ingenti lætitia populorum.

Hic subsisto. Nicolaum de Cusa, S. R. E. Cardinalem summoperè lau-  
dant Trithemius, Schedelius, & Boetius: sed non habeo sufficiens testimoniū  
Sanctitatis. Obijt autem anno 1464. 12. Aug. Romæ sepultus, magnarum  
Virtutum homo, Germaniæque Sydus plæclarum.

Si quælibet Religiosorum hominum societas ex antiquis monumentis  
erueret suos Cardinales sanctitate conspicuos: ingentem sanè numerum posse-  
mus coacervare. Verum hoc illis relinquitur faciendum.

F I N I S.

CATA-



# CATALOGVS SANCTORVM

## QVORVNDAM EX S. ORDINE

### CARTHUSIENSI.

**N**E arbitreris forsan, Candide Lector, Carthusianum Ordinem nullos alios sanctos protulisse, quàm vnicum hunc cuius vitam collegi: Volui quasi per Synopsin breuiter enumerare eos, qui sanctitatis opinionem inter nostros sunt consecuti. Et vt nihil exhibeam confusum, Chronologicam seriem obseruabo, ac distinctiones sæculorum. Neque etiam meis indulgebo affectibus: Sed ipsos authores (qui recensendis sanctimonie laudem tribuunt) quasi digito demonstrabo. Sciendum verò est, quod Carthusianus Ordo initium sumpserit post Christum natum sæculo vndecimo. Sæculum porro (siue Sæculum à sequendo, vt alij volunt) complectitur apud Historicos spacium centum annorum.

In hoc autem catalogo S. Significat Sanctum, B. Beatum, P. Patrem, D. Dominum (quo titulo omnes Clericos nostri ordinis honoramus.) F. Fratrem, (ita Laicos vocamus.)

### SAECVLO XI.

1084. S. Bruno, natione Germanus, nobilis Colonienfis de familia Hardefault, Doctor parisiensis, & Canonicus Rhemensis, inchoauit S. Ordinem Carthusianum in Sabaudie montibus, anno Domini 1084. circa festum S. Ioannis Baptistæ 24. Iunij. Obijt in Calabria, anno Christi 1101. 6. Octob. Relatus est Canonicè in numerum Sanctorum à Leone X. pont. Rom. anno 1514. &c. Vitam ipsius conscripsit Franciscus de puteo I. V. Doctor, & generalis Moderator in ordine Carthusiano. Item Petrus Blomouenna Leydenfis, Prior Carthusie Colonienfis. Ex vtroque scriptore Surius aliam confecit Tom. 5. Tractant de eodem S. Patriarcha nostro Arnoldus Bostius Carmelita cap. 1. Petrus Dorlandus lib. 1. per tot. Item Petrus Sutor pag. 527 Colonienfis. edit. MSS. Authores, quos habeo, in aliud tempus referuabo.

1084. S. Hugo, Episcopus Gratianopolitanus, & cooperator in fundando ordine Carthusiano, locum primis Initiatoribus designauit ac dedit, vixitq; inter illos humilis Eremita. Obijt anno Domini 1132. 1. Aprilis. Canonizatus est ab Innocentio 11. Pon. Rom. qui eodem tempore Ecclesiam rexit. Vitam ipsius conscripsit Guido de Castro, V. Generalis in Ord. Carthuf. habet eandem surius Tom. 2. Plura habentur apud Bostium, Dorlandum, Sutorem, aliosque.

1090. B. Lauduinus, 2. Generalis Ord. Carth. (vt pote qui S. Brunoni succels



cessit anno 1090. eo scilicet tempore, quo ipse Romam profectus est ad Rom. pontif. Vir & doctrina & sanctitate conspicuus. Hic cum S. Brunone in Calabriae eremo latitantem visitasset, in reditu à Gilberto anti papa interceptus est, & carceri mancipatus, in quo feliciter pro Iustitia & Unitate Ecclesiae mortem subiuit, anno Domini 1100. 31. Martij, SS. Martyribus & Confessoribus annumerandus &c. Tractat de ipso Dorlādus l. 4. c. 1. & 2. Item Canisius in Martyrologio suo Germanico.

## SAECVLO XII.

1133. B. Auduinus Lotharingus, fuit vnus ex iis Monachis Maioris Carthusiae, quos nix de altissimis montibus cadens extinxit. Contigit hoc sub B. Guidone V. generale, anno regiminis eius 23. qui cum praesse incæperit anno Domini 1110. Sequitur hanc calamitatem accidisse anno, 1133. Verum hic Lotharingus die 12. de Voragine erutus, integrum adhuc habuit sensum & loquelam miræque dulcedinis verba locutus, atque Ecclesiae Sacramentis munitus, placidissimo fine quieuit. &c. Lege Sutorem pag. 529. & Dorlandum lib. 4. cap. 3. qui insinuat hunc fuisse singularem cultorem S. barbaræ V. & M. cuius meritis factum sit, vt absque præuijs sacramentis nō sit extinctus.

1137. B. Guido de Castro, Vir doctissimus ac eloquentissimus, Quintus Ordinis nostri Generalis, & S. bernardo Abbati Clareuallensi amicissimus sanctitatis titulum obtinuit à Dorlando lib. 4. cap. 3. à Sutore pag. 528. & obiit anno Domini 1137. 27. Iulij, cuius natalem Canisius inseruit Martyrologio sanctorum. Tractat de eodem Bostius cap. 2.

1138. B. Hugo, ob eximiam sanctitatem successor S. Hugonis Epif. Gratianopolitani, ac deinde Archiepiscopus Viennensis, floruit circa annum Domini 1138. Vide Dorlandum lib. 4. cap. 8. & Sutorem pag. 529. Ponit hunc Canisius in Mart. 1. April. Consule insuper Petrum Veneran. Ab. Clun. lib. 6. ep. 10. 11. & 12. Vbi agit de hoc Hugone.

1139. B. Hugo, VI. Generalis Ord. nostri, discipulus & successor B. Guidonis, fuit tantæ probitatis, vt vix ei similis in Ordine posset inueniri. &c. Ita Sutor pag. 529. Vbi illū inter sanctos reponit. Floruit autem anno Domini 1139. quando ab officio absolutus est, Vitæ solitæ flagrans amore, Ita habeo ex MS. Chronico Carthusiae Maioris.

1140. B. Bernardus, Prior Portarum: cui S. bernardus Ab. Clareual. dedicauit sermones in Cantica Canticorum: fuit Vir sanctitatis gloria insignis, vt constat ex Bostio cap. 3. Sutore pag. 532. & Dorlando lib. 4. cap. 9. Fit etiam mentio ipsius in Vita S. Anthelmi, apud Surium Tom. 3. 26. Iun. & in Vita S. Stephani, Tom. 5. 7. Sept. &c. Floruit hic B. bernardus circa annū Domini 1140. obiitq; 17. Decemb. Vt habet Canisius in Martyrologio suo.



1162. S. Anthelmus, ex nobili genere in Sabaudia oriundus, factus est Ordinis nostri Monarcha anno 1139. præsuitque annis 12. Postea electus est ad Episcopatum Bellicensem, in quo sedet annis XV. peruenitque ad annum Domini 1162. & obiit 26. Iun. relatus in numerum sanctorum in Mart. Ro. Vitam habet Surius To. 3. &c. Plura in Dorland o, Sutore, & Bostio. &c. 1169. B. Simon, Prior Carthusiæ Montis Dei, & aliquando Prior Parisiensis vocatur in epistolis Ioannis Sarisberiensis Vir sanctissimus. Ita testatur Iacobus Sirmundus ad epistolam XI. lib. V. Petri Ab. Cellensis. Idem Simon functus est legatione ad Regē Anglię Henricū pro S. Thoma Episcopo Cantuar. missus ab Alexandro 3. P. R. &c. Vide Baronium Tom. 12. anno. 1169.

Dies obitus eius ignoratur: quem eiusdem loci Carthusiani scient.

1173. B. Basilius VIII. Generalis in Ord. nostro, doctrina sanctimoniamque excellenter ornatus fuit. Huius rei testes habeo Bostium cap. 5. Dorlandū lib. 4. cap. 14. & 26. Sutorem pag. 539. qui etiam testatur eundem miraculis claruisse. Obiit autem Vir sanctus anno Domini 1173. 14. Iun. positus in Mart. Canisij, præsuitque annis 23. cum summa laude.

1190. B. Odo Nouariensis, ex Carthusiano factus est Abbas Iaderæ in Sclauonia. Verū ob varias persecutiones ad suos Carthusianos reuersurus, mansit Taliacori apud quandam Abbatissam, quæ istam licentiam à Rom. Pont. obtinuerat. Floruit sub Clemente 3. R. P. circa annū Domini 1190. obiitque. 14. Ian. viuus ac defunctus miraculis coruscans. Hinc Gregorius IX. si diutius superuixisset, voluit ipsum referre in Catalogum sanctorum Tractat de ipso Bzouius Tom. XIII. Annalium, anno 1240. num. 15. qui primus omnium ipsius sanctimoniam in lucem produxit, ex publicis Instrumentis Curia Romanæ.

1200. S. Hugo, Episcopus Lincolniensis in Anglia ex Carthusiano, satis superque celebris habetur &c. Vitam habet Surius To. 6. Plura alij de ipso. Obiit anno. 1200. testibus Bostio c. 6. & Sutore pag. 545. & quidem 17. No- uem. in Mart. Rom. publicè canonizatus ob miracula.

### SAECVLO XIII.

1213. B. Stephanus, ex Carthusiano Episcopus Diensis, sanctitate miraculisque floruit in vita & post mortem. Id asserunt Bost. c. 7. Dorland. l. 4. c. 10. &c. Sutor pag. 547. &c. Obiit autem anno 1213. 7. Sept. quo die vitam ipsius ponit Surius. Meminit ipsius etiam Canisius in Mart. suo eodem die. 1233. B. Iancelinus. X: Generalis, maximæ Vir sanctitatis fuit, & quasi Vnus de antiquis Patrib. qui Ordinis monarchiā administravit annis 60. obiitque anno Domini 1233. 26. Febr. quo die in Mart. Canisij sanctis annu-  
me-



meratur. Tractant de ipsius sanctitate Dorlandus l. 4. c. 15. & Sutor pag. 547.  
1248. B. Martinus XI. Generalis, Vir scientia, sanctitate & autoritate  
clarissimus (Vt asserit Dorlandus l. 4. c. 16.) obiit anno 1248. habens etiam  
sanctitatis laudem ex chronico MS. Carthusiae Maioris. Diem emortua-  
lem non inuenio.

1255. V. P. Martinus de Lauduno, Prior Vallis S. Petri in Picardia, ob san-  
ctitatem celebris (Vt Posseuinus ait in Apparatu) floruit circa annu Do-  
mini 1255. quantum colligere ac diuinare possum ex Priuilegijs Ordinis  
nostri fol. 12. Reliquit vero artificiosam epistolam ad Nouitium quen-  
dam, quae impressa habetur. Cetera alij indagabunt. &c.

#### SAECVLO XIV.

1305. B. Margareta Priorissa in Carthusia Monialium diæcesis Lugdu-  
nensis, floruit circa annu Domini 1305. quæ ob Virginitatis puritatem  
Christo Domino admodum familiaris fuit, ita vt ipse Saluator non secus  
cum ipsa loqueretur in visibili persona, ac quondam cum sua Martha &  
Magdalena. Tractat de ipsa Dorlandus lib. 5. cap. 3. Et Canisius eandem po-  
nit in Mart. mo 30. April.

1305. B. Beatrix Moniali eodem loco ac tempore vixit sanctitate con-  
spicua, & singularis amatrix SS. Vulnerum D. N. Iesv Christi. Scribit de  
ipsa Dorlandus l. 5. c. 4. & Canisius 13. Febr.

1313. B. Boso XVI. Generalis, tantæ fuit sanctitatis, vt mortuum resuscita-  
rit; obiit autem anno 1313. 4. Martij. &c. Huic testimonium sanctimoniae  
perhibent Bostius cap. XI. Dorlandus l. 4. c. 17. Sutor pag. 549. Canisius in  
Mart. Bzouius Tom. 14. Annalium.

1319. B. Petrus Fauereij, ex Monacho Carthusiae Maioris, factus est Prior  
Romæ, totiusque ordinis Procurator generalis. Obiit autem anno 1319. 29.  
April. De cuius sanctitate scribunt Dorlandus l. 4. c. 19. Sutor pag. 550. Ca-  
nisius in Mart. & Bzouius Tom. 14. Annalium.

1331. B. Haymo XVII. Generalis, etiam à Dorlando l. 4. c. 18. ob sancti-  
tatem laudatur: Obijtque anno 1331. 28. Octob.

1336. B. Ioannes Tornerij, professus & Procurator maioris Carthusiae,  
ob sanctimoniam laudatur à Dorlando l. 4. c. 20. & à Sutore pag. 520. & à  
Bzouio Tom. 14. Annalium, poniturque à Canisio inter Sanctos 30.  
Septemb. & 15. Decemb. &c. Floruit autem circa an. Dom. 1336. vt  
habeo ex chronico MS.

1341. B. Clarus XIX. Generalis, tantis virtutibus ornatus erat, vt vix in  
tota ecclesia inueniretur illo præstantior, &c. Vide Dorlandum l. 4. c. 20.  
& Sutorem pag. 552. &c. Obiit autem anno. 1341. 16. Iulij, vt habeo ex an-  
tiquis monumentis.

1360. B. Ioannes Birellus XXI. Generalis, vir eximiae sanctitatis, obiit

anno



anno. 1360. 6. Januarij. De quo Bostius cap. 10. Dorland. l. 4. c. 22. Sutor pag. 555. & Chronicon MS.

1362. B. Iacobus de Viuiaco xx. Generalis, quasi Angelus Dei fuit suo tempore, & post obitum miraculis clarus. Obijt autem anno Domini 1362. 30. sept. & c. Lege Dorland. l. 4. c. 21. & suturem pag. 553. Bzouium Tom. 14 Annalium, & Canisium in Mart.

1367. B. Helisarius, Vir magnæ sanctitatis (vt ait sutor pag. 561.) obijt anno 1367. x1. Iun. vt asserit Dorlandus l. 4. c. 23. & c. Fuit vero xxiii. Generalis annis 7.

#### SAECVLO xv.

1377. V. P. Ludolphus saxo, cum circiter Viginti & sex annos inter Patres Ordinis Prædicatorum sanctè vixisset, desiderio solitudinis & celestium rerum contemplationis maioris incensus, ad Carthusianos se contulit: quorum habitum, vt vocant, Argentina suscepit. Ita posseuius in Apparatu. Floruit autem in Carthusia Argentinensi anno Domini 1330. Vt Trithemius, & Sutor affirmant. Cæterum anno 1343. electus est primus prior Carthusiæ Confluentinæ, præfuitq; annis quinque, & absolutus est an. 1348 ad suam instantiam, & ad sedandum scrupulum conscientiæ suæ, vt loquuntur antiqua monumenta. Vixit deinde annis 30. in Carthusia Moguntina (in qua etiam feliciter obdormiuit) nō ad otium, sed vt librorum compositioni posset vacare liberius, habens singulas bibliothecas visitandi gratiā; Vt testatur Bostius cap. xi. Obitus ipsius ponitur in chartis capituli generalis anno Christi 1378. Dies emortalis incidit in x. Aprilis, vt habeo ex Carthusia Confluentina. Veruntamen, quod rei caput est, fuit vit doctrina & morum sanctitate conspicuus, qui vitam D. N. I. E. S. V. Christi cælesti quodam artificio, imo Diuina potius reuelatione, quam studio fabricauit; vt scribit Hartmannus Schedelius in chronico suo. & c. porro vita Christi hoc anno elegantior prodit ex typographia Antuerpiensi.

1406. Hic ponendi essent pragenses isti Carthusiani, (quos an Confessores, an Martyres appellabo?) qui à Ziska Hufitarū principe de suo ascesterio expulsi fuerunt, & in carcerem coniecti. at Deus ipsos præclaro miraculo honorauit. Agit de ipsis Bonfinius lib. 2. dec. 3. an. 1406. Naclerus anno 1419. & Aubertus Myræus in Originibus Carthusianis.

1408. B. Henricus Kalkar, professus ac prior Colonienſis Carthusiæ, vir haud exigue fuit sanctitatis: de quo alibi fusius. Obijt an. 1408. 20. Decemb. quo die Canisius ipsum refert inter Sanctos. Tractant alioquin de ipso Trithemius, Bostius, Sutor. Item Dorlandus lib. 5. cap. 10.

1419. R. P. Bonifacius Ferrarius, S. Vincentij Dominicani frater Doctor Iuris, & XXV. Generalis: laudatur ob sanctitatem à Bostio cap. 15. & Dorlando lib. 4. cap. 25. Obijt anno. 1419. 29. Ap. vt eruderaui ex antiquis monumentis.



1420. D. Gofvvinus siue Osuvinus de Beka, obtinuit sanctitatis opinionē ex Bostio cap. 19. & Dorlando lib. 7. cap. 36. Fuit autem I. V. Doctor, & Prior iuxta diuionem floruitque circa annū domini 1420. meminit ipsius etiam Sutor pag. 592.

1424. R. P. Stephanus Senensis S. Catharinæ Senensis quondam amanuensis, sanctē vixisse scribitur à Dorlando lib. 7. cap. 35. Hic fuit per annos 12. Ordinis nostri Generalis, obiitque anno 1424. 7. Aug. Vt certissimis documentis probatur. Facit eiusdem mentionē Bostius. c. 16. & Sutor pag. 591.

1430. D. Petrus Petronius Senensis, pater sanctitate Venerabilis, ac miraculis clarus, floruit anno domini 1430. Vide Dorland. l. 5. c. 1. Cæterum Augustinus nathus in oratione de laudibus. S. Bernardini Senensis vocat ipsum Virum plenum spiritu sancto.

1437. R. P. Guilielmus de Mota, xxvii. Generalis, reputatus est in vita iustus & sanctus & post obitum miraculis clauit. Obijt autē anno 1437 18. Iun. &c. Hæc ex Sutore pag. 563.

1443. B. Nicolaus Albergatus, etiam hic suo loco reponi debet: qui obiit anno 1443. 9. maij. S. R. E. Cardinalis atque Episcopus bononiensis Authores citare superfluum erit, cum suo loco recenseantur.

1446. P. Bartholomæus, prior Ruremundanus, & Visitator prouinciæ Rhenanæ, atque s. Th. doctor etiam inter sanctos locū inuenit apud Dorlandum lib. 7. cap. 5. &c. Obiit Coloniz in Carthusia anno 1446. ibidemque sepultus. scribunt etiam de ipso Bostius cap. 24. & Sutor pag. 594.

1461. P. Dominicus, Vicarius Carthusiæ Treuirenensis, plurimum laudatur à Dorlando lib. 7. cap. 2. 3. & 4. Obdormiuit in Domino anno Christi 1461. 21. Decemb. vt assero ex antiquis documentis.

1470. P. Cæsarius Raso, Monachus in Carthusia Capellæ, vir iustus ac timoratus, quem B. Virgo Maria ægrotantem visitauit, ac migrantem ex hac vita in sinū suum suscepit, obdormiuit circa ann. 1470. valde commendatus à Dorlando l. 7. c. 26.

1470. P. Hugo Boletus Delphenensis, professus in domo capellæ, & aliquando Prior Montis Dei, magnus paupertatis amator, cuius vita fuerat forma virtutis: floruit circa ann. 1470. Dorlandus l. 7. c. 29.

1470. P. Ioannes Theodorici etiam Delphenensis, eiusdem loci Monachus eodem tempore vixit vir sanctæ ac innocentis vitæ. &c. Dorl. l. 7. c. 30.

1470. P. Arnoldus Carmanus, Prior domus nominatæ, & Visitator Prouinciæ Theutonicæ, ab eodem Dorlando sanctis annumeratur l. 7. c. 32. qui asserit eum claruisse. ann. 1470.

1470. P. Arnoldus de monte S. Gertrudis in Hollandia oriundus, in domo capellæ vicarius & Procurator, hic præteriri non debet: quoniā Dorlandus ipsum laudat lib. 7. c. 33.



1470. P. Gerardus Bredanus eodem vixit tempore in eodem loco, illustri sanctimonia clarus, ut affirmant Dorland. l. 7. c. 27. Item Bostius cap. 33 vitæ sanctitate ipsum mirabilem fuisse testatur. Item Sutor pag. 601. vitæ sanctimonia clarum scribit.

1471. P. Guilhelmus Apfelsius, patria Bredanus, Prior Carthusiæ Brugen-  
sis, vitæ austeræ & sanctæ, migravit ad æternam vitam anno salutis 1471. 5.  
Aug. ut Bostius habet cap. 30. cum annis 40. laudabiliter inter Carthusia-  
nos vexisset. Ita Dorl. l. 7. c. 28.

1471. P. Dionysius Rikel, Carthusiæ Ruremundanæ Professor, Do-  
ctor extaticus atque illuminatus, fuit suo tempore admirabilis, ideoque  
sanctitatis nomen apud posteros est consequutus, obiit anno 1471. 12  
Mart. De ipso agunt Bostius c. 29. Sutor pag. 598. Dorl. l. 7. c. 6. Imo Episco-  
pus Ruremundensis D. Henricus Cuckius, si superuixisset, volebat virgine  
ipsius canonizationem in Curia Romana.

1472. P. Hermannus Appeldorn Xantenis, prior Colonien. & visitator  
prouinciæ Rhenanæ, fuit summæ Innocentiæ & virutum omnium præ-  
claris dotibus egregie ornatus. Quapropter summopere laudatur in an-  
tiquis monumentis huius Carthusiæ; Fuit etiam olim prior Treurenensis. Obiit  
autem deuotissimè anno 1472. 17. Sept. Confluētia in actu visitationis, i-  
bidemque sepultus, expectat nouissimam tubam.

1477. P. Laurentius Musscheli, Prior domus Capellæ in Hannonia  
prope Angiam, tantis virtutibus præditus erat, ut ab omnibus sanctus re-  
putaretur. Fuit autem singularis cultor S. Catharinæ v. & M. & cum suo  
paruulo & Agno D. N. Iesu Christo die nocteque se occupauit, & beatissi-  
mo fine obdormiuit, anno 1477. 3. Decemb. Vide Dorlandum lib. 7. cap.  
25. Scribunt de eodem Bostius cap. 35. & Sutor pag. 602.

1481. P. Henricus Loenius Louanien-  
sis, Doctor insignis, Prior capel-  
læ, & visitator Teuthoniæ, Vir vitæ sanctissimæ: qui ad cœlestia euolauit  
anno 1481. Hic aliquoties inter celebrandum solitus erat in ærem cum  
corpore sustolli, ob feruorem deuotionis. Dorlandus lib. 7. cap. 31. Agit de  
eodem Bostius cap. 34. Item Sutor pag. 602. Fuit aliquando Prior bruxel-  
lensis.

1491. P. Ioannes Aldenardus, quasi alter Samuel Deo consecratus in do-  
mo Capellæ sacristam egit annis 35. Speculum virtutis & sanctimoniæ, In-  
nocens, purus, feruens, & singulari gratia decoratus: cum hic in terris Deo  
Opt. Max. in Ordine Carthusiano annis 50. syncerissimè seruijsset. transijt  
ad cœlestem patriam pro æterna mercede accipienda, anno Christi 1491.  
21. Nouemb. ipso festo præsentat. B. V. Mariæ. Dorlandus hunc virum  
summopere laudat lib. 7. cap. 34.



## SÆCULO XVI.

1502. P. Ioannes de Virduo olim Decanus Virduñes. Prior Môtis Dei in Picardia, quemadmodum laudabiliter vixit, ita miraculosè obiit anno 1501. 27. Sept. Cum etenim lumen incaute relectum in cubiculo, totam cellam dormientis incendisset ac incinerasset: ipse toto corpore integer inuentus est. Quid hoc est? Nunquid elementum insensibile honorauit vas illud purum & immaculatum? Possem hanc rem pluribus confirmare: sed oportet hic esse succinctum. Si elementum illud corpori tantum reuerentiæ impendit: quo gaudio putamus animam illibatam à SS. Angelis susceptam? Accedit huc optimum testimonium, quod vir ille admodum Religiosus habet in istius Carthusiæ monumentis.

1509. Rmus P. Antonius surianus, ex Carthusiano patriarcha Venetorum & Dalmatiæ Primas constitutus, integerrimæ & laudatissimæ vitæ fuit. De quo Dorlandus lib. 7. cap. 37. ex Francisco philomuso pisauriensi, obiit circa ann. Domini 1509. Vt habeo ex chartis cap. general.

1530. Circa hunc annum aliquot Carthusiani in domo Morbacensi prope Viennam à Turcis interempti, martyrij palmam promeruerunt, testem habeo Myræum in orig. Carth.

1530. P. Andreas Prior in domo Seitz prope Ciliam in Sclauonia, circa hunc annum à Turcis captus, tortus & occisus est. Ita ostendit charta cap. gen. anni sequentis.

1531. P. Guilielmus Tynzbi Hybernus, prior Londinensis in Anglia, quasi alter Antonius Eremita fuit suo tempore. Valde hunc virum laudat Mauritius Chancæus cap. 8. obitum ipsius reperi in Chartis Cap. gen. anno

1531. Hoc anno 4. Maij in Anglia occisi sunt tres Priores Carthusiani, & ad Sanctorum Martyrum gaudia in cælum migrarunt.

1. V. P. Ioannes Heugthon, prior Londinensis, vir magnæ doctrinæ sanctimonizque, plurimum laudatus à Mauritio Chancæo cap. 2. 3. 4. &c.

2. V. P. Robertus Laurens prior Bellæ Vallis, professor Londinensis, vir planè religiosus.

3. V. P. Augustinus Vvebstez, prior visitationis. B. V. Mariæ, &c. De hisce Chancæus cap. 12.

1535. Eodem anno 19. Iunij, alij tres Londinenses Carthusiæ Palæstritæ egregij Martyrij coronam adepti sunt.

1. V. P. Humfridus Middelmore, Vicarius, & antea procurator eiusdem domus.



2. v. p. Guilhelmus Meuvve Procurator, & olim Vicarius, eximia vir sanctitatis, & apprimè doctus.

3. v. p. Sebastianus Nendegate, genere nobilis, dignitate sacerdos, &c. De quibus Chancæus cap. 13.

1536. v. p. Petrus Blomouenna Leydenfis, annis 30. in Carthusia Colonienfi prior, vir innocens, pius, contemplatiuus, Illuminatus & sanctus, obiit anno 1536. 30. Sept. Cuius vitam conscripsit P. Theodericus Loherius, ipsius discipulus præclarus.

1537. Hoc anno, xi. Maij, ex Carthusia Londinenfi sacerdotes duo Martyrij aureolam consecuti sunt:

1. v. p. Ioannes Rochestez.

2. v. p. Iacobus Vvaunert.

} Vide Chancæum  
cap. 15.

1537. Eodem anno, 29. Maij, in Anglia 9. Carthusiani incarcerati, atque ex ergastuli fœtore extincti, Martyrum gloriamperceperunt. Quorum nomina sunt ista.

1. D. Richardus Beerez,

2. Thomas Iohunson,

3. D. Ioannes Greenetz.

4. D. Ioannes Dānij,

5. F. Vilhelmus Grenevode,

6. F. Thomas Schynen,

7. F. Robertus Salte,

8. F. Valterus person,

9. F. Thomas Redyng.

} Sacerdotes Dei.

} Conuersi Laici.

De hisce prolixius Chancæus narrat cap. 14.

1539. v. p. Ioannes Iustus, natione bauarus, ex Lanspergo oppido oriundus, Vicarius Carthusiæ Colonienfis, & olim prior Cantuiensis, obiit anno 1539. xi. Aug. cuius animam SS. Angeli cum gaudio ad cælestem patriam perduxerunt. Vir verè sanctus multorū ex testimonio. Vitam ipsius conscripsit P. Bruno Loherius discipulus eiusdem, & Vicarius Colon. De hoc autem piissimo patre alibi fusius tractabo.

1541. F. Vilhelmus Hornæ, Conuersus Carthusiæ Londinenfis anno 1541. 4. Nouemb. Martyrio in Anglia affectus est. De quo Chancæus cap. 14.

1572. Hoc anno Ruremundensi in Carthusia occisi sunt XII. Carthusiani quorum certamen discripsit B. Arnoldus Hauensius S. Th. Doctor, & Prior Gandensis Carthusiæ, subierunt autem mortem 23. Iulij, quorum ista sunt nomina;

1. P. Matthias Colonienfis, senex.

2. P. Cosmus Traiectensis, senex.

3. D. Vin-



- |  |              |
|--|--------------|
| 3. D. Vincentius ab Herck, Sacrista.   | } Sacerdotes |
| 4. D. Ioannes Leodiensis, sacerdos.    |              |
| 5. D. Seuerus Confluentinus, hospes.   |              |
| 6. D. Guilhelmus V Vellen, procurator, |              |
| 7. D. Iohannes Levvis, sacerdos,       |              |
| 7. D. Henricus V Vellen, Diaconus.     | } Laici.     |
| 9. D. Ioannes Gressenich, Diaconus.    |              |
| 10. F. Stephanus Ianitor, conuersus.   |              |
| 11. F. Albertus Coquus, apoplecticus,  |              |
| 12. F. Iohannes Sittard, Pistor.       |              |

## CONCLUSIO.

**P**aucos hosce raptim ac festinanter collegi, vt darem alijs occasionem plures inuestigandi. Neque omnes posui, quos scio: sed illos tantummodo, qui apud publicos & probatos Scriptores de sanctimonia vitæ celebrantur. Anonymos præterea & quorum tempus (quo scilicet floruerunt) ignorabam, volens præteriui. Alioquin ex Dorlando ponendi fuissent.

*F. Guilhelmus, Conuersus Carthusiæ Genuensis: cuius natalis ponitur in aucto Martyrologio Vsuardi, & Canisij. 19. Decemb. Vide Dorl. l. 5. c. 2.*

*Item D. Stephanus Flander, Monachus in Anglia apud ciuitatē Henton, singularis amator B. M. Magdalene. Vide Dorl. l. 5. c. 4.*

*Item D. Albertus Arnheimiensis, Prior domus Monachorū in Geldria, qui caelesti concentu recreatus ex hoc seculo migravit ad gaudia æterna. & c. l. 5. c. 13.*

Petrus etiam Blesensis exponens caput 2. Iob laudat quendam *F. Gerardum Conuersum Carthusiæ maioris*, virum in SS. scripturis admodū illuminatum. Sed viuum laudat, non defunctum. Omnis autem homo mutabilis, quamdiu est in stadio huius vitæ, alioquin Blesensis floruit anno 1160.

Scio præterea alios, tam ex Carthusia Colonienſi quam ex alijs domibus: qui meritō in hunc Catalogum deferendi fuissent: at ego innitor censura publicorum scriptorum: reliquos in suum locum ac tempus reseruans, de quibus pleniorē opto expectoquē informationem.



Sed quid opus est pluribus verbis, si benè considerentur ea, quæ Dorlandus scribit lib. 5. cap. 26. & 27. Item Sutor pag. 523. 524. & 525. facile apparebit, Carthusianos sanctis Viris non esse destitutos, Quid? nonne verus Carthusianus est quoddam simulachrum sanctitatis & miraculum mundi? Nos ad SS. PP. nostros in Christo defunctos, & iam in æternum felices suspiremus eisdem verbis, quibus olim S. Augustinus in Meditationibus suis cap. 24.

**F**elices sancti Dei omnes, qui iā transistis huius mortalitatis pelagus, & peruenire meruistis ad portū perpetua quietis, securitatis & pacis, securi & trāquilli semper & festini atq; gaudētes estis. Obsecro vos per vestrā charitatē qui securi estis de vobis, solliciti estote de nobis; securi estis de vestra immarcesibili gloria, solliciti estote de nostra multiplici miseria Per ipsum vos rogo, qui vos eligit, qui vos tales fecit, de cuius pulchritudine iā satiamini, de cuius immortalitate iā immortales facti estis de cuius Beatissima visione semper gaudetis: estote ingiter memores nostri subuenite nobis miseris, qui adhuc in salo huius vitæ circumstantibus agitur procellis. Vos portæ pulcherrima, quæ in magnā surrexistis altitudinē adiunatē nos vile pavimentū lōge inferius iacētes Date manum, & erigite iacentes super pedes ut conualescentes de infirmitate fortes efficiamur in Bello. Intercedite & orate constanter pro nobis miseris multumq; negligentibus peccatoribus; ut per vestras orationes vestro sancto consortio coniungamur: quia aliter salui esse nō possumus. &c.

Et S. Ephrem. Syrus in sermone quodam de SS. Patribus, qui in sancta pace requiuerant.

Beati estis Vos, qui Christi amore ac desiderio benè prudenterque magna cum vestra patientia scapham vestram in terra tuto in mandatis Christi Optimi Domini direxistis: quapropter ad tranquillum ianportum peruenistis & Christum recepistis, quem tanto perē desiderastis atque amastis Nunc vero gratulamur vobis, ô Beati: quoniam laqueos inimici effugistis, & ad Christum qui vos coronauit peruenistis, factique hæredes æterni regni ipsius modo estis. Cui gloria in sempiterna secula. Amen.

F I N I S.



